

竹溪鬳斋十
一稿续集

林希逸

文硕阁

wenshuoge.com

目录

关于我们	3
提要	5
原序	6
卷一	7
卷二	18
卷三	29
卷四	40
卷五	51
卷六	62
卷七	68
卷八	75
卷九	82
卷十	89
卷十一	96
卷十二	100
卷十三	105
卷十四	113
卷十五	121
卷十六	130
卷十七	137
卷十八	146
卷十九	156
卷二十	168
卷二十一	171
卷二十二	178
卷二十三	185
卷二十四	191
卷二十五	196
卷二十六	207
卷二十七	218
卷二十八	234
卷二十九	242
卷三十	248

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望可以帮助有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

钦定四库全书 集部四

竹溪鬳斋十一藁续集 别集类三 【宋】

提要

【臣】等谨案竹溪鬳斋十一藁续集三十卷宋林希逸撰希逸有考工记解别着录宋史艺文志载希逸有鬳斋前集六十卷久佚不存惟续集谓之竹溪十一稿者尚有传本即此三十卷也凡诗五卷襍着一卷少作三卷记二卷序一卷跋一卷四六三卷省题诗二卷挽诗一卷祭文一卷墓志二卷行状二卷学记四卷其门人福清林式之所编共十三类而谓之十一稿不详其故或十中存一之意欤刘克庄尝谓乾淳间林光朝始好深沈之思为文极锻链一传为林亦之再传为陈藻三传为希逸比其师槁乾中见华滋萧散中见严密窘狭中见纤徐所以推许之者甚至今观其集多应酬颂美之作且以道学名一世而上贾似道后乃极口称誉至以赵普文彦博比之殆与杨时之从蔡京同一白璧之瑕集末载学记其中解太玄经者居其半诗亦多宗门语为王士禛居易录所讥然南宋遗集流传日少其诗文虽不尽如刘克庄所称而尚不失前人轨度其学记中所论学问文艺之事亦时有可取录而存之用备一家之言固无不可耳前有咸淳庚午林同序称戊辰九月上擢鬳斋长仙蓬侍缉熙明年春再入禁林长词翰趋行之诏联翩而下行有日至是而续集之入梓者为卷三十云云则是集成於希逸内召时也乾隆四十四年九月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

原序

竹溪麴斋十一藁续集原序

麴斋林先生之白玉堂翠帷求奉太夫人出临莆郡也实淳佑戊申後村先师时方辞宗正少卿之召先皇以魏国年高就畀宪节即家建台一时麾节照映之盛真有壶山之所未有宾僚乎其间者盖莫不人自磨濯奋励求以所讲习所蕴蓄所设施而於学问於文章於政事有可以表表自见者爨下之音囊中之颖又夫孰无是心哉既而台与郡各以郡之法曹掾为举首掾则同之再从兄子敬也莆於七闽为军垒子敬於郡幕为底僚一旦撻出腾上受国土之知於二先生是所谓空羣於冀北拔尤於河阳者其荣且耀固万万而始是臬台祔表已具中以亲嫌为疑虽重之魏国之命有不能自决惟一闻守候合荐之说乃定此造就之仁终始之谊子敬於麴斋不无重惓惓焉後村第一集六十卷之行也亦子敬効程督其间前五卷则麴斋在郡时以却例卷资其费及易镇延平通守王公实绪成之今後十卷卷末有子敬监雕名衔在焉可考也故子敬於欲以自表其惓惓焉者则亦惟於麴斋之若诗与文思所以淑後学诏来世如麴斋之於後村焉且可与後村诸集相为不朽於穹壤之间是固子敬之心也而素食贫多家居愿有莫之遂志亦莫之渝其於前集後集之行亦惟知於顔杨二君致其欢喜赞叹焉尔归自括家食又且十年及通守三阳咸淳戊辰秋抵官下将一考以书为同言吾此来得馆郡绌薄有俸入节缩裘纫铢积寸累或有可以足吾生平未足之志者愿以麴斋集为先子其为我请续集於先生而行之且毋以惮烦辞同敬诺於是麴斋方卷退处之怀袖观之手其年秋九月上擢麴斋长仙蓬侍缉熙明年春再入禁林掌词翰盖是癸亥东归一闲七朞矣旧词臣真学士有不惟一堂之上明良胥会於所都俞者则然下而九州四海人士亦孰不曰是当行铺席也是我家旧物也顾非斯文之一泰吾道之一春乎麴斋屡辞不获命趋行之诏聯翩而下行有日至是而续集之入梓者为卷三十矣昔人怀一饭之感捐千金之报以情不以物以谊不为利也况举之入云嘘之上天乎寂寂谁从翟廷尉滔滔去事霍将军此後村所以为世道感也此同为子敬别麴斋续集三十卷为一集之意也麴斋前集亦六十卷续集宜视前继自今赧殿阁之吟陪穆厦之咨云雾裁剪日月献纳必且至於手抄而腕脱者当揭为文续集以遂子敬兄之志云是年为庚午春为正月元夕前一日石塘林同谨书

卷一

钦定四库全书

竹溪鬳斋十一藁续集卷一

宋 林希逸 撰

古律诗

和後村忆昔二首

应世只愁一着差少曾苦学鬓今华爱牛因见无伤也喻马还非俱是耶工苦从人夸腹藁发明自我看心花蝇头蜗角人间事回首惊看似乱麻

白云深处卧元英莫问卿君与我卿说向老禅成寐语误他壮士爲虚名镂脂须信文徒巧隔膜只愁性未明空忍饥穷吟乐府也疑太祝似心盲

和後村口占一首

老去田翁多狎友年来观主换新衔缘溪竹杖时行散面壁蒲团渐放参休梦笔花寻砚滴但看贝叶守灯龕清朝越绋将修礼留滞何妨似史谈

和後村唐衣二首

非晋非唐落魄?人生行乐不知他可曾痴说飞霞佩那肯吟思叠雪罗带眼减多癯已甚布毛吹尽意如何溪邻更有笭箬伴时整蓑衣共缉莎

初服能寻恨已迟便如野鹿脱拘维闲因解带迎风处冻忆穿靴立雪时老守渔蓑随分乐古多蝉冕叹机危不知穷苦哦诗相破帽从前略似谁

和後村记顔一首

精神归阿堵一点定如何问景论蛇跗吹毛笑鸟窠鬓知谁甚似音比旧尤讹但拥维摩几时时閱贝多

和後村漫兴一首

儒冠能误甫休忆早充宾既得林间趣甘爲局外人法书喜皇象古画爱公麟屡典衣偿直因

痴不恨贫

行田间见新秧作【丙寅三月初九日】

新秧成段见连连风弄轻柔雨後鲜细出水如青缕线平铺田似绿毛毡国贫民困忧无日身
远心存冀有年试问维鱼谁入梦牧童三五涧头眠

锦溪谒坟作

鞠育恩深愧老身少营甘旨苦长贫如今有酒空浇酹对此伤心十一春

松下殷勤奠献回山房四望小徘徊常年不似今年晚待得花时过尽来

资福岭庵前作【岭内有神祠旧时课社十日一集其间】

岭路松阴好归鞭为小停苔封石面紫藤络树身青庵古无人住蝉多过客听少时文会处近
里有祠堂

和莆田陈宰筱塘庵韵【贤有十不去】

竹根墙下一灯龕旧事伤心未易谈十颂尚留禅髓在诸方应作话头参高情写入阳春调远
望吟思落日酣魔种纷纷堪可笑得君点破料知慙

崇安忌日【丙寅四月】

生死涂分久追怀漫自伤怜渠眉旧白叹我髮今黄聚散萍来去悲欢梦短长纵能排遣尽此
日亦难忘踰月苦旱忽得邑宰喜雨诗用韵二首【丙寅四月十二日】

连日非无数点飞滨溪底见响春机甘霖君已吟成卷炎赫吾方汗湿衣雷邑未能均泽施龙
君可要逐方祈笺天更仗伊谁力外史臣慙似螳微

布谷催耕叹雨乾诸贤欢咏我辛酸瓢分不到田犹涸琴化虽均天作难底要岁遗三九食但
爲民几一分寬未县龙骨鱼无梦那得新租上送官

和萧教韵

声华六馆压羣雄独坐臯比信国工弟子三千徒共喜法筵第一义尤公我开荐口慙如愈守
自知名盍敬融料得芹香留不住会须班入大明宫

四月二十日得雨方足闻城间一祷即应沾渥久矣此余波所及也再用前韵一首寄呈恕斋

晴云卷尽雨云飞多谢元工已转机恳切敷陈緑封事殷勤持送紫霞衣十连如佛仁均施一念於民福可祈秧马既闲青徧野摇摇争弄晚风微

和一隐堂【义江陈吏部】

少陵那肯缚微官谩结陶庐杂市闌五客昂藏图素壁一翁偃蹇对青山我因月忆人千里公比云居僧半间老去得闲应浪喜何如未老已先闲【堂中画鹤鸥五禽】

贺後村得第七孙

恰喜长房儿纳妇兰堦又报送麒麟一夔四海名千载三凤诸孙见七人新綴锦綳饶献笑賸留宝砚要分珍太翁从此应投镊却许貂金映鬓银

既旱得雨连日不小住

旱余得雨又伤多尘世因饥百种魔便使有方能辟谷我虽独乐奈人何

喜雨还忧雨过多人生可煞是多魔事难恰好天谁问天本无心可奈何

再和後村得孙韵

含饴方乐燕嘉宾画果犀钱胜擘麟老凤遥看雏凤好犹龙行见共龙人孙夸奇骨饶如玉翁喜龐眉从以珍产有万金谁敌此他山何羨器车银

送用和刘推官入京班改

幕画如兄有异才岭南声价动诸台登龙尾道呼班去爲鰐鱼州守印来定有赏音相料理何妨进卷小徘徊遥知得意行吟处傍柳堤看菡萏开

山丹已盛

夏半葵榴亦顿空临池还未见芙蓉花神也念翁岑寂数本山丹着意红

小盆新种水芝方有生意

买石殷勤种水芝主人欲速讶渠迟朝来喜见芽如粟点点青青上下枝

行楮

救楮爲谋意甚忠人间岂不愿流通未论子母权轻重无奈官民价异同【州县入纳只用时价纽中半之数】产计高低藏自可用难节缩出何穷秤提须信无奇策贱则因多少则穹

和吴帅古灵祠堂韵

学问功深笔砚灵南来题咏徧吾闽诗书礼乐宗元帅俎豆衣冠友昔人顔色如存满梁月襟怀长想浴沂春新成翬革添吟句传入图经字字珍

用珍字韵谢吴帅分惠乃弟山泉所寄庐山新茗一首

五老峰前草自灵若为封裹入南闽锦囊有句知难弟玉帐多情寄野人云脚似浮庐瀑雪水痕堪鬪建溪春龙团拜赐前身梦得此烹尝胜食珍

题郭进士所进万世宝鼎鉴

学苦功深老更癯储闱一念许渠渠抡才合作金闺彦忠国无踰宝鼎书未见龙图携处士但闻狗监荐相如明时主相求贤急指日香名入诏除

谢刘正奏惠文戲效昌黎体仍用送贾浪仙韵一首

可人忽及门莹骨清照胆衔袖子何谦拜手吾岂敢于嗟泥尚蟠有兴月可揽何居欲困衡乃尔蹈坎 万言蛹吐丝一第髭摘颌攀天桂非高佳境蔗方噉但思俗茫茫颇怪云黯黯顾我方厄穷相看合凄惨藿食恣酣饕大羹鄙漓澹甘守竹箒簪畴忆盖菡萏孤熊羝狴犴芳卉杂葭莩躡藉衆靡怜访求情易感玉肆混琳琅珍筵侣菹歎岂伊厌葱珩雅欲共藜糝见睨失漣漣闻雷嗟坎坎俚笈价编琼璆藁愤削桀新知乍激昂老我长顙颌惟应旌翘翘曾是御憺憺期君骐驎骧眇彼蜉蝣撼层青富修程坟索且玄览

和後村二首

琼筵追补庆樗庵寿宿荧荧耀斗南诗胜卢仝酬马异客无李四与张三【深村酒小溪鱼李四张三来便留】顔红鬓白国元老眼赤腰黄世美谈索和多慙供狗尾公如大楚仆毛聃

其二

但喜僧歌不坏庵可曾佞佛学和南溪深却有鹑千百城远何妨家两三诗未能工多頼句书无高论摠常谈身穷久欲逃名姓任把秦儋作史聃

耳鸣戏作

底事虚聪里长闻风雨声史尝云蚁鬪医却比蝉鸣老纵聋何惜愁因聒易生道书疑太诞如磬是丹成【丹书云第三转则耳中常有笙磬凤凰之声】

六月二十四日雨後苦热作

今年一旱热良苦既雨才晴热如故桔槔慙闲稍解忧赤日当空蒸湿土晚田切切更望霖早禾已失十四五溪泉渐涸衆撮眉老我垂头汗如雨有身有患信可怜亦既忧农还畏暑

乐轩远日之祀岩尹方兄赋以七言用韵一首

事师如父理云然到底难忘讲席前身在必忧惟忌日义存虽死似生年亲祠执奠疑容见浅学孤恩枕膝传长愧後生香一瓣玉楼十二抵三千

得大慧顶相有亲笔赞【赞中有呼聚又喝散之语】

见师画像如师活聚散如何呼又喝似与不似吾不知却是梦中青直裰

四睡戏题

多少醒人作寐语异形同趣谁知汝四头十足相枕眠寒山拾得丰干虎【其像三人交头枕虎而睡】

咏松石【松化爲石】

生生化化果何如物类虽殊气不殊疎密尚留松脉理嵒巖却是石肌肤今身肯羨陈三品往事堪羞秦大夫斲药仙翁何处问云根还似树根无

和柯山玉上人三首

身如孤鹤万缘空吟得交情底许浓我老学禅无长进相逢却讲少陵宗

闻说高人意已消非坡谁解识参寥何年共赋浮花雪一棹清溪两岸苕【坡诗溪上苕花似浮雪】

赞尽俱佳见似亲殷勤远寄证前因虽然说我梦中梦却要知渠身外身【知某曾梦大慧似慧自赞顶相见寄】

贺後村生日庆八十

星履班头跨锦鞢乞身玉座赋归田当行两制文章老来处三壶功行仙生比莱公过半月占求尚父恰今年先皇法从新皇忆须落前衔拜榻前【七月二十九日生寇公七月十四日生】

宸奎辉映画堂深瑞旦华筵酒满斟三凤七雏樽捧玉双鱼九銙带横金未须人诧耆英会更看公求耄老箴却此赵州行脚後百三十岁主禅林

戏效刘苕溪十二辰歌

华门鼠忧多唧唧我贫不厌瓜牛窄痴人虎视欲眈眈我宁老守兔园册莫愁龙具苦酸寒等爲蛇跗祗瞬息试问蓝闥马不前何似金华羊可叱娇羞已笑沐猴冠卑栖那更争鷄食掉头一任犬狺狺掩耳莫听猪嘍嘍晚日既入红云满空以东西言之此间去日入处几千万里日既到海而其光上射於天如在头上非天高地小四面海濶安得如是因以纪之

几译天西到海东日沈犹射半空红吟思益信人间小海濶天高地水中

天高地小水茫茫取喻只如鸡子黄西日既沈光倒射天中还是水中光

袁命士

言多奇中邑人夸得妙无过六十花术学要须来处好驰声贞观是渠家

题赵工部柞山堂【以半山五愿木爲柞自名其堂求余书扁】

太白前身锦绣肠字书搜尽入篇章作归田赋辞兰省取半山诗扁草堂自拟百围庄散木不夸五柞汉长杨却愁金殿催班去风舞槐龙影正凉

和鞢字谢後村和篇

狨鞍更合破花鞢【亲王而下鞍上綉花随品支破】挥手归寻种玉田琢句工如贾岛佛引杯豪似翰林仙作蝇头字无虚日辞豹尾班不待年活底寿星公即是轻安尤胜者希前九裘筵开喜更深金杯从客十分斟新词岁岁歌县矢回啓人人得碎金短韵岂堪勾白句初心却似欠韩箴如公搃是书融化椰腹多於汉学林

再和前韵谢後村惠生日词

野客相过坐马鞢论谈大半是农田生慙弧矢爲男子老脱簪裳似散仙锦卷新词歌永日茅

檐小酌胜常年痴因好佛蒙嗤诮更敢夸张灵运前

老去劬劳念转深一樽聊尔可曾斟中年爲拙辞宫锦晚岁虽贫笑汞金破被与儿眠似铁败
毡留客坐如箴【箴与针同】多情曲意加题品错比唐溪与晋林

三和鞞字二首寄後村

谁道林花不是鞞山如奔马下平田哦诗不记身投老对酒犹狂兴欲仙勾漏丹砂寻旧令云
安麴米问长年如翁一事尤痴絶醉却逃禅綉佛前

胜败如碁閱世深夏商犹尔况戈斟痴人倚柱思全璧达士挥鋤不顾金穎自忉?宜愈传酒何
殃咎要皮箴过从怕听闲言说闻早移家避入林

偶题

溪南溪北鸟相呼听雨看云足自娱不羨笔书黄纸尾但吟诗捻白髭须身谋只合交猿鹤眼
见浑如掷雉卢堪笑少陵高自比到头老大始知愚

再和柞山肠字一首

县知书卷饱撑肠一倡殷勤十和章茅卷三重怜杜屋株高八九羨韩堂利名谁信为纆鎖圣
知人犹比桁杨万事不如祇浩饮葡萄切莫换西凉

溪居古榕甚佳未尝有所赋得柞山诗卷借奇字韵戏成一首

古树婆娑谁手种有藤纏络似髭垂但看窗草求溪意自觉庭楸欠愈诗才拙岂能酬郢曲心
降但合靡齐旗吟渠却羨公家柞短韵长篇句句奇

春谷惠示榕桥精舍二十四诗借首篇韵赋一首

春谷因榕费苦吟爲怜夹道緑陰陰身藏岩涧风霜老名入图经岁月深北客未知题咏少南
州莫向字书寻莺啼庭叶曾留句独有河东柳赏音

题僧雪岑诗

本自无须学捻须此於止观事何如诗家格怕无僧字圣处吟须读佛书得趣藕花山下去逃
名枯木衆中居早梅咏得师谁是见郑都官却问渠

题范月溪欸乃集

欸乃溪干入听时忽传新集到柴扉自惭我老眠云惯遥羨君吟弄月归正始余音何寂寞四
灵苦思尽光辉当行家数今谁是消得渠侬论锦机

送徐谔议總管

美矣军谔议元戎喜借留吟多磨盾鼻心久折刀头梅日相求去花时寄别愁天风题石处从
此梦同游括要翁精训君於翁又贤吟工如射巧藁富已刊传资格宜分竹功名早着鞭从军
诗更好因鴈寄溪边郡圃小山大资可斋先生所作也石久散而池亦荒恕斋来公补处叠之
浚之访求旧记重刊之仍续留题之句以寄可翁翁又和之以某同出可斋之门不鄙赐示借
韵爲谢

湖嵌散尽重堆叠池碧堙多旋斲开旧记幸存新入石胜游端待可人来

旧留岸柳千株老新种池荷一度开此是可翁题咏处元戎领客喜同来

石好岁深欧记在雨多云为段游开同门一士头如雪许待龙图老子来【时方苦雨恕斋一
祷即晴咸淳丙寅九月】

吴帅用前韵以别再赋以谢

碧油幢下诗书帅吏案如山强拨开领客雍容游郡圃柳间松下步行来

主人爱客情何厚尽日移樽逐处开古栢寒梅俱问讯追思犹说海棠来

清晨玉帐方违拜一叶江干舫未开多愧元戎怀旧雨殷勤惜别袖诗来

村居僻甚城闉远避俗柴门久不开忽漫出山归自喜龐翁还谒恕翁来

题天风海涛

亭後千寻劣崩峰亭前万里见晴空山藏落照生新月海涨轻涛带晚风世事浮云变今古客
游鑱石徧西东近檐溜雨霜皮栢却是渠曾识晦翁

题梁秘阁玉堂何似亭

放眼久知亭外景连朝苦恨雨昏昏红飘落桂浑如雪青失平林总是云与世相忘真有道休
官曾不待移文玉堂天上空回首白髮追寻我愧君

喜新晴和前韵【梁丈三径堂中作】

清晓秋声枕上闻倚栏顿觉失眵昏潮分新水添池水山放晴云换雨云翠洗方壶如着色稻
摇平野自成文荷枯菊少梅全未风叶萧萧对竹君

题张尚书画册四首

松间睡道士

高枕松间石如依未易知世情祇益睡不是学希夷

犬

辞家何处附书归纵猎何年投綬去斯入咸阳机洛阳料知黄耳嗤渠误

牡丹

生意草亦佳可但莲菊好富贵本何心莫以色见我

雀

勘破鹏鸪事人间百念消茂先老自误不记赋鷦鷯

菊庵相道人求赠

抛汝庵中菊寻他楸上麟休将穷达事来语菊边人

送建宁倅林太博用後村韵二首

清班早见扬休立自诡俄爲九仞翔教雨久沾儒馆下屏星还照建溪傍助行好事趋铃合课
了康功向玉堂禹锡文章终得力吾侪恻细要更尝

家年爱友相期久注目云霄看凤翔半刺暂烦书纸尾一翁分守繫篱傍多携客上丹青阁易
事贤居夷白堂更喜宦游逢乐地户无贵籴稻新尝

寄题赵武子鹤泉

可人何事着斯名知傍清泉筑小亭遥想倚风看鹤鹤更须和月掬泠泠君於醉後流应漱渠
若来时舞不停莫漫濯纓歌此水会当冲翼上青冥

别林伯常国博

解印南来久卸鞍未甘遮日向长安洪都别驾何廉取斋殿除书果趣还再入美传喧辇下多情远别到溪干才名藉甚如君少此去应须立要班

岁晚交亲久寂寥明时賸喜入旌招玉融名邑虽多士橐从无人已四朝我分长闲守龙具君宜闻健侍鸡翘从今出处分岐路对月相思梦愈遥

偶题

清晓焚香罢书窗只自娱时爲五禽戏闲看六牛图遯世元无闷衰年不厌癯围碁三稚子夜笑翁输题国清林氏海山精舍【取乐天海山不是吾归处为名】

白醉吟翁颇似痴当仁一见却无疑但寻来处知归处莫把迷时待悟时风过更看云不尽潮生长与月相随海山此趣谁能会也是禅关也是诗

丙寅再至水南吴景朔家

旧游人物转头空此地重来恨不穷闻笛久怀中散氏对床仅有小苏公门前旋辟园池好壁上芳题子侄同尤喜芝兰书种茂迎门欢笑挹溪翁【景朔男子谦侄定子皆请举诸孙亦好学】

和後村问讯水南失约二首

忆昔从容陪燕几别来岑寂守渔蓑论谈苦羨江河决离索深慙岁月磨覲面难逢善知识钝根空比老禅和当时言语何曾会路滑山高敢再过

学荒久欠亲谈麈居僻谁同理钓蓑砂欲作糜那解饱塲难成镜只空磨出乘雪兴思安道归逐风吟笑志和赖有先生前约在扫门直候愈轩过

题刘某诗集

邻居前此未相闻到手新编喜得君一事更令人动念曾吟诗谒网山坟【集中有谒网山坟两絶句】

夜坐偶成

涉世才深误转深鬓毛赢得雪霜侵人多痴到未来劫禅要空无见在心昼暖枕书高鼾睡夜长樽酒纵狂吟花开花落春何意潮去潮来古即今

书窗即事

此心无着自超然
麤粝随宜醉即眠
喜读佛书非佞佛
赋游仙曲岂求仙
涪翁语忌随人後
康节图看到画前
老尽蓬窗聊尔耳
何曾敢道慕诸贤

竹溪鬳斋十一藁续集卷一

卷二

钦定四库全书

竹溪鬳斋十一藁续集卷二

宋 林希逸 撰

古律诗

晚晴

云收风止晚晴初池减波痕见緑蒲鹭入田行如数步鷗随林去似相呼赋形宇宙真如寄息意林泉不是迂疎柳欲黄枫渐赤来今去古几荣枯

题吴司户忠斋【名汉英谷城人乙丑科留忠斋知举】

事业心期在汉廷师生莫讶共斋名当年取履封留者入梦祇因住谷城

题吴司户思忠堂

我既题斋扁堂名却又同进思臣职分意慕世宗工欲问传心法无如尽已功游扬朱吕後先且学忠公

三和除字韵

终岁吾伊祇自苦多生习气未全除却嫌俗态骚骚尔宁作闲民皞皞如肯羨孔光灵寿杖且烧韩愈送穷车一编受用床头易却似忘筌已得鱼

诗赠友人程乡次子和甫兄

苦恋庭闱戏彩衣其言虽讷未全非旁人竞喜广长舌之子还如杜德机他日必多麟抱送妙年肯叹雉孤飞但能寡过何妨拙却恨乡闾识者稀

雨中怀後村石塘之约爽矣

好读书多昼苦短细行历到岁其除无端竹雨萧萧下可奈松风谡谡如更仆诗来几满篋过门约在待安车大寒不出空回首何日同观濠上鱼

四和除字

白髮余生甘寂寞丹书微累幸蠲除天留老眼凉人只云本无心於我如千岁不知暮几局二乘且论宝三车香山见彻人间事断道爲龙苦似鱼

客至五和除字

衡茅有客同欢笑径草呼童旋剗除刍酒熟迟聊酤我藜羹生怕有卷如夜长不必论升斗岁晚能忘誓笠车邻舍多情还解事频分野菜馈生鱼

和披字寄後村

不羨新雕绣穀驰不嫌自织草衣披谈禅客至眼俱碧联句人来髻似椎愁絶只凭杯遣兴意行全藉杖扶衰旧游历历天南北梦不能忘随所之

送陈莆田【僩】

【归时得後村力】

邑以滩名处处同此滩加似打头风吟多正恐招穷鬼怨作无端谤杀公怒欲怀砖嗟薄俗义为全璧赖宗工冲寒溪上携琴去羞涩囊如子美空

和春谷用弓字见寄

奴去看鱼笥儿寻射鸭弓养痾三径里取友一溪中日苦经檐短天如罩野穹过从人絶少访问愧春翁星晓有残月明明挂一弓四天垂野外万象蓄山中水动知冰薄林疎见谷穹傍人应比我观物邵家翁齐物书非放师传自子弓人多谈稷下我独守环中道贵身无贱名高位莫穹元和虽五相千载一渔翁

三和磨字韵

休忆朝携香满袖从教人画雪披蓑诗狂黄鹤楼堪碎颂美浯溪石欲磨安得谷论肥定武却嗤甫贵瘦光 and 老痴只弄穷生活散帙多闻暮鸟过

再和除字韵

洛下玄功须究意人间杂念早消除才情向老无多许梦觉何时解一如失马塞翁云得马数车柱史论无车浮生宠辱浑闲事胜负真如射?鱼【?音塌骰采之名】

第三孙弥月小饮

茅檐喜得第三孙
草草团栾笑语温
晚菊客贻黄似盖
新萸儿喜绿盈樽
生涯素薄书差富
旧物能留砚仅存
儒级传来方四叶
九龙入梦始曾门

四和除字韵寄元思别驾

多生已被禅勾引
万事祇凭酒破除
节物变衰黄落矣
儒功寡要白纷如
怀贤疑似渴司马
避俗佯爲瞶仲车
好友年来吟骤进
相逢何日语姬鱼

雨山徐總管袖诗见访以道间见梅而作少留一夕次韵爲别

何曾问柳与寻花
访友轻车到海涯
少爲梅吟看倒挂
【坡词倒挂绿毛么凤】
会须木餠出
褰斜霜寒尽夜同煨芋
月过残星似撒沙
村落常时无此客
多陪僧话送年华

二

天放寒梅三两花
殷勤粧点淡生涯
巡檐索笑忘霜冷
倚树长吟待月斜
君去定趋丹凤阙
我闲但占白鸥沙
孤山好处空回首
典祀何时到玉华
【玉华宫名见杜诗孤山今为西太乙祠】

三

岸帻冲寒嗅雪花
兴随云远到天涯
月知玉斧修成近
星伴银潢左界斜
佳客过从聊把酒
浮生聚散似团沙
新吟何日重商榷
苦学无功鬓已华

七和披字韵

意马难调繫更驰
【繫马而驰】
空沙莫爲拣金披
忘机每笑碁争局
爱礼时看斋白椎
正月书因王不竞
变风作爲教先衰
圣朝可托狂歌乐
况有羊何共和之

泳得男再蒙後村先生和除字见寄戏和一首

贫惯人人嗤不管
老慙幼幼念难除
有孙何必位爲喜
【萧愿】
戏父谁云翁不如
【张凭】
夫子忘年容撰屨
长文何日抱随车
殷勤好伴腰鎌叟
莫学娇痴女觅鱼

题朔斋铁壁堂

耐久声名参古柏
絶清词翰赋薇花
几闻人似南都老
再有公生朔党家
题扁不慚名铁壁
持

荷更合侍金华元城志业须翁了推美还看入制麻【堂以纶言名】

丁卯元日作

泰時钦柴已庆成金鷄赦下是兹辰百官班立楼前拜万岁嵩呼竿上人正喜含饴看稚子还叨祭泽及微臣老逢嗣圣徵前梦三十年前岁在寅【庚寅梦应今上御名】

二日野望作

麦壠高低一樣青淡云笼昼雨丝轻梅花烂漫开将尽松叶稀疎落又生遥企钧天知梦断欣闻玉陛庆熙成人人尽说新年好除夕无风岁旦晴

丁卯立春作

岁阳更始财三日輶路归来第四春野菜旋挑丝未细村醪浅酌酿差醇团栾弟侄何妨笑淡薄盃盘莫厌贫却忆先朝供帖子伤心白髮旧词臣

邻园惠晚菊数月有花高大甚奇

菊种虽殊多短短忽传一种自比邻围过十尺高七尺开到初春始小春团比盖擎身极瘦碎如金散色常新梅时得此真奇絶更有清香细袭人

放歌【读放翁诗作】

朗诵乌栖曲数终乾坤何事老英雄纵令经有千名佛敢道诗无两放翁九万里风来海外二三更月到天中便教挽得银河下今古闲愁洗不空

晨兴闻檐雀作

晨起喧喧暮自栖梦回每每当闻鸡有渠何用门前客廷尉当年见处低

石竺山紫云恭老【得樗庵尚书书往温陵见洪阳岩】

几载空拳把疏头新成楼阁石山幽未忘嘱付樗居士送紫云师紫?游

师知缘熟向温陵骑虎仙翁现化身袖有先容应得力阳岩佛地位中人【紫云仙旧骑虎】

雨後赠雁来红【闽中谓铁树】

雨後欣欣綠萬叢
伶渠叶叶但焦紅
旁人莫作榮枯看
时节因緣各不同

先母忌日【丁卯】

儿正痴時賴母賢
如今滿鏡白於綿
可堪遠日思存日
更向衰年憶幼年
嫠早獨携三稚子
世貧能有几硯田
書燈督課無虛夕
曾解衣還束脯錢

有感【丁卯二月】

世事年來百色難
沈思觸目是忧端
田家仰麥嗟傷雨
海市無鮮爲苦寒
楮欲秤提官自抑
苗多走弄吏尤奸
【時有秤提推排指揮】
身逢昭代還如此
獨喜三邊慮少寬

遣興

風流不羨三學士
衰退甘爲一腐儒
嗜古心痴迷黑鬼
【見歐公與劉原父簡中】
養生胎息學玄夫
興闌日下新吟少
靜勝年來雜夢無
醉後枕書時鼾睡
長孫喚醒小孫扶

戲效梅宛陵賦歐公白兔

毛蟲虽小着仙籍
云渠千歲皆化白
中山山中衣褐徒
生長何年換顏色
豈其孕育自卯宮
又是金公付精魄
渠宗學孔非學朱
拔毛不薪供書冊
老蒙將軍縱獵時
遁向何方爲窟宅
紛紛爾後更几秦
避世甘心飡苦柏
明時作意始出來
五岳徧游無定迹
多生曾識六一仙
知道琅邪有新刻
要尋此碑龜與螭
何事乃被滁人得
滁人知渠慕醉翁
翁已往在云霞中
期翁千歲亦如汝
殷勤遠致提金籠
傳夸瑞物徧都邑
倡和千篇模寫工
翁携入直金銓殿
渠應自比廣寒宮
寄聲樹下搗藥者
汝伴嫦娥我伴公

三和庵字韵

新吟度度到溪庵
風味鏗錡似雅南
筆健稱雄一當百
韵严苦和二生三
舍襄陽外無新語
除謫仙來可劇談
覲面猶龍誰復識
杏壇人在庶知聃

題平遠軒

伊昔營此窗眼前
頗有趣往來多勝流
必和壁間句人事一
淒涼牕亦不如故
旧詩无一存誰復
闖其戶新來改作之
好景欣再遇清溪漾
淺流長松列古路
高下見青山濃淡云
來去西齋平遠名移
以扁其處我閤納八
荒令人心領悟星垂
平野詩云征遠游賦
倚欄拍手歌百盞吸
琤露

新晴四和庵字韵【三月三日作】

衰懒如僧不出庵雨晴春又徧溪南周天日度一日一初夜月生三月三还丹只是安乐法虚白应难容易谈最喜无名公自传何须儒学记齐聃【唐儒学传徐齐聃】

偶题

浮沈上下一虚舟久喜身心得自由知我要须高着眼逢人多是懒擡头诗名遣兴元非兴酒道消愁有底愁学圣玄宗搃如许莫疑老子习单修

别黄尉【止堂左史之侄】

梅隐多留誉花残乍语违慈空县棒在廉得荐书归好是家声着贤如柱史稀清时衡尺定着意称传衣山长潘同舍南归袖诗爲惠奉和一首

南郡谈经得誉还久知言行有防坛合从金帖彊书後便入宫花院柳间雅抱清如漉明月俗情险甚渡扬澜殷懃话旧溪干去好友相期向道山

了不了语

龙去拔髯嗟帝远鹤归留语笑人非龐涓死怨悲题树豫让酬恩喜擊衣

胥驾鲸来潮上下羲鞭乌急日西东万世不竭箠取半一是无穷枢得中

和元思朋微韵二首

吟清字字使人冰惠我多於锡百朋照破尘心如镜镜【镜镜相照齐丘化书】续传诗派似灯灯【灯灯相续禅家语】句工可信堪呈佛格老谁嗤要惹僧【郑国诗坛恶惹僧】但把功名付篇什莫论青竹几人登【杜诗】

宫衣我已换禅衣读得狐书颇造微晚岁斗思蓬【阙】去早年浪夺锦标归多生自苦滔滔是一悟应知念念非【八十年来念念非放翁诗】投老但留诗癖在羨君珠玉入毫挥

苦雨

半春常值雨人叹久难禁桥断溪仍涨秧寒水更深老天因底漏无日不重陰兀坐凭谁诉愁多只自吟

刘躔甫七十【四月初四日】

早岁耽诗学乐轩如今霜鬓作吟仙回思同舍二三子几见生朝七十筵竺岭佛来争四日崆

峒人在更千年称觴岂必纏头锦醉舞何妨共釀钱

别吴帅恕斋

学问功深道得民但曾补处誉俱新来爲闽岭诗书帅归作甘泉侍从臣政剧不辞身自苦施多却似郡非贫前贤好事推行徧玉帙如今有几人

猎猎江滨万彩旗恋恩非止送公时贤如司马家求像教比文翁学有祠半月趣行三被旨残年惜别两攒眉东南民力闽尤困到日论思首及之

七聚人人苦恋行吾乡一事更关情郡贫已极民县罄岁计祇於寺取盈官要板曹寬未许闽无保障害非轻扶持有意公还去条约春初恰讲明【今春恕斋方爲诸邑不济权管区处】公来植纛我扶犁苦忆京尘判袂时墀下一回樵服谒溪干几度锦笺贻去思定有爱棠集恋别空吟折柳诗梅子正黄晴又雨风檣语燕梦追随

送徐仓用後村韵

君王玉节选非轻远部何如乡部荣得志可酬公学问用人如此世清明名犹高似南州士性本剛於东海生振廩岂应烦此老论思便合向西清

鯤横学海孰知修万卷胷中古索丘滂喜澄清真有志籍违礼法亦如雛发棠事亟聊行锦活国忠存待借筹圣要直臣流俗憚会须览镜说韩休

再用仙字韵答刘躔甫【刘生日釀饮】

柴车本不美华轩吟苦何妨浪号仙扶老底须九节杖欢呼还费一金筵正闻僧去坐长夏那得君来论大年会面苦难辰去速柳绵飞尽见荷钱

题建安曹兄深居小藁

得君诗一卷自命曰深居苦爱惊人句多慙寄我书絶知吟可老更问法何如叟已忘言久离鉤正待鱼

二

伊昔君居里宗师有大贤字尝疑吕哑诗怕爲扬颠堪恨梁颧久祇余棹曲传【九曲棹歌】要令吟律细但学紫阳仙

题陈兄始鸣集

集编名甚雅之子信吟徒不是綦闻籁应如惠?梧但令鸣中律何用句成图蝇蚓嗤时辈能联石鼎无

苦雨

一春苦淋漓既晴差自喜四郊遽如壑晴日共能几人言山雨骤每点大如指新秧过半空农泣向妻子今年种如金典质到衣被忍饥事犁锄岂料今乃尔一饱强营营天公难指拟先淫後必涸我虑非止此可奈漫空云如墨来未已长宵欹枕听揽衣四五起滴碎愁人心不滴愁人耳

太平莲者草花也本如藤蔓好事者结竹而植之其花大如当三钱四围先绽中有一萼如初出水莲最後方拆想以此得名一花可十许日邻人馈以一盆亦自可爱推其所以名者戏述一首

柔条细叶緑层层盘结何工岂易然绕竹似藤浑似草开花如菊却名莲知渠耐看令人喜入我新吟与世传性分本同无细大休夸太乙叶爲船

记事【四月廿八日】

清晓奴传事异常白浮碧瓦徧银床正愁炎夏多淫雨那更阳秋记陨霜我爲太和思保合谁知小雅赋忧伤中朝定有更生疏野老空添雪鬓长

送三文书院陈上舍入京

翁季能贤有月评频年相与愧深情三文书舍新求友六馆英流喜得兄秋赋屡曾飞称墨夜寒未肯舍韩檠殷勤拭目看双凤同向龙飞榜策名

三文主席刘兄翼运相别

百尺刘墙未易窥笔无尽思信瑰奇早闻大字书毡墨肯爲三文坐虎皮注脚根株谈未了状元名第久相期锦衣归後如相访却要重论茅苒诗

闲居

已喜尘缘断虽然未尽闲笔因求字秃烛爲检书怪可愧家牢落难辞客往还苦须穷壁观除却住云间

六月廿九早题

【夜来颇凉与月仲弟饮散再欲一酌以姜醢萝卜荐之】

时难禁酷暑晚喜动凉飈已饮阿连去仍招欢伯来数根煮芦服一酌热茅柴睡到窗明足摩挲醉眼开

谢石塘小孤山惠酒

好友怜余渴饮溪醲香每月入緘题分无内库黄封赐似有孤山赤帮支把盏慚非浆玛瑙倾瓶尤胜碧玻璃三升美醞何须恋绩也当年可煞痴

梯飈惠酒且有和篇用韵爲谢

襍被当年去省房村沽空忆御流香花城不靳分新酿应笑三升恋帝乡

入罌浑如琥珀红谁家酿法似渠工爲怜渔父鸣鞭送尽有醒人羨醉翁

赠僧宗仁回江西

少别溪干去于今识者稀腰包留一鉢顶相称三衣未得逢渔住还如化鹤归马驹江上有着意访禅机

题临清堂

一派清流绕屋长陰阴古木隔修墙枯梅照水横疎影新竹摇风送细香诸老旧游如洛社百年陈迹有溪堂扁题祖笔真奇絶竚立沈吟两鬓霜

题林桂芳洲集【丁卯五月十日陈左秋转求】

知子吟情美工於学选诗音惟追正始派不入旁支谢句人难梦锺评世有谁匆匆酬雅意勘辨待他时

和後村三絶句

求齐若拙瑟徒工已谢孙刘不作公拋却巢由思稷契许身却笑杜陵翁

谈玄要似蜜中边末学纷纷纸上传擊竹卷帘如未会要无疑去待驴年

衰翁分已絶尘缘自和新诗醉擊轅不是灯灯相照者个中消息也难言

再和

艺业虽多蜕不工差头分付是天公之乎者也成何事却是天公误此翁

白髮攢眉住道边钱荒糴贵怕人传溪干早稻垂头久次第今年似有年

少小田家有熟缘自骑牛背赋犁辕闲思耒耜经高古朗诵龟蒙数百言

朔斋惠龙焙新茗用铁壁堂韵赋谢一首

天公时放火前芽胜似优昙一度花修贡慙烦铁壁老多情分到玉川家帝畴使事催班近仆
守诗穷任鬢华八椀能令风两腋底须殮菊饭胡麻

六月频雨

雨患先淫後必愷春来数月爲眉攢如今早稻黄几徧却怕收时雨未乾

春雨伤多衆虑深那知六月似梅霖天公事事俱难準扫尽闲愁信意吟

又一首【讲堂前作】

半空如墨半空明乱洒斜飘却又晴细柳墙边飞拂拂随风不住带蝉鸣

三文祠堂七月二日礼成作

九龙山外筑祠宫崇祀三师敬则同此礼独行秋远日身曾逮事乐轩翁

明星落处是溪边回首如今四十年清晓深衣来会拜人无少长识师传【乐轩没於子晦宅
中正在小桥之侧明星事见先师传】

在三之义父师均往事追怀等念亲当日西轩同社友相看白髮只三人【是日会拜独余与
月仲弟嗣功林丞】

卜筑虽殫岁月勤事於州县不相闻祠田更拟图升斗要与春秋祭二分

别莆阳郡斋张文学归建安用後村韵

君住壶山参请徧樗翁却似岭松孤学如禅派求滄仰师比医宗要扁俞到此几尝名谱荔归
欬独忆故家鲈我慙九曲身遥领空诵仙经说黍珠

再和自賦

意散久知流不竟交穷甘与月同孤酣歌斫地凭谁听心事笺天恐未俞何必红云班立鹄只愁赤壁网无鲈身名自要分轻重人世多慙弹雀珠

後村先生再寄新出名荔賦謝一首

远使殷勤访草堂见书已似饱琼浆曾叨独乐园中赐犹寄端明谱外香珍重朱簾分五品衰残白髮喜初尝灯前把玩如珠颗强忍馋涎且度藏

清古源以隆茂宗画华池佛求跋

画如禅有派此派自公麟试我银丝髮幻渠金色身淡无脂粉气清与雪霜邻具眼须珍惜休将示俗人

七月十五日作

【早禾已熟连日风猛颇以田间爲忧朝来得雨虽小而风止矣喜而賦之】

连日祗愁穗落空松飘竹断似飞蓬喜看密密漫天雨止得萧萧卷地风俭岁久难禁贵余早秋今幸有全功田家更仰冬收好倚柱攢眉祝化工

竹溪鬳斋十一藁续集卷二

卷三

钦定四库全书

竹溪鬳斋十一藁续集卷三

宋 林希逸 撰

古律诗

夜凉饮罢月中作

早秋凉夜那无酒明月清风不用钱重露正随松叶下飞星忽过柳梢前骑鲸昔有李十二控鹤今无员半千头白如绵空醉舞歌长意远有谁怜

怀古

万事信前缘陶窗稳醉眠笑他名下士底似饮中仙乐在身何羡闲多性所便不穷能有几试数昔诸贤

二十日待月有感

秋来余暑未能清夜久凉因露气生星影渐微斜汉落月华欲上半空明人间寒燠能无变世事更尝孰与评不鼓昭文深有意宫商才动几亏成

题陈道古留远堂【卓山宪使之兄】

乾坤不毁易宁熄风月常新诗岂亡可但功名须久远也知道味更深长留题底要穷东野取友何如贤李方料得对床吟乐处平章欧蔡到程张

咏莲花

梅有幽人骨兰如处子姿二者岂不贵清矣仁未知美哉水芙蓉百花谁庶几可爱非可狎不癯亦不肥充然德之容莹矣仙之肌芬芳不容挹既远而有遗洛阳妖艷品红紫薄易萎东篱败坏相着枝黏如 此花虽已落泛泛看红衣有房如粟玉尚以金丝围吟翫苦不足赋予何其奇因思爱莲说稽首百世师非汝溪不爱非溪不汝宜何人斯取斯有道者似之

遣兴

车轮到处碾成尘苦乐伊谁见得真
蚁聚万缘皆假合驹阴千载几新陈
虽云入息非出息或说前身有後身
此事漫然成诤论且看古月照今人

玉水记方流【白傅省试题偶读其集同赋一首】

玉水何从记工因卞璞求若非藏异宝
那得有方流远派来元圃潜珍向某洲
璧沉疑月在斗折认波浮山鬼休持献
江神不暗投磬囊何入海应爲访鸣球

和王臞轩旧题紫阁寺诗

余初识此寺是臞轩约饮题诗时也
今甫三十年寺已中废余守郡始复之
丁卯寺僧攜此诗来访和付之

阁为山名紫松依水更青僧谈畴昔事
我记始初经败壁题仍在臞轩唤不醒
个中安稳住但要主人惺

问讯後村目眚【前书云食荔多得此疾】

赤眚因何久未除客来多爲荔分疎
苦云牛背寒光减病在蝇头细字书
老学常时资共订诗筒两月顿成虚
人间未有医龙手梦索仙翁拟访渠

清晓

清晓沉思自点头年将八十又何求
便令?合扶鸠杖底似渔矶弄钓舟
邓禹不妨嗤寂寂司空自信合休休
年来点校书多在但嘱儿曹着意收

梯颺遣惠菊糕且以铁壁和篇与兰闱魁卷示教戏用前韵以谢

诗来已似风敲竹釘巧还如雪糝花
便把菊杯邀酒伴谁将糕字问吟家
独怜卷上文成锦却守琴边鬓欲华
饱听溪干人颂咏鳬归早早进三麻

月仲重九生朝喜赋二首

自得生涯一室中不於牛斗问穷通
傍闲婚嫁先时了随分衣冠与世同
伊昔阿奴俱养母如今予季亦成翁
相看各喜贫强健对菊休辞酒盏空

长年冷淡似难堪自比荣期乐有三
就书卷中时借问除杯酒外老何耽
定知丹桂还儿折且把黄花对我簪
好趁月明来痛饮不妨握手共迂谈

赠别张养晦

访我溪干住蕉衣换袂衣甘同蔬饭久饮了菊杯归论药方书熟修丹咽息微浴水还啜火此事世应稀【饮酒极热如火而盥沐只用冷水】

遣兴

於鱼於蚁皆非计爲马爲牛一任呼文字要须心自肯功名只怕命元无痴人底信高僧黠俗士从嗤我辈迂老作凡夫差了事得闲不厌弄心珠

即事

学必苦心非易事世多抵掌是痴谈评量人到九分九指拟天穷三十三彻底书须随字解造微诗要似禅参眼前定与谁商榷忽谩狂吟付一酣

寄兴

黄花未有红花尽秋思撩人欲上眉耕不逢年难靠笔穷知有命错冤诗旋沽来酒聊供客留读残书要付儿犹向醉时歌衮衮少陵虽老有些痴

长孙遣聘五更戏作

生涯太极一图中白鷗犹鸣上下风蚁穴蜂房人世是鸩媒鸩妇性情同谁家不欠儿孙债缘法还归造化功月下有书何日定一门三见线牵红【祖子孙皆婚方氏】

得京中书

故心人在贻书及秃鬓翁惭信道痴千卷一琴甘隐矣五穷三揖喜延之空山賸拟藏书去好景只愁得句迟倚杖看云陶处士乐夫天命又何疑

夜坐偶成

涉世才深误转深鬓毛赢得雪霜侵人多痴到未来劫禅要空无见在心昼暖枕书高鼾睡夜长樽酒纵狂吟花开花落春何意潮去潮来古即今

三十年前尝与陈刚父论诗云本朝诗人极少荆公絶工致尚非当行山谷诗有道气敖臞庵诸人只是侠气余甚以爲知言追怀此友因以记之

目断千山嗟宿草言犹在耳奈从何文人纵有诗人少侠气不知道气多哲匠久埋泉下骨吟

徒今似法中魔【佛云五百年後魔生吾法中坏吾道场】吾非具眼空饶舌自掩柴扉适意歌

痴翁

痴翁痴处苦难言半似禅宗半似仙适意酒杯中味道寄心诗句里参玄虽然也作人间梦但觉元无俗下缘剩把残编消日子不妨吟罢枕书眠

寄兴

少时攻苦已成翁学似无功亦有功身外事皆随顺去人间念已扫除空痴儿莫指第二月快士休夸九万风世界虽然许空濶等闲分付酒杯中

别躔甫

一别三秋喜我过旧游如说梦南柯功名会上前缘薄灯火社中遗恨多几劫曾爲诗法眷两鰥堪号俗禅和相看未久匆匆去可奈能吟不饮何

十月朔日作是月十一日立冬

静看历推移天公巧孰知朔先旬日改冬早小春迟?手闲中老欢顔乳下儿小窗残藁在续纸旋抄诗

二

身外无余念残年守旧书窗先寒日补园趣小春锄边耗多疑信邮传久缺踈往来南北客时得问何如

十月初六夜偶成

寒鸥归尽暮烟生野草墙根络纬鸣岭外斜河双派入檐前新月半轮明厉阶莫甚董狐笔避世宁随桀溺耕尧舜不惊祗爱酒痴人往往笑长庚

怀後村作

无端对酒忽愁生酒欲浇愁愁未平老我厄穷如子美故人忧病似丘明常时交讯无虚日每日迂谈尽五更手简近来几代作得公手简若爲情

十月九日回书偶作

炎炎翕翕何关我是是非非厌听人莫谩揣摩当世事且须康济自家身【康节语】囊空米尽挨排去菊老梅迟问讯频南北尚留书债在未能痛絕爲情亲

客云今年小限甚佳戏题一首

晓呼儿读新诗草昼引孙看槁叶莲但得天教闲度日休将星筭小行年耐饥不管尘生甑
筭犹存纸裹钱一事近来堪自笑关心数月爲桥缘

寄刘躋甫

涉世还须着眼高尘浮浪汨世滔滔功名纵似秋风客见解何如春梦婆握手纵谈抛我去
心往事闷人多西轩旧友今余几掩卷长吟叹逝波

昔与诸友同登香城最胜阁有长歌一首今壁题已失仅记炊烟不尽愁不尽七字追怀往事
遂爲律体以足之

曾向山巔望海涛远村簇簇树如蒿炊烟不尽愁不尽立处愈高见愈高追记壁题才一句同
游沕聚惜诸豪等闲试足成章在却叹吟时鬓未毛

秋闱放榜作

三载抡材棘屋中不知老尽几英雄争先谁是穿杨妙偶得依然拾芥同衆噪似狂俄寂寂【
试後乡人聚饮而喊谓之喊榜】捷传未定愈忡忡人间万事皆儿戏注目长空送暮鸿

晚步偶成十月廿八日

半空浓碧云成峤上有明霞如野烧緑田黄犬吠行人白鸟青林送残照连朝毒热胜三庚万
木号风无一窍松间散步信意吟安得孙登与长啸

老来犹喜看书清晨有警书以自砭

千古兴亡大略同自爲儿戏是天公人如流水浮云去事落残编断简中已分尘埃嗟齿髮休
将点画污心胷香严喜把经遮眼悟处虽高性未空

禅学元非妄诋诃声前句後搃成魔本来性即虚空是自障尘因闻见多过眼皆如云不住举
头但看月如何传灯诸老还痴絕只翫心珠?用歌【传灯有翫珠歌】

偶题

求之有道果何如莫信邹书恐自愚生怕不祥如跃冶底曾大叫肯成卢言禅尚要空诸有定分谁能得所无却喜天公最公处人人可索是玄珠

游应天寺

白屿有僧初业农因见虾蟆跃苔而出忽然省悟去而爲缁徧游诸方老归西禅寮居帅以某寺招不就访之寺中煨芋烟满室竟不出户帅敬叹良久而去此畴昔所闻也乡邻有寺曰应天虽相去不远未尝一至偶因溪行见之四围破碎中殿竟存西廊小屋一缁尚留问其寺所由起则曰开山白屿僧也其名曰智淳塑像犹在双眸异於人崇宁四年有旨住西宁州万寿师进偈辞既而还乡遂剏此寺绍兴壬子也旧碑载三偈磨?尚可读倭指寺成才两壬子其季方十六岁入亦不薄以主僧不得人官吏又重困之遂爲不济人间百事兴废不常良可感慨因赋一首

万安桥北破僧坊追数梁题岁月长师祖碑残微有字世尊炉在久无香虾蟆撞破青苔去龙象凄凉宿草荒四壁不留风雨入仅余一衲住空廊

偶怀丙午丁未同朝诸公怅然有感壬戌再预经幄先帝犹记小臣爲安晚门人

前朝旧事怕追寻欹枕更长忽上心七贵五侯俱梦断【李太白诗】一翁六士谩愁吟雪歌黄竹游何邈云叫苍梧恨更深再割铅刀尤可叹白头赢得泪沾襟

和吴检详飞跃亭韵

心有灵渊性有天得渠乐处自难言谁传仙去曾骑鲤况说南征看跼鸢

圣师知远又知微率性而修教迪彝物性高高还下下与渠相赏莫相违

六爻万象理俱陈物物皆诚在反身飞鸟音遗鱼信及中庸尽性易穷神

梦如爲鸟何妨乐计得於鱼底是愚化化生生机在目紫阳深意注陰符

有我何能与物亲物无非我学方淳不知目送飞鸿者何似观鱼濠上人

跃跃飞飞共太虚痴人底解见遗余师传吃紧知何处乐在中心不在书

万善皆由一念基学能自悟不妨迟得他渊默天游处何异抠衣侍子思

题范曦文诗藁【武资请解】

年翫新编比碎金知君风月满清襟才高欲进竿头步兴到还磨盾鼻吟字有三千何日奏藁留五七已年深汉廷射策无苏李千载河梁是正音

答吴检详用饶字韵见寄二首

星省论文久追思去日饶同趋花底路执别柳边桥【山泉出使别於江涨桥】我已甘肥遯公还惜髀消新诗时见寄莫怕鴈程遥

白髮溪干住虽贫买竹饶名慙五云吏梦断七星桥烹鲤梅春小归鸿柳雪消两乡同此月庐阜亦非遥

晓起即事

枕上吟安未了诗披衣趺坐自支颐今年暖过冬强半昨夜霜浓晓始知腰带愈宽只强束髮梳常落不多丝衰残却喜身强健岁稔村沽醉度时

和梯巖薛宰镜中我韵

菱花泓里炯相亲久翫还疑假是真覩面果爲谁氏子回光须照本来人正慚我老羞看影堪笑渠痴苦效顰陶叟但知身有二当年问答只形神

送刘漳倅

捻髭袖手耽闲久岁晚俄闻轺骑催翁喜为亲负米去守需监郡及瓜来但令岸帻歌司马莫恋斑衣戏老莱迂叟有康人所羨竚看扶对殿中槐

南郡久闻非旧比民贫甚矣吏奸深凭熊正试活人手展骥仍多及物心箝尾决不闲署字支颐莫漫喜工吟殷勤惜别顰眉老洗耳溪边听好音

再和镜中我

把照相看意自亲是身非幻亦非真徘徊似月歌中我上下如水梦里人喻以不言只见色愁於何有亦同顰本来面目伊谁识却诧僧繇解写神【第三第四句一作似歌月处徘徊我如梦水时上下人】

三和镜中我

百骸虽在果谁亲本地风光见是真隐几正忘吾与我开奩忽讶彼何人叔敖还许伶优学西子何如里妇顰遥想当年游镜殿化身千百未爲神

丁卯重作化龙桥嘉平甲子修梁方举两虹忽现里人皆以爲瑞辄赋一首

下手高秋忽暮冬霜晴水暖荷天公旧碑语妙谁能继新筑工多事却同健笔早题需驷马修梁朝举现双虹殷勤着意溪干友应?桥门况已通

三偈寄白沙和尚

叠石爲梁岁月遥溪神毒发恣飘摇万事有缘人赞叹白沙师造赵州桥

桥长百丈架溪横半水工夫次第成人言不是慈悲力那得霜冬暖又晴

作缘道者信难哉小工石匠亦持斋世间苦行谁能此爲向白沙会下来

玉融嘉禾歌

新来盛事喧南北争道玉融调玉烛乍可优昙现出花未见嘉禾长似竹一茎五穗各垂头千人万人齐拭目元戎如佛令尹贤清朝有道吾君福来处况是太平乡此事须传瑞应录便当图本上九天看取三登上上熟

送方岩尹到省

可人家世文章籀骑气如虹向上都姓字儒流称作者工夫圣处及原夫临轩黼展新龙御射策彤墀引凤雏鹤髮溪翁勤洗耳首听翁季共传胪

送方兄【岩尹之子次云正字玄孙】

清姿乍见似兰芽未识多闻士友夸健笔如翁宜跨竈着书先世久传家妙年秋日高攀桂来岁春风早看花竚听龙飞新进士一门姓字耀京華

寄题陈非潜达观堂

拙信时也古犹今耐事闲居且醉吟看破人间须具眼驰求身外枉萦心乐常在我穷何有名欲爲宾见未深闻说君如濠上老会当握手论升沈

子真昆仲用虹字韵坚十七之约因眩而爽和以谢之

握手归来四见冬窝中风月忆先公情知梦逐飞鸿去愧与饥吟病鹤同既老岂应忘旧雨相寻恨不渡横虹云龙上下心期在彼此祇凭一念通

答子常

清晓霜晴不似冬多情剩拟谒龐公若无檄得头风愈却引帆如弱水同见讶令人时阿鹊清吟惠我气舒虹殷勤一使来何远双凤华笺袖两通

和福清鹿鸣宴诗

雪花飞舞上貂裘此去朱衣定点头字奏三千高射策噪垂十二拜凝旒乡邦正说龙年好吾辈相期鹏路修日下五云知有兆瑞光先向玉融浮

和後村答空青韵

病能崇眼似波旬闻说仙方妙入神定要空青爲药使解除翳赤见瞳人仆贫何计求珍剂天寿斯文保玉身岩电竚须光烁烁检书看剑乐千春

和後村韵赠砚土方生

精能磨石似磨砖巧手驰声积有年想见割来云制作妙如修得月团圆我虽成癖耽求砚家苦长贫恨少钱却羡樗翁藏甚富?题欲付子孙传【溪工割紫云李贺端砚诗】

桥缘渐毕再用冬字韵

未雪爲梁正御冬主缘賸喜得支公如膺下手知谁会与洧褰裳涉不同列屋饥贫几似鹤高轩来往谩如虹【高轩过】成裘岂有毛堪聚不待青铜助半通【赵州问僧赵州石桥谁造僧云李膺造州云当初如何下手僧无对州云既知造桥问着下手处却不知】

送方汝则西上【同年之子】

才华少日早峥嵘万里鹏抟始发程丹桂籍中曾定价金花帖上合书名同升每爲翁称屈此去深期子有成便好输忠酬圣问肱传听取最初声

送刘兄西上【乃父同行】

春光已入柳条催雪後孤山尚有梅泉上老人携子去天中多士待君来絶知戏彩怡顔久便合看花得意回遥想端门迎马处不妨翁季共传盃【天中多士刘禹锡送吴应制举诗】

戊辰元日作【除夜暗而无风乡人以爲丰穰之兆】

云暗长空夜不风新年又与旧年同身前百念翁俱足但几乡田岁屡丰

初二日作

一饱秣期与衆同残年自分乐溪中此心久爲云留住犹梦持笺入帝宫

象祖戊辰元日初冠仍拜勅命

老得渠爲第二孙加冠还已向春元蓝?试拜痴翁喜初勅题名圣主恩好续世科如汝父勉求师学大吾门一樽长幼团圞笑虽愧儒酸礼略存

临清堂前观红梅作

滨溪竹伴老梅丛一种风姿与杏同直者倒垂横者瘦水中同漾影青红

送林少嘉西上

声名早出自儿曹场屋尤推笔力高老大诗魔空白髮几多榜少已青袍穷通有道吾何畏文字随时看所遭簪取宫花归锦後不妨痛饮诵离骚

送吴子谦西上

君家学问富源流世守书窗志未酬曾记麒麟初抱日喜看鵬鸞再横秋龙飞恩数优多士牖唱声名占上流我爲汝翁期望汝捷书闻日报溪头

送戴兄西上【端溪簿之子】

乃翁白髮栖鸾去夙志勤勤待汝成自古文章有定价如兄词赋合先鸣今年恩数非常比上甲科名着意争语别溪千聊赠句南归竚看锦衣荣

送王税院西上

词场百战气尤豪此友真如老伏波本色蓝?须用着到头铁砚岂空磨向来鵬荐飞腾屡此去龙飞恩数多遥想玉阶牖唱後小璫觅句看挥毫

用韵送徐平父西上【徐释之後艾轩外孙】

鸣鞭西上访渔村倒屣霜朝喜及门豹隐频年聊蓄銳龙飞今岁有殊恩诵先朝赋知名祖读外家书见此孙千载艾轩吾敬慕袖中锦轴两诗存【以老艾墨迹二俾余书其後】

送林汝大西上

一第於兄何足溷相期十载恨悠悠未闻鲤化三层浪但见鵬横几度秋手妙八义时辈服眼迷五色主司羞舒徐有待知天意要作龙飞榜状头

送陈清夫西上

健笔朋俦推许久芬芬几播桂花秋词场多美君义手省户须看鬼点头昔送广文生有序今无瞋睡汉争筹高科迟取君休讶恩数龙飞榜最优

送林毅夫西上

【乃父特奏仕止法曹昨赋挽章末句押臯字正以此见能赋】

乃翁赋手妙驰名白髮青衫恨晚成宋玉大招慙老友枚臯末句属吾兄专场见说词锋鋭跨竈应知话柄行圣御六龙新策士输忠不厌字纵横

戊辰谒伯祖惠阳使君坟三絶

一山双脉两翁藏最久凋零长一房谁道败墙荒草里冢中枯骨昔金章

少日春秋学最高年踰弱冠掇危科也乘五马鵞湖去埋玉凄凄草一窠

手足情鍾共处埋荣枯顿异可胜哀长公松下无人扫三从诸孙岁一来【惠阳与山斋提刑相并爲坟】

送余兄西上【曾祖乃祖俱龙飞登第年方十八】

得意秋风早香浮桂籍中清疑卫玠是年与贾生同鵬化多诸从龙飞上两翁此行宜趾美竚见赋摩空

竹溪鬳斋十一藁续集卷三

卷四

[集部,别集类,南宋建炎至德佑,竹溪鬳斋十一藁续集]

钦定四库全书

竹溪鬳斋十一藁续集卷四

宋 林希逸 撰

古律诗

送蔡弥坚西上【戊辰榜郑孙黄三魁皆三山人】

春试新因闰少迟行行应见柳舒眉香留丹桂籍中久名写金花帖上宜一榜三魁同我里重轮六戊属今时赠言此意殷勤甚就有安书寄小儿

次韵题马氏亦乐园集【建安马氏晦翁放翁皆赋此韵】

何处君家亦乐园遥知眼界与天宽年时料得羣花好岁晚祇留老树蟠佳客酒中吟李白主人林下见韦丹事随鸿去今如梦却有赓酬集可观

用韵和黄兄【黄号梅坡寄桥成诗和虹字韵】

老如枯栢傲霜冬名实俱忘赋茅公正苦岁寒无竹伴喜知春思与梅同囊书待朔登金马琢句追坡咏玉虹他日肯寻翁住处花边野水与池通

昨晚溪缘之论闻善友颇不能堪戏成八句

作室道谋虽不可同舟义等又何疑自贤必去能贤也不受何宗是受之非马固知难喻马围棋恐未及看棋溪干老子归来笑忆到行河集议时

题化龙桥碑【桥本名万安中间再修得石碑化龙桥字於潭中】

桥以乡名曰万安篆碑谁作曰溪干化龙二字重修得归鹤千年耐久看鈎画不凡非世有精神欲动肯泥蟠崇宁石在文尤古虹笔相辉射斗寒【重修乃崇宁间石记犹无恙】

赠周医主簿和後村诗

紫橐埭簾派易推丹炉芽雪妙谁知方因龙得来何处棘爲鸾栖住几时见似臞仙清可掬胜
他流辈俗难医樗庵有句吾拈出谒两孤山共和之

寄兴

生涯薄薄仰田畴破敝犹存晏子裘聊向太虚中过活何曾自己外驰求狂吟时有衔盃兴退
省知无障扇羞老守残书差得趣人间别一种风流

洗石蒲作

似发青蒲石顶鲜与奴疏剔换青泉莫嫌水部寒贫气【何逊传】聊结涪翁潇洒缘昼永久
看云独立夜寒略对月还眠焚香弄镜皆书味时有新诗入续编【涪翁事在题跋中】罗真
隐已化数年曾纠仕五羊病中尝访渠爲之求药曾知其已逝颇有问答曾今爲漳倅亲与东
庵道老言之

生时句句有玄机语我因医偶造微霞屿已题新窰石羊城还着旧深衣曼卿见说乘骡去丁
令尝闻化鹤归葱岭相逢提履者宋云恐被後人讥

戊辰二月六日作【是年闰正月】

事随时去似飞澜具眼应须以道观汤武交争棋里见唐虞气象瑟中看【伊川语】寄情物
外吟差乐回首尘间意久阑多一月春还过半先生随分老溪干

读昌黎与孟简书作

学能害道义当排深浅还须究竟来动静理如双转轂危微心要两俱灰俟之不貳知天矣逝
者如斯叹水哉却笑留衣韩十八美人明识外形骸

遣兴

老後粗知见处真世缘随顺不妨贫静看星斗尊吾性闲对烟云笑此身旧学易忘缘懒散近
诗多拙欠尖新从今只合逃名去似此饥穷昔几人

晓作偶成

饮粟羹藜漫曲肱病无俗物也身轻万钱下筯非吾事数卷残书了此生学浅幸无禅二障心
闲喜与迹双清更长睡足元无梦又听檐间足足鸣

和後村喜大渊至二首

可笑儿痴觅句忙先生善诱许升堂未应得髓能如可敢道言诗亦与商笔落更夸风雨疾袖回犹射斗牛光句中有眼容参取肯靳涪翁古印章

问疾维摩本不任【佛遣弟子问摩皆云不任诣彼问疾】招延多谢屡挥金伏波床下容松拜康节窝中爲客吟新语粲花空把翫旧游煨芋阻追寻老慙筋力难爲礼南北相望只嗣音

和效顰一首【屡劝吟多恐妨目眚答以自乐不爲劳】

诗能妨病语情真才大犹如富傲贫强作手书诚愧我那知腹藁不劳人生平酷好乐何苦集本多传续又新 却此身吟送老百骸虽在果谁亲

叶万山以诗求诗爲赋一首

闻说君家旧业儒贪游到处曳长裾学青乌子通砂法傍紫阳翁故里居吟苦虽无堪煮字交穷却有救贫书虚中融结皆真理朱蔡犹谈可但渠【风水家杨救贫文字最佳】

送陈伯厚试上庠

才华早已逼难兄声动贤关指日听万卷饱看双眼碧一篇聊换半身青三都赋出愁无纸千佛名题会有经投老溪干吟送别旧游回首梦炉亭

後村再和堂字二首且云欲谢遣孤月一意祈天用韵爲谢【医者号孤月】

问药虽忙吟更忙新诗必富似龟堂未能载雪寻安道恨不乘风学老商伊昔虱心看愈大因何牛背射无光疑公只欠长明颂不用云璈共绿章

诗工如沈笔如任【沈诗任笔任昉传】到手篇篇玉应金【金□玉应韩诗】月好岂无搔首梦【杜梦白诗】日长谁伴捻髭吟如今具眼师能几何处还晴佛可寻【西湖有僧梦观音云还汝一双眼睛今有还晴庵】来往莫嫌贫问讯也胜空谷听跂音

和桃巷吏部用鄙韵三首

人间波浪胜扬澜对镜知公有达观晚喜骑驴半山去早曾立马万人看平头八秩身逾健信手千诗兴未阑应笑溪翁耽贝叶但寻破寺访丰干

袖疏曾将紫闼排山今排闼送诗来试评藜杖爲吹火何似麻衣共拨灰濠上鯈鱼真乐也山梁雌雉信时哉只愁驱上蒲轮去不许笺天强乞骸

老学黔娄已逼真他年谁解傅寒贫曾供天老书题目空守将军醉告身山似友于青眼在世

多交絕白头新痴儿浪下龐公拜许作樽前问字人

送吴司户之任

南州诧说才名早到手青衫已二毛自守冰霜真铁汉肯淹岁月待珠曹遥知玉节将争致暂掌牙筹莫厌劳圣世怜才甄拔易倚须去着锦宫袍

再用前韵谢桃巷

清吟思涌似回澜家数他年比务观歌舞丛中知散易功名纸上要留看吹残柳雪寒仍在数尽花风春欲阑好景纵多公不饮谁论?蘖向江干

老境浑无闷可排交情莫逆有舆来骨寒底爲哦诗瘦心懒非因忍事灰蔬水生涯聊尔耳轮云世故奈何哉漆园未悟身如幻更把君臣论百骸

山深林密乐吾真从古吟人例是贫参句似禅诗有眼还丹无诀酒全身我闻竹後痴犹甚公见桃来思许新有雁莫嫌时问讯旧游诸老更何人

闲题

老守寒溪作逸民未尝忧道况忧贫生涯宁薄吾无愧分外求多天亦嗔一点要须明不昧万缘总是假非真有书数卷诗千首便是人间了底人

四和澜字三首谢赵工部

汨汨难回既倒澜我今忘世漫游观雀罗生怕客惊散鱼笥长呼儿去看笋蕨弥山求易足园林到处入无阑渔翁樵叟相过熟一语何曾非意干

已分金门不可排何须竹帛诏方来囊收玉子开云种炉养金公候火灰老见明时真乐只身缘吾党合归哉年丰处处炊烟好追忆边城叹析骸

芋栗先生语最真有园我亦未全贫闲寻往事浑如梦 作清吟老此身但愧淹才随锦尽何如韩思与花新柞山集即杼山是佛地中来有几人【赵有柞山集自比杼山僧】

山前山丹已见微红【四月初六日作】

一种村居富贵穷多年饶润谢天公眼前黄白方吹尽已放山丹蓓蕾红【楼前黄木香酴醾方谢】

再和效顰一首寄後村

读易伊谁见得真能见富定不如贫【向子平】涪翁但冀天还眼子厚何求愁化身【若爲化得身千万】语燕殷勤如话旧良苗次第又怀新往来独恨诗差少便觉江山憔悴人

用韵答徐古爲【寄进易与诗】

金问天南使过门欲尽春理谈经独妙诗当札尤真图进知天喜纶颁人日新相思梁月在吟望向江滨

悼刘主簿【後村之侄善书工琴後村目眚日在侍傍代亲书】

忽传哀讣泪难禁忆在樗庵别至今遗迹几何留子墨知音多是惜人琴汝身汝伯相爲命一死一生尤痛心幸是栖鸾本无意遽令题墓向空林

雪峰藏叟过门见访赠别一首

山头老汉老尤癯忽谩溪干访老夫问讯辊球思古宿等闲隐几说今吾多留旧日题诗在近有寒泉答话无握手依依还别去十年一见只斯须

看风穴语偶然有感

【风穴一日於念法华侍次垂涕语之曰临济一宗今坠地矣念云观此一衆岂无人耶穴曰虽敏者多见性者少】

一点关心道即非到关心处又谁知渠宗爲此犹垂涕益信傍人不是痴

偶得虾酱怀所翁作

【所翁向同舍时偶有鮓酱招饮必曰吾得一宝请速将就此三十年前语】

送酒无如鮓酱宜所翁旧以宝名之看渠忽洒思翁泪爲忆相呼得宝时

平远窗中作

祠宇小窗西松高柳尚低垂垂青可爱一带遶长堤

夜立池边作

烦促耽凉夜穹虚望碧霄云行迎月入波动带星摇

送黄蘖老子住西禅

贤哉断际堂中老法席新移向凤山妙选碧油翁具眼相迎黄面佛开顔老来得友如师少别去伊谁伴我闲十二峰头明月在不妨言句落人间

雨後溪桥看水

緑遍东西岸田家亦喜晴溪因急雨涨云放半山明沙外看流势桥边听浅声向令平十里应与剡争名

读契嵩非韩三十首

此緇何事与韩仇可怪真如撼树蜉蝣唤作辨才知汝误看成寐语使人羞赐云日月无容毁甫叹江河不废流者也之乎三十首千年贻笑几时休

送岭口仓季高兄用後村韵

士能优即学岂必爲贫驱翁有三珠树兄如千里驹敏知才脱穎慈是德充符盐户雕残甚殷勤爲掖扶

又

竈户年年减苛征可柰何给符催起火输赋仰晴波民困官谁察兄贤政必和虽云纲有本久例尅除多

雨中看山丹作

簇簇团团似剪霞雨中相对爲咨嗟固知沾足徧宜稻只恐淋漓解损花

再和送岭口仓季高兄二首

此客熬波去初程宿暑驱名家真凤穴内廐待龙驹台自催征课官惟守信符少留翁必召温国要康扶

又

尽职随高下吾无问孰何留看烹玉雪入对丽金波任大盐中举官卑柳下和当涂须刮目父

执故人多

得浩书自维扬至京将归矣【五月十三日】

汝渡长江後南来北客稀梦寻骑鹤处愁对钓鱼矶淮仆行方半京书报欲归抵家应一喜稚女解牵衣【遣维扬书方数日】

读候官刘宰山居集一首【同年刘侍郎子】

琴思清於五柳陶词源浩浩似秋涛落花未赋时争价香草曾吟处得骚七字法传山谷秘数篇文比曼卿豪衰年酷爲齐年喜紫橐仙翁有凤毛

麒麟猫【新得狸奴满口皆黑人谓含蝉甚佳絶不能捕戏以号之】

道汝含蝉实负名甘眠昼夜寂无声不曾捕鼠祇看鼠莫是麒麟误托生

贺刘尚书除龙图阁学士

名在先朝擅斗南圣心求旧眷非凡龙图字足新三画凤诰书来更几函指日即须携手上耆年可但改头衔玉阶正要康扶对新渥相辉共引帆【长子除架阁】

和前韵谢後村饷甘露团荔子一首

日日亲朋饷自南比公所赐似仙凡擅名甘露珠百颗入手好风书一函苏老黄柑休立传半山红柿莫分銜金茎仙掌何曾得要枣如瓜谩举帆

寄题京山书院【胡兄申甫新作祀文公与安定】

天南胜处是京山精舍新成数百间柱石规模何整整衣冠人物想班班昌黎教法依然在安定家声喜复还受用不穷书富贵吾侪本领学曾顔

送严陵教方汝楫用後村韵

官是东莱初补处诸生料得熟香名县知讲席通三昧合向明廷听五英君有奇才宜凤翥我安穷分乐鸥盟鷄羣有鹤令人喜伊昔翁曾共短檠

所翁爲泳作小卷翫珠龙极其精妙赋翫珠吟一首追忆此友

翁爲髯相小尤稀此卷於今信絶奇墨晕浅深行笔意红光上下吐珠时名高擅世无他手语

硬盘空况此诗散髮不知何处去想应龙尾学骑箕

用韵谢子真【时得章贡二兄见贺而罢命至矣】

到了於鱼真得计从前飞鸟倦知还低头未羨居辕下拙手何妨缩袖间说偈不嫌如泻水着书岂必要藏山渔翁学士皆闲梦此事谁知若是班

用韵谢子常

轮云世事去还来老眼曾经见几回乍可洗心清净社何须觅句郁孤台痴儿归语差精进野叟衰颜觉好开一件却令人愤闷秋阳骄横胜恢台

七月十二日作【是年六月十九日立秋】

投闲不厌玩心珠遮眼无他只旧书得马塞翁从丧马知鱼濠叟且观鱼三旬不雨田俱涸一月先秋暑未除此念却难排遣在家无大小仰犁锄

七月苦旱

徧走仙坛与九渊三旬涸尽涧中泉埵无鸣鹤嗟何及古有刑鹅法孰传父守井棒形似鹤儿归市朶瘦於猿旁人若识农家苦粝饭藜羹直万钱

送咏宰安溪

好为君王去字人乃翁知汝耐清贫求民疾痛当如子有道弦歌是悦亲月解前期须趣办日生公事怕因循扫除诗癖祇勤政最急无如赋役均

二

邑小虽贫亦自嘉遥知?僻似山家我思宫锦袍如梦汝向黄綢被放衙守忆旧游须易事吏存古意要无华但令禾麦季季好肯羨河阳一县花【迓新甚朴陋】

三

此邑先曾有美传雨阳仰佛令多贤复斋名比太丘长清水仁如姑射仙廉白不慚居补处精?更为祝丰年殷勤办此身心去莫怕溪滩稳放船【陈复斋为宰清水佛在邑数里甚灵祷雨阳必应】和王此山午寄虹字韵一首【金陵人隐居西湖上】

早气如春夜即冬操存要有主人公斯翁枉向尘埃老好我遥知臭味同案上两图圆似月毫

端万丈吐如虹渠依落处应谁会未美他家那一通【此山有两图其一□三径一中书心在鬼神莫知处其一外園内方中书人立乾坤规矩中】

和赵春谷南溪双莲二絕

萼仙彩袂湿银泥共蒂分红照碧溪桃叶桃根双姊妹未应拟入句中题

文耀祠前花满池花神爲谷献珍奇会看两两红莲炬先遣秋风瑞入诗

程君履以薛宰书见访【其父寒谷】

游历江湖久刊诗已百篇梅花曾共笑杨叶不难穿朴厚如翁好推敲何处传雀罗空自愧爲我谢琴仙嘉禾瑞於丁卯此粟瑞於戊辰两年之间嘉瑞迭见所产之地其名亦美琴化所感盛矣哉再赋此爲梯颺明府贺

我贫冬春苦不足常时屡贷监河粟大贫忍口活小贫仰天但冀田中熟去年已喜见嘉禾今年得粟喜奈何一茎六穗最奇者四四三三云更多禾生之乡曰太平粟生之里曰永福天公此意岂偶然拍手歌之仍鼓腹忧国何人不愿丰太仓那得相因红但令此物如水火酒肉如山八蜡通人言此邦今乐土长官於民如父母曰阳曰雨天应之叶气嘉生有如许长官宁非佛地人三年一念何其仁要知此瑞爲谁出金粟如来个後身

二偈赠余干震上人

芝云深处远携筇行徧闽山访野农问我旧游诸大老云渠识涧住依松【依松东涧祖坟庵】

老漆园仙数卷书最佳公案是观鱼濠梁水上宁无影悟得应知我与渠【求庄子解】

九月山丹

数本山丹似晓霞多情恋恋野人家自从五月至九月还有三花或两花莫笑萧疎同寂寞早曾烂熳见纷华篱边黄菊今全未且对芳樽拾堕葩

月仲弟重九日庆七十

自得斋中得乐全对床白髮者希年尚平债了闲无事洛社交多誉独贤女嫁比隣来往密醉忘巾栉起居便紫薇旧伴今如梦喜插黄花寿阿连

送丘进道入京

孝慕三霜不脱衰月评甚美况清才爲贫遮日投竿去得趣吟风讲学来翁岂常人嗟宰木我
尝爲子指庭槐有臯能赋谁嘘送莫使君王忆老枚

送光泽苏县丞

种花城里谈经席三载何曾有束修别换头衔聊佐邑重拈手板向邻州松厅莫笑无公事藁
幕时能致俊流握手溪干留饮去相思那肯靳书邮

前後身

幻影匆匆托太虚问身前後果何如李如画马沦爲马庄亦观鱼化作鱼房相未忘前世字谪
仙曾读几生书古今传说多蒙昧覩面须知我即渠

送林帅参

羊肠历尽鬓今皤官职因才自折磨议幕重来还去也攀辕不住奈愁何情知直道能容少空
喜阳岩得助多券内功名终久在非非是是一东坡

十九日作【戊辰】

霜残已报春消息未见篱边蓓蕾黄爱菊苦迟今十日漉巾须作後重阳酒知圣处何妨醉药
纵仙方不用尝拍手自歌儿和我别无曲调只沧浪

偶题

钓鱼矶畔赋沧浪不是狂夫老更狂心是罢参僧养病身如拣退卒还郷谈玄近喜儿差进得
酒先邀弟共尝遮眼有书时掩卷小窗趺坐自焚香

赠月溪孙相士

紫霞焚香青霞哭此诗此事谁堪录二公如此讼君冤身虽掇祸名不辱天留老眼见时平君
既生还丁巳戮仙无点铁救君贫佛却有篋刮君目令君看破玉管书养生聊借君平卜纵谈
风骨妙入神江湖诸老争推轂君能相人我相君岂无武襄与英六【月溪豪士也忤丁得祸
今以姑布子卿之术自隐因话二霞初见时因缘霞皆吾故人也因以赋之】

送赵兴化

壶山虽好俗难平新下车来有异声得乳雏均心惻怛害羣羊去听神明永丰陂上碑遗爱德
礼堂中实称名执别溪干情可耐公家资相老门生

潮阳赵秋惟父作新廨成以景阳扁之谓阳岩尝历此官也余既爲作二隶古因赋唐律一首

画栋危梁喜落成主人高致着新名义存必葺规模远贤要思齐慕尚清丹笔平反真养志绿
绋催趣看登瀛阳岩住处今君住料得夸张徧凤城

猗冻宜酒以皮爲之入口爽而色可爱客以山谷醒酒冰比之余谓冰鳞物也其性寒比之玉
狸又不莹戲成一首

豚膏鼎化元非截切入金盘得许清鳞雪性寒空细缕狸霜糟重欠通明渠嗟不遇黄山谷我
爱浑如碧水晶醉後不妨冰着齿最宜人是味温平

题梅花帖【爲徐山长作】

梅经和靖诗堪画兰识灵均赋是经两得清名还此卷梅花石上古兰亭【後村旧有此帖与
余所藏一同本差胜更以质之金凤可也】方遣三山学记仍寄径山文字笔砚稍寬梁秘阁
忽送金锤千颗此吾乡名品也

埋头汨汨应酬中一喜因何到此翁恰了数家文字债满篮人送荔枝红

虽云莆荔胜闽中诸品如今未改容寄语宋香陈紫辈还他先进是金钟

竹溪鬳斋十一藁续集卷四

卷五

钦定四库全书

竹溪鬳斋十一藁续集卷五

宋 林希逸 撰

古律诗

和後村书牕韵四首

尊知笼愚笑火驰人间翻覆任纷披偷桃儿美侏儒粟辟谷翁怀博浪椎座下固知师也嗔
门前却叹凤兮衰世无齐物庄夫子那得渠依一问之

乍可轮生角莫驰蓑衣好在不妨披相寻日月急如箭休笑尘埃钝似椎老去诗篇多感慨
古来书卷几兴衰箪瓢乐处虽难会却是知之亦好之

痴人如马系犹驰我有心经喜自披解使伏戎仇李石何如瞠视友桃椎老怀只付一杯足
壮气浑如再鼓衰得失到头堪献笑纵令有道莫求之

有余宁要厥闻驰架上书多已懒披学养丹须明鼎竈要参禅莫怕钳椎痴心浪说诗穷达
冷眼闲看世盛衰千古纷纷皆梦事道难行矣却知之

再和磨字韵谢後村以余评新藁见寄

持荷苦口辞宫锦伐木多情忆钓蓑童子无言堪问答武公虽圣更磋磨禅宗尚别偏中正
圣处犹分清任和吟苦正求人订正柴门何幸许相过

至日再和磨字韵一首

长边久息追风骑散地闲披钓月蓑锁谏忠劳多叔达铜光谐谑絶新磨笙镛尚闕须终岁
珪币将陈待始和老太平时逢此日负暄檐下看云过

冬晓

云树晓层层初霞照屋棱冰池纹似镂霜瓦气如蒸冻想歌樵客闲思煨芋僧痴翁吟太早
窗尚有残灯

即事

寒林叶尽见巢乌独坐闲吟自引须万劫總如萍聚散一身几见树荣枯昨日明日算不尽先天後天易本无事有难言长隐几何人曾识我非吾

与友人论文偶作

坡翁好语嗟难读介甫新经苦尚同举世笑时韩自喜无人爱处陆云工能奇却怕翻空病得妙还须苦学功旦暮烟霞千百态伊谁巧似老天公【意翻空而易奇语徵实而难工晋人语】

信缘

尘世情知事不然生涯漫浪只随缘閒篮身入从初误逆境魔多向老便未肯羡人昇白日不妨存我送残年声名官职俱何有枉见匆匆髮似緜

晓起即事

千古宗传有正音纷纷俗学误人深痴生佛说成魔说见彻尘心即道心老眼惯看碁世界浮生难恋隙光陰凡情圣解凭谁诘独坐蒲团只自吟

即事

旧留蓆帽知何在秃鬢乌巾一任斜病发相如空视草梦迷太白谩生花古今来往三千载文字消磨几百家底为藏山痴作计衰翁笔砚是生涯

论文有感

纷纷见解何差别豪杰还须间世生识在雷从起处起文如泉但行当行均爲千载无双士莫问三苏与二程丹井红泉南谷老似渠宗旨更难明

题徐司理诰【初爲理曹後爲宝应主簿以徐寅爲曾祖】

端拱雍熙诰尚存栖鸾衣鉢陀曾门龙飞黄勅新来好先辈名家又有孙【建安山长徐平父宝应之後也於先辈爲十三代孙咸淳戊辰廷唱後两月林某书】

题王元之行徐簿诰词

文林有底迁登仕簿领如何压理曹官制虽殊纶笔美黄州一字肯轻褒【後村前跋始末备

矣因赋二首】

莆田陈尉新作二轩於其廨舍寄题二首紫薇轩

双松厅上念先差晚节渔翁谩叹嗟试问归摩青玉笋何如坐对紫薇花【乐天爲整屋尉厅有二松】

青云轩

千载流传感兴诗爲渠黄绶叹官卑便令图上凌烟阁何似青云传伯夷

寄题名登楼【漳州陈氏名登皆山名】

危檐飞处緑周遭遥想凭栏似跨鳌取义两山名甚美凌空百尺卧尤豪惊人姓字层层见作圣功夫级级高直要襟怀如范老岳阳楼上赋云涛

贺李教授挂冠

鹄袍未脱先谋隐雅操如君世所难甫拜袞龙怀勅牒便寻神虎挂衣冠定应传入逸民去更有文留後代看高卧东山还不稳令人远笑谢公安

後村爲李教赋诗且以索和辄课二首

莆在东南夸独盛材如荆楚信多奇爲祥以德麟昭矣增击何心凤去之玄岂可嘲嗤范蔡廉无敢溷慕随夷情知结束非时样冷看人间半额眉

诸老赓吟如许富一翁寒瘦岂能奇君爲严郑其清矣仆岂羊何敢和之投匭疏高闻殿陛入图赋妙徧蕃夷子云自许千年後覩面何须彼俛眉

送刘元思倅三山

碧玉峯前诏趣回雅知金耀要清才影纓即盍班行去岸帙还因便养来丽句时应梦池草安书日可到庭槐府公况是深知已引领同看禁苑梅

赠命士吴月堂

爲养祗凭卖卜钱术精云有异人传如君合把堂名月得姓元同斫桂仙

和後村韵二首奉寄府判真司令

听雨楼

取放翁诗扁此楼知君心企古名流苏吟韦句虽欣慕樗记曾云不是由【刘後村有听雨堂记爲曾氏作】大被长衾佳伯仲高门素学尚姱修俱存无恙邹书训此乐人间底处求

格轩

祖学单传信有原秤停一字自名轩肯令公愧太丘长要似思爲孔子孙知格格知须细认有无有果难言读书记在门生老愧有君家未报恩【知格格知张子韶与大慧语】

寄建安山长徐平父

钓石摩挲久席珍儒冠非误一朝伸修程鹏击三千里次榜龙飞第二人讲紫阳书聊倚席纵青云靶早影纓十传先辈家声大又喜中朝诵句新

题松涧徐氏余庆集

三派分来久松高不计年扁题六大字【坊名徐卿积善之家】姓氏两魁躔太末韩曾记中间穉更贤爲君期望远声节要俱传【两魁徐寅徐铎也】

戊辰除夜作

今宵明早爲新岁明早今宵是旧年却羨山中无历日循环只认月亏圆

年来朋友多称所交某公某卿爲老师者因赋一首

年来俗客似禅缁开口人人王老师何处得鳞皆透网谁家有米各经籩本无桀溺问奚自刚道刘君胜自知此语但能亏雅道旁观冷眼爲攒眉【透网金鳞三圣之语喻其得法於临济也】

己巳元日二首

诸祠谒後乡团拜得健多慚造物怜老去一毫无杂念闲来六度见新年饭蔬老幼呼同席记礼儿孙讲半篇此事此朝爲例卷清贫聊且守家传

占年五子推壬子端月三旬看上旬新把历书欢竟日旧传?度属今春残生一饱无他念半世多魔笑此身清晓冠裳八十拜老能强饭不输人

罗云谷诗集跋

【云谷余同年友也丙午以後同仕于京数年相与懽甚遂得以诗交知其思远而识高必以诗鸣於世一别二十年今以经幕领印古论寄余此集俾书其後因爲数语以寓君苗焚砚之意】

人间好诗不易得江湖近事诗之厄梅花知己欠逋翁明月论交无太白何人识尽谷中云将渠去作天南客凤冈传酒赋凝香龙岭行歌欣应拍题书忽与燕同来入手恍如鳞有获彩霞封裹策二三珠露穿排首千百吟将麈柄击玉壶听是水弦调锦瑟岂惟句字费推敲好是典刑见风格问之乃是吾故人对此悠然记畴昔杏园初会固匆匆蓬省旧游思历历我今娱老但醉眠君要惊人更精索诚哉老子共风流龟堂主人忧火逼料知得意风月前独立长歌天地窄生民清庙要新声底处当行求巨擘看君定作出谷云鹤书已到罗含宅【凤冈龙岭肇庆府事】

占岁

秋田已歉期新岁人道占书必有年料事每难凭者半知几谁见吉之先米荒邻送荷包饭铜泄市无纸裹钱解使乡居长得稳不妨吟钓老溪边

老去

老去人间念不生旧来诗兴亦雕零故交可数半黄壤邻舍相过多白丁倚杖溪边看过鸟焚香窗下守残经後村已病赧吟少纵有牙弦孰与听

自误

老守平生自误书人间事事付痴愚万缘已息心如石一点能明腹有珠门外设罗祗见雀溪边买钓学爲渔生来虽欠封侯骨未羡凌烟阁上图

穷理

磨旋盖倚机谁悟镜缺弦生意最深知历知星方识性潜天潜地要非心山须鳌负诬仙圣潮爲鲸来误古今我不信书祗自信千年未必有知音

有感

人间分有高卑在世界嗟如缺减何楚客骚吟小司命杜翁诗消寡嫦娥拙知尊爵非吾有贫爲鰥居失助多独坐蒲团守书卷长年恰似病维摩

观物

天旋底背东西日月正河平昼夜潮空里华生空里?静中声起静中消移舟远浦疑山走汲水
清溪觉岸摇人世自迷顛倒见达观何事不逍遥

寿溪刘岩傅唐御史之裔乃翁国学前一輩同舍也筑新居名曰西村以此求扁为赋二韵

李唐御史入闽居衣鉢才传两副车六馆未酬先志在儿贤正读乃翁书

主人作意扁华轩不厌溪寒自歛门似此相求差可喜爲渠隶古作西村

痴人

痴人多见筭穷通我亦痴人却耐穷幸有读书闲日子何曾问命老星翁岂能忘世差无欲纵
似谈禅不落空千载英豪皆可数未知约略与谁同

和洪帅燕新进士【正月八日】

涂抹年深满鬓星招呼愧莫筵宾荣龙门客趁新正宴鹏路人看第一程七字如珠真好语诸
贤似玉要修名樽前况有师模在学得阳岩是德成

己巳元宵雨

里社由来庆上元常年鼓笛徧诸村缁黄香供人人冗红白灯竿处处喧积雨连朝寒可畏祈
天一念礼犹存夜来见说柴炉少清磬行时半闭门

诸侄约至黄蘗因思前岁刘朔斋同宿约後村不至慨然有感

黄蘗山前古梵宫早年屡宿此山中猿啼十二峯前月鹏送三千里外风日者共游因朔老期
而不至有樗翁骑鲸人去相如病更欲跻攀谁与同【朔斋戊辰仙去後村以目眚不可出】

送子晦宰南安

送子南征爱子深殷勤听取拙翁吟爲儒但有书堪信试邑元无谱可寻民病盍知渠即我郡
贫应念昔非今圣门絜矩真良法彼此秤停要尽心

此邑曾爲掾往还昔云优易近雕残士嗟前輩风流远吏苦专人月解难琴以道鸣宁择地篙
如手妙岂愁滩竹湖亲授侯心印不比他时事上官

紫帽山前墨绶新此行一喜异於人公车荐口多诸老便邑怡顔奉二亲伯氏横经如共室吾
儿学制不爲邻书邮见说无三舍细大相规莫厌贫

次韵方持叟见寄一首因悼後村

鹤髮荒三径溪干久赋归人皆笑金帚子尚记蓑衣
笃学藏书富工吟信笔挥多情慙眷眷入手觉辉辉
鸾棘方娱侍鹏程待奋飞讲经融有帐进酒贺无帙
底是锋相拄应怜带减围新知虽可乐故友渐俱非
忽忽纏悲绪茫茫恨化机何时吊乌石有泪湿渔矶
此老真基杖遗文半掖扉苏梅今孰是谁复识邻几

初八早枕上作

新种梅家萼綠华缘渠关念似痴家不知青叶朝何似展转残更听过鷓

读敬箴作

先儒只此是单传圣处初无别入门人与两仪三并立
天分万化一爲元知无适处乐何喻到放参时妙不存
勿正勿忘真见解此翁千载有名言

隐几

守定残书雪满头眼前散尽好交游重拈旧话无人会
纵有新知惹我愁是圣是凡谁与辨非心非物果何求
梦回隐几窗才白远听林间唤雨鸠

独坐

掩卷闲窗独坐时生涯自笑昔俱非枯铛了尽残生事
暗想空山老衲衣

诗送鰭叟建安理曹

能廉不患不能官折狱偏劳是建安一掾虽微关涉大三司
分立应酬难平反送喜非徒养叹息求生岂尚寬积庆如翁
须趾美厚培福本称鹏搏

次韵梯颺明府燕新进士一首

领袖羣英有钜儒蓝袍端不负三余开樽笑把杯相属
即席吟成锦不如鹏化修程知翼健鳬归要地看纶除
招呼意厚慚居僻老怕冲寒驾犊车

东涧以且静坐三字赠莆阳郭堂长阳岩谓莫作禅会名言也用韵一首

作镜如何埽可磨个中方法似无多定而能静吾师也不比伽趺佞佛何

送新饶州陈教授

学深行粹乡评美三舍成名号胜流定价盍归羣玉府横经暂访百花洲湖山称侍亲行乐岁月追思仆旧游台府诸贤皆具眼相知应不待相求

寄题春谷工部自心田一首

笔耕虽苦未逢年解印归来且醉眠谁毁谁誉平眼界我疆我理自心田庵无宝贝主长在家有诗书种已传遥想个中梨枣熟饱餐且作地行仙

退老吟

圣絶微言大义乖六经犹幸出残灰知行大学工夫密理欲先贤体贴来岁晚筑场多识赐早年陋巷屡空回同门人尽师资远退老西河只自哀

读子厚李华释氏二碑作

佛学纷纷半是非若爲疑议到昌黎柳推性善碑南岳华指心宗传左溪有诞有微须自别或排或赞摠非迷痴人但道书皆好读得明时论易齐【藏中诸经皆可翫】

吕洞宾生日

瓣香知敬自童儿梦得先生笔一枝老愧乏才疑索去少曾耽句岂能奇犹传薛荔图中像【今在东林寺】那见榴皮壁上诗此日殷勤加额拜人间说是降生时【余十岁梦真人以笔见予家传画本乃模李祖母家真人自画像也】

得安溪书知义役义舟图册已成喜寄二首

山邑煎熬百弊俱就中二事最堪吁小船有限家家占役户难差处处无惭愧痴儿差解事编排册子见成模从今溪运均输去朱记还闻徧十都

邑苦如滩险渐夷翁犹怵怛爲怜儿人生要有余无尽公事元非了是痴二籍幸成吾所职一毫自喜道之亏药中最是醍醐毒着眼看渠道好时【喜一作眩】

有警示训

不比深山空谷翁人间冤债日相逢大须勤拂当台镜莫道南宗笑北宗

种种心生种种危急须毒手下钳槌要令独坐空斋里打出人间万弩围

紫霄岩作

紫霄闻久真奇胜三友同游亦不凡满袖清风来缥缈衔盃落日踞巉岩客携老艾遗书至僧
诧沧浪古字鑱大小壶山俱翠碧谷青平处见归帆

和平父游紫霄韵二首

杉松夹径去犹远桃竹随人强自撿水界平田疑刻画烟笼远日状琉璃何波爲续游山记好
友先吟访古诗清思如君真可爱行须入赋万年枝

诸贤盛气趋华毂一老闲吟乐老盘旧友醉乡祇白堕新衔散地号黄冠束刍已了林宗吊孤
石因陪子美看絶顶洪崖肩可拍乘风何许觅还丹

送方潮州

中朝人物久无俦何不容渠侍璫旒直疏勇于丹凤阙勅书去管鳄鱼州名高北斗知相敌吏
问南宫莫苦留召节鼎来宜略住郡贫民病待公瘳【吏问南宫刘梦得语】

寄安溪

书判可传今几录就中亦有客先夸强宗理化知无薤住处名香可当花案牘正劳诗倚阁扁
题俱妙篆名家新来一事翁尤喜看小孙吟寿阿爷

和山中后社韵一首

君家文曜授翁诗椿老还如窳有仪枕膝固应传已久趋庭岂待问方知山中香火留吟处殿
下云屏有隔时愧我衰残谁伴侣但寻莲社守禅规

六月十日晚饮呼行祖共吸荷盃

寂寂长闲日炎炎酷暑时纳凉惟竹共对酒得蔬宜韭嫩须新剪菰甜要旋丝荷盃时一吸聊
与小孙嬉

偶成

老去溪干作钓翁心闲无事与僧同梦回喜见晓窗白旱久愁看暮岭红案上旧书因暑废樽
中美醞爲贫空不凡不圣伊谁会别是吾依那一通

喜雨【六月二十日】

閩南爲雨久嗟吁守令焦勞已月余兒在藍溪祈更苦翁緣忧旱又忧渠

黃蘗山前五百仙諸村迎禱過溪邊陰云竟日涼如水不待仙回已沛然【十九日】

曉雲如墨幕諸山飛瀑傾河頃刻間一喜令人無着處長歌欹枕听潺潺

望望藍溪未得書痴兒見說爲齋癰逢人多問南來者紫帽山前雨有無

志喜【廿三日作】

溪邑兒因旱久勞正愁無處問如何童奴忽報行人說中澣泉南得雨多

瓶中指甲花初來甚香既久如無之

胆瓶花在讀書床坐久看來似不香便比古今求道者學成却與道相忘

溪橋作【廿八日】

聞說溪流漲看來勢漸停雲籠山際白水沒野畦青旱久知天悔祠多詫佛靈老農忧雨過四望尚冥冥

連日雨驟頗以關心【廿九日】

旱余虽喜見滂沱可奈連朝不已何萬事人間如此雨無時太嗇有傷多

今日多愁後日慳晚田要見是秋殘過猶不及天誰管世事終求恰好難

前日苦旱禾恐立槁今雨太多已獲者生芽未獲者欲爛因叹耕者之苦輒賦一首

老守田疇正學耕尋思一粒也難成晴乾久叹頭未下雨過還忧耳漸生斗米三錢何日見五風十雨望時平村居飽飯猶難必更敢痴迷望糝羹

夜雨不止枕上作

得雨初愁雨暫停如今徹夜怕泠泠此心果是誰差別一樣聲成兩樣听

別梯巖

持錢老叟送公還詫說吾依好長官曰雨曰陽三載里如冰如雪一廉難新陂旧學鑄碑去瑞

粟嘉禾入画看截镫莫留休怅恨此行要看触邪冠

儿忝同升辱爱深诗情道气两知音衔盃欲挹浮丘袂倚杖长听子贱琴未别已愁残月梦相看难忍此时心我衰何日重携手有鴈南来字抵金

柴门四壁愧贫居惜别殷勤不可虚铜雀瓦存聊赠子金盃坡去好同渠掉头莫惜题新句敏手还看草赞书若见薇花烦寄语前朝学士已爲渔

溪干喜晴

陰云西卷去徐徐照眼睛空意豁如何处飞来双白鹭浅溪逆上小红鱼经风忍见折残柳饱雨欣闻暴长蔬新月宜人须痛饮南来况已得儿书

涵江山长韩同舍以先大夫障东志与所着反舌蝮蛙辨见示志爲改永阳县前之水欲流归巽因此下狱陈复斋有诗美之辨乃山长同六士攻丁相时避祸作也诸贤既分而跋之余嗇於文合二字共赋七言一首

永邑从前盛俊英谁家再世擅时名乃翁障水流归巽此士笺天拔去丁标美於嵇如鹤在文工似愈以虫鸣同时六士多翔翥事业轩轩洗耳听

山丹

秋半山丹树树空几回惆怅恨痴风那知九月明朝尽个个枝头数颗红

竹溪鬳斋十一藁续集卷五

卷六

[集部,别集类,南宋建炎至德佑,竹溪鬳斋十一藁续集]

钦定四库全书

竹溪鬳斋十一藁续集卷六

宋 林希逸 撰

杂着

日月食说【己巳正月九日】

日月之食见於历家其说详矣然其间有甚难诘者而昔之人未有疑焉虽康节以观物爲学亦不及之何也且日之与月皆行於天其光下济九州六合同一明也有时而蚀苟未至於尽三分二分以至七八光之在地初无亏损独屋上之罅窗中之窍其大如卵其小如豆随其分数皆有缺焉累百累千无不然者何野外所照远近皆同未闻某所某方有明有暗而此光所入独变见於窗屋之内此其难诘者一也又如木叶在林若与日月无预当其食时叶叶之影皆缺或细或大分数如之缺则俱缺还则俱还直干横枝却不如是此其难诘者二也而况月之明魄消长有时爲朏爲弦与食何异而诸木之叶独无此影又何耶此其难诘者三也余尝疑此有年矣夜来思之偶得其一盖日食必於朔月食必於望常时月体与日不同如镜之圆独在於望彼以圆光爲物所食故影之於叶亦如日焉朔望之余明有消长未全之明乃其正性譬如火之於薪多亦火也全者性之全亏者性之亏以食例之则非矣臆说如此未知然否并由前之疑姑识于此以俟来者

拟制一首

李全特追复彰化保康军节度使开府仪同三司京东路镇抚使依旧京东忠义诸军都统制

门下记功忘过君无终怒其臣立身扬名子欲致孝者父爰徇肯堂之请聿新告墓之荣犹有鬼神式时猷训故具官某姿函英杰识造高明愤时因衆怒以激昂提师决大义而去就涵养念累朝之赐杖策来归间关竭百战之劳纳刀自奋万人呼而枪急两河辟而玺来授钺登坛已视袞圭之贵书常作册丕昭彝鼎之勲俄?跋以失常怅幽明之遽隔猛知正朔想垂歿以有言陵岂孤恩叹自明之无益赖有传家之庆能殫报国之忠胙土分封既受功臣之誓奉先思孝必盖前人之愆悯其至情还以旧物仍改春秋之史式慰霜露之心於戏参合何归喜弓高之鼎贵山桑虽失怜平北之初心宠服涂芝报图结草可

尤揆父字说

梁溪文简尤公淳名法从也余生晚仅及识木石诸昆仲於端平间既而木石长蓬山余爲之属每会食退常与径畝独留木石喜茗坐半日饮至七八瓯平章诗文商榷今古乐甚人谓梁溪风流醞藉木石有之岁晚投闲溪上有以长邑令尹来访者语从容及旧事则知其爲直心之子直心於木石爲母弟风度甚美令尹颇似焉临别俄语我曰吾名葵而朋友呼以揆父未得闻其说愿有请余曰乡日者葵也鸿烈解尝言之葵者揆也郑康成於采菽笺之微而有尊物莫贵焉以道揆物学莫难焉仕则慕君学必乡道此士君子之事也闻君来此邑以才名选劳心於民事揆事必以理无负於家学矣积岁月之勤遡梯级而上进倾心以尽忠退揆事以尽职使上不负天子下不负所学则诗人所谓乐只君子天子葵之乐只君子福祿膺之君其有焉勉哉毋怠

二损箴

触物而怒非性所无爲怒所使则心爲奴能无固佳欲无乌可以渠怒渠无我怒我怒而及其伤必多是之谓忿有毒如刀我能自持则有宾主不迁者顔实圣所许易爲此训但曰惩之万古之病一字之医惩之如何以损爲益能如是惩无愧於易

可欲之欲字不从心爲心之害惟慾最深根阳根陰固有人理违者癘之迷则误矣三戒之一严於方刚能损而窒则仁之方矧是沈绵屡作屡止不早惩之身其余几病爲良药此语最奇药而不悟是则终迷我爲此箴以劝以戒古佛有言生死事大

迁老画赞

去五峯住五峯去空山饭半盂古寺香一炷不问即心非心莫管有句无句蒙头破衲老诵经此是残年受用处

幽化渊画赞

把数珠放初柄败衲枯藤古松幽径但知靠实修行不用谈心说性长年窗下一函经清晓佛前数声磬

上丞相劄

某日僭案钧严以封事副笺率易呈渎非敢出位嗫嚅忱以浅学虚谈欲尘信史其於事体颇有关繫实区区爱助之忠也近者又得其所上钦翘一书与所谓十说者未免再摘其最甚者以告且其十说之中无非常谈第一段谓之正天行数乃其异论之本也其言曰左旋称天左行西转过周一度右旋称天左行西转只是一周又曰儒家历家不明道以正经不按经以正历谓考四仲齐七政爲不足法舍本逐末至称天行每日只是一周某不知其所指儒家爲谁也按考灵耀之注曰天左行一日一夜一周天一周天之外更行一度孔颖达已引之而疏月令矣其言明白如此既曰一周天之外更行一度非黄校勘所谓西转过周一度者乎孔颖达

亦儒家何尝以天行每日只是一周耶况四仲之中星七政之往来诸家经解考订甚详场屋亦以发策何尝以爲不足法哉此其不学虚言一也又其所上之书有曰测验者所以候在天自然之象算造者所以立在人使然之法象者道之所以见法者术之所从生某又不知其所谓法象道术者何也张衡造浑仪置之密室使灵台观天者候星辰出入以应之是造法也亦观象也况诸史历志皆有求中星法求日月五星行度法算造者何尝不测验测验者何尝不算造以彼爲术以此爲道不知其何以别之此其不学虚言二也况文公尝曰天行过一度某自看得如此後来得礼记说暗与之合此汤泳所录也文公既曰礼记说有之而彼谓儒家历家皆未之知将谁欺乎由是而观非惟不见诸经疏解亦未尝读文公语录也又何以知文公之学乎置之史馆已爲非据又欲秉笔以志天文窃以是僭爲朝廷惜也不避譴呵与之辨析敢望特霽崇威俯賜鈞覽

橫渠晦翁所说

正蒙

地纯陰凝聚於中天浮阳转旋於外此天地之常体也常星不动纯繫乎天与浮阳运旋而不穷者也日月五星逆天而行并乎地者也地在气中虽顺天左旋其所系辰象随之稍迟则反移徙而右尔间有缓速不齐者七政之性殊也月陰精反乎阳者也故其右行最速日阳精然其质本陰故其右行虽缓亦不纯繫乎天如常星不动金水附日前后进退而行者其理精深存乎物感可知矣鎮星类地然根本五行虽其行最缓亦不纯系乎地也大者亦陰质爲阳萃焉然其气比日而微故其迟倍日惟木乃岁一盛衰故岁历一辰辰者日月一交之次有岁之象也【参两篇】

此段言日月右行甚明

凡圓转之物动必有机既谓之机则动非自外也古今谓天左旋此直至粗之论尔不考日月出没常星昏晓之变愚谓在天而运者惟七曜而已常星所以爲昼夜者直以地气乘机左旋於中故使恒星河汉因【一作回】北爲南日月因天隱见太虚无体则无以验其迁动於外也【参两篇】

此段言天非左旋乃地左旋所以常星河汉回北爲南其说近於盖天即未尝以日月五星非右转也故曰运者惟七曜而已

天左旋处其中者顺之少迟则反右矣【参两篇】

?此一章承前章之下所谓处其中者指地言非指日月五星也

朱文公语录

正蒙中地纯陰天浮阳一段说日月五星甚密【李阎祖录】此段本言右行朱文公以爲甚密则未尝不是之也

先生曰窃恐所谓日月右转者不是如此天行至健一日一夜一周天必差过一度日一日一夜周恰好月却不及十三度有奇只是天行极速日稍迟一度月又迟十三度有奇耳因举陈元滂云只似在圆地上走一人过急一步一人差不及一度又一人甚缓差数步也【廖德明录】

此言窃恐则非定论

义刚归有日先生曰公这数日也莫要闲义刚言伯靖在此数日因与之理会天度问伯靖之说如何义刚言伯靖以爲天是一日一周日则不及一度非天过一度也先生曰此说不是若以爲天是一日一周则四时中星如何解不同更是如此则日日一般却如何记岁把甚麽时节做定限若以爲天不过而日不及一度则?来趲去将次午时便打三更矣【黄义刚录】

此数语乃辩伯靖所言之非今史馆书援以为证

程子言曰升降於万里是言黄赤道之间相去三万里天日月星皆是左旋只有迟速天行较急一日一夜绕地一周三百六十五度四分度之一而又进过一度日行稍迟一日一夜绕地恰一周而於天为退一度至一年方与天相值在恰好处是谓一年一周天月行又迟一日一夜绕地不能匝而於天常退十三度十九分度之七至二十九日半强却与天相值恰好处是谓一月一周天【周谔录】

程子所言升降三万里乃是郑康成南戴日下一万五千里之说今语录以为黄赤道之间恐门人误记也但此言月行一日一夜绕地不能匝今史馆书以为月亦一日绕地一周

黄校勘正天行日行月行度数

正天行度数一

【左旋称天左行西转过周一度右旋称天左行西转只是一周】

易曰天行健不知何如其行健也按今秋分戌初斗宿二十度午中南见午而未未而申申而酉则西没矣自西而北自北而东自东而南至次夜昏时戌初斗宿二十一度午中南见又次夜昏时戌初斗宿二十二度午中南见每天行一周再过一度是一日之健也天行二十九周半再过二十九度半是一月之健也天行九十一周又过九十一度三十一分二厘半是一季之健也至於三百六十五周又过三百六十五度二十五分差劣则足二十四气而成岁矣儒家历家不明道以正经不按经以正历反谓考四仲齐七政爲不足法舍本逐末至称天行每日只是一周不知每日中星何爲得过一度每月中星何爲得过二十九度半每季中星何爲

得过九十一度三十一分二厘半至越四季则过三百六十五度二十五分少亏每日过一度处即造化所以成岁功者昔朱熹学者谓天西行一周熹曰不然若以爲天每日只西行一周则四时中星日日皆然何以纪岁此天行度数不容不正一也

正日行日在度数二

【左旋称日左行西转一周右旋称日右行东转一度】

按今秋分日出卯正一刻初历辰巳至午中二十五刻以中表影验之午中正到中表过午未申至酉中二十五刻日没入夜酉戌亥至子中二十五刻夜半过子丑寅卯二十五刻日又东升是一刻日行三度半十分度之一又百分度之五分二厘半百刻日行三百六十五度二十五分少亏今日午时正中表影至子中无分毫欠缺次日午时正中表影至子中亦然以至无日不準洪范称日行则有冬有夏冬昼短夜永夏昼永夜短时有冬夏刻无余欠此日行之度也天一昼夜行三百六十六度二十五分日一昼夜行三百六十五度二十五分每日天行健一度日在次度次日天行又健一度日又在次度以刻论之一刻在一分百刻在百分共成一度礼称冬至日在牵牛夏至日在东井春分在娄秋分在奎记称孟春日在营室仲奎季胃孟夏日在毕仲井季柳孟秋日在翼仲角季房孟冬日在尾仲斗季婺女此日在之度也然当在某宿几度与不当在某宿几度今之在昔之不在昔之在今之不在如尧典四仲中星今皆後二十四度如月令孟春日在营室今不在营室孟秋日在翼仲角季房当时已差记月令者莫觉其非臣所经当以道正历当以经正也考之历经称日行某宿几度乃日在某宿几度以在爲行是爲失之此日行日在不正二也

正月行月离度数三

【左旋称月左行西转较之一周不及天行十三度日行行十二度十九分度之七右旋称月右行东转十三度十九分度之七】

按仲秋初一夜昏时戌初当斗宿五度到中表其日日月合朔於昼午初一刻翼宿七度内其时合朔日在日中合朔後月每一刻行三度五十一分八厘八毫一杪五忽又一忽之七分八半至戌初已过二十九刻月已离到翼宿十二度自初一戌初至初二日戌初足一日计百刻月行三百五十一度八十八分一厘五毫七杪八忽半每日共不及天十三度十九分度之七其时斗宿六度到中表月已离到轸八度至初三昏时斗宿八度到中表月已离到角宿三度以次离到後月初一乃离一周又二十九度半则再合朔在轸宿十七度凡自东而西即月行之度自西而东即月离之度一刻离十三分有奇百刻离十三度有奇洪范言月之行则有冬夏周礼称春分月上弦於东井下弦於牵牛秋分月上弦於牵牛下弦於东井此月行之度也洪范言星有好风星有好雨月之从星则以风雨故月离于毕而滂沱月离于箕而扬沙此月离之度也後之历家称月行十三度十九分七乃月离十三度十九分七以离爲行是爲失之此月行月离度数不容不正三也

此校勘黃兄所進十說之三也余向在番嘗以封事辨之已見前集又有廟堂一書偶得之敗篋並取而錄之恐異時黃說不傳何以知余之所以辯者是猶訟者之兩造也知我罪我付之後人吁余豈好辯哉予不得已也咸淳丁卯十月

竹溪鬳齋十一藁續集卷六

卷七

钦定四库全书

竹溪鬳斋十一藁续集卷七

宋 林希逸 撰

少作

金天移文

【时友人以丧偶自号在家僧戏作赠之嘉定庚辰】

金天宝界竺岭玄云飞轮驰骑曰我访闻有人下土口业云云期申峻约爰勒移文夫空桑孤特之流超尘迈俗之相脱苦海以冥搜小人寰而遐想此固人间希有上士也至如色界沈昏爱河汨处投之埃氛昧此宾主虫窠蚁穴之中蜂雄蝶雌之侣迷以执迷谁谓荼苦下愚之常我所不数其或身被绚华心厌尘浊乃求道於玄微知用心乎寥廓悼世网之莫逃具禅心之先觉有若宋人谢康乐者我西竺所谓在家菩萨也亦其神超识到烛道所在不沈於己昏不溺於可爱虽非妙达於根株是亦粗得乎三昧若是者亦足尚矣今有海滨俗士陈某者窃其名而强自号曾不逾时迹与心背破玄门之规犯前修之戒惟口是而心非故前贞而後败盖其始也燕孤无偶鸾只不双粲虽不哭岳实悼亡霜寒冬瓦月冷秋床情凄凄而易感哀续续以难忘於是借说空无纾悲寄意期以玄机祛此俗累昧生天之因窃在家之义诱我云月欺我松桂虽驾言於双修实撓情於秒翳然且和铅舐墨引类呼俦私相标置彼唱此酬演长句束短篇爲欺爲诞曰蹟曰玄自以证身如来可同李白思归兜率何异乐天使我龙象欢传法筵瞻仰以尔尘中人能作如是想奈何凡骨难医慾流莫断飞絮不黏泥蒸沙求作饭故七情作炎五欲交起见惑温柔顿忘法喜求卿卿之欢忽如如之理於是讴歌绕梁粉黛列屋主人之心日且不足何怀贝叶书有意采莲曲当尚子平毕婚娶之年叹牧犊子雉朝飞之独犹且续宝瑟之鸣弦粲洞房之花烛昔兮同世界於浮沤今兮忘泰山而逐鹿此时此心将玄将俗嗟夫禅关既键火宅自焚重将恩爱子种此忧恼根是岂不污我缁梵辱我法门使玄猿抱惭白兔怀耻恨斯人之我欺叹迷波之易靡然诗案具存前言在耳亦乌得爲无罪也已我缘此误惩艾永刼遂勅禅关具载玄牒嗟尔後來人莫造绮语业

问云将辞

玉融子以周瑜赤壁之年困不得骋神紆思结兀兀无聊欲访童子於崆峒求神人於姑射彷徨广漠之野忽遇云将天游於涂跪而拜曰先生至人也弟子幸矣得承下风窃有所疑愿从先生质之云将曰嘻何居乎子其语我来又拜而进曰方今荃宰道明衡阶正平登良选公越有常程垂髻者习史黄觚者谈经投卢擲雉摸索姓名幸而得隼羽翼乃成走也生不逢辰命

穷在斗挟傲世之愚昧适时之巧窥陈篇而不事钩纂味前言而不工雕镂年不後人茫乎何有处穷厄而不羞爲獐獭之所笑逝将改图莫得其要宁曲肱饮水以自足乎将捷径窘步以追曲乎宁捧心以效里妇乎将娥眉以受謡诮乎宁逆旅栖栖乎将执御扬扬乎宁爲泽中雉乎将爲溝上鷹乎宁爲饮啄之鷺乎将爲浩荡之鸥乎爲鱼而透网乎抑点额乎爲鷄而吐绶乎抑断尾乎宁看跼跼之鸢乎抑友昂昂之鹤乎抑佻佻倪倪以拯穷饥之水火乎将寂寂默默以保膏肓之泉石乎宁爲唐衢之哭乎将爲孙登之啸乎宁纵湖海之豪高卧百尺楼乎将学农圃之事退守三亩园乎宁沈诗於瓢乎抑诵佳句於左丞乎宁瘞文於塚乎抑持奏牍上公车乎宁藩墙置笔爲子玉乎抑簸弄排偶以爲摩空之赋乎宁拓落爲玄效子云乎抑破碎章句以明拾芥之经乎宁从八仙饮乎将食五侯鯖乎宁饱鱼羹饭乎抑擘麒麟脯乎宁安公居乎抑寄蘧庐乎宁樵服以候麻衣乎抑櫛具以谒暴公子乎宁披羊裘以独钓乎抑坐皐比以高谈乎宁爲盐车之驥乎抑爲文绣之犧乎宁爲宋人之迷乎抑爲樗里之智乎宁坐浣花之马羈乎抑披青莲之宫锦乎宁风卢仝之两腋乎抑梦陶翁之八翼乎宁荷渊明之锄乎抑枕祖逖之戈乎宁破戴逵之琴乎抑挝柝衡之鼓乎宁抱书以随半山之驴乎抑候气以逐出关之牛乎宁餐霞饮露以求轻举乎抑尝粪舐痔以希进取乎然富贵神仙恐两误乎宁饥吟困饮以诗酒自污乎抑熊经鸟伸以纳新吐故乎宁爲打锤义山乎抑爲曳裾邹阳乎宁爲书蠹乎将求禅悦乎宁蒙破衲以究三玄三要乎将繫芒鞋以待三熏三沐乎宁槌鹤楼翻鹖洲以快意乎抑营燕巢守蜂窠以苟活乎宁槁项黄馘以求其趣乎将抚壮弃秽而改此度乎路何识而可通身何居而可容宁爲工乎宁爲农乎岂数不终奇会有逢乎抑穷果有鬼不可送乎岂徒耸其肩以鸣不平之悲乎抑将假其喙以声太平於时乎孰从孰违何是何非帝乡不可期兮思誓墓之羲之世情祇益睡兮逝将访豹林而师希夷言未既云将掉头舞手抃髯雀跃而歌曰天浮乎地游乎百川东逝而斜河西流乎覆我载我劳我息我爲又何求乎天游起而和曰失我者竟知我者静世汨汨兮如轮我荧荧兮如镜彼大块兮何心孰爲吾之司命二仙三倡三和余亦涣然释怡然悟与之三歌而後去

孔雀赋

夫离合聚散悲欢怨怼之情非必含灵而具识者有之物亦与有焉而怀怅恨以相感者又非必有族类俦侣者也物亦我我亦物也奈何哉其相物也余往尝读鸚鵡赋戚然有得於余心及今而见斯雀也形神意趣高怀远慕怅然有异於常日故采其情而爲之赋以解之其辞曰

猗珍禽之何来粲五色之华郁擢双骹於空庭乃点首而彳亍【上音勅下音秃】角蓬松以特起尾纷葩而欲秃循堦除以数步味屡俛而不啄闯长径之肩肩【阙】四顾而疑愕虽樊笼之乍解不振迅而萧索长引吭以不鸣类欲诉於寥漠於是仆本恨人壮怀易感对斯禽而贻讶情遽集於所览谅中心之有违乃凭拊而问讯谓口噤以莫言请臆对而神应托玄嘿以【阙】听爰舒写於篇咏尔其产遐陬毓下土间洪涛越重阻三代唐虞此何处所更秦历汉哆意宕心珠崖拓郡儋象桂林重译累堠远极天南索王府之琛贡遂徵及於鱼禽惟斯名之一出故委祸而至今嗟彼巧匠胡爲肆情分雌雄而入画合姚魏以爲屏曾颜色之足眩乃晃耀乎丹青玄胡髯鬣亦以名经侏？【音摊】【天上】乃效予声又有伶人乐工夸训虫蚁对华筵之嘏【乌骨】嚟【巨略】呈薄技而披靡扬春秋植翠尾腾觚爵以爲欢在予心

而良耻於是公子王孙贪奇好异闻佳名而竞喜挥金帛以罗致嗟进献之有时柰斯求之无已惟蚩惟徭以货以市尔乃?嶠岩而爲弋冠云日以张置连柯结蔓以爲储胥苟一目之所暨貽碧落其焉如离俦失侶絕母弃雛怆哀鸣而谁念竟快意於锥刀之余於是委命归穷飘流万里闭以雕笼饲以粟米宁一饱之足谋怅吾生之已矣眷炎路以长怀感寒燠之殊气嗟俦匹其奈何痛天属之睽异虽五客之相从亦南北之殊类遇物感时相顾垂泪量陋质之?臊岂鳬雁之同味名虽载於陶仙曰方家之所弃何品别於盐凉又见录乎藏器曾祸福之由生恨不效雄鷄之断尾且其岭岫崎嶇林薄蒙密山风海涛昼夜逐擊动扞乎林根潰沫乎崇壁山妖木魅闪屍於其巔玄猿鼯鼠跼蹐於其侧尔乃朝飞暮翔羣聚卵息求偶命子节节足足纵流落而依人亦羽衣之僊客是余固不厌於危苦而无乐於闲逸也若夫芝栴藻井之华雕朱镂碧之饰触之而惊盼之而惕物固有所宜情固有所适矧才能之何奇敢无效而素食长締思以展转愈【阙】怀乎畴昔情靡乡而不凄况今夕之何夕陈情未既戛尔长鸣有怀余思尚托歌声歌曰寒月惨兮玄云愁叶岑岑兮虫啾啾故乡何许兮此淹留惟圣贤之羈寄兮哲智拘囚何微禽之足迷兮於天道而诟尤良委情以若命兮奈何乎休

见陈郎中【贵谊】

仁义道中提瓶挈水未有夙缘祖师门下拔楔抽钉请从今始言之似僭见则不疑虽未知际可之何如亦不厌略陈其所有窃念某滔滔碌碌怪怪奇奇虽少年不过作俗下文章而此心非止随人後选举自解芄兰之佩即贪贝叶之书然得禅关而不谈禅好佛书而不事佛尝谓佛虽诞而天下不知其所以禅虽高而天下不知其所高必见者自见而闻者自闻则非其所非而是其所是且形骸内也而佛以爲外食色性也而佛以爲邪以乾坤之德生生而湮盘之功灭灭有如此者谓之何哉盖百王之用穷而仲尼生六经之力微而释氏作仲尼以庄说而释氏以矫说仲尼化善人而释氏化恶人即其扶持诱掖之心推以恢诡譎怪之论?祓禳禳岂爲我辈设邪果报受持正与俗人言也其书固至矣尽矣不可有加矣其心亦愚之侮之而一切诳之佛之至意则无愧於孟子與佛之不恭则有甚於柳下惠然人知佛出於秦汉之下而愚谓佛始於羲黄以前惟精之道何心退藏之密何地独当时存而未显故圣人秘以不言盖帝王之世虽不容妖幻之谈而天地之间实难去清虚之说况南华之三十卷即大藏之六百函轮回化後之鼠肝死生梦中之蝴蝶一十六观晓然止水之鲙盘千百万身何异南溟之鲲化如斯原委不尽机关尝於中夜舞手蹈足而得之未肯向人倾肝露胆而论也兹盖伏遇某官性根福慧识本圆明具脑门眼而读书吐广长舌而论道藏万卷於椰子悟一见於桃花慙领使輶人谓西江之口吸少留郎省我知大地之手擎某纵迹虽遥皈依惟久自谓岭南之邑子肯爲城东之老婆横锡而来投机则住禅家相见以佛法何求蟠木之容此老未免有乡情岂弃浮萍之迹我闻如是於意云何

见林郎中【器】

浪次山之迹居怀野鹤之心顾伯乐而鸣犹窃骅骝之志谓蟠木轮囷归题品则簞食瓢饮又有依归爲此而来麾之则去伏念某赋材有限属兴无涯神散意散居然散人学穷行穷厄於穷鬼虽少年亦随人後科举然生平耻作俗下文章怪怪奇奇萧萧索索哦诗尽夜伴四壁

之虫吟得句空山疑一身之羽化第苦饥肠之煎迫莫能饱意於讨论雕虫之技未除妨人岁月盟鸥之约莫遂入梦林泉所以心迹俱违形神交诮虽读书二十年矣回视欲然便逢时万户侯哉自知明甚徒以斗升之计庶几铅槧之功然文辞既非场屋之章程而言语又有渔樵之气象顾自笑齐门之鼓瑟人徒惜伯牙之鼓琴方将效西子之顰又恐失邯郸之步飘零爲客空怀李白之飞扬涕泗交颐终悼昌黎之变化谁肯顾於盐车之下疑遂沉於涸辙之中兹盖伏遇某官学擅儒宗文名天下书藏富於椰大笔久梦於花生时辈标题好云破月来之句家传苗裔追影斜水浅之诗满城士夫而独有接後进之名当世英才孰不在弟子之列遂令疲繭亦起覬觎虽退量已分其於自视何如然今有仁人育之成材亦可一丝一粟我其杓之人邪三沐三熏则在鑪之间耳重念某世家藜藿门地冰霜窃尝比数於卿大夫见辱纪名於大手笔宗固殊於南杜念倪及於西华推而内之沟中岂不动匹夫之念引而置之门下若以爲俗客则非

代怀安林丞上杨安抚【诚斋子】

具位某谨熏沐裁书百拜献於某官阁下曰韩退之有言曰王公不借誉於布衣则无以广其名士不借势於王公则无以成其志愚曰不然此特其凡者尔若夫英雄豪杰之士又岂轻誉於人而借其势哉孟尝之门三千珠履识者不贵其客曰吾宁见简亢无所交接之李膺宁见填门食客之公子何者骅骝顾伯乐而鸣也填门之士鷄鸣者与焉狗盗者与焉彼虽简亢一登龙门非郭林宗则苟慈明矣某无闻之人也名叨於计簿而不上於太常之版籍厕於金闺而未脱乎奔走之吏仵仵倪倪於百僚之底蝇营狗苟於俦人之後视之若愚即之若庸亦孰知其胷中之有以也然某艾轩之裔也所读者艾轩之书所守者艾轩之道亦尝肩下僚於州县之间尾谈客於公卿之箔旅然而进旅然而退未尝苟有求知之念盖孟尝李膺之说有以錮其中也习闻前辈惟曰江之西有诚斋先生者其时与艾轩相先後而名过之某窃求其书而味其道尝曰生世何用早我已後此翁而竟不得俎豆於其门良可恨矣二十年又歛衽於公之盛名自南而来者曰龙驹也自北而来者曰凤雏也某闻其风而悦之每曰一代不数人百年能几见第惟鵬鷃低昂悬隔宇宙李星莫覩韩斗镇明守次家居惊闻邸报荷锄而知名者则曰福星照吾闽矣戴笔而知名者则曰南斗避文星矣某引臂欢呼顾朋俦而起舞私曰生平所愿识者一人耳谁啓其逢与名邑佐且密迹於耳目之前岂非木生於匠石之园璞入於卞和之肆乎及瓜竭来种竹已久虽尝屡至大府瞻望阶符而卑栖下僚谁复比数窃自谓曰荆山之璞凡夫失之则人不以爲毁誉而卞和不之眄则百年块石矣南岗之干庸工委之则人不以爲轻重而匠石不之度则终身凡木矣夫以下寮而过求干进固其罪也然与其见斥於自炫无宁委心於自嘿与其见诛於自进无宁絶意於自退进而自炫知与不知犹未判也纵令不知则曰不遇徒然自嘿则甘尘埃而分泥滓矣且使某而在远郭则已而在下邑则已麾幢节钺朝趋夕承而不蒙一顾眄之异他日明眼之士相遇於江湖必曰杨公在闽子师之云乎事之云乎仆将曰事之矣事之何如则仆将何辞以对彼必曰诚斋艾轩以道相高於南北子爲艾轩之末裔而不见录於诚斋之嫡孙子絶长者乎长者絶子乎某爲此惧故直然不顾犯严於斧鑕之下以待诛斥若曰爲邑貳於斯而求媚於上人以借势则非也辄采民謡以歌以颂列爲十章具于右幅又欲道其所以来之意不觉喋喋

十诗

止戈堂外戟森森画鼓无声昼漏沈好是风流贤太守空斋一片读书心
先生旧把钓鱼竿弄月云涛手本闲只爲春风藏不得却来摇笔对三山
千载斯文关洛翁祠堂新辟焕儒宫司南又是杨夫子管取闽中胜洛中
一样新缝战士衣指麾貔虎上旌旗太平侍从资文武肯向春风卧鼓鼙
一昨潢池波浪惊将军随手卷红旗碧油幢下诗书帅真个胷中万甲兵
听得溪边擊壤声年来官府是昇平吏呼不到韩卢卧整理犁锄待雨耕
春雨来看一派河却愁无地着恩波东风剩与栽杨柳留作甘棠去後歌
篇篇浑不费安排霁月光风自满怀岭海声名谁得似一家句法老诚斋
元戎根柢是公平玉肺冰肠彻底清一点吏奸无隐处逢人个个说神明
一持使节两持麾五岭依然双鹤归见说只今杨子宅庭容旋马地生衣

纪异诗【并序 嘉定十二年寓城中作】

岁己卯亢旱乃二月下弦之三日赤舌之崇自城东而来延连一夕燄灼不可向听自止天明
焰絕乃有破屋数椽屹然灰烬中问之则洒扫衢巷一贫妪也家无半升粟惟周身一具火方
炽以此祝于天而获免孩乎异哉是乌可无传也遂赋云

城中醺龙龙苦蛰城门夜开八人入粤从东关煽喊呀飞烟卷作半空霞祝融慄怒咋齿牙彤
幢绛旆纷要遮扶桑剥落喧撑义两岸炮焦几百家当时诸校阵阵来传呼数里声如雷州官
令严兵官急斤斧鑕锄勾纆集其奈枯河无渰汁炎曹横恣玄冥瞽天虽有泪不敢泣千人万
人瞠眼立扑之愈张听自戢就中那得十数椽败壁穿穴檐瓦悬四围灰烬渠岿然邻人惊怪
一郡传扫街老妪今几年只身穷独头如绵家无一孔破絮纏只余一棺候弃捐以此吁天天
见怜幽明之理岂眇绵天在屋头非虚言陆浑山火虽富妍无所劝戒何足编惜渠不遇昌黎
仙

朱典卿和章有结茅孤青之语戲爲古风以絕之【孤青艾轩拟小筑处也】

盥手捧诗神索索高怀细把重抽绎冥心不觉有鬼知消息漏传到姑射个中昨夜有使来梦

魂暗引飞双腋楼高百尺锦户开中有一人犹岸帙低头未敢问起居自言我是壶仙客紫薇花下引笑归世缘已谢来兹宅虽然旧隐也未忘离宫尚浸孤青碧侧聆有客身姓朱结茅準拟欺泉石山神火急报此间移文便已回飞驿冯夷奏记奉指挥严兵锁断青松壁公爲诗案有引连归到人间凭解释云渠姓字在天衢捡点不上幽人籍明年已着瑞鹤袍浪言谁与飞鳧舄便令勲业了鼎彝也莫迂我云山迹宇宙如今况未清经纶不任伊谁责更是蓬莱有新禁岩扃不许金?惜诗词固然多孟浪此事也须先禁格划然惊觉汗满身捉笔书之窗已白诗君从此莫戲谈恐有鬼神重听得

送王少逸还乡【己卯同出冬先归】

点点琼花上旅衣还乡心壮任寒欺飘零爲客看归客记忆来时惜去时家书一半凭君说客里三千尽梦随握手桥门重约在芒鞋莫便厌奔驰

中秋後三日寄吴景朔

离鸿影断中秋月病鹤心愁薄暮云爲语白莲同社友得君书後愈思君

寄橘与吴景朔

碧云愁望夕阳西好景无因与啜醅霜雨满林黄欲尽愧君书後不多题

病中送丘升叔复入广【是岁同自临安归】

出岭相逢话上京归鞍齐卸独南征风摇五两南州去月傍孤灯病客惊莫倚能诗心便纵大须力学眼还明无因别後知分寸得趣深时远寄声

美子论文见解深无端聚散苦难禁虽然後会刚期我忽漫离筵已着心穷杀昌黎缘怪怪谁怜子美独涔涔寒梅鬪雪看何处还忆花前抱病吟

游孤青作

野水茫茫去渔歌远远听醉酣觞大白乘兴棹孤青明月长如此浮云不暂停拜经遗址在谁与拾残萤

读史

有人读史不读经史在目前经杳冥有人读经不读史经有道腴史泥滓我云经史无异同八窗八面俱玲珑经爲律兮史爲案古来已断与未断是贤是圣何世无贤圣身全此身散既息而消消又息便是先天後天易何祸非福吉非凶何成非毁始非终西麟絶笔汉纪凤晋马食

曹江化龙千龄万载事不尽总是禅机与道锋乃知龐眉太史有眼目一家自作新机轴至今史法有凭?残书断纪收成束拘儒足足笑杀人白头苦向河汾续

秋日凤凰台即事

凤凰台着名以李翰林一诗也余思翰林题诗时台必不尔白鹭洲问之故老指点固无定所而三山则於此台望已不见乃远落於前江之尾若当时果尔则诗辞不应如此模写也谩刊正之以俟好古者

三山远落穷江尾一水横过接石头兰棹几双船细细芦场无数屋浮浮断云归去商量雨黄叶飞来问讯秋总爲登临能作兴若爲陈迹替人愁

王日起谋请乐轩先生主席其乡隐山堂喜以诗赠之

场屋时文百态新六经门户冷如冰江湖有客奔驰倦来问诗书向上层

论文欵欵细留心一点尘埃也不禁爲语隐山同社友读书根本是胷襟

相逢刮眼试金篦直下承当是嫡儿长恨马驹天下少汝今分骨我分皮

刘躔甫许以古诗集见假而竟不至代书促之

好书千束且万束前身後身读不足刘郎好古喜收诗一篇半篇惜如玉知君此性人所希旁人浪指爲书痴旁人肉眼君似月好句何从向渠说相逢剑客心相许青萍莫惜当筵舞

七月二十三日奉寄濂溪书堂吴景朔因讯旧游

闻向秋山苦读书吟中还解忆人无强颜爲客心何在忍病哦诗骨正癯明月青山追昨梦去年今日下姑苏长桥一带关心否问讯高阳旧酒徒

独夜偶成回文

身随影立孤灯暝杖倚人行独月明新得病形成瘦鹤乱添愁思惹飞萤

长门怨回文

伤情暗断恩和爱擦泪空添怨与愁霜透衣寒轻卷?月移窗去罢吹箫

竹溪鬳斋十一藁续集卷七

卷八

[集部,别集类,南宋建炎至德佑,竹溪鬳斋十一藁续集]

钦定四库全书

竹溪鬳斋十一藁续集卷八

宋 林希逸 撰

少作

春秋义 【兴化军秋补都魁】

三卜何以礼四卜何以非曰求吉之道三禘尝不卜郊何以小

礼有可止而不止者君子有以知其心之僭礼有不用而或用者君子有以知其心之疑甚矣人心之不能自秘也率然一卜而君子乃得以推原其疑僭之所由则是心所存人焉廋哉吾於僖公见之矣夫卜亦有礼也简之则失於慢繁之则失於渎一再之未止惧其简也至三而不止则渎矣僖公之於卜可止而不止岂非其心之急於僭欤夫卜则有疑也寻常则自信求异则自危禘尝之不卜安其常也非其所祀则危矣僖公之於卜不用而或用岂非其心之怀於疑欤春秋王政衰微僖公将以诸侯而僭天子之事其心虽急而又疑焉迹僖公之事求僖公之心是知法制之不足畏而犹惧神明之不可欺也公羊於僖三十一年传云云自图书演於圣人而天下有卜筮之事卜筮之道成变化而行鬼神也盖理隐於太虚而寓於神明太虚之理隐於人心而神明之道显於天下斋明盛服以承祭祀谁不知神明之可敬知神明之可敬则知神明之可信人心不能无疑而求信於神明此卜之所由兴也故凡卜不可渎而卜必有疑我之怀也将以求之神也始之从违犹未容已故必渎渎而再告之再告之从违而又审之则吉凶断矣是岂容更渎者哉曲礼所谓卜筮不过三者此也然我之自信也可以质之神也心之对越自己无愧尚何必喋喋而叩之既叩之是非而听之则必非安矣是岂为无疑者哉此鬳廉所谓不疑何卜者此也僖公之心何心也僖公之时何时也名分不存纪纲不正王章之不能以自用征伐礼乐其权同出二百四十二年之诸侯犹有以征伐自用者大柄既移其如礼何此欲僭之心所以勃勃不能自遏也僖公之卜何卜也僖公之祀何祀也典章虽乱法制虽亡王法虽不足以为惧公议虽不足以为畏而帝鉴昭明不可欺罔八十六年之祖宗未闻以郊礼自用者此日虽僭其谓天何此自疑之心所以昧昧而不能专决也僭有所不可僭疑其所不必疑既卜而渎甚矣僖公之不思也吾尝求古之卜矣易有再三渎者矣太玄有三经三纬者矣未闻有过是者盖祀神之礼不可以简也亦不可以繁也简之罪则慢神慢神为不敬繁之罪则渎神渎神亦不敬夫敬礼之本也曾为祀神而可不敬哉再卜而未已知神之不可慢也三卜之不敢过知神之不可渎也求吉之道止於是矣公羊据古以明今而断之以曰之一辞所以着僖公之急心也僖公之急僭也道非所知也礼非所知也再三而不已犹

庶几苍苍之或从不知神不可诬天不可欺四卜而不从上天之神明可见矣故曰事有可止而不止君子有以知其心之僭吾尝求鲁之祀矣前乎此者有禘尝矣後乎此者亦有禘尝矣而未闻有卜之者盖凡人之情於其常者安之於其异者危之心之安则自信自信何卜心之危则自疑不卜何决故未卜者疑之端也曾谓卜而无疑哉禘尝之不卜知其心之危也考鲁之祀尽於此矣公羊由前以证後而设禘尝之问所以察僖公之疑心也僖公之疑宜也禘所可用也尝所可用也僭礼而为郊恐神之或我吐是知王法不足威明鉴有可畏自僭而自疑人心之神明可见矣故曰事有不用而或用者君子有以知其心之疑经着其非而传发其义非惟有以察僖公之心而天人之道亦尽於此矣夫天有神明而人心亦有神明隐显虽殊而理实相因不能以间断僖公之不畏其心而畏天不卜于心而卜於天疑其不可而後卜卜之不从而後已是知天之神明而不知心之神明也夫人心本明昏之者有所惑也僖公之昏惑於僭矣僖公之疑觉之机也不知自觉而又愈渎焉僖公其有蓬之心也夫然公之在位犹一二年而终不言此者非王可畏而天可畏也嗣是而後有五卜者矣有用郊者矣卜而至於五渎愈甚也其欲僭之心愈急於僖公矣不卜而用惧不从也其疑之之心盖有惩於僖公矣僖公萌於前而子孙成於後周公其衰矣虽然四卜固非也使鲁而三卜则得礼欤吁传之言论常事也礼有之天子不卜郊当郊则不卜矣非所当祀而祀何取其得礼也哉禘固不卜也在鲁而行禘所宜用欤吁传之言失其义也礼有之禘者禘其帝之所自出非天子则不宜禘矣非所当用而用何取其不卜也哉学者又当详传之论而求传之失

第二道

名有公万世之所重者圣人之书法辞有出一时之所乐者圣人之述史此春秋之作所以辞严而事信也夫孰不名也而於季友曰季子一字之褒称万世之贵重

[集部,别集类,南宋建炎至德佑,竹溪鬳斋十一藁续集,卷八]圣人之书法宜不苟也夫孰不归也而於季子乃曰来归民望之所属一时之喜辞圣人之述史宜不易也贵名褒於夫子而喜辞称於国人季子其贤矣哉谷梁於闵公元年传曰其曰季子贵之也其曰来归喜之也意或如此夫经作於圣人固将以垂法也然其事其辞圣人亦因旧史以成文特加刊削耳文存而义自见圣人无容心也且夫名也者圣人之所重书爵书人曰名曰字圣人固不以轻假人一字之华褒不以加非义之人一言之斧钺不以及知礼之士此书法所以甚严而甚重也然其事则国史之所述其会其盟曰与曰及圣人岂得以私生义非弑而曰弑则以为诛心之法或与而不与则以为文实之异此辞义所以愈穷而愈远也夫春秋正名也亦述事也正名之不当固不足以为训述事之不信亦何以为经此季子之称所以垂万世之褒而来归之义所以着一时之喜也夫季子何如人也知国之将乱先之五年假辞而出季子知几矣知宗国之不可忘嗣君新立翻然而归季子知义矣鲁之国以季子轻以季子重鲁之君以季子安以季子危圣人之贵贵此者也国人之喜喜此者也圣人则曰季为宗臣也可以去则去而不留可以归则归而不怨卒能扶持国祚平定患难宗国不亡伊谁之力名所当归圣人安得而靳之国人则曰季为贤臣也昔其去我我何望矣今其归我我获依矣来矣我喜去矣我悲辞之所称圣人亦乌得而没之名为季子简册着荣着荣非圣人之所贵万世之所贵也来归之称如爱如慕非圣人之所喜一时之所喜也万世之所贵书法所以甚严一时之喜述史所不容

泯其辞如此岂不为严其事如此岂不为信此春秋之所以无异说也嗟夫季子何以得此哉曾顔荀孟之流则以子称此名不轻予也而季子得於圣人周公之东留则西人欲其?此情不易得也而季子得於一国季子信贤矣然则春秋外此有之乎曰有天王使季子来聘齐人来归子叔姬辞同而旨异

第三道

礼有不同意亦随异甚矣礼之不苟制也知其礼而不知其意非知礼也夫备物有仪谓之享燕乐相欢谓之宴仪必有节欢必相亲此之训示所以不同也知燕享之异名又知宴享之异意始可与言礼矣左氏於成公十二年之传着却至曰享以训共俭宴以示慈惠其义如此夫礼作於唐虞三代而着於六经愚尝於六经求礼矣虞氏养老以燕周享公侯有三享再享昌歆白黑形盐物备之享也厌厌夜饮不醉无归湛乐之燕也嘉宾之交际一也而礼有不同古人岂无意哉夫享以仪观而燕以情亲备物而陈登杀有数使之视而知共盈而不饮乾而不食使之视而知俭此享之所训也献酬之交错尊卑之忘分非慈而何俎豆之所交?羞之所逮非惠而何此宴之所示也享不徒享而必有训焉宴不徒宴而必有示焉则唐虞三代之圣人所以制礼者莫不有深意也春秋之世礼已亡矣荆楚何邦礼不及焉却至聘楚而陈之左氏作传而着之使礼意不亡於後世者二子之功也愚尝因是而求春秋之士其所以知礼者非一甯子之於卫知享食之观威仪叔孙穆子之於晋知饫尝之亲和同是皆讲求礼意不徒言者也虽然朋酒斯享曰杀羔羊享亦有示也鹿鸣宾燕讲道修政宴亦有训也是不可以不备论

策

分野

银河着象横首尾以经天水脉沿山顺高卑而流地星视河而分面势地由水以别陰阳此天文分野之所由辨也抑尝深考其来粵自圆明布位历象有司盖造化之机寓乎其喙言星则必言分传记所传虽自尧封閼伯於商丘使主辰然分野之说必非昉乎是矣自是厥後周有保章氏汉有孟坚地理志其详则蔡邕之月令其纖悉毫末则陈卓之州郡躔次是固其传历历可考也然竟莫溯其所由将无所据耶则员穹辰位犹人间也地之凝也固少天之覆也固宏拟之而议亦必有故是何吴东南而位星纪星纪东北也周土中而位鹑火鹑火南正也晋北赵亦北而或西正或东南郑中宋亦中而或东南或东正负海之齐而居元枵之北西戎之秦而在鹑首之维乾维不可以为鲁卫而为鲁卫巽维不可以为荆楚而为荆楚十有二次而仅一燕可言何以为据也将以为诬耶则荧惑之入其分崔浩以姚兴为必亡太白经其方傅奕以秦王为得位星孛大辰光芒及汉则鲁梓定四国之灾玄枵失次祸行其冲则裨竈指鸟帑之恶仰观俯察其验若神何以为诬也欲据之莫据之欲诬之莫诬之果何以为定论其分封之始断诸岁星之所位乎其南北之陆指日行以为次乎吁古之人其如有所至矣有以天河断两戒者至矣尽矣不可以有加矣且天犹卵也经星之次环其四周银河之所界者半其余则天市太微布列焉故二十八舍其附於河者三之二矣沿之河以分其势稽之紫宫以定

其余井井乎其条秩秩乎其次况夫广轮之数虽若散漫而天倾西北地不满东南则上下流之势自可考也江源河源截为二纪则南北之疆又不容紊也是故秦虽西而位坤维之鹑首云汉之升两戒之道也吴虽东南而位艮维之星纪云汉之降两戒之终也燕穷北纪之曲故以末????之析木为燕晋赵河陰之国故以上流之参昴为晋赵接紫微者为中州则卫非在西北也连太微者位纯阳则楚非居东南矣降娄玄枵与山河首尾相远非中州负海之齐鲁乎鹑火离正上接黄帝之祇非寒燠所均之伊洛乎寿星在天门之内则近畿者郑也何有於巽维大火布明堂之和则中州者宋也何有於东正盖以星河之流起於井終於箕则南者反北北者反南矣又自是而分内外则一彼一此皆有定论无复顾其方维四正也他人之见执方位而言一行之见反方位而言他人之见胶柱之瑟也一行之见脱囊之锥也传上世之微妙破万古之昏迷虽隶首复生无能易斯言愚故曰银河着象横首尾以经天水脉沿山顺高卑而流地星视河而分面势地由水以别陰阳此诚要谈至论也虽然一行之意盖亦得於两戒夫山川之论马融三条康成四列其分其合脉络不通疆理犹胶何以言星分惟一行之也断以南江北河而为两纪又以胡门越门而定两戒於是引之以合银河折之以论上下宜乎了然易明也呜呼两戒之论亦非强为臆说禹贡之言山也错综不一焉而南北曰导者二虽非言戒孰谓戒参之理而得其当稽之经而知其源故敢确然以复师问

离骚

闻之师曰不知诗之旨趣无以知骚之风骨不知诗之蹊径无以知骚之门户诗者骚之宗而骚者诗之异名也盖乾坤之宫商而寓以诗人之喙其写情寄兴多出於元冥罔象之中而言语血脉有不可以文字格律求者自夫诗派不传文习益胜辞尚於浮靡而不务於真实言出於口耳而不根於肝鬲流荡於风云月露之形祖袭於四六红白之体三百篇之义尚以章句训诂求之而况骚乎故夫天问近诬九歌似怪宓妃娥女非典谟所谈崑仑元圃非经义所载求於笔舌而不索於性情无怪乎昧真而失实也其或好名之士以文相高指瑕前辈轻议古人至又有援笔而为广骚反骚辨骚悼骚之辞者悲夫原之不遇也原宗臣也楚宗国也其爱君则鴟鴞也其伤谗则巷伯也怀黍离靡靡之忧有柏舟悄悄之念遭诗人之所遭怀诗人之所怀放言遣辞写心寄意非惟以鸣一身之忧亦以鸣宗国之恨非惟以鸣一身之不平亦以鸣吾国之不幸荃化为茅则惜芳草之为此艾也偃绳墨以改错则又不忍为此态也鸞鸟不羣蛾眉衆嫉余固知蹇蹇之为害而不能舍也故行吟非怨而人以为怨被髮非狂而人以为狂出处进退既律以圣贤之规矩而言语文辞又不免後人之指摘悲夫原之不遇也盖尝以诗求之静言思之不能奋飞非变风之辞乎原之所谓怀椒糈召巫咸者其萌芽於此也夫内怀忧愤情不自達驾言出游以写我忧而寄情於无何有之地此诗人之逸兴也何有於谲怪夫遭穷遇厄岁月易暮怀疑蓄恨委命於天而欲求讯於冥漠之内此诗人之真情也何有於虚诞且其驱飞廉指望舒兴言扶桑属意沅浦其兴若远矣而终篇乃有反乎故都之怀则其所以若谲若怪者子虚乌有之谈耳非真有涉於神仙之迹且其要灵氛召太卜属辞拂策驾意卜居其事若信矣而终篇乃有龟策不能事之语则其所以若虚若诞者假辞设问之类耳非真有涉於鬼神之事演而伸之触而长之则其所谓浇羿姚姒驱云役神者皆诗人之寄兴者也反於吾心苟有得於诗之遗味则当於此一唱而三叹矣又何暇议其曰经曰传也哉三百篇之诗出於小夫贱隶者不少而皆以经目之系辞之文古之大传也而槩以易经列之离

骚之曰经九歌而下之曰传又何足论也故夫求骚以文者不若求之以诗求骚以义者不若求之以情以文求骚则得骚之门户晁补之新序有曰离骚既作诗虽亡而不亡此知骚者而昔人之读骚至有以焚香者以痛饮者是岂可与浅浅者道哉故尝谓三闾忧愤之辞当与杜子美论不当与扬雄贾谊论二十五篇逸放之辞当与李太白论不当与班固刘勰论扬雄贾谊忧在一身而不在天下其行已可考也故指笑湘累以为其度未广托讽凤凰以为不避谗若夫一饭不忘君者又肯为此谈耶班固刘勰缀缉词章而不达比兴其文可考也故露才扬已妄致其讥不合典雅窃生异议若夫俱怀逸兴壮思飞者又肯为此言耶是故虽乏谏诤姿恐君有遗失此杜拾遗之诗也非骚之忧愤乎仰天揽明月散髮弄扁舟此李翰林之诗也非骚之放逸乎由此观之则信乎诗家之风骨蹊径与骚为同出也千载而下不遇诗人使缀文之士指议骚之是非未有一人如王安石谓刘向非强聒而实其宗臣之情也愚不敏尝学於诗矣敢以此谢明问

闰

戴履之民固有终身听用岁月而不知所以有闰者又有操觚握筭研精筭数而不知所谓本无闰者愚尝穷思有年矣窃有以得其起闰者推闰者置闰者而後知夫在天本无闰也起闰之法系於月行周天三百六十五度四分度之一日行一度月行十三度十九分度之七月常速而日常迟故三岁之久为朔望者不止三十六此闰所由起也推闰之术系於日法或以九百四十分或以八十一分最後又有千三百四十分或繁或约要皆定其余於二十九日半强而纽於周天之所未足者故有月余岁余之法此历所由推也若夫置闰必求之节气焉一气则十有五日而有余分常月刻皆未尽故有越岁而气未周者渐而积之至於月气之中者或加乎晦则闰之所在矣故曰校中朔以正闰分又曰闰月有朔而无中者此也虽然是特起於历家尔在天之岁本无赢分何以有闰人之为年也以月天之为岁也以气以日气始於立春则必尽之大寒而後为终也冬至日始牵牛一度则必复至於是而後为始也初何为而缩初何为而赢明生魄死系於我者也合则为朔对则为望渐近则受明离远则生魄我之行也十九周而彼生於我也二百三十五此历家所谓一章闰分尽是月自月也而为岁者如彼故常岁之日每求於周天之法而未尽乃以日行为余分是在彼者未足而以在我者为有赢古历所谓十一日弱者此也然彼之积余必於岁终也岁果自何而终自何而始尝试求之古今之历矣唐虞以前历不可得闻秦用颛历非果颛历也以其用水行合於颛帝故取以为名是古历盖不可考矣吾求之三正夏以寅商以丑周以子三代之岁首各异建子者则岁分终於亥而积为赢矣丑也者则终於子寅也者则终於丑在周为余商分则未余也在商为余夏分则未余也以其余之名加於我而所由余者在此在彼又无一定之论果且为有余乎哉求之节气莫得而余是之谓无闰且其於是岁也闰农时作息又常听於是气之何如析因夷隩乃在鸟火虚昴之候虽闰弗闰候常在也是则岁在天下本以岁不以月月也者有国者自为朝会颁正之节也故晋人有曰山中无甲子代谢自成岁以代谢而论岁则复何闰矣且历家之闰又取证於斗故有斜指於两辰之说冬至夜半是为构建之始始於子终於亥二气尽则一辰终初未尝少加进退惟其常月求之斗而有余故其积既久乃有回斡於二次之间者以斗而定闰则可以斗为有闰余则不可故尝谓归余之名不在於斗不在於气历家自为法也公羊释经谓天无是月非无是月朔晦弦望固有赢者求之二十四气初无余分也虽然於此又可

以窺天地之巧焉天之運不周於一周而過其周月之行不盡於可盡而為半強是則雖歷家之法亦造化自有不齊者潛思而默識之觀化之妙也先生曰古之業是者或有道不專乎技愚曰信然

太玄

博書着文千載而上有若揚子云者吾當斂衽矣讀書摘疑千載而下有若蘇老泉者子云當斂衽矣子云之文固不可以六經論亦自為一家之長勞心苦思理不足而才誠有余皓首之年羞與賈馬等列故搜奇摘異以盡其筆力之余健惜其閉戶窮巷載酒與游者獨嚴李仲光之徒無可商略一人獨見故不能無偏蔽使其有高見遠識之士相與細論一二則其成書必不至若是之疏故嘗因雄書而觀老泉之例未始不掩卷慨嘆而重惜其不遇也老泉之論大槩有二曰筮曰歷其於筮法也曰一仞之多不過乎六其餘可以為九而不可為七八不若再之則八仞之余四位自成着書之始不應有差必其傳之訛也吾固不以是疵子云而旦夕之用經緯之說與夫二六一九之數虛三於地以扮天之論是則子云之蔽也去其旦夕經緯之?而從其辭之不可以前定舍其扮天二九之數而正以三十三為不可加損斯論例之至談惜子云之不遇老泉者此也其於歷法也曰日書斗書而月不書則無以齊其不齊者定一朞之說於前而存五盡之法於後似若強存而無與乎其書然太玄以節氣言也一歲已成而千歲可致月視日而進退日書矣則月在其中五盡之說吾不以是疵子云獨七百二十九贊可以當朞之日三百六十四有半其不盡者四分日之三加以踦贏之贊而又余四分日之一是四歲而加一日也且玄擬易作也重以歷不足而輕加其書是為太初歷也是則子云之蔽也今以一百八分而為日則四分日之三所得者八十一加之其首而無贏求之於天而相直不必為贏不必為踦而歷自成斯為論例之巧說惜子云之不遇老泉者此也蓋自三聖絕筆之後虛空之間是數猶有所未盡者子云之書一而三三而九九而二十七二十七而八十一是或一數也黃鍾之長八十一分則是法蓋始於律河圖之數藏十用九則是法亦得於河圖故列之成書散之為圖整整而可觀子云之文筆自聖賢不作之後誠為獨步當世研精覃思有得於是借之以摭其才雖未免於好名之累實苦學之用心獨其考論不精故有所不必強而強為者夫易之於筮特因是以神明其德於六十四卦初無輕重六日七分之說不見於大傳是特起於後人縱出於後人亦自然之數所配合耳而非其?心雄也何必胶執而用力於是耶使雄有得於至理借是以為書不為乎占不詳乎歷將不為玄邪後之人將以求筮也曷不為易之直且徑而奚事於玄之紛紛將以為歷也曷不為易之流且通而奚事於玄之拘拘雄之心將以追蹤古人而刻画嫫母唐突西施反以取識者之笑然雄之書亦未易侮理不勝詞固其文不能如大易之天成而莊騷之下誰可與并驅爭駕今觀其辭如曰陽氣潛萌於黃宮信無不在其中又如曰月闕其博不如開明於西險古奇異豈耳目所易到之語海水羣飛誠狀物之至工侯厖厖天扑其顙寧非措辭之極到使雄能脫然自為一書祇以文鳴誰敢輕議凡其自為抵牾者皆雄自為拙也故嘗謂太玄一經後有子云者作復加刊正真可以抗衡於後世作者之上請試言之說卦雜卦乃聖人紬繹其所未盡者玄何必仿乎則沖可去也錯亦可去也文言大傳乃當時議論之所及者玄何必仿乎則攤可去也瑩亦可去也玄文亦可去也無乾之四德則何必為罔直酋蒙冥無十三卦創物之義則何必為元掄無八卦自然之象則何必取五行之常論而及形色聲味之繁且碎也故其數可存其圖可存若此則不必存者惜乎

雄之无所考论而不遇作者也大抵一人之见自非大圣大贤则不能无所蔽老泉之言着论将以子云复生当无愧乎其言而方州部家之筭紬绎於太元所未尽者而为图自五十四至於三部之筭六皆以三乘也而三家之筭参则以两乘之是岂得为浑成而非出於有心况不尽之分归於羸踦者如故前之论以为不可加而又若不可去殆何为邪向使老泉以首加一分而算之则其余分难总九之半之终不可合又使老泉以踦羸为一度如所谓岁美四分日之三者而附之三家焉则三家之算又奇而难乘推之而又不合则是图似亦不必作也一子云着之於前而不自觉其失一老泉正之於後而不自觉其非後之作者有能刊之正之而存其余不以占不以历不附於易而玄自玄则论文之士亦安敢有覆醬瓿之讥

古封建唐藩镇

【阙】

距盖复得於羣雄之手而不止乎系组捧玺之日秦之郡县其果郡县乎七国之变倭以惩艾之失犹可也炎德既微刘袁董曹之衆尺攻寸取连城自固卒除鼎峙之势鼎峙之势方除而分裂之祸已起迄六代而後归一是非春秋战国之势乎故尝谓封建者天地自然之形也法虽立於古而非古之所能立制虽亡於秦而非秦之所可亡当其盛也虽封建未尝不郡县及其衰也虽郡县何尝不郡县哉唐人藩镇之祸浑然封建之势也方贞观之初世袭刺史之议纷然不已卒亦罢之节度之名始於永徽而景云都督复罢之虑亦甚悉也尾大之叹岂非监周汉乎然而河北一裂於因循之主背胁疽根终以促唐家之命八镇之雄更强迭叛或覲服而复睽或已平而终乱才如德裕空尔慨想贤如裴度仅亦一清此其可归咎貽谋者之不臧欤世之论封建者曷尝不曰狂羸贼之计乃自私不公之童心是岂後世之所可循者土地自有人民自保无朝夕苟简之谋嗣子传孙自貽家法必有丰芑燕翼之念与夫视官居如传舍凭熊轼如逆旅往来劳费道里憧憧忽略无赖岁月是计盖不同日语也反覆唐事果何如耶若夫咎之者则又曰髀相相依自貽问鼎之患胫股不称终遗腹心之忧是必罢置自我则可以操臂指之权更易不常岂复有抗衡之虑然而名虽不存形势若在孰能有之孰能无之盖尝因是而论之天下之势未始不可一也亦惟始终一也为君人者必当有以立天下之治不当求以制天下之势凡立治有二道其上也权其次也就日之民相孚於不识不知之中望霓之衆潜格於克寛克仁之际汝坟江汉之国虫鸣螽跃之情盖有不可得而遏者日临月照勲应丕僖虽推之而不去此圣人盛德事也固不可以是望之後世若夫枢机周密者必无耳目不及之忧权纲总揽者必有裁抑保全之策山东之祸不可以亡秦而秦亡於斯高之弄权诸雄之乱不可以败汉而汉败於阉官之擅政无弄权之杨李必无幽燕之师无害正之朝恩必无永泰之乱盘根仙李之祚所以终於蹙絶者实僖昭之昏庸躬招而已致也他何尤哉失在於政不在於制子厚之言犹信

竹溪虜斋十一藁续集卷八

卷九

钦定四库全书

竹溪鬳斋十一藁续集卷九

宋 林希逸 撰

少作

律

举天下之事若皆出於人为而实非人所能为也自无而至有自简而至繁由古及今变不穷而用亦不穷是盖自然之机行乎两间者也民生之初未能佃渔也而网罟兴焉未能耕种也而耒耜作焉服牛乘马则成致远之利剡木剡木则有舟楫之用是盖自无而有也始之为宫室也上栋下宇足矣而层台累榭丹楹刻桷後之宫室为何如始之为饮食也污樽抔饮足矣而鷄彝牺尊山罍玉瓚後之器用为何如是自简而至繁也无者未始无而终不能以不有简者不终简而终不能以不繁机变之自然非人所得而强有亦非人所得而强增也审乎是则乐律之变亦可以意通矣窃尝谓声与天地俱生有声则有乐且天地之始有风则有木风号於万窍则小和大和能言之类即具五音岂非律之所由兴乎嶰谷之管雌雄凤之鸣特其机至是不能以自秘尔庄子有曰乐出虚是诚至言也又其假黄帝之名谈大庭之事模写乎流光辉绰之声庄周其真知乐者也黄钟之九寸三分损一而十二月之律吕生焉五声还相为宫而三百六十音之法兴焉是犹未也增之以三变演之以八十四调伸之以百四十四律千有八声机愈出而变愈繁昔之无者非亏也今之有者非赘也昔之无者非未备也今之有者非有余也造化之妙游乎天地之间愈久而愈泄若是尔夫何郑译之说见排於当时而技杂?弄声多吴楚祖孝孙又见讥於後日译之说得於龟兹而孝孙之乐谓之杂?弄非诬孝孙也盖声乐之事非独中国有之蛮徼之间虽其分寸尺度与中国固殊而亦自有乐是皆冥默机契之地安得以蛮徼为俱非也且夫羌人之笛得於龙吟伐竹而吹其声相似此非一机之所寓乎伶伦之听凤其有异於是也由是而观则乐律不可无分寸尺度而非分寸尺度之所能为有其法无其人亦徒尔此议律之事所以啓後世之纷纷也故尝谓上党之黍不足以定律舜祠之管不足以定律非不足也无其人也得其人则牛铎可以谐声矣然则造律之法学者不可以不议如欲调律请俟其人

周礼

六经作於圣人非後世所可轻议也吁圣人百世师也使其果出於圣人之手又孰敢议之哉七雄之後合而为秦六经一厄天地之大变也坑焚焰熄而函关不守沛中刀笔之人但以图籍为急遂使三代之藏竟空於楚人之一炬是盖万世之遗憾者马上之治绵蕞仅存故学士多老死而残编断简虽得於壁藏口授之余自卜筮一编而外虽他经犹有可恨况周礼乎三

豕渡河子夏已疑於古史血流漂杵孟氏已辨於武成自秦以前且然尔况挟书禁令方除之後乎且周礼果始於谁耶刘歆唱之杜子春和之郑衆贾逵鼓吹之上下二千余季或以为周公太平之书或以为渎乱不经之典又或以为六国陰謀之作党同伐异互相矛盾或疑或信果何从而质之盖世儒之学周礼者有三解释章句不论意义一也古制不存独见不立苟焉藉是以订古今二也间有疑其一二之戾古又以为周公所作必欲牵而合之三也是以前者主之後者难之前者非之後者是之参订不审迷其指归所以徒为是纷纷也周礼果周公之书欤封建成於周公也武成有曰列爵惟五分土惟三而孟子之论亦曰公侯百里伯七十里子男五十里而周礼自五百而下乃有五等焉是何其戾经也而世儒方且有附庸之说方且有别创开方之说无所折衷何其缪耶周官一篇成王所作也六卿而上有三公焉有三孤焉名字具存职任尤重而周礼乃始於天官冢宰论道经邦燮理陰阳略无一语又何其戾经也而世儒方且以为?奄还丰之作正此书也何其踈耶周礼之不出於周公必矣其间盖有甚明者而世儒未之考焉孟子之生其去周末远也毕战之问井地已不得其详北宫錡之荅班爵亦仅闻其略诸侯恶害已而去其籍于斯时也已有斯言使是书果有耶则战国已去之矣岂特火於秦乎使是书果不去耶则孟子当见之矣何独出於汉乎此其是非一语可决善乎汉初诸儒之明经也五经继出并已名家而周礼独得於献王独藏於河间岂非知其非是欤治礼诸儒若高堂生二戴氏曲台仪礼皆入讨论岂有周公之书仅藏於秘府而不之见抑亦知其必非是也建元而後虽曰表章六经而博士之立惟五则其所缺盖可知矣使是书果出於周公欤则汉初耆旧必有传闻何不以足六经之数独待於刘歆而後出耶吁吾知周礼自歆始也然井田之制歆自行之而自败六典之法後周行之而亦弊唐太宗虽有真圣作之难而贞观所立徒为纷纷封建亦終於不可行太平之典独行於成周而不可推之後世岂周公误之耶周礼误之耶吁儒者论经苟未能以心为师以识为友以见闻为传注而区区求泥於纸上之陈言终何所折衷哉故历观汉魏以来诸儒传疏或是或非亦有可论者然其大本既失则一二章句何足云哉然则周礼果谁作欤古人有言曰得其时者无所为书为书者皆所为不行於今行於後者也周公思兼三王日以继夜握髮吐哺犹且不给何能弄笔而为是文哉愚意战国之时必有深沈多智之士隱伏而不见不得以自试於当世故泄其蘊以为是何休以为出於六国是也虽然此书固非周公作也若以不经而尽斥之又非矣何者唐虞而下至於春秋再变而秦三变而汉书籍不存无所考证其间更革之际犹有古制少存而渐异者於此尚可见焉今以宫正一职观之即书之所谓太仆正也冏命一篇即後世之所谓制词也岂其官果止於上士二人而制命之词郑重如许此其存古而渐变者也注者不知乃以书之仆正为夏后之太馭太馭中大夫也其官固稍尊其辞固宜重殊不知辞与事乖彼此不应实难合也至夫冢宰之长王官官聯之相统属兴贤之典考吏之法纖悉条理古意具存故曰周礼一书正可以观古今之变也使刘歆能以是读之则其所以尊信者亦何可厚非耶吁书之始於刘歆者有二周礼其一也左传又其一也左氏为不传之春秋汉人之言当矣然二百四十季之间时变所纪或合或离亦多可观者而歆乃以左丘明为之此皆歆之失也左传之为丘明亦犹周礼之为周公也後之学者苟能去周公丘明之说即以周礼左传而参古今之变则其书尚可贵也使刘歆而可作未知以此语为何如

论

文武之道大小如何

道散於天下惟圣人为全得之夫圣人道之极也正统之相传大原之相授则其心领神会於隱然胥契之地者意有遗世独立之妙而顾以得之天下何哉盖三材奠而人极立太虚存而万理具大而性命之精微小而日用之纖悉以差观之虽所得有不同要之无一而非道者前乎千百载之开端後乎千百载之授受其间圣人未作岂无间断不续之日而人心天理随寓随见语小焉语大焉不于其智则于其愚会而一之则是道之浑全者在我而昔人之所传者无复间然矣此非夫子孰能之此非子贡孰知之洙泗之初其相去亦邈矣闻知见知如出一轍斯道也何道也其得於吾身者即其存於人心者也其全於圣人者即其散於天下者也夫岂越宇宙而求之哉文武之道大小如何请以夫子之所得者言之圣人不作而道术为天下裂昔之谈道者有是言也夫以天地之纯神明之一而散於该博不偏之士贤者察焉以自好愚者日用而不知大溺於大而遗其小小局於小而昧其大犹百家衆技而莫之通亦诚病矣不思夫理外无心性外无道虽所得有精粗所学有深浅所造有远近而囿於宇宙之间者莫非游於斯道之内者也圣人而不作则已苟作焉岂能外斯人以求道而遯是偏以求全哉岩廊之授受人皆以其精微者言之而不知耕稼陶渔之始木石鹿豕之游所闻者何言所取者何善两端之执已於精粗小大者兼有之而羹墙之见特冥会而脗合尔知舜之为善所以取诸人则知夫子之传道於其在人者得之也且夫由春秋之未思镐丰之始其世异矣其事殊矣以其道寓於典则坎则纪纲文章荡不复存是盖未足证也以其道寓於方册坎则诗书未删烦芜殆甚是又未易证也宪章文武之事将孰从而求之其以智索之乎抑以象罔索之乎盖尝思之道存於太极而理散於人心家庭唯诺无非理也洒扫应对无非教也人心之所有岂以文武之存亡而或加损焉方其盛时汝坟江汉之滨虫鸣螽跃之妙成人小子莫不有德游女武夫亦知好礼周辙虽东斯民固自若也豪杰之士虽无文王犹兴好善之民岂以衰世而好暴乾坤未毁则道未息矣仁者谓仁智者谓智固其大也百姓用之而不自知非小者坎九畴未斲则道未亡矣有猷有为有守固其大也不协于极亦不罹咎非小者坎重爻之易虽存而人心之易尤显洪范之极虽明而人心之极尤着闺门夫妇之道岂亡於二南之既熄朋友兄弟之义岂缺於小雅之或废在人之理不可厚诬又岂容舍是而求文武哉由是而观则夫子之所以得之文武者即其在人者也文武之所以传夫子者亦其在人者也在人者离而散得於夫子者浑而全在人者有小有大而夫子则无复小大也不然老聃之问礼何意也苾弘之问乐何心也渔父之言何趋於下风孺子之歌何为而或听随取随得细大不遗此夫子所以备道全美也公孙朝之问端木赐之对不曰在文武而曰在人不但曰其大而亦曰其小此非深知传道之妙者未易及也或者不察以为圣人心传之妙必超然絕异故道在迹而求诸远事在易而求诸难意者吾非斯人之徒欤此非知圣人污者也庄周一书着方术於其末且曰一偏之士判天地之美故内圣外王之道闇而不明是以斯道之涣然者为可叹也而邹鲁之士独不列於诸子乃以小大精粗无乎不在者归之其意盖以推尊吾圣人殆非无见者吁周豪士也亦在人贤者也不幸而出於文武孔子之後得其大而遗其小故其书未免有所倚焉使一及圣门之炉锤且庶几矣惜乎周之不得为全人也故并及之

续诗续书如何

圣经之终始盖与造化参焉非人力所能与也夫圣人作经非以自求名也古今天下有不容无者圣人亦不得而自己也造物者发其机於千百年之前圣人者成其书於千百年之後圣人与造化相为期也是机既息虽圣人复生亦无所措其笔矣况区区言语文墨之士哉王仲淹正世俗所谓书生者沾沾自喜於笔舌之间而乃欲僭躐於圣人之事业通真不知量而亦不识诗若书也续诗续书如何请得以穷其说凡古今天下不知其几人也亦不知其几书也要必天下不可无此书而後谓之书着书者非苟以自鸣而已也两间之内有人道所不可缺者待其人而後具也周易待文王而具者也春秋待夫子而具者也遭其时适其事圣人有不容已者是则造化之机自动也自有帝王以来则有典谟训诰誓命之文虞夏之浑浑商之灏灏周之噩噩历一世而机一变文侯之命周书絶笔矣书也者岂容有不定邪自有性情以来则有咏歌嗟叹之辞国风雅颂正声谐韶濩要妙通鬼神浑浑若天成浩汗若河汉有非人力所得为者文字之机千余年之所紬绎啓露王政熄而声诗亡气将熄矣则诗也者岂容有不删耶使其未容删定也虽圣人有不得为者至是而不容已矣则圣人岂得以泥其意好名之士以是为圣人求自见者则误矣嬴颠汉起天地之间断一视前古盖梦不及矣虽使圣人复生於周隋之後祇亦重加慨叹而已王通好古者也立身行己虽拘拘乎规矩绳墨之中其视圣人奔逸絶尘之事盖瞠若乎其後其守经执古正所谓书生者人苦不自觉而以皇极自负荷乃曰千载而下有绍宣尼之业者吾不得逊也故书可定也我亦可续也诗可删也我亦可续也书有典谟训诰我则为四范七业也诗有比兴美刺我则为四名五志也书始於汉则曰六国亡秦不忍闻皇纲系於此吁使无续书史文阙载乎诗备於六代则曰仲尼三百始终乎周若然则遗殷颂矣且所谓六代者以正统在也晋为中原之裔後魏据有中土隋氏混一区宇犹可言也若南宋若北齐若後周无异齐梁陈隋之篡窃者何可言也必也正名乎名若是矣奚其经且通固知後世不若唐虞三代矣而又取其文以续前作将以其文可续耶抑以其事可续耶通之中说盖将以发明其着述而乃模仿於论语之文仿规为员模矩作方而无一出於通之胷臆而徒掇圣人之句法以为能将以求其工适足以露其拙耳通盖知名可慕书可作而不知六经非夫子之经乃天下不可无之经也夫子之经行而诸书尽废通之续经虽作而诸史自不泯则通之书赘也故凡通之所谓元经者礼论者乐论者并足以发识者之一笑耳盖自汉而下着书立言之士以实事为书则仿史记班固以下诸史是也以空言为书则仿论语扬雄之法言是也诗书春秋皆史也迁易而记传迁诚作者班固以来不出其篱下矣荀悦孙盛虽僭拟编年并亦沈没不显是迁法不可变也通之续经祇史耳又曰史之失自迁固始而自拟经通之见正与扬雄同科然雄之法言固浅陋可笑太玄一书虽曰拟易其自立机综大有可观通又不及雄远矣庄周异端也其书虽诞谩要亦自成一家而乃慨然以六经为先王之陈迹是岂为续经者耶周之言固非格言也与其为通则豪杰特起之见吾於周斂衽焉

尧汤备先具

圣人居两间辅相之任所以赞造化於不及也盖理数之或然虽天地莫之违而圣人成能者也於其莫之违之际而有以用其穷是则与造化相为功也故有天之天有圣人之天在天者有时而不及在圣人要无时而或穷苟为漠然而信其自如则与时偕极者矣尧舜备先具之意盖若是夫天下未尝无数而圣人亦未尝言数盖盈虚消息者在天而辅相裁成者在我天

之所以立司牧者亦惟求以济其不及耳苟吾无所必然而乃听其或然亦非天之所期望我也夫陰阳之气在天地之间不能以不戾天亦非勤恤我民至是则非天之所及圣人者非惟以与偕行偕极必有以济天之所穷而浮於天时乃可以对越而无愧此所以有备先具之说盖天能生物不能主是物民知用物而不能节其用圣人者代天而相民者也故备之於未然而若迂济之於既然而若神昔之人有行之者尧汤是也我欲观尧政帝典无足稽焉吾求之下民其咨之日我欲观汤政商书无足稽焉吾求於六事自责之时十年九潦我闻惟曰用鰥无成而耕田凿井之民不闻有饿莩者七年八旱我闻惟曰承桀余殃而责若草木之世不闻有菜色者使尧汤而无所备吾将见如後世之移民移粟者矣否则如後之靡有子遗者矣王制曰三年耕余一年食九年耕余三年食无三年之蓄则国非其国王制之书虽出於秦汉之际其事必得於传闻者尧汤之事其若然欤易於益曰益之用凶事象曰固有之也当益之时而为凶年之备虽凶年吾固有之矣吾何虑为盖圣人於司徒养民之政亦先之曰荒政聚万民是必非遽行於一日者仓人廩人所备而无其素则虽有是政谁无是政周诗有曰我取其陈食我农人此陈陈相因之法也此非周人委积之政欤唐虞三代之始相因者也由周即商由商即尧则其事见矣吁圣人非特为有备无患之术而已圣人之心盖以天之责望於我惟宠绥斯民耳或然之数天无以用其穷而吾又无以相诸天是则非惟君惟长之责後世常平义仓之说盖亦尧汤之遗法而孰识乎尧汤之用心吁

汉之为天数者如何

论一代步占之学而取其有益後世者言之此儒者着书之盛心也夫步占之学其传尚矣自史氏之书志作而其人始详苟非学术之精微可以推行於千百载之下岂肯私其姓氏而着录之哉且夫天人之相去其间至辽邈也是非得失之证於其星辰之变而示焉於其风云之候而示焉冥然相与之机盖有甚於告语者而人不得以尽知之於是能者出而名斯世知星者若而人占气与岁者若而人大抵以其未然者而推之於将然其所以为天数者诚精矣儒者取其源委而纪录之使後世因其休咎祸福之言得以为恐惧修省之地是盖为斯世赐非为斯人赐也天官一书子长所深注意者而天数之学独有取於唐王魏三子此其诏来世之意远矣汉之为天数如何请申其说盖尝求是说於羲黄之前矣甲子起数星传有书言天数者未尝无其人也然大挠隶首姓字虽存而其法与八索九丘俱无传矣至虞书而後羲和氏出寅宾寅饯之职平秩平在之分四仲必殷中星必考抽关啓钥条目具详於寂寥简短之书而此事纪载独备使百世而下谈天文志星历者莫不祖羲和而言之然则仲尼之叙书其法固已如此况後世之作史者乎子长史氏之宗也龙门之父子其????本出於重黎而文史星历近乎卜祝当时或得以厌薄之藏山有书迂所以寄其愤者不少而天官其大者焉一时莘莘大变有如平城之月晕元狩之蚩尤荧惑之守招摇之葦皆正色直书之而修德修政之事且拳拳於其终原迂之心无非推明天数之微昭示来世之戒意其史笔之着录必有大过人者今也指其人而称许之独不出於是三子迂果何见哉彼三子者何人也太初造历都以方士应诏其先盖隐於民间尔周南留滞之人千载未易多得而乃受学於都都亦伟人矣子长述都之事而又列朔与鲜焉由是推之则三子之言数是皆当时卓犖着见者也今以其学术而观之星躔有部自商丘主火之日说已定矣而都之推步深微奥妙有非射姓輩所能及其术何精也云气有候自楚人论夹日之应法已详矣而朔之占视独决於日旁实息虚耗毫厘不

能遁其术何约也以至岁始有占冬至有占臈之明日又有占无非卜岁之丰俭者而八风从来各以其日木饥水毁推验若神鲜之术又何其简且当也三子之学抑有自来矣九州封域各有分星以观妖祥此保章之法也而都得之五星十二风以卜水旱一禋二象以卜吉凶此保章与眡祲之法也而朔与鲜得之以千百年占天之秘而发明於汉庭三子之间迁之许可岂轻及者异时蔡邕陈卓之言分野张衡马绩之论星躔与夫晋志所纪之杂占刘勰所集之妖氛寻源泝流无非祖述故智而已然则三子之言天数其为後世赐深且远矣岂特汉耶不然艺文所录有如淮南泰一之书常从国章之书无非占星候岁者考其人物皆在太初先後何独不得与三子并列哉子长纪述之意槩可见矣或者不知乃曰灾祥占应之说隆古未之前闻保章眡祲虽有其术而六典非周公全书後世已病之矣是何子长见之拘耶吁春秋非为星历作而纪灾异者过半洪范非为陰阳出而言休咎者甚详六经格言岂舍理以求数者诚以昭昭之鉴形於冥漠之中譴告之来无非仁爱之寓占天之法备则畏天之念兴纪变之书详则销变之政举人主之求天既不能自得於微密之际而步占之成法又视以鄙陋而不谈吾恐天人相与之机自是隐矣天官之作政为此惧也有志於当世者尚或鉴兹不然三子殆空言也子长亦有遗恨焉

以大事小者乐天

时变之来圣人安之而无所较者是其心泰然与万物同量也人惟不能以处变也故区然较是非曲直於其间而其中亦戚戚然无以自宁圣人有以见天下之理凡其或然者莫非自然之使然於是乎顺受而无扞拒有矜怜而无忿争时至事定而反其常则圣人处之亦安然已是故在彼者或去或来而吾之泰然自得者常无穷也此之谓以大事小者乐天请申之天下之事适来适去者犹蚊蠅鸟雀之过目也缘督以为经游心以应世者要使之无以汨其天和耳苟为容心於其中则逆我者触我者与吾鬪者角而应我在彼方来且不可遏而吾又忿然而不自宁则吾心终与物竞而莫得少释矣且夫观化最可乐也吾知其出於彼者非出於彼加於我者非加於我蟬蛻蝸翼以视世故则吾常洒然静然恬然泰然而无所忤有手舞足蹈而不能自己者彼何事与物相靡相刃胶胶扰扰而使之丧我耶昔尧欲伐宗脗胥敖南面不释然而问之舜舜曰彼二子犹存於蓬艾之间是虽庄子之重言亦可借是以形容汤文之事葛与昆夷犹宗脗胥敖也彼之不我服者是犹在蓬艾之间也汤也文也安而事之不欲与商略轻重犹舜之存心而非不释然者也方其自挟而邀於我也蕞尔之国以分则彼下我者也以力则彼弱我者也以德则彼事我者也声其罪而问之可以齏粉於一鼓之下而圣人之处心则以为天地之间一物一民皆吾同体彼之不自量而与我抗衡吾也不可形厌恶於其怀而锋刃之交又无故以加吾二国之赤子仁者岂如是耶且彼之为是勃勃者亦莫知其孰使也彼亦岂不乐安逸而为是自速亡哉是盖有物也而莫得其所萌凡吾适然而顺从然而应非顺於彼应於彼造物者至於是而不可知故吾且与之无崖且与之无婴儿且与之无无町畦雍容自得不与之争而物莫吾撓不与之敌而物莫吾逆此心方且乘日月而流方且挟宇宙而游方且泠然若飘瓦若虚舟真不知老之将至而乐以忘忧也迨夫征葛之师形於胥庆之余昆夷之伐赫然於一怒之日是非蘊怒而至是也是非宿怨而至是也盖天之未定也欲亡之或张之欲倾之或兴之吾未尝拂意於方来而未尝容心於已定天时之或彼或此而汤文之心则尝泰然也易曰齐小大者存乎位位者时也小大不济而齐之以其时则无小若

大矣於临有曰至临无咎是其事之适至虽圣人有不能违也然则事之者天也伐之者亦天也而圣人则常如故也是亦犹舜释宗脰胥敖而末年又有有苗之征也征之不待克而又班师盖莫违者机莫逆者时故圣人不凝滯於物而与世推移则亦何容知者耶诗曰不识不知顺帝之则顺之斯乐之矣文王然尔汤不然乎

竹溪鬳斋十一藁续集卷九

卷十

[集部,别集类,南宋建炎至德佑,竹溪鬳斋十一藁续集]

钦定四库全书

竹溪鬳斋十一藁续集卷十

宋 林希逸 撰

记

重造林岫斗门记

陂之有斗门犹城郭之有关也视时而纵闭之则水之赢缩在我而田常无害木兰有陂自熙宁始截仙溪以上数百里之流而横注之溉田余万顷是曰南洋下为斗门者三所以制淫涸之柄也莆之言水利者莫大焉然洋城东山二门有废有复具见图志独林岫名存事缺不载问之耆老则曰创於元佑而坏修於庆元又坏盖其废久矣毋动为大衆嗇弗图咸淳戊辰贤太守闻而叹曰治陂渠以利民古循吏事也是乌可已命僧计度之衆曰非芝楮六万不可公曰郡家任此第为之勿惮费於是里人作而言曰公意美矣吾侪奈何共裒万五千以经其始寓公林某方为延平倅亦助四千公曰吾以四万一千足之佣工饬材转海求石朝戒夕令且尝亲行以督之夏四月始作六月告成里人德公图为不朽乃列其事求记於余且曰此门雄於洋城东山旧矣内以受木兰漱漱不注之水外以御宁海昼暮暴至之潮内陲外遏工费已三之一焉然後左累右叠植石键者三之分为两门肩以横木仍旧制也又更为新意则有石柜焉有木柜焉昔之门其深以丈今增四尺焉昔之八字其迤踰丈今南北皆五丈焉散水之堤向广六尺今倍之迎水之石向高一丈今三之沈木以为基盐蜃以为固其防虑益周其心思益远是欲为千百年赐也公之治莆为民久计大率类此仁矣哉余因思古昔治田载於旧典其於水事尤悉畎浍之法既如画棋而匠人所书有曰磬折参伍者有曰为渊句矩者其文之工殆似画笔至於蓄水以瀦止水以防荡水以沟意其髣髴必如今之渠碣而独无所纵闭何耶果有之则其模写必有奇絶岂应略之非当时之智偶未及则中土平而水势缓也是以斗门之名不见於前古而创见於後世由今观之为此门者使神禹复生亦必以智许之然则限水以滋田者智也裕农以致养者仁也复其旧制而增所无原其初意而期之远是亦仁智之方也大书特书夫何愧顾余荒耄不称此笔姑纪其实云尔太守赵公与鉴绍兴人董役莆田尉权丞陈元英三山人登仕郎林应凤延平之子也涵江人僧则某寺无极也

岳安石桥记

岳安桥者璜溪吴君清承诸使之意而为之也辛酉某月始事丙寅某月迄工糜緡钱八百万初与道人谢有真俱谢逝君独任责衆初疑其难君极力以就事诸司亦有助焉君来求记余

既书其始末因为诗十章章四句以美之曰使云者帅古心江公万里漕松壑赵公孟传宪颐山家公坤翁先宪後帅者竹居王公熔也诗曰闽居岭间缘溪而路长桥短桥日凡几渡维此金沙有水曰岳伊昔梁之峙流而阁时雨之淫其喧如瀑壬子中秋一涨莫复臬使王公恻以衆请曰谢曰吴以选并命其时维何景定辛酉谢俄而蛻归吴一手力浅虑长更木以石为之良难五载而毕衆施既艰公助能几不厌不慳吴亦贤矣岂无长虹如楚视桧曾是山村埽彼都会寒暑往来铢寸累积非有此心曷就此役岁月姓名所识大者系之以诗美其心也

福州新创义阡记

古之为政其加惠斯民也必使之养生送死而无憾逮德衰而此意薄寒者不能为之衣饥者不能为之食况死骨乎然尝思古事而疑之分田制产古人於民最纖悉也一夫之田五亩之宅居之已食之已然未闻其为死计不韦之书虽出於秦实采三代之文也埋鬻掩骼令於孟春此於盛世何从有之是直其委弃者尔蝇蚋之嘬能无泚乎井塌之苔能无哀乎何必春月而後可夫死固民之卒事也不偕可训圻无其所坊民者何以哉侯则可责细民奈何此千百年所遗之论何漏泽之请直至元丰始见而後义阡之名出焉是诚今世盛德事也闽之诸郡盖尝有之矣然而难继也朱文公之於清漳亦再营之停寄之非训告甚切骊塘危公既续其意而又纪之且以治盗去藏之说而绳诸寺漳人至今思之今府帅龙图吴公某尊文公之学而诵骊塘之文者也越来吾闽其谕俗也有古灵之爱焉其燕毛也有横渠之教焉究力於民靡念不笃今又哀此阡之不续而贫者无以掩其亲也度城西僧庐废地空山为竈大小四千三十与丛冢二稽之陰阳审以面势必固必利为之永图棺者函者骸而暴者婴而夭者皆别处之名其坊曰孝仁主以卧云庵僧储蜃蟻以待其用期之以日合诸寺之滯留者皆瘞踰期者僧自送之约以春秋两祀之糜金钱二百万米石百方郡计窘束如救头然之时而公拳拳及此且亲与寄公周行按视又有结因尔子孙之诗公於闽人恩矣哉公以诗学名者也小弁曰行有死人尚或瑾之解者以为其心不忍也公之为此其一念之不忍者欤四月始事八月告成闻者莫不加额邦之耆宿谓余是不可无籍也余既慨今昔之思而仁公之用心遂录其实云尔是岁丙寅为咸淳二年十月记

福清县修学记

咸淳己巳春二月邑庠羣士友以书来溪上曰吾邑空乏甚学敝久今令尹初来每攒眉以语我我固知其力未给而皆敬其心前岁之秋府公以名法从强镇吾闽悯诸邑之焦煎寬其征而去其害向之持急符而号呼於吏舍者痛絕之於是为邑长者稍得安意以慈其民吾令尹又以清苦自持以勤恪务善察民之病随事而药之空盜之巢剔吏之蠹一念恳恳雨阳应之岁事既登嘉禾荐瑞而井里之聚以饱以遨乃得酬其初心以用力於子衿弦诵之地疏御人籍入之田援譙役秋据之请诸生所叩随事条上凡皆为吾邑士计也且曰不足则以俸继之帅喜而俞令以自庆於是飭材赋功练日轻使正殿论堂戟门经阁若厨若库皆撤榱瓦新之又作十先生四贤三文诸祠而易其像室阁之後辟为堂尤伉好邻之侵地必复虽强御不憚工费大半出县家又朝夕至而督视之非葺也更造也其可隐而不书乎余曰今夫邑之难曰滩矣曰镗矣格令所限黽勉而来视簿书如仇计晷刻求脱甘其身之寂寞苟求无愧於氓黎

之人也已度越流俗千百而况恳恳切切於困窘愁蹙之中勤约以及人劳费以廸教此其蕴积必有所自来者前修轨则非谱可传要之立其本者正尔本之不立乌知政所以先後哉知所先後则近道矣噫成之难者事也遇之难者时也今上有贤府公下有贤令尹而吾邑之尝僚与吾士友又能公此心以相其役余老矣何幸亲见之稍须考成必且秩乡饮之礼使余得尾诸贤以揖拜其间将见教明而俗美使百世之士无忘於斯时若是则遗其岁月恶乎可是役也始某月迄某月府帅洪公名某字某温陵人令尹薛公名某字某永嘉人邑人林某记

行在仰山孚惠二王庙记

仰山孚惠二王庙祀於江南为大香火迹其灵着实自袁始今在所马军司亦有焉讯其由则曰昔淳熙间有本营李统领运木於西江行未至风潮暴作簰木簸荡篙桅束手舟人方相顾愕骇俄有二士立簰上曰我欲拊此抵京李诺之风潮随息散者复聚舟人亦未以为异也徐问二士何自来何姓氏荅曰我将就试也俟近京十里却言之既至李欲延饮二士曰我袁州仰山人李尝至袁髣髴记庙像颇同遽俯而拜举头失所见矣归谗於上下於是筑室於营以祀之始甚狭嘉泰毕方之变一营皆烬而庙独存衆始嗟异乃辟而大之民祷益勤王应不爽民益敬事而庙凡四辟矣今像设既严仪饰浸备衆乃以未得记为歉来谒於余某曰北辰居其所而衆星拱之在天无二尊也诸神列祀郡国其归戴於朝家亦犹衆星之向北今二王显异既徧东南而来宅于兹岂非以圣神继绍宗社灵长故思朝宗之义而有拱卫之心一念忠君神人同也王为萧氏本末见州图志毋庸叙独为祀神诗一首俾歌以飨之时咸淳三年春三月诗曰

王初化兮二龙其始事矣亦以语诸篙翁食於袁数百载矣耽耽其宫兰蒸桂奠矣祀弥恭湖南北兮江西东瓜华之奉兮与物同王知我宋万斯年兮心乎朝宗宜帝所之入卫兮实冥冥之孤忠欲寄灵於一将兮乃变幻江涛之中今祠宇日辟兮象貌崇若时雨兮收融风扫疫疠兮庆屡丰福吾民矣巩吾国期世世以祀兮报王德於无穷

重建崑山县广孝寺记

佛之始也聚徒以听法必於长林茂?之下未尝为之居故从上所录有曰某佛某树者四而龙树又其一焉只园施地致之城闌是则宝方之萌芽於是庄严之说行矣自竺岭之传至吾中土其始也亦然余观高僧传诸贤大抵皆草衣木食班荆?松以为之初其道既行其徒既盛於是争为坛宇以居其师于斯时也患於无师不患无居其後上而公家下而巨室有崇贵其说而求以自托於佛者又华绚金碧以致其徒而居焉故空王之宅徧天下而莫盛於东南则梁之萧闽之王吴越之钱倡之也今久而弊矣为之上者乃因其居而籍之利其有而赋之又从而多取以困之故其居渐废而贫无以自复余常以是慨之今吴之崑山有僧曰允亲者得台宗之旨於印北峯游历而归思有所建立而未能也宝佑中因浚河茜泾得石土中有大字六曰崇庆寺大界相旁有小字曰会昌元年僧兴远立他文磨灭不可读亲喜曰此古寺基乎吾得其地矣寺之兴废固失所传其曰大界相云者即画地之识也请於有司易其名曰广孝余尝备数仪曹与闻其事符下矣亲又规置田园封培芦荡以为岁计役方兴而亲歿其嗣子思?

悲其师之志不遂竭力以成之景定壬戌赋功越五年而毕事相其役者?之子文熙文泰与其孙良珪也乃介余方外友若圭求记溪上余既慨今昔废兴之故而疑其将穷亲能立心於其废灭既尽之余而欲一手作兴之难矣梵为此役又能竭其毫缕之积而无所资於人又难矣今夫世之为子若孙者能訓父祖之志已艰其人自亲至珪徒以教法相绍而四世一心共图其终岂不愈难乎而且不求文於时之华华者而即余之寂寂不于其近而于其远勤勤数千里以是为请其趣尚异於世俗盖如此余既焚香而记之且祝曰若佛之徒皆能用心如思梵者教道不益隆乎已废者不俱复乎是寺也亲为开山矣梵今主之

重建斂石寺记

僧寺之废兴以吾侪视之若於事无所损益也然余观江湖浙之和余运余淮东西之车馱夫脚其为产家害极惨而他科索不豫焉以余所见推所未见槩可知矣独吾闽之人衣食其田自二税之外无所与闻问之僧寺则上供有银大礼有银免丁又有银岁赋则有祠牒贴助秋苗则有白米撮借与夫官府百需靡细靡大皆计产科之嚶嚶者但曰吾乡地狭人稠田之大半皆入诸寺然而谷之食者邦人也岂輶而他出乎余必以钱虽在诸寺犹大家也故前辈有曰僧寺闽南之保障余常以为仁人之言数千年来官病之吏病之大家亦病之僧逃而屋败者过半其幸存者犹凛不自保况已废而求复兴乎于斯时也有能独力勤苦以复其旧亦难矣哉玉融斂石在邑之阳去通衢数里许其扁曰龙潭斂石禅寺唐僧知嵩剏自文德中废矣一殿仅存嘉泰初莆僧弥清首衆鹿门郡倅刘君守仁以其贤白府帅俾居之清辛勤经画自庚辰至癸卯凡二十四年殿既重瓦法堂弥陀阁望拜亭云会寮则更造一新藏屋亦成宝轮方斲以老而惫界之觉融融去丁未以慈榕继之金碧其轮绘饰殿像又为堂为庑砉石砌寺前後地若干大成师志也砮基失久陈乞打量丁巳始再给榕之用力甚苦今亦二十余年虽未至其所得之图经主山自石竹而来左右两龙湫时兴云雨随祷随应载在祀典朝家重农闵雨亦与符免醋应权管科敷以优之清昔退老晨夕课诵犹十余寒暑年八十夷然而逝自号古涧亦丛林可称者也榕以始末请记且曰但以吾师之勤恐遂湮没某甲无冀焉余既嘉其父子之能而又喜榕之言若此故并书之

福清县重造石塘祥符陂记

陂之名何始乎其在夏书已有所谓九泽既陂者求之水经则自楚人期思而後天下不知其几无非贤守令为民为之然废兴不常作其始者固难而复其旧者尤不易汝南鸿隙大陂也翟子威废之濯龙之梦黄鹄之謡皆怨者托其言以求复卒至邓晨而後作用力凡数年其难可知矣况今人乎玉融石塘陂昔县宰郎公藺所作碑亡矣志有之水之源始於闽长邑南下五十余里至邑之西湖迤行及籃尾则由小桥而东注矣滨江为堤直抵古放生湖其汇始大又行七八里则湖之尾焉溉田五千余亩为邑上腴以其作於祥符也以祥符名之中尝湮圯嘉泰甲子张侯大任实兴之既而时敝时葺至景定癸亥啗於洪流始大坏故邑东诸洋皆无所仰雨至莫留旱则立槁民甚病之役大费夥莫适为谋戊辰贤令尹实来谄於衆而知之曰邑虽贫是乌可已作意复之寓公大姓亦乐为之相有草曰荃湖昔所无是岁忽生售镬六万令捐以助役堤之基非沉以巨舰不可适有御人没舟者令即给之富者役者输财竭力惟恐

後令又时出而谕劳之孟秋始事良月讫工糜金钱六十万工六千中役两几败後中秋三日洪发前重阳八日海涨诸堤岸多漂没而此独存人以为令尹一念所格闻者皆加额焉是堤也南台庙东旧逼江移而改筑以丈计之六十五基尺三十其上半之湖尾为丈二十基尺八十高半之其上损四之一邑人始疑其难既成而喜来请记余亦喜为之书曰祥符古陂于邑之东既废而久湖与江通昔壤之腴今废而涸贤哉令尹为民更作堤成未半潮怒溪淫屹如有相神监其心繫令之心惟民是福天亦应之嘉禾瑞粟我歌屡矣况此役乎令尹之德与长江俱波流泱泱禾黍旆旆昔谁之如贾渠召埭令尹薛氏名某字某永嘉人是岁实为咸淳四年十有一月林某记

泉州重修兴福寺记

温陵佛国也中郡之城有曰开元寺者聚僧舍百二十所而居之兴福其一也俗呼为粥院谓开山某师戒行严诵法华得力常主千僧粥食於斯也地居东北隅始甚隘元符中圆觉师本观主之得镇海超禅掌示之旨道化盛行学侶云集无所容请于郡并数刹而辟之其寺始大中毁於绍兴旧碑俱不存其复也亦莫之记余昔为郡掾屡尝往来其间淳佑辛丑岁大饥余领賑济二局朝则散粥开元午则济糴承天两寺修廊东西各数十丈食者列坐余者分给皆容数千人不翅时方隆暑非此何所措故尝谓僧庐亦非无助於政也时住兴福者前则善立後则宗端立以有为称端以静嘿胜皆可语相与颇密今倭指三十年闻寺敝久矣戊辰冬忽得圆悟书以重修法堂香积诸因缘来请记悟余里人也向为双径演溪记室演以高弟许之余尝叙其枯崖集矣而未知其志行若此主此席未一载而役於土木不憚其劳某月鸠工某月毕事糜金钱若干吁亦难矣遂乐为之书独惜寺之始事无所考耆老相传但曰华严董粥事时有兵官夺其桶饲马师取伽蓝画像压以磨石而诃责之一夕行庑下有人身长八九尺乞还位设师曰寺失桶而汝不知汝职何事荅曰即索之中夜俄有叩门而还桶者曰二马俱毙监者惧而归之一夕又见师曰未足言劳何以庙食於此神曰愿为香厨屏鼠雀师许之置祠焉至今厨无此耗神则神矣非师何以令之圆觉有传开山遗其名其所传竟尔因并录于此是岁实为咸淳己巳嘉平月林某记

慧通大师真身阁记

金华大师名志蒙生金华徐氏初以永福怀悟为师三乘教典不学而通常披锦绣衣去来闾閻中里人呼以小舅师亦自称曰姊夫得钱於市即买猪头以食故号为猪头和尚时言吉凶皆验或曰师圣人欤曰非也凡人欤曰非也或曰如何师曰汝以我为圣则圣汝以我为凡则凡人莫之测周游其乡三十年景德丙午始居衢之吉祥院即今天宁也衢人尊信之甫旬浹沐浴书偈而化危坐七日异香不息遂以真身为阁奉之远近奔凑事之如生旱涝之祷随应清献赵公尝为之赞以散圣目之信矣元符己卯勅赐慧通大师实曹守公辅所请至宣和甲辰始纪之则广信郡丞洪公弇也阁屡毁而屡复者先後贤太守也嗟夫释氏之教亦幻矣授法传衣聚徒阐化此大乘正宗也至如扬普化之铃曳弥勒之袋殮虾拾蜣吞鸽吐鸠如狂如痴惊世骇俗岂苟然哉意曰汝以趺坐寂照得禅乎我不然也汝以持斋守戒求佛乎我不然也扫其窠臼纳之炉锤是又一机焉方师之存疑信已半矣今其歿也踰二百年天禧己未寺

厄矣绍圣乙巳又厄宝庆丁亥又厄嘉熙庚子又厄阁凡几废而真身屹然至於仓皇燹逼逆而致之至亦随息是孰使之然哉由此而观则身前之变幻盖可知矣岂非庄子所谓猖狂妄行蹈于大方者乎今天宁主僧如玉寓书於余曰大师灵迹着久矣今郡侯赵公孟奎重剏殿阁贤良刘珙述梦舍田虽有新记而畴昔事蹟未详旧碑朽败传写讹杂来者何质焉愿有记余即其讹杂者而条理之得其本末如此因以其所以异於本教者索言之抑师又云古貌昂藏法中之王猪头千个未始片尝陶吾真性吾即定光然则其食也果食乎非食乎世而有定光则知之

清风峡施水庵记

柯山徐君伯东结庵於清风峡之下又为亭于左以江月名之庵储茗剂以俟行者风月则自有乐也屡以书来徵记余曰义浆得玉徐寅有赋为杨玄作也知君盛心施不求报虽寅无取矣姑以其所乐者商之今夫风薰兮时兮固见於弦歌矣自南华着论於齐物而後有宋玉之赋前喁後于大小二和与夫百窍之声是不可以图见者而周独模写於章句之间毫端之巧与造化争彼楚人之论殆有激云尔雌雄果何有哉今夫月皎兮皓兮同列於风雅矣自五言既兴子建咏於前士衡继於後而後有谢庄之赋流光徘徊赋之高楼照有余辉揽不盈手语粹而味深殆为古今絶唱彼西园托兴千里怀人霜露沾衣徒伤迟暮是直齐梁浮靡之习於义何取哉尔其淫於溪谷而泛我幔帷行於素空而入我怀抱予於人者何私焉见有远近得有浅深皆夫人自为之尔千载而下则有月到天心风来水面若康节所谓真趣者吹者非风照者非月若伊川所谓滋味者力生於所激形生於所遇盈虚者如彼而卒莫消长又有如玉溪所记赤壁所赋者兴味之远前无古人非知道者孰知之今君酷喜吟而有清思披襟於峡弄影於江其於由前之趣必有超然而自得者仆何容喙焉虽然幡风非动比伦无物此又幽人野客一种见解何当握手尝试言之庵某年某月作某月某日成君名某字伯东今为淮西马步军副总管兼制置安抚两司计议官咸淳五年正月日林某记

潮州海阳县京山书舍记

京山书舍潮进士胡君申甫所作也戊辰夏自京南归道溪上?其图谒记於余挹其容谦恭而尚德者也听其言质实而务学者也即图而观则前凿方池涵光浮碧为梁如砥门曰桥门此书舍所由入也其间轩豁夷旷百步而羸两旁为列屋离而远之於是杰栋危檐势欲骞翥扁以四大字?如也华扉洞啓吟吟潭潭论堂正中夹以修庑东曰观善西曰会文是为师友往来讲切问辨之所四斋隅置则弦诵者居焉最後聳以三祠安定左而昌黎右瞻仪肃肃侑我圣师其规模甚广也其位置甚严也君又以其面势语我曰书舍之外三峯参前二水环抱京山峩峩如坐屏障前後柱百有四十皆苍石为之某年某月始事某年某月毕工余虽未及一见已知为南州伟观矣君归踰岁余记未就远使来趣余因以是思之素王之祀天下所同潮於文公归敬惟旧君今尊其姓所出於安定先生拳拳焉身在岭海之南而此志所尚北方人士或有愧者若人哉可敬已而况我朝儒风独盛前古师道久废胡先生实兴之苕川学法贤关取以着令至今存焉于时伊洛之教未廸也今四方之士知尊周程在在有像安定则未之闻君为此室与韩共峙意使潮之衿佩游咏於斯知学问体用渊源成栋梁榱桷人物仰高山斗

簸弄明月于以相辉於无穷京山之名媲美衡鹿殆自兹始岂非三阳千载盛事後之人推言
其自必曰胡君倡之竹溪书之余亦与有荣矣咸淳五年龙集己巳春三月林某记

竹溪麝斋十一藁续集卷十

卷十一

钦定四库全书

竹溪鬳斋十一藁续集卷十一

宋 林希逸 撰

记

报晖堂记

莆阳吴毕公去冬之半过余溪上求记其所谓报晖堂者余诺客而退於心戚戚焉悲吟累朝乃慨然而叹曰为子易养亲难养亲易报亲难余不幸早孤与吾母相依踰五十年少为痴儿粗知力学求以尽为子之责而已未有以养也长落江湖以侍亲之欢不若养亲之志滞留两学何止百战髮已半白而後苟窃升斗之养而又与世寡谐屡进屡斥每以动吾亲之忧怡愉之奉岁月能几何哉风木俄悲而身亦老矣修名不立为世弃人罔极之天痛何所报每思东野之言未尝不自悲且自愧也今吾子架斯堂也为斯名也承顔问视朝斯夕斯而且以文游於诸公南北赠言充溢凡格持此以奉加飡之笑何乐如之况闻子之所自出孝子郭氏也余尝诵艾轩双阙之记想慕其人每过其庐必踌躇不忍去幸而识之如一见焉以余之悲思子之乐而又美其闻见所自来能不叹美矣乎因为此记并述余心亦愿子知吾由前之所以愧者而日加勉也咸淳五年四月林某记

南劍州梅埜徐公祠堂记

陈岁腊月未半延平新使君以书抵溪上曰吾郡有两贤堂复斋与梅埜并祀也既毁而复衆以其地迫隘不称两公之居将以梅埜独祀於演山堂梅埜於子为知己宜为我记之余曰侯领印未数日郡事费爬植甚而首务及此贤矣哉抑余闻昔贤以循吏名者固曰所居民富所去见思然有三年而代者五年而代者民思其德千载若存桐乡之於朱邑密之於卓茂是也今梅埜先生以某年某月领郡某月棘归其留也堇堇六十日其去也攀辕截镫遮路苦留至於间道遁去今亡矣而郡人尸祝之心犹拳拳若是公何以得此於民哉或曰公之初来峡阳方涵公淳淳然以赤子视之贻书出教晓谕勤勤故人感其心皆弃鋤挺而去仅拘一二倡者以谕公亦薄罚而纵之一郡帖然抑斋弥雍以数年之劳而公附集於谈笑之顷民之所以不能忘宜也余曰不然是特其迹之一尔儒以道得民道岂有迹哉吾夫子尝曰如有用我者期月而已及其相鲁也甫三月而化成岂非绥来动和之际心孚神契目击道存乌可以久近计乌可以一事名哉公学圣人之学者也生平践履盖得於伊洛考亭遗书大廷之对所谓得力处者即公自得者也故居家尽其孝立朝尽其忠其仁满腔而根於心者见面而盎背想其莅於斯也拏帷而出凝香而坐士之见者曰吾父师也民之见者曰吾父母也舍我而去何其亟吾以心慕之去我未久而不慙遗吾以心思之以邦人终始之心而起陈侯慕向之念是祠也

非以像祠也以心祠也太虚长存此心不死则梅埜之祠当与演山相为长久矣梅埜先生徐氏信安人讳某字某仕止工部侍郎赠某官祠以戊辰季冬望日始事嗣岁三月告成是为咸淳五年四月日林某记

莆田方氏灵隐本庵记

咸淳五年夏四月余以金凤之戚至莆谒寺丞方君於其居既入拜铁庵先生之像退而坐心田之室君语余曰吾祖长官葬灵隐山下而祠於南山之荐福荐福有田长官子六人所共施也每岁中元祀於祠六房子孙预拜者数千人香火三百年如一日近以僧贫赋重其寺几废余承先志强为掖扶幸而成绪後村已为我记之独灵隐之坟去城三十里守者仅一夫其居又远故前此有伤其薪木者常时拜扫岁一至六房各一人他子孙多不识其处吾翁尝病於斯矣未及广之余今谋之族老约以浇松之日不拘蒸尝分数凡命士举人监学生皆得预焉又思其至无所容遂於坟侧为室三间中则祠堂饮胙之厅西居庵僧东住坟客买田十二斛以食之田存则庵存庵存则松楸百世无恙矣某年某月始事某月既成取吾翁谱序之语名之曰本不书无以告来者愿书之何如余曰世不古而大小宗之法亡盖自采地先废始采地存则族而聚者有所系不至於轻去其乡而忘其祖汉人犹以封侯得国为重者实吾意也千百年来此意泯矣固有买田清颖而洸冈日远买田阳羨而去蜀万里者虽大贤有所不免要不可以为训独高平公眷眷姑苏之族而有义庄田焉非徒为族党计实为坟墓计也今瞻莹之典盛於莆君家族大而系远故此事尤盛长官之祀既有田荐福矣君为此庵又买田以贍守者且欲使六房之後皆无忘其始成铁庵未为之志广前人孝爱之心君诚知本矣昔孟子有言天之生物也使之一本此为墨氏兼爱者发墨氏以爱为仁而不能尽此心之理故其弊也失其本而至於无父今君推一念之爱自其称以及其祖又以及其族亲不流於泛远不至於忘充仁之端尽爱之理盖得此心之正者贤矣哉然则万物本於天人本於祖知其本者心也人能全其本心则知祖矣知祖则知天矣余迂矣为君尝试言之君亦尝试听之矣寺丞名某字某长官十二世孙也是岁己巳端阳後十日林某记

重造应天寺记

应天古禅刹也开山师讳智淳白屿人初行江干见水中青藁为苔所蔽撞破而出因此有省遂弃家学佛徧游诸方声价动江湖崇宁四年挂单京刹帝知其名擢主西寧州万寿寺师进偈力辞久而归闽寄迹青凤山阉帅以巨刹致不可即其居访之兀坐蒲团煨芋烟满室迎送不出户限帅益贤之岁晚还乡遂剏此寺此畴昔故老所传也寺之始事以绍兴二年壬子则梁题有之距今一百三十八年旧为屋数百楹去溪干之市才里许即石桥东望飞檐横脊隐隐绿陰间游观者不絶中因寺前巨浸昔田今溪【缺】岁入浸微官征日急主僧困於吏屡易屡逃遂以他寺岁拘之堂宇厨库俱坏四围荆棘没人牛羊出入不禁佛殿穿漏仅存门与中间一堂柱皆踣立门之西叠壑不盈丈一僧守之过者怆如也余因溪桥之役偶一至焉僧指残碑以告碑之所载即崇宁三偈是也余素敬师名知为师旧宇乃谋补葺之第岁俭乡贫助施能几余方强勉以毕桥事於是去难图易程力即功中殿撤去榱瓦与门一新又增以左右翼室两庑东西共长三百尺是则更造也姑俾周阿稍完苟焉具体而已如师愿力诸佛护

持他日必有尽复其旧者因书以告後之人且并补其本末失传之缺是役也始丁卯季冬迄己巳中春糜金钱若干千缘僧某董役林校尉德政是岁为咸淳五年三月林某记

潮州开元寺法堂记

开元寺法堂潮阳官吏祝尧之地也寺始甚雄中有子院三十六绍兴毁於?寇後虽更造仅有佛殿罗汉堂三门两庀而已余皆豪民大姓据为列肆矣堂则无有也虹节之礼移於光孝赵侯师?曰嘉礼然乎哉请於公朝尽复其旧以为室而後呼赞之仪始肃时嘉泰甲子也屋久而敝壬戌之秋 风大作堂仆焉虹节之礼又移於戒坛阅岁八更守四无有动念者咸淳己巳通守林侯实来适行郡事乾会寿崇节礼行郡之簪纓緇黄咸集驺隶纵横肩?交午喧声如虚市侯愀然私自念曰祝吾君以万寿盛典也一坛余地不盈数丈汹涌丛错如此吾侪俛首苟率以就事非不恭乎於是求老緇之贤者曰惟靖以开元致之捐俸金百万俾就此役为屋九间其深丈有六广三之前後诸栋皆易以石閼杰伉好殖殖潭潭观者耸异而民不与知庀工於仲夏某日越某月堂成僧来请记余曰事之已废而难复者岂皆力不足哉顾此念何如耳斯堂也上下二百年始废於绍兴而赵侯复之再废於壬戌而林侯复之二侯非求益於佛者也尊莫尚於吾君事莫严於诞节即心揆礼必肃必?岂非臣子所宜然哉彼拜稽於荐严之所而不病其名汨塞於?戒之庭而不嫌其嫚何独无此心乎嗟夫千秋立节虽始於唐而华封之传自放勋始至如天保之报寿指南山此诗人所歌咏者然则古今臣子此念大抵同也古今所同而间或忽之余於此能不起敬乎抑当赵侯时郡力方裕其为之也易今朱提之纲符移火迫绿林之扰桴鼓日严郡之焦劳久矣侯於此时暂领郡印而急先及此方之昔人尤可敬矣是宜书侯名式之字子敬三山人以承议郎通判军州事其年六月日具位林某记

潮州重修韩山书院记

韩山书院余闻之旧矣咸淳五年夏季有以三阳士友之书来溪上曰韩山文公故庙址也前使君郑公良臣筑室於斯扁其三门曰城南书庄论堂曰宗道祠室曰泰山北斗文公中居天水赵公左濂溪槎溪二公右两庀四斋职员十生徒倍食之以田则郑公所拨陈公圭买之自淳佑癸卯迄今未三十年藩夷檐缺横者植者俱敝凜凜若将压焉今通守林侯适摄郡事一日率诸生谒祠下讲毕周旋四顾曰潮之士知学自文公始亦犹文翁之於蜀常相之於闽也邦人奉公香火於今数百年不忘公之教也我朝以来邦之人物有登从橐者亚广庭者冠兰省者释褐宗庠者擢英儒科每诏不絶家有弦诵之声里列衣冠之族皆公赐也前人为此室盖绎公之教思相期於无穷此而不葺吾愧焉於是捐俸金四十两命堂长林震曾董其役凡室之材无分钜细摧折者易之腐缺者补之楹之础高至数尺去瓦之敝重覆一新自门堂斋庀以至庖湑与外之九贤堂皆完且固仲春始事首夏迄工郡方焦熬需调百出侯念及此实人所难阙而不书恶乎可愿记之余曰侯为郡政汲汲教事知所先後诚近道矣然士莫难於学学莫难於师今潮人之所师者文公也而况游泳於斯日瞻遗像其可不知所敬慕乎慕之云何是必曰起八代之衰者文矣济一世之溺者道矣疏犯人主之怒者忠语折三军之帅者勇挹衡山之灵而云雾去之恶鳄鱼之暴而风雷驱之是固公之可传可敬者抑所谓浩然而独存者果何物哉状公之本末莫妙於坡仙一记吾侪必以是思之夫是之谓善学侯名式之

字子敬三山人是岁己巳孟秋朔具位林某记

道山之宇记

莆方兄準余齐年景揖之子也为堂於所居之侧而名以道山之宇负东岩臂乌石而面西山四时台榭春日靚粧夏日来风秋日见南冬日索笑中有亭曰耸翠前门曰栢园後门曰迎隐与羽士之居为邻也以书求记余曰孤舟寻壑倚杖看云守八九椽之居畦数百本之韭此贫而为乐者之事也苟有力焉则品奇章之石谱洛阳之花种木千章树兰九畹驾花外之车纵荷间之舫弹箏击筑飘裾曳屣於其间乐则乐矣然平泉有诗而主不留焉辋川虽图而门尝鎖焉此退之所以为圻者传也今子之家传六艺有圃也羣书有苑也灯窗之暇乃欲游息於斯俟学之成需时以进入蓬峦之圃观右文之藏澹茗汗青之间举杯方壶之上於是吟太液赋上林於退朝归院之余预赏花钓鱼之宴其游愈华其观愈大道山又其发轫尔昔吾为少蓬尝请道山之扁既拜宸赐以揭以镌随以罪去回首旧游又记此室叹且愧焉咸淳己巳元日虞斋林某记

竹溪虞斋十一藁续集卷十一

卷十二

钦定四库全书

竹溪鬳斋十一藁续集卷十二

宋 林希逸 撰

序

安晚先生丞相郑公文集序

隆古盛时明良并世其都俞廊庙之上大抵皆有道有文之士也观之书焉舜之禹臯伯益商之伊傅仲虺周公召公盛德大业格於皇天而曰歌曰谟曰训曰诰凡子云所谓浑浑噩噩噩者皆数君子为之也吁何其盛哉欧公尝曰文章事业士不两能盖非为斯时发也汉唐辅相岂无其人然萧曹丙魏房杜姚宋功名著而不以文称韦平康薛常杨燕许词艺胜而事无足录论人物者每每遗恨於斯盖三光五岳之气分矣独我朝诸大老前乎韩富马吕後乎张李二赵其人如泰山乔岳其文如黄鍾大吕纪诸旗常者骏閎垂之简帙者炳耀吾宋之懿所以上并帝王而诸公亦鍾天地之全美也求之近世则有如安晚先生丞相郑公者焉公早游太学即有异声越从经以至大用高文大册流布人间黼黻两朝既极文章之用敷陈九陛无非仁义之言諫藁多焚仅存其略乃若渊跃龙潜初继大统两宫同异监在治平公竭忠忱以裨圣孝时则有甲申尊亲之书逆全驍张声震江南廷议不齐类唐淮蔡公赞其决卒成圣功时则有绍定当国之书亲事法宫乾纲甫正公忧旁落力折机牙时则有政柄之疏和使往来国是未一公条间基迄如蓍龟时则有边备之疏他如敬思二铭元吉十箴与夫祖训四言发挥帝梦又宗社之大计也功言共立不既伟乎而况端明改纪登良去凶宇宙耀明媲美元佑中遭谗妬公身虽退而当时诸贤迄无王吕之祸虽嘉淳而下局面屡移贤否岂不迭进而丁史之去如弃弁髦岂非圣学高明黑白终定讲明辅导要有其先是非甘盘之力乎方公之再相也尝以辅政无状为谢穆陵自指圣心曰丞相之功在此然则大人格君之业公实有之天下有所不知而先皇独知之也文章又其余事尔余尝因是思之元丰末年燕诒置傅使酬神祖之言鼎湖龙御为世少延俾温国辅赞其间得殫忠益异时绍述一语必无所投其奸则邪正纷纷亦不如是其酷也公之所学所遭颇与文正相类追伤往事益叹穆陵之圣而有感於公今公薨十有七年诸孙粹公遗文而出之以余受公异知俾为之引余思畴曩初登朝公留经幄时得从容侍笔研知公学穷古今出入经史胷中所有浩如也熔炼而出俄顷千言形之声歌兴味尤远岂常流所可及然且乐取诸人叩击不已一语中肯击节赏味如自己出集思之益容人之度盖於是槩见焉因以并识於此

次云方先生诗集序

余尝因论世尚友之言而後知古人所以慨惜人物者夫以友天下之士为未足而必求之诗

书是岂忽近而鹜远哉盖宇宙茫茫人物能几同乎伊尹犹有莱朱献子之友已忘其三向非孟氏一言则俱泯泯矣网山先生尝曰在昔乾淳莆之人物最盛其间数大老若文节次云景韦渔仲皆千载人物今艾轩以集行夹漈通志溪东艺圃久传於世可以读其书而知其人独麟台方公既歿其後浸微平生著述片纸不存其可传者惟古律诗两卷亦复沉没不显姓氏仅见於艾轩铭是岂非可重慨惜也耶公尝自言吾文如雨沛然而作则奔注百川弥满万壑常时一滴无之蓄之淳泓发之閎肆其抱负果何如哉闻公初给札时吏白策题例先得公挥手叱之翰长闻而不乐遂取三国六朝兵争险要错综其问以困之公入擒文一览而笑雍容奋笔终篇万余言南北数百年攻守得失如指诸掌何愧於欧苏哉是所谓沛然如雨者也使其全藁幸传岂在古人之下乃若其诗则或长或短可兴可观是谓学问之鼓吹也其飘洒即谪仙其浑重即子美得遗音於风雅寄逸思於庄骚虽元白郊岛亦当北面余子何数焉余年二十一得公此集昼夜讽咏如见其人故篋久留蠹蚀殆尽访公之家则屋易主矣况集板乎每一追思怅然如失今公族孙岩尹访寻幸得录以寄余得鼎还珠不足喜也叙而藏之因语岩尹曰千岁而下有论世尚友者必求之吾侪相与惜可乎

陈西轩集序

士莫难於知道文直寄焉尔因其所寄而後知者存焉然则文亦不可忽也茫茫宇宙知道者能几苟有矣存而用不见於时没而文不垂於後是非尚论人物者所惜哉西轩陈先生有道有文者也生游洋万山中而学得圣贤之心文接神明之奥趣诣幽眇出吻芬葩率皆蝉脱於尘浊之表其在当时与次云老艾溪东溪西为同出是盖孟子所谓豪杰之士艾轩一字不轻许人独谓公之学不缘师授其视横渠为同时独晓者集中诸铭独次云曰子方子公曰子陈子而已至於其文则曰今之良者与玉同色岂不以人知黄之为金而不知白者尤贵乎盖为不知公者叹也公年不盈六十仕不过一邑生不求闻於人而後之志人物於莆者亦於公缺焉金玉之言盖於是信矣余生最晚年二十时得公月圓淹淹之赋於先师乐轩吾师深敬公者余固焚香慕尚久矣最後始传此集於公曾孙子高观其记序论赞颇有檀弓谷梁太史公之风古今五七言可与子昂元结浩然相上下至如桃花瑶华诸赋使孙卿屈原见之亦当击节而西轩一首自为态度又与鲍谢争幽洁焉此其所得所寄艾轩不可作谁与论其樊者然公游戏於此岁月浩矣岂应所传止尔苟非残篇败篋沦委于地蒸为灵芝流为醴泉则其光芒蕴积必且为华星卿云矣又孰得而见之此余所以重惜於此书也公讳某字某兴化人承议郎知长乐县生政和辛卯卒乾道丁亥艾轩所为窆铭与墓志在其出处言论略见於黄钟燕话余大母即公族孙也

丘退斋文集序

有文字来为文之士谁不欲用於世然而有不可必者天也非人也老艾一宗之学固非止於为文而艾轩之文视乾淳诸老为絶出一再传之间如大着正字二刘季冶黄怀安网山乐轩二先生黄石吴叔達是皆笔翰造化者网山奥而清乐轩奇而法虽诸高弟亦当避之然艾轩立朝不久二刘尤日浅奏篇讲卷已惊骇一世其余皆以穷死使人人得吐其所有是为何等人物余尝为世惜之兄於乐轩席下吾辈所斂衽者弱冠拔解漕台主司奇而敬之颠顿三十

年而後得第其末第也已客於龙学信庵二赵公之门三京之役传檄中原帛书露布皆公笔也既而往来诸阃应酬兵事或言之诸使或辨之中朝辞气激昂议论精到传称执讯之书史诧成风之檄兄何逊焉在昔有唐徐濠书记宣州宾客如退之所记所称率皆由藩府升朝廷大用者相踵主人勲业方新而兄之镜中蛇已蟠矣岂不重可慨哉乃若襄城之赴援仪真之料敌勇於李泌精於柳浑人曰信庵之客有兄即紫岩之子羽也疾且革手为别书区别秦张毁誉字字切至而辉采烂然死生之际如此难矣哉使兄而得尽其用则相如谕蜀之文宣公制敌之议房乔垂没之疏可兼有并传矣余少与兄同事乐轩笔砚之交甚密中间南北睽离近二纪始同为乙未进士仆南归兄以信庵留饮别京楼握手不忍释甫三载而兄没於仪真甲也未亂遺藁散落几尽今甲能传世科痛惜其文访求十年所得仅尔览之涕下曰斯文也其用止尔耶斯人也其传止尔耶姑为之序云尔

李君瑞奇正赋格序

自退之为诗正易奇之论文章家遂有以此互品题者抑尝思之张说徐坚之论文也其曰良金美玉无施不可非正乎其曰孤峯絕岸壁立万仞浓云郁兴震雷俱发非奇乎不妨为俱美也前辈乃曰好奇自是文章一病退之自谓怪怪奇奇不施於时只以自嬉然则奇固不若正矣虽然李长吉辞尚奇诡而当时皆以絕去翰墨畦迳称之李义山受偶俪之学於令狐及其自作乃过於楚非以其为文素瑰奇欤长吉之奇见於歌行义山之奇见於偶俪偶俪云者即今时赋体也使今人之赋有若玉溪之奇又何愧於古哉莆阳同舍李君瑞以赋得名屡荐於乡优升於学每以奇取胜自谓之伏兵盖前後见赏有司皆以铺叙体得之今集赋家大小诸试自兰省三舍诸郡鹿鸣以至堂补巍缀者皆在焉每题先之以正继之以奇铺叙之外或以韵奇或以意奇或以句简古而奇或以原头末三韵两韵混成构结而谓之正者人固知之时出之奇多有流辈思索所未及譬犹孙臬之减竈削木淮陰之背水囊沙初不在堂堂之阵正正之旗自可扼敌吭而破敌胆也以君瑞肘後方之已效之剂不自秘而传之人得之者当万选万中矣然唐人论诗有六迷云者有七至云者其说则曰以诡差为新奇一迷也至奇而不差一至也是必知其至而去其迷以诗之病而验之赋庶乎得君瑞所以传之法而又尽其所以至之妙余少学赋苦不能奇今老矣喜闻其说故不辞君瑞之请而为之序云尔

方君节诗序

诗有近体始於唐非古也今人以绳墨矩度求之故江西长句紫芝有诗论之讥盖紫芝於狭见奇以腴求瘠每曰五言字四十七言字五十六使益其一吾力匱焉其法严如此今集中古作絕少亦尚友选家摩括极其苦淘漉极其莹虽然浑雄之气视昔缺矣前此我朝诸大家数律之精莫如半山有杨刘所不及古之奥莫如宛陵有苏黄所不及中兴而後放翁诚斋两致意焉然杨主於兴近李陆主於雅近杜吁诗於李杜圣矣乎神矣乎北山趋慕远而抱负大吟咏之适古比律为多骨气见於丰意态寓於约不肯寄人篱下操纵自如譬之老禅不缚律譬之粹学不踰矩造之必愈深积之必愈富则杨陆心印舍我谁属哉北山莆方氏名应发

陈子寬诗集序

子寬余乡友也余初椽温陵子寬尉安溪留幕中性喜吟颇得闻其警语自後率数岁即一见见必以此相咨决殊有驰蹶陶谢凭陵郊岛之意近南归道溪上袖此集示余曰必为我料简之子寬去余诵之数日长短五七言皆有趣古与律俱春媚秋明姿态美矣何以料简为哉余知其争雄於诗未已也昔诚斋诗先後近四千首自言其作屡变一变於绍兴壬午再变於乾道庚寅三变於淳熙丁酉同时尤梁溪亦以为公诗每变每进又曰壬午以前有千余篇皆焚矣对延之诵数聯曰露巢蛛恤纬风语燕怀春坐忘日月三杯酒卧护江湖一叶舟梁溪惜其焚之公曰无足惜也然观公见行诸集此等句既变以後未尝无之岂变其可变者其不可变者终在耶余是以不愿子寬之欲有去取也母使他时又有梁溪之惜昔蔡端明喜作记顏每轴必识曰某处作年若干竟以自镜也子寬年方盛吟必愈富宜以诚斋之法次第之时以变不变者自镜岂非一乐哉

刘元高诗序

诗有射也栖鹄於侯而程工拙焉是曰的强弱力也中否巧也非的无以别之若?之良其材有六则诗料也参均九和则四链也干之心必正不正与视忤是则思无邪也射之於吟取譬若此然而的有远近焉有高下焉其审则在我诗亦然陶谢一的也韦柳取之李杜一的也苏黄取之郊岛一的也四灵取之随所取而尽其能则可以追古人可以名家数不然皆羿矣今言诗於江西大抵以山谷为的高安刘兄以山居前後藁见寄思清而兴远词贍而律严求之????家神情风格皆具余窃知其所以取的者矣因以是说告之虽然射一也使如由基之於猿纪氏之於蝨何的不破哉刘兄名元高字某今为侯官宰尊公实斋余齐年也

悟书记小藁序

悟上人吾乡儒家子习气未忘酷好诗而喜为文向为偃溪径山掌记谒余西省尝以数语赠之今南归寓朋山所作愈富又寄以二编名曰枯崖且援信无言例以求序曰信为佛日记室僧小暇不入园鋤菜即下田使牛有集曰园夫持示徐师川师川序之易名奇葩余曰皮毛剥落叶尽归根是为汝宗本色贯花散花皆病也师川此名母乃病之乎使悟而遇师川必曰枯者芽矣余因自思少亦喜吟老无所入乃独诵翫味心珠证道诸歌人多阅保宁雪窦诸老颂古亦时有此作或者正以逃禅讥之然则余以书生而喜古尊宿言句悟以衲子而弄穷秀才生活恐彼此皆病也昔鲁公扈赵齐婴问疾於扁鹊谓公扈曰汝多於谋而寡於断谓齐婴曰汝少於虑而伤於专是为偕生之疾若换汝之心则均於善矣遂饮二人迷酒剖胷探心易而置之投以神药既悟如初其疾皆去世而有扁鹊其人余愿请之俾易吾与若之心使运使谈禅临济孙说文章各去其病庶无搀行夺市之疑则两得之矣上人以为如何

介石语录序

介石向在南山余尝一见之道貌粹然出语有味为其乡人也爱之为其名辈也敬之寂久矣侍者景恢乃以此录远求着语余曰有句无句如藤倚树横说豎说如水灑月师既如此供通如此漏逗我又如何分雪虽然师尝七见浙翁末後举黄龙三关因缘遂得关南一拳打夫鼻

孔有许?仞有许作略生平受用不尽又欲分付後人究竟正为谁底介石耶浙翁耶黄龙耶昔人有云一字三写写焉乌成马何况又有上碑石者又有下注脚者莫将黑豆自换眼睛则木马嘶风泥牛入海去也

莆田方氏义庄规矩序

铁庵先生忠惠方公重名厚德之士也其拳拳族党一念盖今人所未有者既谱其六房之传而思有以振德之每曰文正范公吾所敬慕也如公大节固不可企独义庄尚庶几焉顾吾力微虽未能均及六房之衆於吾礼部之後或庶几焉中岁居朝以直道不容而去滞留岭阨凡七年而没使其及还此志遂矣今寺丞君孝於其亲而追思其志切切不去心解章贡之印而归既经营荐福以祀长官之祠又泐筑本庵以守长官之基为其本房计远矣乃即旧请琵琶槽之地堤而为田田成岁入石三百犹未足於用也又捐田五十石以足之於是取范公遗法依仿而行聚每岁之入等第给之姑自其亲且近者始故九世祖礼部而下若干人高王父福平而下若干人冠笄有馈婚嫁有馈丧葬有馈男女之生有馈延师家塾教子若孙月有俸岁有供登科者庆遗之秋荐入学者资送之有其亲而贫者疎而贤者俭岁而有饥乏者非次而有患难者皆有以济助之是皆范氏旧规也每岁季秋又与族衆共行忠惠之祀祭之仪器服牲牢献奠祝赞件件应法故其意盖曰馈者惠也徒惠非古也是必有以私淑之故器必如礼欲其因俎豆之数而知有作圣之学焉服必如礼欲其因衣冠之制而知有修容之学焉登降裸献有节则朝廷宗庙之事习焉尊卑饮拜有序则闺门孝睦之义着焉此其用意深远又范规所无也况文正之子孙见於奉使公所纪坟山之集凡十世仅二百人今礼部而下三大房自祖父行以至兄弟凡五百人方来之益未已也吁盛矣哉此又范氏所不及也昔钱公记姑苏义庄举晏子之事以明之乃曰晏之仁止於生前范之义垂於身後盖以禄赐之及不如义田之远也余始亦是之既而思之不然也春秋之世阡陌未开田非国君所赐不可私得?殿之邑既辞当时所有独北郭六十而已是所三等采地也采地废而後有义庄之名范公尝倡之今君能续之是又不可不知今昔之故也因并及之

竹溪鬳斋十一藁续集卷十二

卷十三

钦定四库全书

竹溪鬳斋十一藁续集卷十三

宋 林希逸 撰

跋

跋浙西提举司社仓规

古人为惠於民未有不自均田始者田不可得而均民无以自济於是有贵贱歛散之法然耿司农请於汉官为歛散也故曰常平长孙度支请於隋民自歛散也故曰义仓後人失其意皆归之公家於是考亭先生本其初以复之此社仓所由作也其虑甚远而惠甚溥矣曾未百年此法亦敝非蠹於官吏则蠹於豪家民之无仰自若也卓山陈公为西畿常平使思行文公之法又本古人之心不聚以粟而求之田盖以粟之藏易弊而田之入无穷视时而散约以其直十之二取而积之积之久则田可增田益增则惠益远此岂吴人一日之赐哉因思古今良法未尝不可久也推而行之实惟其人文公愆在官之病而廩之於民卓山又愆积粟之病而本之於田使文公犹及知亦当嘉叹於此余闽人也恨文公之法不及於吾郡卓山来闽乃以此集见示使卓山更为闽留其不以惠於吴者惠於闽乎民穷甚矣安得如卓山者数十辈俾推行其法以徧吾国岂非文公所望於後人者哉

赵尉尚书讲解跋

孔明披书乃观大略或者则曰武侯豪杰之士也读古今之书得其略而不求其详遗其小而独取其大所以长庚亦慕乐之吁此非知言者也孟子曰博学而详说之将以反说约也孔明高卧草庐筹量当世之事思与伊傅周召共传舍书何以哉博以古今而求其要领此武侯所以用其书者侯之略孟之约也是岂易能哉史氏谓其不求精熟误矣不精熟何以得大略哉余读延平赵君百篇讲解因而思之曰书自诸传既行句句字字毫分缕析孰不知之而每篇之要领则得者盖鲜今君篇篇有解铺叙发明该贯首末使夫人一览而大略皆具非用功深密者能之乎君於未第时方用功場屋之业而留意此书如此宜为恬轩所喜也恬轩工於吟论文有眼目取东莱论史之法以序此编曰譬如一二百幅公案自有要处要处云者非武侯所谓大略乎余於此以恬轩为知言恬轩尉伯父也余诗友也

黄绍谷集跋

余初学诗喜诵涪翁诸篇谓其老骨精思非积以岁月不能也最後芟室植斋所编外集别集则有公七岁八岁与二十以前所作如溪上吟青江引牧童睥日岩下放言与内篇殊不相上

下乃知往昔十四五出游翰墨场斯文崔魏徒以我似班杨非特子美为然也绍谷为翁直下孙年十二即能文弱冠前後诗集有名者数种上追陶谢下轶郊岛志趣之远犹及於删前一家人物超诣如此诚可爱而敬者时之名胜随集题品其推许甚至犹以老作期之是固爱吾绍谷者也然后山尝曰学诗如学仙时至骨自换余则曰学诗如学禅小悟必小得仙要积功禅有顿教譬之卷帘见道灭教明心是所谓一超直入者固有八十行脚如赵州白髮再来如五祖而善财童子临济少年楼阁一见虎须一捋直与诸祖齐肩是岂可以齿论哉抑彼宗之法又有曰善自保任者有曰长养圣胎者以吾儒论之被褐而怀韞匱而沽韬而不耀闇而日章是则保任长养之道也今绍谷与余书曰年三十二矣此昔人赋秋兴叹二毛之时余知绍谷又非昔比决无忝於涪翁矣咸淳丙寅小至前三日

跋富文方公行状艾轩作

某少读艾轩书知先生所与交者如方次云陈西轩溪东溪西二郑大着正字二刘片文只字忘饥渴以求之幸而得昼诵夜梦思见其人尝谓莆於是时人物如此是皆千百年间见之士何其盛哉何其盛哉今北山礼部又以远祖富文公行状寄余曰此艾轩先生所作也余喜而拜奩香而诵则知富文之於老艾犹为前一輩老艾初年尝问学焉状公几二千言且以门人自称先生於人一字岂轻与又言公识拔溪东休斋於未知名时而溪西亦以奇书奥义求质於公然则富文之於莆又为诸名人所敬畏者是何等人物惜其文未及见而遗言卓行仅於志状中得之使此数纸不传後来谁复知者北山方有盛名於世今既表而出之富文之名自是显显矣方輿之後八世殿中祖以孙着表于河东北山其有焉

给事丁先生奏议跋

公早以赋鸣莆之言赋者宗焉既而他文渐出人始得而诵之此仆学於莆时也及公登朝首传火後一疏两学同舍皆曰简到而深切犹胜於习庵公之名於是大矣俄而改纪公始戮豸弹文諫藁遂与洪王二公角立此仆为诸生时也甲午公督监闈仆以词赋为公所许常时造榜上三名必诸经公问何故吏曰是为一色教官公曰教官非斯人予谁予寘之第三至今以为例开院仆以门生见始知公为世伟人也仆既误窃虚名公每见必喜曰余於兄文不愧此眼既别南归五年而公没哭之溪上堕泪者数日每怀知己之恩必曰公今已矣其不朽者文也可尽传乎公犹子南一仆亲友也因公嗣子云亡尝相与语曰吾叔父遗藁吾不得尽传今十失八九吾甚痛之仆曰此宋杰之责也宋杰擢第癸卯南北宦游相见之日愈疎虽尝聚此数卷仆未之见也宋杰没始得之其子览之怆然曰公为諫宪今孔范也公司封驳古袁李也穆陵知公最深垂大用矣天竟夺之事业既未究而生平着述寥落乃尔虽涂归直前诸疏亦失之是岂可以六丁为诿岂不惜哉虽然此集之存固少其间乃有著蔡於眇绵者有药石於沉痾者有逆鳞而输忠者有捋须而犯难者讽之味之可喜可愕而且春明玉洁波折澜回幹之毫端曲尽其妙即此而传亦不朽矣独散语韵语俚语经评史断有尝及闻见者片纸皆不留是则可为斯文惜也至如公之大节则端平亲擢犹凤鸣朝阳公之所以名於世者此时也嘉定之进致我以名公何尝一识哉嘉熙之留实上所眷公岂容遽去哉当时在朝岂无三变两来之士而公居其间独为全节此穆陵所以属意者大而惜其慙不遗也後村为公铭墓颇

得其心论甚正而辞甚悲死者而可作也公必以後村为知己而人亦以後村为知言

跋方持叟岁寒三友制诰

毛中书传退之试史笔也当时之士且笑且怪子厚至为之解嘲岂非骇所未见耶然东阳沈作芭蕉弹文前此矣以朝廷体制用之游戲似非退之作古其骇也何故尔後遂有以竹夫人木居士为颂为赞者仪曹以为善谑当矣昔安晚先生以帝师留经席时取文房四友入之北扉西掖之文继而作者不翅数十家既又转为岁寒三友除授余向留京已得之同朝临川吴万叔及还三山得之宪幙四明张立道二兄皆尝以词学应选矣今莆阳方持叟年才弱冠两荐於乡西上过门乃以此卷相示後村许以年少而笔老意高而语绮信非虚美持叟此行必擢高科登膺仕他日本色文字官舍我又谁属因思宏博一科嘉定大臣以私意废士亦弃不习遂使公朝两制之选每叹乏才既设小词科又欲秋试增为四场岂亦闻鼠尾帐之诮乎使今世友朋皆如持叟於进士业之暇游戲於斯文字一机尔岂有难能者哉常杨苏李将层见而叠出矣

林君合诗四六跋

今场屋之士为诗文四六者皆曰外学固有哂其必荒举业者又有自挟以傲同辈者余曰二俱非也文字无古今机键则一是岂不可两能哉直患不用力尔脱穎策之吕伯恭林夙永嘉论之陈君举戴溪前辈赋之叶初陆唐老其人皆进士也笔力所到何所不能邑士林兄君合？俚语一通访余溪上以其所作五七言四六数篇下问且求跋妙年场屋未了而余力及此汪洋有余趣向颇异是非两能者耶又何惜数语然学贵自知求知於人未必以情告我江湖诸友人人有序有跋若美矣或以其浅淡则曰玄酒太羹或以其虚泛则曰行云流水疎率失律度则以瑞芝昙华目之放浪无绳束则以翔龙跃凤誉之讥侮变幻而得者亦以自喜後村翁每以锦裹刀为笑者此也余素不然敢以情告参之离骚致其幽参之太史致其洁此子厚言文者凡作皆然君笔进矣更以二字求之老子曰惟能病病是以不病他日当以余为知言

跋东坡与苏丞相颂五帖

山谷云东坡简札字形温润无一点俗气观此卷真所谓笔圆而韵胜也前一帖借金带乃初除从橐时第二帖获谴时升沉转眼荣辱兼之由今而观并可一笑百世人物固不可磨也

跋蔡端明遗建康杜君懿行草四帖

蔡忠惠正字为本朝第一行草俱妙然得者絕少此卷尤当宝之

跋东坡默化堂三大字帖【堂名坡所命也】

三大字神全而韵胜其说尤美此坡仙儋耳所作与者果谁欤公方见仇於世而能求此於公

亦贤守将矣体四时之运而无容心於其间付苦乐於偶然而随所寓以自适此先生养性之法也岂直为牧养之妙乎默化之名奇矣哉虽然四时化万物亦化其不化者长存此先生之帖所以传先生之名所以在也

跋山谷与魏彭泽四帖

山谷元佑八年七月除编修官时方服除绍圣元年除宣城改鄂渚六月离城下八月至彭泽四帖皆此时作所言三前执政【微仲郢州莘老蘄子由筠】之报绍述之祸萌芽矣明年先生去黔中矣今片札寸简百世宝之而子厚诸人字诛笔挞童稚鄙恶得丧荣辱果何如哉

跋摩诘看云图【注云襄阳米友仁元晖丹阳释梵隆茂宗同作】

陆平原云情见於物虽近犹疎神藏於形虽远则密观此笔者必以是求之苟知其趣莫问谁作

跋玉融林鱗诗

诗雅道也几败於唐唐人以为进士业也然而不败者李杜韩柳元白诸贤不可得而束缚也今世之诗盛矣不用之场屋而用之江湖至有以为游谒之具者少则成卷多则成集长而序短而跋虽其间诸老亦有密寓箴讽者而人人不自觉所以後村有锦褙刀之喻余常恐雅道微矣今玉融林鱗吾邑佳子弟郭外之田足以自给原夫之技亦颇自力而喜为诗亲?此册不远访余是其意盖有所慕而非江湖友朋之比余读而喜之曰诗有链字链句者有链意链格者此香山居士旧法也然不止是风雅之传几千载古今作者几百家或喻以弹丸或喻以组绣或以比洞庭之合乐或以比龙渊之探珠先後形容犹可置喙至如乐轩先师尝论芣苢三章曰譬如晴空一声霹雳今人言诗岂知有此境界子其以是求之幸而有得则四链之工固在於诗之中而自喻之乐则在於诗之外矣

题子真人身倡訓集

右五言三百首石塘林子真所寄也超伦絶类出人意表始若可骇徐而爱之曰是诗也非诗也真诗也诗之所以为诗不如此也然而必如此也何为而不如此梓匠轮輿各有规尺是岂规尺哉何为而必如此蕢桴苇龠自为鼓吹此非鼓吹乎规尺之常人人知之鼓吹之妙非有道者不知也删後无诗固康节言之然击壤诸吟何愧於古彼其规尺岂与古同所以鼓吹者同一机也康节之後又无诗矣幸而子真得之子真之规尺岂与康节同哉惟其不同所以为同同则不同矣虽然难能也亦难知也世无康节人必不知之虽然幸而不知也人人知之则我不贵而机泄矣抑不知子真知之乎人知之乎身知之乎倡者知之乎訓者知之乎皆不知也则余又何以知之子真嘱余为之勘辨如斯云者其知乎其不知乎

题徐先辈家传

正字徐公以文名於唐末誦其賦者與樊川香山共夸詡也遇非其時名高位下釣碣固在而文緒浸微直至建炎始有族孫著作一序又寂寂焉雖詩賦俚語數卷探龍雅道諸集而世莫之見至有遺佚不存者寶佑以來十一世孫平父始收拾其書采摭遺事求其年月而譜之辨世俗訛傳列所作先後於是冥鴻於審知之閩捋虎於大梁之朱溫未篡適放榜公既第不至汴往來致光諸賢之帖感咏天佑末年之變忠唐之心歸隱之操出處本末始備而大節著矣平父於公可謂無忝獨惜歐宋二賢共為唐史不見張文定所記九國志所傳使公之名不得與龜蒙表聖共入卓行隱逸之間不為無遺恨也雖然今平父名列龍飛魁亞行即顯融文章節槩當與公共為不朽又何取於傳不傳哉

題徐少章和注後村百梅詩

在昔聞人有注前人詩者有和前人詩者未有且注且和者獨趙次公於坡老為然數十卷之詩和盡而注又特詳此人所難能也今徐君少章以後村翁百梅絕句注之和之援引博而用韻工勝於人遠矣然翁詩六七千首百梅特集中一卷爾兄若了場屋之事能盡為翁注之豈非朋友所望唐詩家李義山其用事最精密世所喜讀者而苦於無注開卷茫然良以為病況翁詩比義山數倍而句句用事融化獨妙他年若無注本尤病於義山前輩云任淵史會注陳黃二詩多得於同時及門之友故其間略無差舛今翁游咏午橋樂接引後進有疑可以面質將有勝於任史矣吾友其勉之

跋鄉僧詩集

從上諸吟家詩有自選無求選於人者山谷詩甚富而選者為內篇放翁詩萬首嚴陵以前存者二十之一誰實去取之誠齋舊詩亦多削去尤梁溪以為可惜亦不肯留其自信如此今人不自信而以此質於人誤矣況退之有云人笑則以為喜譽則以為憂將使人選其笑者欬選其譽者欬上人昔以此集示余嘗說偈言矣又欲求去取焉余乃以自信者語之非靳也抑余又有語上人景淳藏作山居詩十首甚工其師寶峯見而諭之曰此詩不減灌溪第恐世以技取子而道不信於人今上人欲了單傳之事而用工於此道進於技乎技進於道乎留以自玩勿示人可也

跋蔡伯英四友集

退之毛穎或者以為俳子厚獨以詩之善謔史之滑稽比之四友除謝之作亦猶是也初安晚先生留養魚庄仆以文字時奉燕笑先生偶出此數則仆戲和之既而後村亦和之爾來作者甚衆今總幕蔡君又出此筆於諸作之後抽擢愈深排比愈巧四六家之能事君實有之不妨於此游戲也昔夕郎王是齋取前漢諸大傳盡入駢體作漢制一冊進之阜陵遂見擢用君方游諸老間知己不少若此集因以上聞他日詞垣之命南澗不得而遜矣

跋靜觀小藁

静观小藁余友人傅子渊所作也其词清放而意闲适余方得而喜之客有过余而见之者曰子渊之诗美矣其自名者奈何余曰太极一图所主者静夫子言诗曰可以观子渊学圣门而宗濂洛者意以是名之客曰情动於中而形於言歌之不足至於舞蹈观奚静窈窕寻壑崎岖经丘登高而啸临流而诗此渊明得於游观者静奚观余曰不然柳月梧风先天翁击壤诗也伊川尝以非风非月美之而翁之自叙则因闲观时因静照物因物寓言因言成诗子渊之静其得於康节照物者子渊之诗其得於康节观时者子奚疑然则子渊之诗似击壤乎曰余闻方外诸友谓子渊虽以吟事为乐而观心静定之学所得者奥诗其土苴尔客起而拱手曰然乎滋可敬咸淳丙寅腊月林某书

跋赵次山云舍小藁

江西诗之冀北也????家行而诚斋出後村评中兴家数以放翁比少陵诚斋比太白而文公昔尝病之岂以其变化如浮云激射如飞流有非绳墨规矩所可限者然非病诚斋也病学诚斋者也今江西诸吟人又多祖陶谢矣陶谢诗之典刑也不假铅华不待雕镌而态度浑成趣味闲适一字百链而无链之之迹学者亦难矣白云以诗名江西次山白云之子也余识白云於京师而得兄於乡幕廼以此编见示自命曰云舍小藁步趋陶谢而隐然有诚斋之深思五言如饮酒及饮酒社日雨声秋怀云卧诸作七言如重午夏日生春春晚守岁唐律絶句工力到而兴味深余读而爱之知兄方盛年吟事进进未已白云集未尽见而得此作乃翁不死矣遂题此以为白云贺

刘侯官文跋

文亦难工矣虽从前大家数亦未尝不磨以岁月而後得之自韩退之有如是者有年之说至老泉乃曰其始也骇然以惊其久也豁然以明及其胷中之言日益多不能自制试出而书之再三读之然後浑浑乎觉其来之易也此非沈潜之深悟入之奥无缘有此语虽然不如是而已也老泉此书方以请於欧公故其言有不容尽者若退之所谓迎而拒之平心而察之见其皆醇也然後肆焉斯一转又有黄芽化云之妙非传心得髓者未易知也山居刘君少掇高科而学问不少辍其为文日锐日进正如秋水方至而波洄澜激姿态横生今观此集有豪爽似曼卿者有崛强似徂徕者其间纡余夭矫又有文潜少游之遗风他时霜降水涸一见涯涘当知退之所以迎所以察所以肆者其不名家矣乎比因南来访余溪上与语及此君以余为知言遂书集後以归之名某余同年实斋侍郎之子也咸淳五年五月日林某题

跋忠定晦庵与井伯林金判诸帖

井伯林公艾轩先生犹子也艾轩在时客於忠定之门所交多当世名胜紫阳尤敬爱之此帖二十有七皆二公往来者也忠定在闽欲致福公晦翁不可而公亦不肯一出帖中所谓学可再招不至者网山也公为旧客网山为?氓皆重於一举足如此而忠定拳拳之意亦异於将相不俛眉者矣岂不两贤哉紫阳在漳以经界访求人物公亦不一就之诸帖云云或及时之大故或访以所述何业或曰欲质所疑不可得紫阳岂轻予人者又砚书一事有如後村所记东

岱信伟人矣余又闻东岱夫人田氏也既嫠而嫁诸女皆名家历山陈君作哲其第三倩也陈君得璋夫人以锦囊送此诸帖以代犀钱玉果曰可抵千缗非艾轩侄妇安有此语闻者皆笑而陈氏独宝之今叔谦因平父山长寄以示余而西山後村黼轩手迹俱在思前哲之浸远而题跋诸贤亦不可见感翫不已书而归之叔谦平父皆艾轩诸孙也故家人物遗风尚存好尚如许艾轩之书其有传矣咸淳己巳立冬前一日三山林某书

跋艾轩读离骚遗蹟

灵均之文龙骧凤跃神鬼神帝不可以笔墨蹊径求之此从上诸老所传艾轩先生之语先生於书具如许眼目而此卷随条杂记不厌烦碎必少年初读时今集中有以骚发策者议论颇相出入岂非究其纖悉而後尽其底蘊乎此真读书法也平父徐山长其外大父井伯金判也於老艾为外诸孙擢第来归极意访求先生遗蹟所得颇多而真贋相半盖莆之前辈风流慕尚学艾轩笔札者甚衆故有虎贲似中郎者此卷其真也平父宝之咸淳五年十月後学林某敬书

跋徐平父所藏兰亭二帖

山谷谓右军兰亭无一字一笔不可以人意摹写或失之肥瘦亦自成妍此卷二帖皆摹而又摹者与余所藏颇相类虽其间有失真处然亦有可心会者以山谷之语求之则可竹溪林某咸淳己巳九月己巳书【可以心会亦山谷跋中语】

老艾遗藁跋

此卷是为艾轩先生遗藁曾孙白杜方君之性所藏也前数则有幸学纪事者有为经筵故事者有为二广论盐法岁计者有为榻前拟奏者此先生在西掖时也最後细书密行有论西汉顔注者有论大易乾坤二卦者有论顔子学问先後者此先生为著作与南轩东莱邻居时也其间至言妙义如曰自尧舜以来宇宙之间始晓然知有帝王之学如曰体乾坤二字之义惟天惟地可以尽之不当说乾便指天坤便指地又如南轩曰圆终日如愚当时问学中间一节先生曰退省其私亦足以发此是初学无疑钻坚仰高以至欲罢不能则是中间一节非先生无此见也非先生无此言也余既得而翫之因曰是虽残篇败楮真蹟能几而论其世想其人其於朝廷则有君臣遇合之懿焉其於班行则有朋友讲论之懿焉其於家庭先生口占而东岱笔受则有一门父子之懿焉是岂千金之璧所可敌哉方君其珍之咸淳五年十月十五日林某书

老艾遗文跋

嘉定壬辰岩仲初解褐余方补上庠与岩仲饮别彙征曰兄老艾外诸孙也先生遗文散落殆尽兄之责也岩仲得尉光溪需食数载搜猎残缺之文不遗余力乙未余成进士归方尽见其所得者搜猎犹未已也每得一纸虽三数行亦必驰以见质其间亦有诸生传录而论议失真

者余稍能辨之遂不以入集已刊之莆番两郡矣年来诸友又有得於故家而集所无者或以见遗大抵有若似夫子俳优效叔敖益信岩仲所选之精可无遗憾今性仲访余溪上又出此数则余谓太史公之书必扬幼安所传为真褚先生虽为补遗或者未免疑之古今之事皆然敬书遗文之後以俟具大眼目者

诸贤与艾轩书跋

头一帖忠定书也忠定与先生书如家人语余得见多矣次两帖乃留丞相章贡所作时先生犹在朝也最後范石湖数书如作英英堂托先生求张余曾三公画像皆所谓桂林伯者如厌诸妓所歌俚语则因诞节哀苏黄旧作委吏教之曰尽洗蛮烟瘴雨亦与先生言之又求古端旧石意故家有得於未闭岩之前者风流好尚岂俗吏所为哉使人读之如见二仙相与倡和湘南楼时奇矣

诸贤与东峦书跋

东峦为艾轩先生犹子获交诸老间此卷乃忠定晦翁益公两游公李鴈湖诸贤手帖时东峦或未解褐也方君彦惠得之其子性仲出以示余又在历山陈氏所藏赵朱四十帖之外陈亦东峦之倩与方为襟友东峦四女蒙仲乃翁亦倩也然此等书帖多留方陈二氏而他倩独无何也闻岩仲向得以入集者亦皆性仲借之此帖虽存岩仲本已拱矣为之怅然

竹溪虬斋十一藁续集卷十三

卷十四

钦定四库全书

竹溪鬳斋十一藁续集卷十四

宋 林希逸 撰

四六

理宗皇帝大祥疏文

臣必慕君终身之谓大孝丧无过礼天子以达庶人既终遏密之期敢伸梵呗之祝大行皇帝陛下乘云独乐慧日同辉渭北出游之衣冠第勤追慕天上已成之宫阙永遂逍遥

理宗皇帝大祥疏文

千岁厌世至於帝乡德忱罔极三年服丧达自天子礼必有终祥而旷然嗟何及矣即梵宫而祝赞合率土以悲号伏愿大行理宗皇帝与道逍遥在天对越庙配太祖为百世不迁之宗圣即如来有万劫长存之性

丁卯贺郊祀表【代作】

中国一人只袭宝图之庆正月上日肃陈圭邸之仪熙事备成受命用怵恭惟皇帝陛下俨君临之始弘郊见之恭汤又日而日新德隆昭格舜荐天而天受礼重肇禋柴燎而宵景穆清銮回而朝光绚烂符万国讴歌之望昭先皇付托之明宗社尊安神人鼓舞臣际时龙御与数骏奔丹凤楼前幸侔从而班贺金鸡赦下知喜动於驿驰

丁卯贺圣节二首

鸿名镂牒备天下养以为荣虹节称觞与佛降生而同庆敬凭清呗仰祝遐龄寿和皇太后殿下如月之恒倪天之妹其来有自诸仙振金策之乡惟休无疆万岁并瑶池之母叨利天之佛母方庆诞弥金轮王之如来相期示现合臣黎而欣戴资梵呗以?祈皇帝陛下介福万年并明两曜昨日今日瑞迭纪於虹流先天後天寿永齐於鳌立

贺生皇子表【戊辰闰正月六日皇子生代作】

璚旒高拱万年方颂於怡愉银榜储休弥月载歌於覃訏懽腾鳌拈祐笃燕诒恭惟皇帝陛下惟德绍明自天施祉帝天之功九叙洽於羣生华封之祝多男得於一索况昔惟诞节瑞当冀

荚之五生今闰亦建寅数比雪花之六出以圣祖神孙之继美知皇天眷命以无穷臣等际世重熙逢辰大庆吉日维戊肇开暉暈之祥千岁为春可卜治安之盛

贺皇太后表

惟圣宪明受兹福于王母今天命哲肖其德以神孙懽奉东朝瑞腾北阙伏惟皇太后殿下德备姜任之圣寿齐箕翼之长帝捧瑶觞既先天後天之同祝祖诒玉叶又五日六日以相仍闰亦建寅帝为施祉即造物安排之巧知皇家眷佑之隆臣粗缀班趋遥陈表贺怡愉问膳喜看朱芾之祥欢笑含饴竚见绿车之侍

贺皇后表

万年为母奉太后以怡愉一索得男歌生民之岐嶷懽传万宇喜动六宫恭惟皇后殿下以坤承乾如月嫔日諫而脱珥朝必谨於鸡鸣祿以授兮占喜符於熊梦福隆基祚瑞塞堪舆臣遥企椒涂重伸华祝小星及下之惠宜尔绳绳後天不老之期相维穆穆

贺丞相进封魏国公劄子

位峻上台国隆新命爵尊以劝屡辞尚父之师官无可酬特锡大名之魏勤劳既懋谦逊尤高共惟某官旋乾转坤功成再造扶天浴日翼赞两朝属当访落之初绰着无前之绩仇鱼之蠹重窒曾龙之径扫清诏令罢行皆先帝欲为之志弓旌收召多前朝未至之人修内攘外而德威强开忱布公而容量大气象挽回於庆佑声华远聳於伊周快活新条丕变一和之效明良嘉会共期千岁之安某欣际熙明遥瞻穹邃虽少陵已老敢忘左丞诵句之恩恨史克不生莫继周室啓宇之颂

贺丞相除太师

国重元勋阶崇极品兹惟后矣宅牧宅準以式四方曰吾师乎为仁为义而泽万世维垣之逊必陟告廷之命又新喜动埏垓辉流简册窃以宗社之重所寄一贤古今之难莫如二事诰今王以敬德时惟升陟之伊保冲子以居师是亦征东之旦自汉唐以来鲜此惟殷周之老兼之乃若皇家非无名哲澶渊之寇遗恨於天禧好水之韩始称於嘉佑吕相有不名之宠於平世何为紫岩任中兴之功而未扬不与盖尝观田文吴起之问答诵采薇天保之声诗我思古人式至今日恭惟某官盛德元老耆儒宗工声猷远聳於典谟勲烈徧铭於彝鼎力侔再造在长江饮马之初忠济两朝实大宝遗龟之际搢笏垂绅而声色不动谏经订礼而册号具严快活新条皆述行於先志登延衆正即诒燕之初谋屹成磐石之安亟了因山之役尔乃攀乌号而如慕奉龙輶以请行两宫迭勉谕以莫留四海诵奏篇而竦立导恭八袞归秩九虞清庙之对在天心质祖宗而无愧咸池之浴出日功於社稷以愈隆爰即止垣荣路絶席殊拂撝谦之志实无可酬之官虽韩以勋潞以年未有如公之全美使河如带山如砺所宜与国以长存弼予一人期之千载某叨居化冶喜际明时卑栖莫望於鵷严踊跃敢鸣於燕贺第慙拙陋曷究形

容如正台之席而啓黃扉公何樂此追先帝之遇以光遺德世所望焉

賀魏國公再拜相

九垓宣制元老還朝今王即命曰功宗方切時中之念先帝寄臣以大事敢忘陛下之忠是以袞歸能令鼎重嘗謂甘盤舊學姬旦大勲高宗興罔顯之思迄容遯野成后有弗知之悔猶待反風是皆簡冊之夸談未盡君臣之全美卓如今者皇乎盛哉共惟某官以文德規乾矩坤以鉅力扶天浴日保金甌而無缺茂著勤勞奉玉几之末揚具明忠孝登延衆正允契治謀快活新條無非先志既奉襄城之駕功即方中樂慕子房之游疏却復上扁舟徑渡飛鞚莫追宸章疊十數以苦留朝紳隨班次而迭奏謂唐於裴令所謂佩安危之身漢去鄼侯信如失左右之手庚牌?下丙枕皇安殿學士與持橐以通行王叔父亦載酒而勉諭賴高帝之靈啓我幸阿衡之志幡然都人欣司馬之來天下慶紫岩之相師維尚父必成會盟一正之功心若老臣宜盡開濟兩朝之事某戀德恨去天之遠歡顏聽動地之聲蚓亦何鳴燕知有厦蒼生厚福欣聞再提筆之期紫極隄瞻但竭一瓣香之敬褰裳舞蹈端笏敷陳

繳劄

共審宸旒凝竚公袞來歸子房為帝者師雖念授書之約予旦篤前人烈宜膺作冊之新勲華極千古以獨崇聲節比二公而兼美基圖益固日月增明某方吟遵渚之詩欣聽告廷之命亟凭俚牋僭露慶忱因思君爽序言有所謂召公不悅者訓解久訛未得其旨獨艾軒先生以為召之不悅蓋欲歸而未許也方周公東征未還公嘗獨當國矣卜洛既成浩然動念周公以二人共濟苦留之公之不悅蓋此時也夫何自此既留之後終始王室獨相兩朝三十余年是豈淺心狹量者所知哉蓋功成欲逸固為賢哲之本心眷篤必留是乃君臣之大義九廟之托重則一身之計輕此古大臣事也竊惟師相先生始焉之請既同召公之心今者之留必踵召公之武翼扶初政昭答先皇萬年敬天之體蓋自今日始區區排偶未竟愿言敢述此比拳拳為斯世所有賀后一通謹百拜敬具短札?申欲望鈞慈一賜電覽擲去

賀賈平章啓

注倚眷深辨章位正兩朝開濟俸建武再造之功一老褒崇繼元佑二公之美軍容國容之俱肅天心人心之允符遠思盛朝喜見今日共惟某官元勲大德碩量鴻儒和野和朝致治慕虞周之懿知兵知國御戎笑秦漢之疎雍頌變局而躋至寧艱難定策而了大事既弼成於新政且蒐舉於彌文元旦奉瑱賡昊天有成命之頌兩宮作冊續思齊所以聖之詩然後歛謁儒師以至躋升哲祀丕煥恢弘之烈允殫勛相之勞帝方念無可酬之官公乃有成不居之意爰登絕席就幹洪鈞聳世觀瞻對時尊禮首百辟而獨立宰臣之上定三日而一游廟堂之儀時於熙明坐而經論恩禮有加於潞國眷留期比於召公稱瑤池之觴孰若黃扉之榮養作角招之樂宜於清廟以美成某退服鋤犁遙依袞黼傳觀制詔與臯謨說命以同夸歸美君親愿天保南陔之再作

丁卯贺平章生日【八月八日】

共审岳骏生申奎明聚卯帝梦予而赉弼久殫启沃之忠时申命以登庸式协平章之治两朝元老千载昌期共惟某官箕昴瑞储乾坤名塞三日月继千秋之节生德於予中天成再造之功弼基自我跻时雍而衆芳和聚穆天緯而大化敷明丕宣擎柱之劳独任赐图之托大舜协华而类帝姬公作诰以明农惟玉皇注倚之隆而奎画眷留之切谓天生李晟非为朕实惟社稷之臣矧时若甘盘又有殷可微师保之训勉就湖山之赐第优崇廊庙之重臣慈闱养志以含饴瑞旦同声而称寿遥想贺床之万笏?来御府之八珍野言富贵神仙虽山人而亦美克颂燕喜寿母何鲁国之足云某扶犁正托於化钧滌笔僭修於庆牋静惟今昔未见拟伦潞国以德韩王以勋既备两公之美广成之寿汾阳之考所宜二者之兼舞拚惟深形容罔既

贺常枢密

共审诞?制册晋幹钧枢躬一德以享心时则有伊尹筹千里而决胜吾不如子房朝登真儒国成强势敬惟某官以魁垒之名瑞世以学问之道致君二纪践馫两朝闻望名为殿上虎义不留而莫留拔去眼中丁时可进而後进?矣常扬之制凜乎袁李之风天纶奋笔以涂归星履拂衣而径去先帝雅知於大器留遗後人嗣皇简记於直声式至今日乃者还望之於试政位坡老於大仪熙事备成功畴咨於五使基命宥密班峻陟於一堂益耸岩瞻嗣膺廷告莱公为文正所重盖本同年潞国与忠宣俱贤竚须共政某身逃空谷心企层霄晦叔得时老固难於言仕司马作相礼不可以无书所恨衰迟有慙後贺

贺叶右相

播告枫墀延登槐宰招旌不至如旧学之遯于荒有袞是归喜良弼之置诸右宗祧增重廉陛益崇共惟某官德备乾坤之和学得圣贤之奥笔全大巧文为六馆多士之宗王立清聯名在百辟千官之上雍容出入密勿论思其浹於下也皆仁闻仁心其沃於上者必大计大虑社稷之臣惟黜庙堂之量如安琴瑟更张独首诸贤而召衣冠甚伟有如四皓之来方烦公调护之时即咨汝弼承之意两地共擎於鳌极一朝扶上於羲轮弓劒是藏所以报先帝而忠陛下麾幢於迈亦惟光万邦而至海隅属时图任於旧人将旨趣还者累月九重虚竚百疏告辞朝有潞公次辅必资於司马相惟蒙正元勲庶佚於韩王及此告麻闻者举笏问朝问左右孰不属心惟天惟祖宗生而佑我相须一体在时二人必如三贤推庆历之车主行而已将见万国贡王朝之籍曰盛哉乎无疆惟休俾耆而艾某迹慙孤远格合遯闲闻宰路之尊隆为世道而鼓舞公来西洛想万人环马以共观仆老香山虽一翁自渔而亦乐

贺留枢使

作册明廷颞柄宥府斗魁宣化第一星而曰枢天佑生贤五百年而名世朝耸岩岩之望国隆濯濯之声共惟某官学贯几神姿函经济文軋汉周而上名垂宇宙之中射策大廷以直言为多士之冠影纓华省即上疏讼故王之冤帝简知於是时士期许以异日暨燕诒之谋决首鸿

碩以习居固知注倚之密隆犹且从容而入出着於朝者直节孚於衆者仁声即华使以趣还实先皇之深意持荷紫禁藹如君谟永叔之言讲德青宫隐然温国申公之望嗣王纘服旧学奋庸经纶二府之间才兼文武翊贊万微之化力罄忠勤属时修攘加意申儆谓知兵知国莫如希文之贤况同德同心庶协裴公之议畴咨元哲帝曰钦哉独幹洪枢相尊等尔是必以鲁经而正夷夏之分以周雅而规内外之功当使函谷泥封然後天河甲洗边无南牧敌宜袞冠带以称藩圣寿东朝公亦戲袞衣而娱母庆关家国福等山河某晚际熙明格当闲退迹远方盟於鸥鹭才衰莫颂於夔龙为世道以激昂企台垣而鼓舞西周二老时哉如鷹之必扬元和一翁仆也虽渔而亦乐

贺後村八十劄

曳履名臣垂弧瑞节新吟传藁已夸孩儿贴额之年初度衔杯恰是老子出胎之日大手时需於阁老元身寿等於壶公某夙沐殊知欣逢盛际允协周熊之兆曷伸夏燕之私輒课疎芜仍羞輶菲僭祈容纳倍切皈依三子七孙再入共游於两地十年一贺百篇更纪於千齡

贺刘朔斋除乡漕兼建宁

帝眷耆英诏兼台府持两使之节孰如朔翁之贤總大漕之权仍领南州之牧列城雷动千里春浓为丹山碧水而小留听綠雾红云之遽召某逃闲既老知己惟公广厦懽顔遂钓艇渔簑之适形墀接武看龙藩骊驾之归

贺陈提刑【淳祖】

九陛疏恩七闽司臬轡丝遣使由赤霞选表而来衣綉问民称霁月洗冤之志令如霜肃至与春同共惟某官伟矣文宗?然政誉惟当官必於行义此先帝所以知名星渚抗言有不受之豹虎日畿持节安肯问於狐狸虽许辞鹭序而归实深有燕贻之意於皇嗣圣简在胜流初元须共理之良寛书布矣正旦霈好生之泽丹笔付之禁武稍迂宸知殊密钦哉惟恤姑登孟博之车道之将行即补仲山之袞某散人号久遗老传成莲叶操舟息意但寻於溪友薇花残梦回思幸识於省郎乃以坚民托之冀部皇华吾善处愧莫陪骑竹之迎短褐人更嗤喜或遂扶犁之适率然笺贺幸甚镜原

贺吴恕斋除兵侍

畴咨闕庸趣还禁省诗书元帅方进直於老龙笔橐清班特峻跻於司马邦人恋嫪輦路懽迎共惟某官瑞世一贤牧闽三载行尽世间之好事何求身外之虚名来从佛地位中用心仁矣得於书册子上皆学知之宜其推行如此光伟今嗣圣正朝之始谓先皇得力之臣与其远惠於一方孰若归游於两禁有文必有武熟师友之讲闻志刑不志兵笑史家之疎缺於此献论思之益仁焉运宥密之筹某辱知素隆受?尤幸虽听颁纶而喜预牵卧轍之情民愿借留莫遏九重之眷公归奏对请言七聚之贫

贺洪福帅割【天锡】

帝畴法从诏领元戎两朝之召五载之辞但见奏篇之?上十乘之雄七闽之寄肯为乡部而一来吏民争辂於福星主相欣闻於上日共惟某官学扶人纪道结圣知直声发於世喑哑之时雅操见於局转移之後人诵排奸之九疏我如横野之孤舟大老归乎来嗣圣荐勤乎出綍諫官徵不起诸公应愧於弹冠缴还紫禁之除书苦逊清湘之赐钺有臣不召欲治其谁想宵衣之思贤至於侧席即昼锦而命率姑以起家玉音不住以丁宁輿诵又从而怱慙迫斯可矣乐则行之碧油幢下之书生何必富贵琉璃瓶中之清望竚见登庸某辱眷素隆受?伊始兹候迎於茅虑敢率越以笺忱老愧惰荒拙难模写作堂而刻诗於石固知相人之所荣要路而请造於朝尚愿齐王之得见

贺刘尚书生日

听履星辰储精箕昴欧老之生丁未昔皆谓之再来祁相之会丙申今已多於一筭为文章之宗主备福祉於元身名重两朝壽期千岁某欣逢盛旦莫效庆忱素不工词又耻借君房之笔姑惟存礼敢并羞野老之芹

贺徐仓兼宪【明叔】

帝眷一贤诏兼两使饥者溺者既捐例卷以活其穷钦哉恤哉又证古书而行所学廷颁纶命乡讹锦行某听崇台布德之新为圣世用人而喜始了澄清之寄具知简记之深老固欢颜布被安冻庐之雨公宜归覲绣衣立霄汉之春道与时行施由闽始

贺陈提刑兼泉州

帝提三印诏付一贤紫帽雄藩特移於簞节绣衣御史就领於金珠部曲欢呼商夷鼓舞共惟某官传止斋涵古茹今之学推濂溪洗冤泽物之心平反之笔春和廉按之章霜凜即使星之躔次专佛地之拊摩森戟凝香竚见藩条之肃连檣接触抑令?市之通雍容荷禁之归迺续芝纶之至某欣聆邮令倚俟郊迎与野老共谈喜即瞻於标宇虽崇台渐远要不外於提封

贺刘朔斋除中书礼侍

荷橐真除薇垣再入周使载驰之蹟方庆袞归贺公二命之华兹闻诏下九陛虚怀而图旧三阶夷武以登庸独柄斯文即栋吾国某辱垂情於簪履喜窃听於丝纶姑亟泐於贺忱尚嗣鸣於别悃礼乐文章之老定符岩尹之瞻邮简倡和之诗宁去溪翁之手

贺李侍郎兼漕【建宁】

公领侯藩甫颁条於上日朝分使节俾兼组以观风九重之眷异殊再命之荣赫奕声摇山岳

欢溢闾闾某正慙溪老之寒幸入?氓之数棠陰仍在樾?是依得人吾榜中四海必均於霖雨
先州後天下八城重见於福星

回洪帅

紫橐油幢方秩初筵之礼华笺锦字肯贻老圃之农欲使扶杖之癯得与曳裾之客眷隆破例
蹟冷知荣适苓桂之未除整檐簷而莫强不容稟令有甚负芒谪仙长揖而见荆州岂非素愿
渊明称疾而辞刺史何敢为欺

赵判府贺年劄【兴化】

史占新历纪百二十日之春侯举庆杯上万有千岁之壽奉慈闈而燕喜轺帝阙之凤纶一贤
得輿千里同颂某虽居邻壤何异?氓未能贡贺於椒盘乃若鸣谦之华翰元日到人日自慙溪
老之陰寒卿云若非云徒羨壶公之喜气矧叨珍惠倍剧璆藏

回林潮倅贺年

春多一月喜历日之开端潮有三阳赋屏星之来暮内君子既遇拔茅之吉半刺史宜膺出綬
之荣小留咏於柳塘竚催班於兰省某隐几穷吟而度岁开緘愁破於清朝今年似去年对酒
遥知於花好元日到人日为莺独惜於冰寒

谢再任武夷

钦承恩命倍激懦衷伏念某自去阙廷久安农亩每思畴曩幸逃偃月之危机敢意衰残获际
中天之盛旦踰分屡叨於华擢汗顔十斥之自貽齿豁头童世鄙退之之陋囊空米尽谁怜子
美之贫曲赖陶甄未忘簪履支离之踵有粟足可 门莱芜之甑才尘又嗟涸辙问钧僭矣提
笔活之此盖平章先生仁不弃於内沟德尤先於嘘槁谓彼耄无能之老曾备驱驰使其饭不
足於今有亏覆幬冒焉引喙慨尔垂情某敢不?祝瓣香归依化冶十题渔具远师笠泽之散人
九曲棹歌即访幔亭之精舍虽捐糜之无路实戴荷以犹天

贺余宅燎黄

禋恩賙远燎祀展仪黄制前陈谐告墓显亲之志緑?後拜兼呼班擢第之荣福萃一门辉联三
世某自慙倚玉莫预炷香善积庆余侈有子有孙之美利成宰彻想为宾为客之华薄效菲輶
厚祈容亮

贺余帅参生日

谷城喜气蓬岛瑞光是月先立秋适生申於五日有星曰南极宜介壽於千齡姑满酌於兕觥

竚飞来於凤诏某有慙葭倚薄致芹恭同是黄冠堪笑两翁之岑寂遥瞻华佩阻陪诸客之欢娱

回福清薛宰劄【梦桂】

门外三尺草底闻蒲艾之香河阳一县花犹念樵苏之老竭来华染访逮衡茅倚马挥毫巧矣抽黄譬白笼鹅包黍加之重碧轻红辱专价之肯临知可人之厚爱鸣琴余暇少看竞渡之龙舟召札伫盼即见催归之鳬舄

回丘司理【谢乃翁退庵集序】

还兄先集率尔署衔惠我长笺得之街?古云三不朽贵如翁之立言教有五大伦忘其友则非义所幸蠹编之犹在虽非鸿笔以奚辞慨怀一生一死之情可无有子有文之喜若为言谢弗称知惭乐莫乐於相知叹斯文之已矣序者序所以作庶後世其知之

代後村遗表

投綬归来之久抱病日深阖棺就尽之时怀恩天远将随土化敢罄私忠伏念臣夙慙琐尾之踪横被蛾眉之妬几更烦使动触危机爱憎并起於虚名毁誉皆伤於过实固尝负妄男子之谴幸不加刑然卒叨先神后之知召而赐第逆旨涂归而又去充员襮直以重来衆忌是仇十年不齿輿图中复华颠幸际於改弦扉掖兼除紫橐仍陞於曳履瓠羹至蒙宣索奎文特示褒嘉疑福过以乞身拜宸颁而稽首宝箴亲题之句御墨犹新筐金内出之珍归装骤富宠加一老荣倍二疏奈还笏之未几痛遗弓而何及今皇新命方欣扶杖之观古我旧人亦軫遗簪之念老龙华而过望肯龟药以弗痊逮此新春乘之他证分揣侥踰之极理安梦觉之常况其年八袞又加三此在昔诸贤为絶少所恨涓尘莫效终始何裨竚閤泉扃指他生而自誓遥瞻霄汉尽垂歿之悲言伏望皇帝陛下体道清心尊贤敬故能保民则能保国知事天则知事亲楮下物昂节用当由於上始敌强我弱攘夷莫急於内修毋憚忧勤而喜小康毋纵窥觐而干大政思再造之艰必申严屏翰守两箴之训必如见羹墙于以奉太母怡愉之欢于以荅穆陵付托之意臣万事足而欠一死身无憾於九京羣枉杜而和衆贤国愿安於千岁

竹溪虜斋十一藁续集卷十四

卷十五

钦定四库全书

竹溪鬳斋十一藁续集卷十五

宋 林希逸 撰

四六

贺江左相

上宰登庸明庭宣布今王立政宅俊而灼有三良弼辅台作相而置诸左朝绅喜而举笏国势定於覆盂窃以盛时所贵者多贤泰阶莫难於齐色昔惟元佑尊申国而吕范并除亦若成周内毕公而周召分治是所谓鼎承君之象于以成鳌立极之功於赫前闻复见今日共惟某官气稟两间之浩文为百世之宗早似获麟当世谓异人之间出晚如翔凤举朝望大老之来归盖方行言行道之时已有汝翼汝为之托先帝既登崇於两社嗣皇遂图任於初元其居休休以有容其进绰绰而余裕赋灵光之在鲁誉望独隆歌缺斧之居东优游三入及兹廷告式副岩瞻同德同心上曰甘盘之旧学知兵知国敌云江左之伟人翕然四海之皈依重矣一身之负荷和协於虞者臯夔之大德交懽於汉者平勃之良规推车何取如争作楫但期共济乾坤之闔辟有运人物之会合以时三贤谋而成太平之阶自今以始千岁壽而计中书之考无疆惟休某喜际熙明迹慙衰遁昔忝相门之下士今为耕野之遗民既分守於黄冠徒企瞻於紫汉公来西洛想千人环马以聚观仆老香山虽一翁自渔而亦乐

贺马右相

播告辨朝登庸真宰资商者帝思旧学之甘盘祚宋惟天相中国之司马欢腾海岳声震华戎窃以圣时所贵者多贤泰阶莫难於齐色昔惟元佑尊申国而吕范并除亦若苍姬内毕公而周召分治是所谓鼎承君之象于以成鳌立极之功於赫前闻复见今日共惟某官稟德金明而玉粹蓄学地负而海涵方鱣舞狐号屹立南都之壁及凤翔麟出独鸣正始之音清名下视於严徐精思上凌於燕许虽前辈老文学之士各避一头凡中朝大典册之文更无两手先帝已深於简注嗣皇宜亟於延登盖烦公调护之时即咨汝弼承之意方歌几几俄赋栲栳九重钦崱者三年四海欢欣於再入贵居廊庙澹若癯儒名塞乾坤欲然尽下同堂选吏何尝有范老之勾当世名流孰不入裴公之疏土闻风而自奋物蒙润以不知属当揆席之久虚预叩前旒而苦逊暨汝其济曰有合哉二人非我有私亦惟佑于一德明良胥会气运有开三贤谋而成太平之阶自今以始千岁壽而计中书之考无疆惟休某时际熙明格当闲退虽愧田中之老亦为门下之人庆世道以激昂企台垣而鼓舞千官百辟之选信永叔之知言一翁六士之诗笑乐天之痴语

甲子回生日启

後村

公为翰长先携宝箠而归仆守祠官岂忆锦袍之旧同嗟流落共念衰残共惟某官履上星辰
笔惊风雨身怀碧水丹山之绶意守清泉白石之盟六学士五相一翁公无不可九尚书四登
两地人谓宜然方将慷慨以县车乃为交游而度曲某凄其寂寂愧此拳拳歌寡和之阳春喜
而拍手问疑年之甲子数又从头

新漳州刘通判【强甫】

棹歌九曲喜得缺之便家弧射四方愧衰年之遁世客谁来只公独念之伏惟某官家富经籀
翁传心印岸司马之帙了不介怀学伯鱼之诗自知得髓未忘旧雨为赋阳春某续前哲归去
来之词见几差晚诵可人好事近之作回向固宜率尔稟酬幸甚恕亮

余制参【邵鲁】

棹歌九曲喜得缺之便家弧射四方愧逃谗而遁世客谁来只公独念之蔼然旧雨之情贵以
华星之字盛仪侈锡寒舍增辉参红蕖幕府之谋竚迎朱绂访浣花草堂之隐亦有青刍谢拟
面言幸祈体督

乙丑

福清陈簿【德亮】

散人赐号寻棹歌九曲之游老景逃谗负弧射四方之志寂寂正慙於罗雀拳拳独荷於栖鸾
伏惟某官屈意勾朱潜心舍紫蜚声鴈序着鞭始逊於少公造榜龙飞唾手即收於高第以毫
端之游戏为门左之辉华七十年之过三自知衰退五百名之第一尚覩扶摇亟沥谢言幸祈
孚亮

丙寅回生日启

後村刘尚书

生男子而县六矢老慙戴氏之格言寄禄官而呼大蓬年比陆翁而自诮岂伊衰槁犹足品题
汗顔锦卷之貽镂瞻荷囊之赐此盖某官以真法从为太宗师先皇看坡老之文每闻停筇外
国爱乐天之集不吝捐金未忘撰履之徒曲借濡毫之润某虽有附青云之喜愧难酬白雪之
高况内学之命南音之辞仆悔晚矣若上殿之扶北面之拜公愿先之

新漳州刘通判

凋年急景谁怜退士之穷每岁兹辰长拜可人之赐阳春腔妙初度辉生共惟某官义山之凤
絕清士元之驥方展谓翁吾翁爱友久矣亲之然子曾子何人拟之过矣以郢人寡和之曲
賡先生自壽之词愧不得当辞则何敢对嫦娥十九分得七之度有慙攀桂之天高诵放翁七
十年又四之诗敢道大蓬之阶似衆方鄙消君独品题率控谢言幸希孚亮【子曾子之文忠词
中语】

陈公益

年比香山之白自信非伦词工双井之黄雅知造妙华其初度惠以新腔且罗列品之嘉昭仞
高情之笃此盖某人胷藏远趣笔有余功义尤重於交游情不分於凉燠择所宜而下拜感此
意以弥襟执?丫头岂堪歌於白雪挥毫义手愿即躋於青云

福清薛知县【梦桂】

老处士横江潭而渔伊谁访问邑大夫为河东之凤於我勤渠度雅调以入琴华久尘之县矢
共惟某官隐万人海负一世豪为玉融金翅而来实迂俊武得锦瑟朱弦之妙雅有余功歌此
阳春荣其初度某思昔人风推户之句几误揽衣歌令尹月当庭之词不妨击缶【先许见访
】

兴化萧教授

小山桂隐谁为岁晏之华半水芹香独惠阳春之曲捧提锦卷拂拭蓬弧伏惟某官奏赋名高
横经誉藉四海传千岩之集允谓世家诸生诵三舍之文见称哲匠义存维梓喜动衡茅某忽
得新腔顿回老色独寻南隣爱酒之伴击缶歌之何必东山携妓之游衔盃乐甚

新劔浦郑主簿

仆守五穷已愧老夫之耄君名三絕肯貽幼妇之词把翫笺题拂拭弧矢伏惟某官学参诸老
才压羣英身为鸾棘之栖方将奋翮念及渔樵之叟不厌低眉双緘之华三舍其远某思候迎
之一失有欠负之百慚敢意英流未忘遁蹟暮齿九老图之白才则歉焉新腔太史氏之黄褒
之过矣

刘逵卿【惠词用後村韵】

老守钓竿方枕石漱流而隐使持锦字自朋霞友月而来知吾故人记仆初度伏惟某人经明
古意文谢时粧蔚有擅场之声蚤作买山之计世无具眼顿成方叔之迷我有遐心不待孔宾
之呼谓宜遗俗尚未忘情一门阿大中郎无词和者三迳欢迎稚子乐与歌之【朋霞友月刘

别业之名】

福清陈主簿【德亮】

老甘渔隐是谓世之陈人贤有鸾栖犹念邑之寄客华其初度惠以新腔伏惟某官名早占於乡书梦曾吞於古易尚携银案必取青氍王杨卢骆之才暂为禄仕荀贾良平之作行振家声以勾朱之余功为垂白而加赐阳春白雪莫酬絶妙之词通明红云但祝方来之庆【乃祖省魁荀贾良平之亚论传】

三文书堂方岩尹【令嗣亦有诗】

仆还四方之事世谓陈人君为三文而来时有此客华其弧矢惠以珠玑伏惟某人簪裳世袭於芸香乔梓名联於桂籍八义手之赋如乘如皐一捻髭之吟有闲有甫何意老渔樵之士得交贤父子之间百赋千诗未有荣於此者两采一赛所期恕而亮之因书绪言为仆多谢令嗣状元更不别状

石塘林子真

汉陰丈人之居纷其罗雀文隐先生之子誉以绂麟拍手自歌汗颜滋甚伏惟某人希踪魏野拍肩洪崖屏案上之楞伽占笔端而游戏味少林之髓久矣杜门弦清庙之音时乎应世鏗鐃五字黼黻一寒棘句鉤章是乃兄之余事金舂玉应尤愧仆之非长

石塘林子常【付珠林氏堂名】

县弧之六生男子老愧前闻付珠之二如少公宠贻佳什锦笺入手茅舍增辉伏惟某人粲然有文渊乎似道夜雨对床之乐慕尚昔人青云得路之夸鄙夷俗客独有溪干之叟是为方外之交三万之日无多常恐茶山老矣七十之年又四乃为放翁歌之

新潮州林通判

一男子之妄有愧蒙弧半刺史之贤特贻珠玉知心有此拍手歌之伏惟某官既吟烟雨以拂衣犹分风月而怀绶以数茎吟一字之手岂轻予人谓七十又四年之翁独为爱友每加黼黻欲赅蓬茅某感岁暮之交情岂容锦卷愧阳春之寡和徒负金舂

同安林丞

老慙初度坐挹五穷我有故人书驰一介弦此宫商之妙瑟兮弧矢之华伏惟某官笔扫烟云曾藏冰露於蓝田公事之暇不废哦吟以茶山衲子之贫特相煖热眷怀许笃归兴何浓谓官情已薄於秋光而交谊不忘於旧雨年相若也素为二仲之邻吾有待耶拟寻九老之会

刘士仰

昨承华染承惠佳词特为弧矢之华足仞金石之谊凋年急景固慙斗牛之不辰西舍东隣岂无湜籍之畔去多情若此一感可知

新汀州黄教授

一辞而退臣之厚也甘日守於五穷十年之长兄以事之慕风流之二老字比蝇头而更细诗吟鹤膝以尤工华此衰龄奇哉异稟伏惟某官浩然善养粲乎有文经师人师衆方求於指授形散神散独自乐於逍遥同为扶杖之翁尚记垂弧之日堪传佳话曷称高情放翁七十四年之诗歌而自庆广成千二百岁之壽还以相期

刘智翁【小令嗣亦有诗】

老愧蓬弧方学渔翁之独钓君携锦卷且闻骥子之诵诗旧雨高情阳春寡和聊供茅斋之汤饼共披薤叶之琳琅君家兄弟不可当谁肯云龙之相逐帝乡富贵非吾愿但於猿鹤以申盟

郑进士

人生贵是男老负蓬弧之志常时有此客久寻灯火之盟愁破今朝歌贻白雪奉槐淘而浅酌击瓦缶以共歌六字语一字难愧莫酬於锦制去年人今年老且同醉於花枝

心游刘躔甫

老吾之老谁此日之肯来诗人之诗後数朝而犹至情知好我愧曷酬君伏惟某人超然心游久矣神悟鄙夷场屋耻为俗下之文笑傲烟霞真得吟中之趣贻半山之絶句问少陵之残年与鬼歌之徒有叹辛蠶之妙去人远矣何由致汤饼之招

僧贺生日二首

门前问今朝之客能来者谁山中无历日之人未忘此老扫除蔬笋演说蓬弧伏惟某僧了为僧心具论诗眼唱谁家曲从来自立宗风作牧护歌所得无非法要不嫌汤饼并为说贯花禅是九世临济孙虽论文章而何害添一日寒山子且听钟鼓以共饮

山中无历日谁传直斗之辰石上旧精?雅有吟风之兴得无生忍颂不坏身伏惟某僧说洞山文字禅作无本推敲势竹边松下之思时出偶然句後声前之机不言乐只悟三身之现化演六矢之因缘祖师直指单传何妨游戯父母未生一句便请证明

丁卯回生日启

刘後村

老寻溪友方散髮以弄舟公念門人為倚聲而度曲馳來錦卷增賁蓬弧共惟某官履上星辰手扶河漢了三麻九制之作笑把壺公殿兩朝諸老而留壽同柱史暫葆光明於晝眼不妨游戲於文心口占佳詞意恰孤蹟以通神之要妙俾對客以誇張白雪和難虛辱最高樓之賜紅云侍立但祈通明殿之歸

新漳州劉通判

浯溪聲叟老將至而不知斜川小坡交雖久而益敬華其蓬矢惠以色絲伏惟某官未駕題輿獨耽戲彩書無不讀但資以為詩簫豈必吹乃倚之度曲唾成珠玉義篤金蘭欲令欸乃之聲中稍識鏗鏘於格外第慙衰老方參露地白之禪雖有童奴誰識滿江紅之調有孤絕唱徒感高懷

福清薛知縣

投竿野叟浪家灤溪之濱制錦主人風格薛華之老情加弧矢曲度宮商共惟某官清名獨鶴之標廉取雙鳧之舄雨露司存之貴可但荷囊香烟消息之傳先聞箕筆行驂鸞鳳猶顧蟾蜍紅心好手之才不妨戲詠赤腳無齒之婢誰識新腔

新潮州林通判

滄浪一釣舟誰念笊簍之叟別駕半刺史未忘金石之交惠以色絲華其蓬矢共惟某官?中風月筆下烟雲難弟難兄遙想日吟之富旧雨今雨不為秋述之交拜手新腔彌襟厚感門前几客肯為湯餅而來林下一人甚愧華箋之及

同安林縣丞

击竹枯禪誰問蒲團之老哦松好友偶因草檄而來白髮旧情青灯共醉共惟某官在人賢者負余丞哉謂我鈐紙尾而書真堪一笑汝了詞頭而斥相顧兩窮昔焉嘗共於蠶鹽今也何嫌於湯餅八家家百畝之井素托善鄰十章章四句之詩彌欽盛意

福清陳主簿【咏什麴鼎】

放鶴山人嘆垂弧之老矣栖鸞高士指古麴而賦之運筆思工開緘喜溢伏惟某官廣寒有約矮屋暫留未忘先世之交欲作忘年之友謂彌明石鼎且勇索於倡酬元結注尊亦自銘而夸許矧是名齋之器何妨托物之吟美其燥濕以不移侈以壽炽而見頌荐君清廟期為瑚璉之珍老我空村何足斗筭之算

福清赵县尉

仆游鸥渚方思同谷之歌君立鸡滩独有倚楼之思乃为初揆特度新腔伏惟某官折桂词科访梅吏隐千诗百赋退之曾许於专场三字六么贺老尤工於乐府情知好我语欲惊人青蒻蓑衣愧方寻於溪友红牙拍板宁复有於雪儿

刘正奏【应旗】

老忆垂弧之志薄似秋光骚吟古麝之诗华予岁晏雅知情重谁谄交穷伏惟某人读西京太乙之书冠南皮七子之誉名香淡墨赋已压於邹枚谏字炳丹策将陈於晁董义深绋恋荣锡锦题第慙砚畔之笥笥曷称毫端之黼黻龟山景仁之宣哲拟既非伦元佑淳熙之舍人宁有此梦虽剥絨而愧矣聊击缶以歌之鹄立门外之?竚听金胥之传漏龙动砚中之影即聆玉陛之呼名

新衡阳赵主簿

昨尝交讯拟一谢以尚迟兹辱贻笺有七言之雅咏记存初度访问穷檐念冰翁之游从未忘畴曩出风人之比兴特示殷懃烂然画蜡名香侈矣书禽美醢择其宜而下拜感此意以难名有美栖鸾之仲措词佳甚相与盟鸥之侣拍手歌之

刘达卿【号後坡】

仆为茅隐谁下问於县弧人正槐忙知高情之投笔此秋月华星之赐非去年今日之同伏惟某人亘如鵬鹗之横秋却笑鯤鹏之击水摩空作赋耻夸义手之工入海留诗苦欲掉头而去交情仍在厚谊可量为我品题及三文之坠绪如君趣操宜千载以相期

石塘林子真

三径交穷皆樵父芸童之侣小山吟富有梅兄樊弟之贤眷此衰慵歌以比兴伏惟某人慕华阳仙之真逸为老泉氏之长公毛羣争掉之时笑人炙手蚁战方酣之日为我捻髭得此十章起而再拜八月枣十月稻未辨公堂之觥今年花去年人且饮君家之酒

石塘林子常

莲叶舟操老我兴思於濠叟梅花帖好少公吟妙於郢人笑指垂弧酣歌击缶伏惟某人交亲猿鹤才度骅骝进士虽不学而能何足浼我曲子岂可缚而住不靳予人一阕见贻兼金莫敌少陵饱饭但歌残年长相见之诗白老坐吟剩有阳春高难和之愧

刘智翁

城东住处谁寻白傅之家门外交情兄异翟公之客念其寂寂示以拳拳七字论工真半山之絕句三文得友胜子美之残年

郑进士

伏承华笺特贲初度吟散人之渔具世已相遗设廷尉之雀罗客有不去尚德哉若人也为诗者知道乎秋月雨章信独工於鍛链阳春寡和愧难谢於琼琚

刘子木

来日大难重有县弧之感徒友益散仅存割席之交好我情殷令人愁破碧云暮合何佳人之不来白雪调高叹郢客之难和

刘士仰【学稼刘之亭名】

判花老子视罗雀以知慙学稼故人指绂麟而过誉垂情八十老拜手十二诗汤饼薄持愧莫延於佳客浊醪妙理笑自酌之衰翁

回刘府教请讲易

室祀三文斋延诸友高贤屈贲正期讲道以吟风下问何谦若俾抗顏於吠雪?华笺特枉顾指危坐许剧谈揆此空疎间此歉忤寝冠昔日已见谄於竅言迂学衰年岂足污於清听知非所据愧不得当在浴谈经子厚犹且撒虎皮而去登堂论易充宗岂无折鹿角之羞

贺余制参【己巳】

纪节椿龄秩筵兰养调冰嚼雪一翁如立於翠蓬横卷弄琴双凤争迎於紫帽乔梓共官游之至乐缙绅传佳话以为夸某幸叨倚玉之荣遥致称畅之庆鸣鸾何处列樽俎之佳宾舐犊有怀过茶汤之痴女辄效微芹之贡竚需召节之来

回余制参

仆守黄冠破薇花之残梦公游紫帽记蓬矢於今辰眷眷高情班班腆赐曷称胎笈之意於昭倚玉之荣却之匪恭择所宜拜锦鲸还客庶揆礼以少安駟骑造朝当望尘而言谢

贺徐帅开藩【明叔】

玺书趣上金篆啓封戎垒晶辉元帅拥油幢之重藩条简当老农扶藜杖而观九扈日升八城雷动某老甘岑寂喜入照临礼盍贡於庆忱威忽传於先令不敢过呼一字恐书吏之却回所

期广廕万间幸故人之貽念深慙简悅窃冀矜融

贺吴制使【革】

畴咨紫橐雄建碧幢文昌六星光夙腾於魁斗长江千里身独護於风云胜势益张真儒无敌共惟恕齐先生两朝重望一代宗工试长才於蕃宣抚御之劳于中于外摅素学於论思献纳之从有德有言属时远图付我留钥国之藩篱门户坐制其全王之纛戟旌旗所分者半方叔之猷克壮子仪之垒骤明渥照乾坤胆寒夷敌竚究閩河之略即专帷幄之筹某辱眷素深闻命增跃自去岁贡笺题之谢莫嗣寸忱以残年为渔钓之游自甘远屏蹟虽疎於詞候情实切於皈依庭别贺裾自叹去人远矣功成归袞尚能为公赋之

余制参招饮

宁馨叠庆屏摄告?盛礼既成嘉筵斯秩重拜招呼之宠深慙谒贺之稽於粢酒扫而无伐木之遗具知雅眷不以微薄而废采瓠之礼自揆腴顏

行祖聘方氏书

男为之室合两家二姓之懽祖及其孙缔三世一门之好固惟情谊信亦夤缘令侄孙女箴训有严夙成於德性长孙行祖簪裳是袭笃守於诗书已於少小之时有是绸繆之约留紫薇之旧藁拟付此儿问红线之老人喜谐嘉耦

回黄丞请婚书

西掖陈人痴了子平之债东床得婿????由叔度而来二姓之欢一言以定令似将仕庆传簪笏书犹珞於善和而某季女诚守衿幃训粗门於内则既辱问名之礼兹承来聘之仪昔我祖曾门尝托抡魁之契而君家明府亦有文字之交信自夙缘兹为永好

回郭通判婚书

同升同里知此志之素孚有子有孙偶其年之相若况长者尝语阿戎而喜则今焉宜有快婿之求问名既领於彩笺?吉重承於嘉聘论情可省执礼何勤已祇具於回仪庸仰酬於至意两家缘熟幸谐鸣凤之占一旦名成尚冀乘龙之早

竹溪虜斋十一藁续集卷十五

卷十六

[集部,别集类,南宋建炎至德佑,竹溪鬳斋十一藁续集]

钦定四库全书

竹溪鬳斋十一藁续集卷十六

宋 林希逸 撰

戊辰回生日启

刘後村

老费招麾笑多生之宿业亲无补报慙初度之嘉名高情敢冀於宗工佳句特华於野叟此盖某官圣时鸣凤学海老龙北门西掖之文藁传万首南窗东臯之咏口授诸郎以游戯之余间示矜存之厚意两章秋月喜击缶以长歌一朵红云伫安车而入对所期雅拜庶竭谢忱

余制参【师鲁】

老子斑衣空记母前之乐山人朱绂正歆洛下之游尘埃谁省於蓬弧华纁特勤於葭玉谦貽珍染侈赐缟仪有慙樗栎之姿曷称椿松之颂聊为汤饼喜儿女之团栾伫轺朝轩尽亲戚之情话率然稟谢幸甚原融

刘架阁【强甫】

樵风泾之陈人贫无汤饼金耀门之召客宠有锦笺拜手欣欣夺目粲粲伏惟某官传後村翁之印乘半刺史之车父老攀辕正歌喧於霞屿文书盈阁乃诏入於日畿念寂寞之蓬弧特殷勤而黼黻是为雅颂之亚也盍此夔鸣安得羊何共和之第慙岛瘦亟抒谢悃切幸深原

兴化萧教授

笠泽散人老守犁鋤之业芹宫博士记存弧矢之辰犀骑远临雀罗惊散伏惟某官学穷圣域身为人师五七字如弹丸工於鍛链八九椽居老衲辱此品题钦叹高情持夸邻叟自念不神之牛斗寂寂笑人安得共和之羊何蹲蹲舞我率然奉谢幸甚昭融

石塘林子真【以九龙山命意】

我非一佛夙慙花掖之居君赋九龙取譬雪山之老拊殘年而易感拜妙语以增羞伏惟某人

心虽乐以自修名欲逃而不得刺史部刺史共腾嘘送之章中书令中书已上褒嘉之奏方需异宠犹念旧交黼黻蓬弧鏗鏘律吕奇哉所作庄骚太史下同工顾此欲闻父母未生前一句

石塘林子常

大方家之笑我老费招麾小孤山之故人多情缱绻记存初度贲惠佳篇伏惟某人以一郗之长才慕两龚之雅操鄙夷场屋笑傲林泉君鸣仲氏之箴何殊伯氏世宝长公之集宁舍少公方腾当世之盛名犹念衰翁之遯迹有客慙无汤饼愧此交情伊谁直得金莲奇哉好语愧云多矣还以奉之【伊谁直得金莲来词云】

刘达卿【号後坡】

前度表郎愧久收於朝迹後坡诗友爱尤笃於衰龄侈以高吟华其初度伏惟某人鄙夷场屋笑傲林泉君唾成珠素夸吟於汝伯仆肠无锦几见杀於世人胡为胶漆之投不忘弧矢之陋自念不神之牛斗曷称锦篇安得共和之羊何徒知珍袭率然奉谢幸甚深原

福清薛宰

孤山和靖方耽放鹤之游王所居州已趣飞鳧之覲情存胶漆问及蓬弧伏惟某官胷抱一和政纪三异装怀牒诉何尝辍单父之琴学道弦歌又喜度相公之曲顾惭绦老获预坚民衰年幸棠茇之依每岁有锦笺之赐光生庭户夸示里闾秋月华星愧殷勤而好我明年今日须展翫以怀人

薛宰劄

昨承答海方佩谦隆兹被华緘益昭眷渥记陈人之初度专盛使以远临侈赐缛仪光生茅宇瑞鹤仙之高妙允叶宫商祝鸡翁之酸寒岂堪黼黻已修谢启载沥寸忱莫究愿言切丐宽亮

刘躔甫【天游刘之楼名】

我歌庵小徒参水观之禅君好楼居独有天游之乐故人情重诞日书来伏惟某人苦学如甘爱诗成癖念五穷之莫送赋十首以相贻开緘赧然击缶咏只声名官职知合受於折磨富贵子孙恐俱难於擘画【富贵功名堪擘画最难擘画子孙贤刘诗也】

黄汀教【龙应年八十七矣】

仆诵子平之易自乐一贫公守伏生之书只争三岁眷眷两卿之二老鏗鏘初度之七言共惟某官经师人师意散形散龟手之方奇秘久已韬藏蝇头之字倾欹不妨吟咏念其岑寂侈此贲存卜邻虽慕於羊求所嗟远矣敌已愧非於元白何以和之

丘司理【得一山丘之楼名】

开三径以邻居托翁旧好得一山之友爱华我残年揆初度兮作是诗也伏惟某官称梅读富
擢桂文工鍛链功深尽吟家之三昧交游情重念散地之一寒欲黼黻於县弧出珠玑於衿袖
勾牵花社青云已暢於前途题寄草堂明年未知在何处【将到选】

同安林县丞【钟】

我惭视草分甘老於钓舟君厌哦松喜归调於乐府多情眷眷妙语铿铿伏惟某官学馆文章
之称南州廉白之誉探三文之脉络同出一门擅二老之风流共居三径常时和卷初度佳篇
声韵高低知行云之可遏舞歌凌乱?明月之长圆

己巳回生日启

潮阳林通判【式之】

仆开蒋翊径之三老寻鹤伴君刺昌黎州之半时寄鴈书念蓬矢之尘埃度瑰词而黼黻伏惟
某官兴存风月操比冰霜视公如龙虽鳄鱼而可训为王市骏知骐驎之难留身将致於青云
交未忘於旧雨饭犹可饱苟乐我之残年币不必将已感君之厚意莫修琼报辄奉锦还

福清叶知县【忠正】

仆意玄都观里曾为桃吟君来佛地位中乃通花谱喜其负耒问以垂弧共惟某官其仁满腔
於书具眼爱民如子素存一念之慈许我纳交殊胜十年之读方相寻於茅舍又招致以玳筵
矧怜岑寂之余尤侈铿鍠之作揆情过矣拜手歌之潦倒何堪私有滕国受?之喜穷通素定已
见孩儿堕地之时言谢既稽不工可愧

前同安丞林通直【钟】

门方罗雀伊谁笼鸽而来客有绯鱼惠我绂麟之颂多情眷眷再拜章章伏惟某官出哦斯立
之松归爱渊明之菊叹朱绂平生之负无羨於时赋黄绢外孙之词欲华其友开缄喜甚击缶
歌之仆似香山笑一翁憔悴君如子美成二老风流率尔稟酬幸甚涵亮

新德化方簿【晋】

遗羹而我独无方有穎封人之感读书不如一诣正思习主簿之贤荷君多情惠我好语兹盖
某官家世麟台之学丰姿蠨井之仙才名三十年夙称师匠扶摇九万里合快鹏程尚怜衰白
之踪肯借勾朱之笔作此诗也相期欲比於椿松何以报之自揆有慙於樗栎

新建安徐山长【端衡】

渔隐凄凉之士老愧饥吟龙飞魁亚之英名香次榜多情厚眷初度增华敬惟某官文擅衆长学参诸老作乃祖钓矶公之赋何减吴融读外家艾轩氏之书有如杨惲方将坐臯比而讲乃肯为蓬矢以吟君游紫阳之故乡自此升矣仆置青云之旧事还以祝之言谢有稽不工可愧【青云旧事空五泻一渔翁白诗】

新永春刘尉【肩吾】

白首来归空忆紫微之伴青云早达犹为黄绶之官落落於时拳拳此老伏惟某官文成家数学有宗师更生畎亩之忠已摅对策禹锡文章之力合演纶言尚怜臭味之投特贲蓬弧之陋百千万劫之鄣老笑多魔二十六韵之诗心慙好我亟兹敷谢幸甚昭融【百千万劫鄣白诗】

新徽州丘知録【应甲】

杜陵野客之家谁来剥啄退庵年兄之子酷喜推敲问讯垂弧殷勤按拍伏惟某官青云望重旧雨情浓道来不来正傒朱丝参军之直所美非美乃贻黄绢幼妇之词拜手钦承过情自耻甚矣吾衰矣甘为白氏之渔翁知之者好之有忝致光之曲子率然敷谢切几原融

海口翁监镇【应星翠浪玉虹镇中亭名浩堂中书之弟】

竹篱茅舍笑老我之无心翠浪玉虹知吟仙之得趣即牙筹之余暇为蓬矢以增华伏惟某官二难之誉俱高少公之思尤老吟风弄月精微独探於程书积雪熬波横写更工於晋问莫甚相知之乐竭来俾寿之词拜手承之过情多矣永嘉四子君真得於诗灵元和一翁仆有慙於才退曷酬雅意切几深原

福清赵尉【宗溥】

我非指李之聃其生也晚君似倚楼之赵所乐者吟咳唾珠玑问讯弧矢伏惟某官禀双龙之气擅孤黑之才以文自名读书有传东南一尉久得誉於闽中台省诸公争欲致之门下伫集觚棱之鄂犹怜沙渚之鸥白雪阳春深有慙於寡和青云异日谅不至於相忘

石塘林子真【同】

山头老汉谈入吾宗谷口子真名为君字共眈禅隐不厌衰残伏惟某人传文隐之珠得後村之印至道唯嫌决择精通向上之机正句不涉思惟真得吟中之乐凄其弧矢调以宫商一日百盃况有君家之酒十章四句长歌好友之诗何感如之言谢浅矣

石塘林子常【合】

杜陵野客谁肯共於襟期苏氏少公情有加於兄弟揆予初度惠我好音伏惟某人曾着千年笔通三昧小山小陆小谢比汉晋以来名家今年今夏今秋有秦黄而上句法因暇时而游戏为晚节之光华云南云北之往来仅存者我月蓬月山之期许先验於君【今年今夏今秋月蓬月山二相士皆词中语】

新平江吴江县张主学【松年建宁人】

学士为渔守白石清泉之约可人寄鴈自丹山碧水而来问讯蓬弧辉华篇翰伏惟某官早驰文誉晚上奏篇将寻花县诸生坐虎皮而讲犹念竹溪遗老忍龙具之寒不靳殷勤特相煖热七言八句知独行於苦吟三揖五穷相与歌而拍手

刘躔甫【翼号心游】

孩儿坠地已知分剂之严稚子候门自喜归来之久心游高谊意爱衰踪伏惟某人学有所传吟得其趣读武成二三册虽少必精録唐人五七言既多不厌功已成於四链惠乃及於左弧老不相忘独名家之翁季少尝共学实异姓之弟兄愧此多情何以言谢

刘士仰【更逮】

孩儿分剂定於坠地之时宾客交情陋矣署门之见多慙亲故独为吟哦伏惟某人霁月曾怀薄云襟谊谱牒自建威而下犹有遗风祖父得乐轩之传常如一日久笃葭莩之好不遗弧矢之辰老子形骸敢羨椿松之祝君家翁季信为金石之交

刘达卿【求志自号後坡】

前朝学士老甘退以为渔後坡故人词独工於吐凤揆予初度惠我好音伏惟某人才度骅骝之前声横鸛鹖而上少陵三赋信妙手之优为晦翁四书犹究心於未竟常年此日念念不忘秋月华星字字俱到多情若此一感云何语我儿孙宜袭藏而毋斲如君翁季尚远大以相期率尔奉酬幸甚加亮

黄掌祠【君遇允文先生之後】

三径就荒之老与世无缘羣经辨惑之家有人好我肯贻善颂来畀衰龄伏惟某人学得亲传文宜世用谓乃祖有春秋之学窃尝窥斑访鄙夫於泉石之间相逢握手纳交自此拜赐以之门左垂弧有愧过情之曲子溪干守钓何由上谒於涓人莫究谢忱切祈深亮

林强父【麟】

白髮筌筴之老即唐漁翁青衿筆硯之交皆周髫士為吾同姓祈我高年伏惟某人獨工於文所好者古盡毫端之巧可但原夫一兩聯厭紙上之聞欲從某也二三子因佳句法如何之問有殘年長相見之情可觀可興可羣詩差難而詞易俾熾俾昌俾壽事雖熟而語佳廣而充之用不窮矣【俾熾俾昌俾壽來詞結語】

方持叟【名德化簿之子】

仆解朝衣稱前進士君傳家學似小東坡不以老而見疎為此詩以相好伏惟某人擅場才俊跨竈譽高聖處自知可但一兩聯之消息班頭獨拜伫看三千字之縱橫以其納交翁季之間乃有俾我期頤之祝愛兄曲子堪為時輩之秦黃愧我釣翁惜不早師於邴邴

方帝臣【時舉次云正字之後】

仆友漁磯之叟方葺蓑衣君祖麟台之賢獨傳書卷揆予初度惠我好音伏惟某人富以才名篤於交旧謂鵬鳩相笑何大年小年之足云使牛斗能神豈善名惡名之無別衆方嗤謂我為褒揚二滿三平不妨老吾之老十章四句所謂詩人之詩何以奉酬切几加亮

劉智翁【貴活安溪之客】

茅舍玉堂衆笑無心之老藍溪琴室多情握手之交問訊垂弧沉吟擊節伏惟某人潛心者理得趣於書大年小年讀南華而縱論昨日今日呼太白以欲飛愛此衰翁寄之曲子君多好語信有似於天生我不中書乃浪云於物出自知不稱欲謝伊何

槩山照老

佛有三三之衆迹日何如仙開七七之花吾年相若多情禪友問訊陽人茲蓋某僧久坐蒲團屢拋杓柄七言雖妙不入半山之宗五叶相傳獨得少林之髓心心相似歲歲如然曹汾分派後五家許依參遍父母未生前一為我道來

賀陳倉

績最錄屏恩榮司庾日邊遣使九重所急者周咨境上爭公七聚共嗟於來晚車音至只輿誦欣然共惟某官一代名流兩朝異眷明道伊川之學問共得其傳司馬景仁之弟兄不同者姓自登朝黼黻歷儒紳是姑為本色之官便合峻緊頭之武青綾夜直方膺賜筆之榮皂蓋春生雅意凝香之樂惟時歛散屬意選擢需章屢上以苦辭催詔几頒而勉就丹山碧水暫夸刺史之勝游黃合紫樞竚續公家之補處某向窺窺於綸綍今幸托於幘幘迹安猿鶴之交心懷燕雀之賀識何蕃於六館況忝諸生笑香山之一翁尚憐遺老

回徐帥送開藩折送及菊節

为农负耒方依南国之碧幢遣使貽緘肯问东篱之黄菊有华异眷猥及寒踪怜其賒酒之贫
侈此卷俎之赐秩初筵而僊舞莫预衆欢倩傍人以整冠但知亟拜难名硯感切丐监融

竹溪鬳斋十一藁续集卷十六

卷十七

钦定四库全书

竹溪鬳斋十一藁续集卷十七

宋 林希逸 撰

省题诗

文字饮

我问扬雄字君评李峤文剧谈聊诘诘对饮尽醺醺笔落三千首盃浮一百分醉吟唐学士酒
颂晋参军良夜邀明月他年忆暮云独醒怜楚客悲怨托湘君

食见尧於羹

隐几看尧典身慙不并生道如知所味食亦见於羹饱学宁求饱精思不厌精垂衣虽已远失
筭恍然惊端坐如吁咈忘饥在服行盐梅思致主说不愧阿衡

枯木半龙鳞

枯木奇如许空山閱几春千寻依鸟道一半是龙鳞礫硿真如石扶持果有神雪犹留败甲云
不露全身藤比髯尤老根疑爪欲伸竚看雷雨夜一跃到天津

吊青塚

谁吊千年塚芳?唤不醒雪连沙外白春带塞南青一酹嗟何及重泉恨莫扁花曾辞汉苑草不
似边庭妾死匈奴在风悲壮士经遥怜斑竹淚鼓瑟和湘灵

野菜飞黄蝶

古竹疎篱畔无人菜自长双飞蝴蝶好一樣野花黄簇簇青无数翩翩意欲狂色鲜凝晓露翅
薄弄朝阳正拟和根拔因怜恋叶忙今宵须梦化随逐过山墙

刻烛

玉笋班头客文章絶代奇奉璋陪内宴刻烛赋新诗指认红莲影安排丽藻辞絶嫌痕已迫只
恐句来迟花烬将残处宫袍欲夺时宠荣归佩晚金炬出天墀

高议排金門

立个黄金马君黄第几門伊人来草莽高议动乾坤劲气层云上孤忠一缕存未通青琐籍先
献白衣言只为豺狼怒那知虎豹尊客星如入兆昨夜在天閤

潮回日射星

有底平沙上辉辉不暂停潮回陰未夕日射灿如星落水归何处斜阳照远汀浮光看闪闪散
地见荧荧拟泛槎寻石知非草化萤晚来河汉白渔火满沧溟

离忧忽浩然

只有片时留离觞肯计筹知渠因底别使我浩然忧握手看成梦多情种得愁征帆天共远羈
恨水俱流明日非今日杭州定越州殷懃无别祝切莫断书邮

星有好雨

视夜几回兴浓云泼未停无端常苦雨作好果何星有烂参之左于嗟月又经何心长霖霖拜
手问苍冥咨暑能无怨呼天孰与听或云旗伐动阴暄为兵刑

至朔同日

至乃阳生节常居子月中计年章在即是日朔应同一叶堦莫长飞灰嶰管通元来初吉旦恰
是六阴终料得云书际还嗟飢礼隆如何太初历辛巳谩求工

竹林七贤

赏静偏怜竹宜人况有林七贤同远趣千载有遗音避俗来深处披衣卧緑阴玉人三四辈风
箴短长吟翠入刘伶酒声随叔夜琴溪干唐六逸先後许论心

一字买堪贫

独妙如椽手夸传品入神千金犹莫买一字实堪贫玉柱多谁得银鈎少自珍愿求三折笔甘
作屨空人但喜萧斋玩宁忧范甌尘疗饥那欲煮吟苦漫酸辛

山光悦鸟性

细大皆天性逍遥宇宙间山光非为鸟鸟悦自因山晓日浮青嶂春云影翠鬟物情如有识乐
意自相关疎密阴俱好飞鸣态自闲夕阳归翅急应是倦知还

呼儿问煮鱼

有客过茅宇停盃待煮鱼向儿呼不已为我问何如骥子捫衣至校人授手初叮咛凡再四烹割勿躊躇正起羹鲈兴因看遗鲤书团栾陪父执更欲采园蔬

白鸟去边明

燕外丝方卷明开若个边痴云留片片白鸟去翩翩雨後霜毛湿风前雪翅鲜双飞向何处一半是晴天乍息鳩鸣垤还归鹤避烟须臾阴靄尽乌遶月娟娟

松子僧前落

野迴无人迹长松不计年随风飘子下竟日落僧前叶暗丹谁化根枯石共坚时敲经夹响匹似数珠圆味美忘斋久声轻入定便时看童行戏争把柳丝穿

月静庾公楼

明月今宵好曾經照庾公登楼当静夜怀古对秋风飞镜缘空上危檐映水中胡床无恙否岸帻为谁雄老子今何在寒光昔亦同清谈孤此景白髮向江东

星垂平野阔

良夜空如洗凭栏一望平星垂因野濶野净见星明点点光疑坠荧荧势半倾天低连岸远地尽看参横水迴过时白云收撒夜清银河今咫尺我欲泛槎行

风破寒江迟

倚棹吟将息江神听亦痴阴犹凝未散风欲破应迟飒飒声虽急冥冥雾莫披凌波疑有物到晓尚多时空使蜚廉怒翻令帝子悲沉湘人在否唤起赋椒蓼

剪烛话巴雨

不负西窗约相逢剪烛花惊心如一梦对雨话三巴蜡烬愁频落关云叹旧遮昔曾留劒外今却指天涯江远谈何剧风摇影屡斜从今须惜别邀月醉流霞

飞星过水白

良夜步郊垧飞看过水星四垂青漠漠一点白荧荧瑞彩浮莲渚流光渡蓼汀不应天共转恍若月初经错认珠生蚌还疑草化萤须臾云半黑渔火个边青

赤壁走曹操

往事思尘迹周郎走魏曹长江几争战万古一英豪乱石吹飞雪蒙冲破巨涛笑谈成一快姓
字信孤高賸拟投鞭渡谁知卷甲逃江山如昔日北望首空搔

拾穗许村童

拂拂新凉入家家获稻同参差多滞穗收拾许村童满地禾频落怜渠筐尚空少多从汝得小
大共年丰挈负归茅宇欢呼谢主翁晚来炊饭饱牛笛弄松风

石鼎联句

漫浪有诗仙相逢药竈边鼎存嗟石古句巧似珠联笔力扛何健云根斲许圆倡酬皆敌手摸
写耸吟肩何日丹同舐寒更墨共研和羹应待我赓载入虞弦

归人争渡喧

野外炊烟起沙边带日明归村人合遝问渡晚喧争暝色催行客长江阻去程帆轻斜照影语
杂远闻声隔岸招尤急栖鸦过亦鸣茅檐何处是儿女想相迎

月色不可扫

此夜一轮满骚情不奈秋月非人可扫人与月俱愁素魄凭谁问寒光为底留拟随风叶去还
似雪花浮竹影摇仍在波明散未收嫦娥如戏我移照读书楼

又

皓色一轮满吟看独倚楼伊谁能扫月使我不悲秋处处寒光共娟娟素魄浮竹知空弄影簫
岂解驱愁露重应徒洒云行却暂收谁疑门外雪谩欲课苍头

天际识归舟

日夕思天际悠悠半掩扉扁舟缘底急注目识君归帆外残鸦去云边一叶飞立须兰棹至细
认藁砧非倭指思江路牵儿上钓矶入门相劳问賒酒趁鲈肥

饮酒拜浪婆

对饮敲铜斗声声应浩歌频斟江上酒亟拜浪中婆深浅倾浮蚁低回舞短蓑白头高似屋素
鞵想凌波江远如神在盃长奈我何却怜独醒客憔悴赋湘娥

鹤引洗衣僧

独卷袈裟去禅房半掩扉僧行随鹤影鹤引洗僧衣振翼寻仙路牵裳上钓矶老缁轻濯濯白鸟亦依依澣涤元无垢叮咛莫浪飞茶烟休更避相伴月中归

新诗改自吟

酷爱惊人语诗坛独苦心吟成还自改改罢又长吟四链传谁法双声岂古音笔涂随句定髭捻用功深过眼疵难掩支颐吻欲噤身轻少陵集商榷到於今

秋水清无底

倚杖临秋水微茫一派平极深不知底独照有余清一色兼天净千寻似监明谁能冰下语为探地中行月动无移石云飞落止泓沧浪佳兴动可以濯吾缨

山鸟暮过庭

试拄看山笏新诗得自哦空庭人不到日暮鸟时过远岫呼雏急斜阳接翅多瞥看窗外影争认柳边窠散帙随吾意喧檐奈汝何须臾林鹊噪袞袞见金波

杓携龙角

帝斡璇杓处云高隔几重自天携左角出地见青龙碧汉方回柄苍精恰露容举头看斗指骊首觉云从西揭殊春候东骑验尾踪韩门人所仰直欲折充宗

山村人暮归

点点残鸦过孤村带落晖篱边闻犬吠山下有人归远岫连芳坞长林遶翠微云深认茅屋风细扬征衣樵唱同寻径猿惊为扣扉夜深灯火下儿女共依依

挂席上南斗

挂席几千里飘飘向极南昂头惊斗近举袖与云参海濶天光入帆轻水影?前瞻依宿六回望迫台三恰似槎星渚应殊钓月潭若非吟胆壮高处亦难堪

翁踏孤舟立

江远孤舟小悠悠避世翁望中留夕照立处倚秋风一叶烟波钓千茎雪鬓蓬短衣难掩骭独棹似浮空人影橈乌并生涯宿鴈同得鱼随贯酒醉卧荻芦中

同前

一叶孤舟小生涯在钓筒羣飞看鴈阵独立是渔翁浪与头俱白顔因酒暂红片帆烟渚外瘦影夕阳中蓬鬓千茎雪芦花两岸风烹鲈吹荻火隔岸呼儿童

屋上乌亦好

我访山家友遥看屋上乌不知何事好所爱与人俱竹外参差瓦檐间八九雏只应交繾綣却喜汝喧呼谁赋牙高啄因吟尾毕逋待令鸥可狎物我两俱无

苏武归汉

仗节来归汉麒麟万古图艰难曾使虏慷慨有臣苏鴈信传何有旄残啗已无拜恩趋凤阙挥涕忆龙湖日月依新主风沙失故吾一官才属国揽卷为嗟吁

龙马负图

八卦将呈露天宁秘此图出因龙马负瑞与凤麟殊八尺非常种千年有此驹皇穹开易象緑字见珍符鸟迹文非比龟畴数亦俱渥洼何足咏谁复羨西都

不寝听金钥

不寝因何事囊封奏帝庭铜壶犹未歇金钥故频听忧国长无寐怀忠我独醒鱼关频借问凤阙想犹扃珂伞依残月觚棱带晓星须臾看鹄立袖惹御炉馨

鸟影度寒塘

一段秋容好丹青欲画难塘幽尘不到鸟度影偏寒何处寻窠去行人瞥眼看云间寻旧侣水底见飞翰鸥讶随波没鵬思击水抟佳人遥望处误指镜中鸾

云霄一雨毛

自起南阳卧轩然志气飘三分嗟汉业一羽在云霄健翮凌星汉孤忠翼圣朝羣雄争逐鹿百鸢不如鵬垂翅应嗤异凌烟未许乔出师虽未捷万古想高标

同心言如兰

金石同心好言言可起予纫兰应足比伐木义何如慷慨输情久芬芳入室初诺能为一布佩不必三闾椒椒能欺我松梅合友渠衔盃时对饮冷淡共园蔬

围碁看驿书

驿骑军书到风流相国知淮淝千载事宾主一枰碁敌手无遗算名家有此儿我方分黑白渠亦决雄雌局外人人喜边头着着奇烂柯翁在否还笑世人痴

儿去看鱼笥

儿去出茅庐携筇远见渠行随溪畔鹤看取笥中鱼童穉喧呼至笊簪整顿初饵寒知不食罾少问何如穿柳呼爷笑编蒲怪仆疎荻芦吹火罢賒酒徧邻居

赐镜湖一曲

拜赐归湖曲生涯只此湖三韩云不远一镜月同孤天语书黄诰波光照白须柴扉当鴈鹜采地即菰蒲殿下投笺乞波间弄桨娱不妨眠井底醉入八仙图

玉斧修成月

我问青天月如何缺又生冰轮看碾去玉斧想修成睨视柯谁执传闻璞孰名元功无此巧素魄岂能盈兔向圆时捣蟾因琢夜惊广寒八万户技与女娲争

杜宇呼名语

叫尽三巴月凄凉杜宇声今人谁与语故主自呼名啼血嗟何意前身恨未平转喉曾有讳弄舌似犹生姓字诸禽识君臣易世轻提壶无意绪醉魄谩飞鸣

渔村晚照

自得江湖趣生涯乐在渔孤村多晚景落照映荒居近水高低岸诛茅八九庐舟横人语近网漏夕阳疎倚棹看归鴈呼儿促煮鱼脱蓑眠渐稳寒月动江虚

夫子墙数仞

劒佩随夫子倾心一瓣香四科分等级数仞叹宫墙我正劳鑽仰人惟较短长可窥怜子贡欲倚愧蒙庄步步瞠吾後巍巍藐彼堂传心因坐见三圣远相望

勇士赴敌场

士有非常勇堂堂赴敌场听琴何比象属意在轩昂触手声何怒推床兴欲狂广陵无散卒易水有刚肠劒客休夸诧桐君为发扬闻弦心有感解使懦夫强

晚凉看洗马

倚杖试徜徉幽看野兴长归鸦凌薄晚洗马就微凉落日明苹渚轻风拂柳塘遥观千顷雪静
涤四蹄霜喷沫随流水摇鬣洒夕阳尘缨应可濯濶步逐飞黄

封比干墓

埋恨非埋骨生前怨不逢比干犹有墓周室合增封一死身奚惜孤忠愤所鍾清朝加显泽终
古志遗踪宠辱嗟何意兴亡记所从谁甘游地下攀檻敢婴龙

雨後过畦润

雨後思花信相过欵杖藜翠明开晓嶂緑润遍春畦燕外丝方卷鸥边雾尚低贪看蔬长甲不
觉屐粘泥草挟余阴涨苗分秀色齐时逢原上客大半话耕犁

机春潺湲力

机事嗟何巧空村不住春潺湲因借力俯仰若为容尽日劳双杵疏泉隔几峰无人长轧轧助
我为淙淙碓下僧长喜溪边妇亦慵香厨炊已办时倩野云封

池水观为政

笔落冰人语霜凝照夜姿平心长似水观政可於池即彼掇蓝处看渠据案时清能见肝胆烛
可但须眉泥浊廉何有泉贪饮自知笑他浑数尺谁道是吾师

水中有行车

野水云何涸咨嗟为久晴昔曾移艇去今见有车行石已磷磷白流无脉脉生不愁濡轡度只
恐细鱼惊宁复沧洲兴空余野渡名秋霖看拍岸还听棹歌声

买木带巢乌

买木为新居诗翁德不孤巧当三亩宅带得一巢乌羞澁无多费槎牙已半枯却怜栖鹊在还
识主人无不入山家券应添画史图从今屋上好来往听相呼

月疑照顔色

苦忆君顔色归期未有期好风吹梦断明月使人疑对影三人共怀贤万里悲徘徊如欲舞恍
惚与论诗蝶化凭谁诘蟾留讶我痴暮云樽酒在只恐见无时

买石得云饶

自笑生涯拙天公意赠君买来千载石饶得四时云秃笔书新券苍苔带旧纹眼前长秀润分外是氤氲定价元非玉宜贫可当熏时哉为雨去利与世均分

柳影不碍舟

长短堤边柳波流影不流浑如低倚岸却不碍行舟水漾千丝乱风吹一叶浮轻摇兰桨过搅碎绿阴不似带墙头燕如紫镜里鸥那堪南浦别明暗两牵愁

榴花照眼明

惜花愁满眼倚杖庆新晴绿幄连天暗红榴照我明蹙巾迎日吐剪锦亚风轻一见眇昏失多疑醉缣生捻须诗欲就靦面兴偏清却笑酡酡後看朱碧已成

龙跃天衢

头角惊人世如龙乍跃渊身随三月浪衢在九重天云起方成陆雷驱正急鞭战鳞飞百万怒爪击三千赤水神何照苍精角有躔堪嗤时俗眼空向壁间传

开冰

仲月莺花半朝家已荐冰驰来金驷裹开此玉棱层冷逼茅檐透光从凌室腾满盘争雪莹照眼讶霜凝九庙亲祠举羣工禄赐膺爱君推托讽履薄愿兢兢

山有仙则名

试挂看山笏令人兴洒然夸名惊俗眼知道有神仙胜地栖丹客苍崖比洞天烟霞无此辈方册不应传柯烂今何处箫鸣若个边旧闻终缥缈何似竹林贤

竹溪鬳斋十一藁续集卷十七

卷十八

钦定四库全书

竹溪鬳斋十一藁续集卷十八

宋 林希逸 撰

省题诗

为麦祈实

麦事家家作宸旒軫意微无虚民所望为实我先祈见白欣舆诵愠黄屈袞衣要他春日饱莫使歛时稀饼饵香深觐牲荐必肥礼成农共庆加额对龙旗

云台图功臣

四七纷纭後殷懃帝念功干云台百尺依日汉羣公栖爵侵霄汉挥毫萃画工位分勲次第像列壁西东貌写丹青里名垂竹帛中凌烟生面笔人物古今同

携手升玉阶

螯玉成阶彤天顔去几层弹冠酬素愿携手尽同升得侣欣交臂伊谁恨折肱龙墀看密迕鹄武接飞腾已庆天街肃行须揆路登朝回花底散袖满御香凝

畎亩不忘君

君幸逢尧舜孤忠岂敢忘身虽居畎亩志亦在岩廊草野栖身久钧天去梦长烟霞虽自乐日月愿依光炙背当如甫披裘莫学光此生名未立金马进封囊

落日见渔樵

落日谁横笛江村一望遥喧喧归鸟雀得得见渔樵薄暮舒愁眼斜晖带远潮依滩纶在手出谷斧横腰歌罢寻归径影行先度桥两翁山水趣应未羡金貂

看碑不下驴

寺古碑犹在尘埃半已漫骑驴应懒下逐字细吟看鈎画雕镌古虫鱼辨识难停鞭欹帽立缓轡耸肩寒应笑修明字还如援据鞍归吟风掠耳影瘦夕阳残

梅花疑是君

欲访春消息寒花昨夜开思君如在眼使我亦疑梅蕊冷於人意
窗开露粉腮欲同渠索笑还似子归来兰室因香讶冰肌助我猜
一枝聊寄与何日共持盃

身玉要俱捐

壮节将全赵威风直挫秦若令空授玉宁用复还身此璧瑕何有伊人
气愈嗔头宁同碎柱节不可欺臣大义千钧重微躯一羽均後來谁慕
蔣盛节独嶙峋

清边生战场

已洗天河甲边清国愈强谁生今日衅战似古沙场不见狼烟久俄惊
鴈塞荒风悲苔染血月射骨如霜榆柳依然好干戈有底忙李华真健
笔吊古思凄凉

勒石纪汉德【班字韵】

稽落功成後将军勒石还辉华天子德姓字汉臣班篆刻千年绩镌磨
万里山勲名沙幕外岁月永元间颂笔嗟何古胡弓孰敢弯龙墀归拜
日称寿动天颜

云逐度溪风

拂面微风动轻云过远堤飞飞无定迹逐逐度前溪望断江东暮生从
舍北泥但随苹未起还傍蓼花低白映清波影红看孤鹭齐似迷归去
路漠漠自东西

苍隼护巢归

苍隼当秋日风高万里飞忽看孤影过因护旧巢归刷翮抟云汉翻身
度野扉雏饥方唧唧爪立自依依莫笑蜂巢小休嗤燕垒微物情元等
耳细大各天机

秋高风怒号

人意与秋高临风意自豪倚栏吟未已拔地怒方号露宇遥穷目霜林
见落毛威生来虎谷声震似鲸涛六鷁飞应退羣狐惧莫嗥拟骑鹏翼
去万里访卢敖

金买长门赋

谁买长门赋闺愁不自禁寸肠抒万恨一字直千金菲薄聊为寿凄凉
要写心珠帘春寂寂玉户夜沉沉语妙钱何惜宫闲恨转深文君因自
笑我有白头吟

雷隐象车音

不听车音久逍遥独倚台远闻疑所象细认隐其雷不怒声初发遥闻妾自猜轻移莲步出空喜玉舆来只谓君王顾因知神女推千金谁买赋会使圣心回

许由洗耳

有道之君子箕山一许由清波聊洗耳尘世肯回头此趣名千古奚心长九州若令婴世网何似枕江流俗事喧谁听寒泉响自幽邻翁牵犊避使我转增羞

川曲通诸海

直道行今古渊源妙莫穷百川虽若曲大海必皆通酬酢几千变周流共一中问津非断港无水不归东洙泗源尤正河汾派亦同纵横嗟末学滥说未为雄

李下不整冠

李下有傍观嫌微择所安莫将遮日手轻整切云冠故径累垂久荒林礼数宽杜陵羞任落贡禹喜休弹主正操筹待吾宁岸帻看义童却欢笑就地拾螭残

瓜田不纳履

莫道田间僻持身惧指瑕近瓜休纳履为履似侵瓜野径风随屣阳陂雨落花藤方铺满地屣且曳归家篱赋长庚蔓鞋吟子美麻及门如有客倒屣只烹茶

精卫衔石填海

精卫谁家女悲鸣苦自怜石知衔不尽海有恨难填妾父曾为帝禽言自诉天磷磷空尔啄渺渺浩无边志有愚公似冤同杜宇传扬尘终可待且伴羽衣仙

观庆云图

伊昔承天庆人间有圣君图传何世本今见古时云就日曾谣咏非烟喜郁纷笔工疑顾陆治盛忆华勲简册歌虽在丹青画罕闻坎中元有象心画妙羲文

掬水月在手

水下元无月江澄别有天凝眸欣浩浩在手掬娟娟桂魄方留影荷衣试弄泉正看波底样俄入掌中圆太白狂应揽知章醉欲眠我知光可汲便拟拍洪肩

弄花香满衣

隔岸闻风处清晨嗅露房花因闲弄久衣有带来香试摘枝头白还拈叶底黄恍如玉皇吏来自锦窠郎袖比朝方罢心因恼欲狂谢安休掩鼻非佩紫罗囊

梦见周公

至圣元无梦伤麟有隐忧道传自公旦意切为宗周泗水遽方觉东山记昔留鸿飞归不复蝶化恍同游洛卜图何在殷楹涕自收蒲姑如可作料想订春秋

四更山吐月

愁客眠难稳危栏忽四更乍疑山色改已吐月华明五夜筹将转孤轮缺未盈霜翻禽欲下云破兔还生问晓樵相语栖寒鹊自惊娥眉秋一半彻夕恼长庚

热不息恶木阴

苦热虽求息炎凉愧易心既云名恶木那复有佳阴烦溽方三叹婆娑有百寻匠皆行弗顾吾肯据而吟冷忆瓜浮玉清思竹碎金鸟犹知所择人岂马牛襟

渴不饮盗泉水

盗有经行处波流恶莫湔固能浇我渴誓不饮渠泉奔骥如追电长鲸拟吸川贪夫曾就酌饕者莫流涎窃玉严於史空瓢碎自贤杜陵思贾井病肺卧江船

道不拾遗

世似江河去还闻返朴时久藏天下富不拾道中遗行者歌如砥谁与叹泣岐锄金宁弗顾守剑烈能知楚国亡弓在荆山抵玉嬉抱茅嗟薄俗屋破呼羣儿

望祀蓬萊

祀事非常典君王望紫蓬仗从天阙下山在水云中采药何时返鸣鞘秩礼隆灵无先沛雨船有引回风夷见燔柴去仙难架海通札书终不验空翠锁祠宫

祖二疏

祖帐都门外贤哉惜二疏史留名不朽古善画何如张幕班离席归装问故居辞官两贤傳送客几华车帝眷殷懃在臣慙老病余重来甘降秩时为子房嘘

济河焚舟

汔济焚舟去秦兵意若何深仇思必雪信誓有如河甲卒方停棹将军怒指戈连檣皆纵燎劲
气欲?波拜赐前言在论功一炬多至今临岸处梦想髮皤皤

客星

久要刘文叔论交在阙庭不为渠相汉仅以客名星鹤髮蒹霜白羊裘近帝青宫中聊欵欵极
下独荧荧一点今霄汉孤灯昔钓汀灵台夸列宿讵肯共图形

驻蹕山

万里君王蹕雷驱铁骑环移来云下仗远驻海东山飞檄青丘外鸣鞘怪石间龙经占得耳禽
语喜违顔似勒燕然去如封岱岳还铙歌模写徧何不续东蛮

乘月登楼

铁骑围何急登楼却自由一轮秋夜月百尺岳阳楼老将凭栏怒嫦娥为我留功成长啸後人
在古城头羽扇荣差可胡床庾浪游千年髯孰似笛里梦并州

饮马长城窟

瘦马如乌渴长驱傍古城听他随窟饮不暇择泉清沙外追风骥榆边积雨坑花鬃摇汉骑草
血染秦兵地脉千年恨波腥万鬣鸣思归频蹠躅苜蓿满宸京

鴈足书

中郎沙漠外羝乳事何如赖有云中鴈能传足上书衔芦来内苑系帛自穹庐地说荒寒极人
称老病余史徒夸问犬诗莫咏烹鱼青鸟僊家使吾今益信渠

无弦琴

道外元无器聊横膝上琴本非弦可弄自觉趣尤深早向声前悟何劳指下寻昭文元不鼓鍾
子漫知音蹟矣钟名哑伤哉磬有心退之如解此十操不应吟

为郎牧羊

卜式何为者清班粉省郎不骑沙苑马只牧上林羊谩詫窠名锦何如羈曳芒含香休向阙挟
册且随臧列宿从嗤我三星喜咏牂尚怀肥报国抗疏欲烹桑

登单于台

天仗祈连外穷荒鸟雀呼登台真帝子絕幕遁单于百级云中见千官帐下趋穹庐垂旷野警
蹕近清都汉地今无虏秦城枉避胡呼韩天日谒却入渭桥图【天如穹庐罩四野勅勒歌】

蒲鞭

自古官刑在如何只用蒲贤哉知道者陋矣执鞭乎草草存笞责拳拳爱体肤教非刑可比耻
患免而无舜朴书徒识秦敲惨自愚悲因挞黎庶适意与寬俱

被褐怀珠玉

怀宝伊谁识累然被褐夫荆山宁泣玉沧海任遗珠寬博形何散龙鍾智似愚藏渊只自媚韞
椟肯求沽雅志褰裳蹈旁观按劍无我知韦布乐应不艳金朱

堕泪碑

叔子今何在风流缓带时伤心因覩物堕泪遂名碑剥落银鈎古凄凉玉筍【缺】生前驱万
马身後立双螭人物襄阳记莓苔太白诗【螭头剥落生莓苔泪亦不能为之堕】羊公岂无
德戎衍却堪悲

杏坛

反袂伤麟後凄凉旧日坛尚为人爱惜不使杏雕残叶映緇林好枝横泗水寒一从梁木去多
把落花看自昔棠思召于今木有韩遥知槐并并根古似龙蟠

闻鸡起舞

龙卧何时起生涯厌鼓鼙舞因随独鹤闻偶为荒鸡楚客长更梦秦关未晓啼竹风吹袂举柳
月傍楼低我醉非无度渠寒不奈栖谁家小垂手百啭听黄鹂

围碁赌墅

太傅筹边日家庭赌墅时淮淝千载事秦晋一番碁得算如翁妙争先落子知汝能输别业我
已笑胡儿曷得山先喜氐争局自痴两军临水处幼度着尤奇

西狩获麟

西狩知何获惊嗟徧国人自怜方叹凤何事又逢麟伊昔追戎地于今较猎频三家如此僭一

角岂为珍笔絶真伤鲁书成已系秦同时多虎辈谁信兽能仁

五言长城

老子风骚将雄豪霸一方五言如壁立万里此城长气靡曹刘垒声喧翰墨场但令投帻去谁
詫捻须狂羲笔图成阵韩文喻倚墙骚坛唯我擅谁敢犯锋铓

惜花春起早

苦惜花能好晴窗唤起频只忧春去早却要早寻春一片飞愁我千枝艳恼人鸣鞭思晓月化
蝶逐香尘醉卧狂谁子【楚狂小子韩退之】吟看睡太真每因风雨夜不寝为渠颦

爱月夜眠迟

意爱多成癖清秋怅望时月能向人好夜不恨眠迟捣药何为者停盃屡问之貂裘蟾正恋鸳
枕蝶休痴昼短何须烛更寒且咏诗婆娑无影处料得梦相随

登封泰山

海畔山名泰东封自昔曾三千余载记七十二回登冕辂陈金策衣冠迫玉绳秘书留岁月立
视俯丘陵华盖行中阪松官立几层祖龙空刻石千载笑冥升

碁声花院闭

花院重重闭香风拂面轻游观多野趣静听有碁声松老藏孤寺柯翁看几枰反关从烂熳落
子自敲铿得着僧应笑栖枝鹊又惊须臾闻剥啄收局出相迎

寒机晓犹织

机上谁家女更长睡不安当牕只自织到晓不知寒霜瓦凝威重冰丝续断难梭声随漏尽妾
意为衣单锦字挑谁寄银缸剔已残姑留刀尺久零落待输官

肃时雨若

肃肃存吾敬冥冥若有期人皆欣雨若心为有天知惓切忧民志勤拳在庙时片云催许急三
祝果伊谁方寸来何易吁嗟礼亦宜虚中求造化事应不须唯

鼠须笔

安得如椽笔晴窗弄鼠须知渠来某氏【永某氏之鼠】为我作尖奴熏室搜罗尽精粗简拔殊香沾窗下墨腥带瓮中腴食肉非无相挥毫且共娱生因斯恨汝莫把篆临模

僧敲月下门

深夜沉沉寂谁行下岭?寺深明月照门闭老僧敲剥啄林间寺婵娟云外梢山童破幽梦人影并疎茅殿冷存余篆窗明待解包山虚传谷应惊鹊亦离巢

笛里关山月

笛里愁千绪更长忆故山今人吹古曲汉月照秦关霜竹和声切胡床倨坐闲一轮秋塞外万嶂野云间此夜听渠弄何时照我还回思帝城角花影映朝班

隔竹敲茶

兴入卢仝椀龙团旋解包忽闻茶窗响正隔竹窗敲活水烹新茗香风度绿梢听知童落杵惊起鹊离巢香比云英捣清无水厄嘲林深留客处未美已公茅

门多长者车

窄窄柴门下多应隐士居时人皆障面长者竞迂车罗雀宁辞客瓜牛旧有庐高轩诗李贺都骑赋相如痛饮宜投辖何心更曳裾辛勤有此室鄙矣羡金鱼

师直为壮

古有征无战堂堂整六师直哉能用壮敌者欲何为道在周如矢兵行汉有旗天威雷在上人喜雨如时敷德苗归舜干盟鲁却夷淮淝知义胜算入谢安棋

星陈天行

法驾谁摸写形容比太清星陈元肃肃天运自行行闾阖开黄道璇玑映玉衡盖明瞻帝近旗动认参横移得魁台下如闻警蹕鸣流光知遣使招我立通明

叫舜苍梧云

叫舜嗟何处梧江去路长天高心渺渺云远地苍苍我欲排闾阖谁能访帝乡泪沾潇水碧梦入瘴烟黄莫唤湘娥问空怜老杜狂重华何可就骚笔更凄凉

山上有泽咸

彼泽卑而漚维山峻且嶮上应无见有气以感而咸石隐虚中窍春蒸润下咸画前分艮兑象
外识机緘野露浮江柳溪云到岭杉个中皆易理具眼要非凡

君王画阵看

圣世忧边切骚骚羽檄忙凯歌来幕府画阵奏君王宸陛千官庆军书一卷长卷舒从御榻想
像到沙场此日丹青笔当时赤白囊会看麟阁上图写更辉煌

洗砚鱼吞墨

携砚临流洗迎人戏小鱼忘机知似我吞墨喜看渠案上研磨久池边浣濯初黑翻波里影素
染腹中书水与烟俱落香知饵不如谁能图罩罩点笔滴蟾蜍

烹茶鹤避烟

隔竹敲茶臼禅房汲井烹山僧吹火急野鹤避烟行入鼎龙团碎当窻蚓窍鸣紫云飞不断白
鸟去边明云舍飘犹湿风巢远更惊通灵数椀後骑汝访蓬瀛

敲云问名氏

避喧谁氏子远近不知名踏雨来相问敲云忽自惊空蒙迷处所剥啄访平生不是师严钓应
须学尹耕深山无户籍虚谷荅人声野服徐迎客论文到月明

又

何意逃名氏祗缘避俗纷有人来隔岭问我独敲云剥啄声虽急朦胧唤未闻严耕应似子说
筑岂非君瞥去鸦惊起谁来稚荅云日高才出户对客却殷懃

滩声起鱼眼

酒醒闻敲云呼童汲水烹龙头琢山骨鱼眼起滩声活水催泉急凝波与石争鳞无游釜见目
有比珠明车异羊肠绕蝇蚩蚓窍鸣磨刀谁氏子对此忆鲈羹

叶带露痕书

拾得堦前叶提携近玉蜍自呵冰冻笔犹带露痕书秋兴题红日霜寒坠緑初珠凝光细碎墨
淡字稀疏滴砚研朱易渲毫汗竹如更乾?亦喜勤扫入僧庐

不下带道存

身外元无道，
抠衣乐圣门。
能因机以悟，
不下带而存身。
俯心何愧，
腰垂手可扪。
步趋如有见，
左右自逢原。
鞶锡殊三褫，
绅书味数言。
垂鱼何足美，
愈以训儿孙。

竹溪鬳斋十一藁续集卷十八

卷十九

[集部,别集类,南宋建炎至德佑,竹溪鬳斋十一藁续集]

钦定四库全书

竹溪鬳斋十一藁续集卷十九

宋 林希逸 撰

挽诗

赵庸斋

金章虽贵岂公荣一点孤忠百世名字字清吟如太白篇篇奏疏似更生士缘气类归宗主身为朝廷作重轻当世共传书几种最初曾见易先成

品题人物妙权衡在日江湖有重名为国得贤八君子登门执贄几书生少游辇路心交久晚见南华口义成欲序未酬诗卷在相知可独是同庚

信庵赵少保

勲名已盛端嘉日身佩安危三十年自去鸿枢开督府迄辞鵷合老平泉早看养马封侯将晚作骑鲸捉月仙纵道进贤冠最好不须画此上凌烟

长淮当日事尤危孤垒身当数月围杨子江头如虎卧平山堂下似羝归二难千载为时出一战三京与愿违賁恨伯符投镜去追怀到老泪沾衣

百万频年战虎貔神驰漠北到洮西空余八阵江头石未见一丸关上泥守父训辞黄合去负时名与紫巘齐河山收此英灵气下马千年看墓题

出语无多动造微公於学问似生知客游槐府珍遗帖世诵樗翁序近诗握手最先门下士伤心谁勒墓前碑匆匆四十年间梦忆到庐江下榻时

赵虚斋

两朝人物号耆英九折崎岖亦饱经几度拂衣心似石重来曳履髮如星争名可是因文字转臂堪嗟失典刑何处藏山犹有史悲笳幽咽若为听

奥学深功在易通御题褒句圣恩隆成书自讲前无例异论难齐久始公辞有所之端可据文
无不变论尤工臯比定集诸仙听独惜丁寃道不通

恕斋洪尚书

定是仙从天日来少曾吟咏到襄淮才名词伯班常伯学问平斋授恕斋华盖漫云邻翰苑袞
衣不许上瑶堦海山纵好归何处叹惜人间事好乖

秀骨清姿玉雪同几多星宿入心胷风流王谢谈谐胜家数常杨制诏工坐政事堂无六丈登
文章籀似三洪年来人物萧疎甚玉座东西欠此翁

伊昔宸京握手初横经公未到三衢早班玉笋还先去晚侍金华却共趋思老有余知笔健病
成应是为诗癯峯摧太华嗟何及身远无因奠束刍

陈节斋

诸贤名并端平见一老音存正始遗改纪重来时领袖持荷独立右尊彝心忘世易身难乞家
着书多人少知省闕才辞留史馆可怜便入八哀诗

国重穆陵蒐鉅典帝咨宿学进隆名那知幻境空花散不待藏山史草成笔塚长存堪怅恨书
棺何益谩哀荣西山门第今无几落尽残星淚眼盈

早岁登门叨赏异暮年造阙喜追陪每从省户供词去多向都曹诵句来逐客贈年今尚在痴
儿别饮恰方回湖边握手如前日身隔千山叹玉埋

李斛峰尚书

公擢端平第祥开日下云乾坤鍾直气星斗瑞斯文出处关时运更尝厌俗氛白头需旧学何
事靳吾君

又

论着千年计崎岖二纪余人多仇直疏公不羨除书曳履归何晚仪图事竟虚早知天许嗇恨
不守茅庐

又

中朝更几局鸣世独铮铮奏疏如山藁哀笳何处声虽孤岩石望何损斛峰名应有遗书富何
时见集行

又

当年期集所一榜上三人晚节惟公在交情独我亲楚东分袂久溪上得书频曾共茅檐宿因行部入闽

又

三领闽麾节名高德度寬苦寻盐利病痛念郡凋残拟有回天奏相期对日看入朝孤此意闻者泪阑干

朔斋中书刘礼侍

声名早日到宸几自许凌空健翮飞朔党家传真抱负西州人老几招麾长庚穷杀狂如故韩愈疑为傲则非岁晚虽为香案吏白头终与壮心违

再造功成始趣还又从薇省去长安登车屡作澄清使持橐还须文字官子美八哀俄入此贺公二命只书棺不知庾亮埋何处遥想悲笳泪雨潜

一识端平三十秋北关重别见南州紫薇阁下分房住黄檗山前并辔游碧水诗来秋後得吴门书去病中投交情不薄相期远底料催归记玉楼

赵大资【无愔先生 以下追悼作】

先帝云公有相才经帷曳履久徘徊先调化瑟更弦去却赞兵机杖节来祀典空闻陪五使宗臣不许位三台白头遗老孤忠在忽漫骑鲸亦惜哉

当年玉座语尤亲荐士虽多不语人天下短长才识尽内中方寸纸来频【用晏公事】仆穷分作米盐吏公许宜为翰墨臣回首摛文今梦断长怀知己泪沾巾【公有奏册分门荐士余为丰储干官名入词翰门】

王太博【特魁 宗合】

兰宫凡几上直待晚成身臣对三千字君恩第一人谈经居未久岸帙请何频风月分能几空山骨已尘以赋鸣虽早襟怀实似虚出弹齐士铗归读乐轩书丹桂攀殊苦黄粱梦不如在时同手足入念每沾衣

卢汀州【号野涉】

名落江湖岁月多白头还止梦三刀胸藏千载心期远识尽诸贤眼力高慷慨当筵谈抵掌淋漓

滴满壁醉挥毫空山埋去泥销骨何日人间见此豪

野涉来南岸帙时我方为掾久追随炉熏柳叶同清话酒嚼梅花几赋诗别後京华才一见病
余山寺漫相期【壬子余自番归公病方安约至黄蘗不果】为公一恸今踰纪当日交游在
者谁

百七弟

我嗟孤日早汝亦守偏亲爱甚於诸季年多似一轮家虽老去足身苦病来频卜穴何时定伤
心历四春

黄倅【钧】

蹇驴骖乘骥盐车有士如君具眼无唾手两科名淡墨秃头半刺【阙】纡朱笔无见梦花何
有玉只空埋草已枯摇膝向人吟不住追思如见重嗟吁

辈行交情似此稀旧游追记每攢眉桐花古郡为僚日落叶长安谒选时君去鸣琴曾别饮我
期煨芋更论诗谁知俯仰成今古倭指伤心二十碁

两舅氏

吾舅虽潜德人间两玉人眼高俱迈俗鬓秃共娱亲场屋因缘薄诗书趣味新少公谈颇胜伯
氏奕尤神门外相过少樽中自酿醇荆花同伴老竹叶满怀春寿袞皆踰七堂封亦与邻赠车
伤作梦华屋怅今颺甥老头如雪山空骨已尘前年松下酌语不尽酸辛

王仓【华甫王实齐遂铭仓之父为孝友王家】

【王为温陵法曹方蒙子功为理曹余为节推三人相与最厚】

姓名早入文章籙姿性宜生孝友家视世故轻如枣叶得时名重只皇华白杨何处伤心远紫
帽同游饮涙嗟向老伊谁同此意独余一友在东嘉【子功永嘉人】

九江朱长卿【信庵之客余同朝同舍也】

精神满腹气英英早岁宜登要路津名是平原门下客字同先汉蜀中人已趋文石班犹浅虽
拥油幢志未伸壮士不留强敌在交游相吊涙沾巾

江番相望两年余度度书来有壮图安已弹箏思海道武空鸣剑说伊吾公闲未久骑鲸去我
远先慚倩鴈无宿草不知秋几度衰年何计奠生刍

班行一见便欢然意气相求似夙缘得古鼎彝多鉴定常时樽俎每招延郊吟愈和曾成轴晋帖唐碑不计钱见说旧藏今散尽传家犹幸子能贤

陈所斋

胷涵万卷笔如虹四海应无两所翁身老肯疑询有鬼眼高不许宪交公祇缘命薄非才薄信是文穷与学穷班路重来终一簿予麾亦不到莆中【在朝以足疾出】

又

三文堂上墨犹鲜别几何时哭此仙散髮弄舟思往日捻髭覓句是前年理明洛学知翁少表慕洸冈有子贤人物如斯埋玉去病违执紼泪潸然

刘殿讲大卿【范】

涉世风波恶收身岁月长再三持笏节八十侍华光边入筹如蔡民怀惠有棠两朝凡几奏书不与人亡

又

已分黄冠老犹为白髮卿登朝著寿俊圣学缉光明盛德兼和介高怀了死生柯山仙窟宅笙鹤定相迎

又

几年漫仕贫如故半世投闲乐远谗无八九椽多借宅得三百户谩题衙初留兰省交吟卷再见芝山送别帆何月得寻埋玉处天南凄恻梦松杉

莆守汪宗博

凝香据案几何时事事传来昔见稀生果神如包孝肃死尤贫似尹翁归谁知食少为身害可恨才多与命违见说满城人恸哭交游那得不沾衣

又

襟义如公世所难南来一念十年间喜时文石为乌石未到壶山住道山宿草故人酬愿毕生刍有客吊丧还清名虽在身何在擦泪空嗟造物怪【来莆先至三山谒越乌石尚书墓】

又

天夺如公亦酷哉遗民悲慕似婴孩
轉还夹道号啼送寝祭诸村接续来野錄
何年能入史祠成他日转生哀
溪干旧友多弹泪半月前书手自回

吴理卿

风骨相期衆才名为底穷策虽高似董位却劣於洪
没世臣卿少他年史笔公赐诗宸训在无愧是清忠

又

二纪中年废清时晚岁收如斯封马鬣漫尔跨鳌头
雅度人何忤虚名世浪仇论交思少日文会饮榕楼

又

白首同收召追随仅一冬公由卿出使我去掖为农
上节归曾见携琴愿莫从伤心湖水外石兽倚长松

陈判官【介】

师学亲闻正始音半生为母欲投簪游环璧水成名去
为念珠曹得誉深贤比邳侯家有传达如康节病先吟
宁需郡幙辞台幙到死知君铁石心

陈府判司令【童科】

大科家世袞传芳恨不崢嶸翰墨场空郁壮图才半刺
合司帝籍便横翔官称仅似浔阳白早慧疑如江夏黄
曾向掖垣开荐口眼看埋璧倍嗟伤

郑令人【义江陈开国内子】

具眼翁求壻齐眉老耐贫年如綵甲子贤比鲍夫人
守诚居官舍持经识幻身亲邻恩意厚谁不泪沾巾

陈橘山

昔侍先师席西轩笔研同晚为莲社客私号橘山翁
内景经谁授还丹诀自通仙班催底急吟此望方蓬

又

数亩园虽小斋居却有楼木奴居半许果子亦多收闲日长趺坐晴时间出游自君之去矣遥望只增愁

郑子诚

执经师席下於我是庚兄袖手尘中老灰心世上名杖藜行竟日杯酒度平生终始交情在无人解索铭

又

住处虽邻曲多慙寂寂居间能驰手帖时致以肩輿我叹年相若君衰日渐疎人间梦先破周蝶果何如

刘夫人【赵必鳌母】

淑德生全美深闺礼自防训严今孟母誓苦昔共姜科欲传三世儿令学四方栖鸾吾所爱千里索铭章

又

独力持家老真如烈丈夫斋明供蘊藻服饰厌金珠甲子祇余六鸾雌叹久孤悲笳讲山路寒日澹霜芜

庄丞内子

多门嫔贵族何事喜摩诃清比顾家妇达如凌行婆再来邻曲媪独见女中娥委化虽云乐潘郎鬓奈何【铭云邻媪见梦而生】

死自知归处生能孝养亲真堪名烈妇岂不胜痴人新卜金沙窆空埋玉雪身佳铭求篆石掺笔为酸辛

郑仲升

西轩同舍日开爽莫如君健笔疑淹笔方巾似艾巾壮年嗟斗粟老日味羹芹邻里交游尽伤心宿草坟

林甲父【胄】

我有宗传未付衣喜渠岁晚共吾伊云胡丹旆鸣笳去不见青衿问易时生灵运前何太速为

文介後重堪悲犀斜宰木今谁主饮泪看君乳下儿

丘司理母【同年升内子】

三十年嫠未易禁信眉才尔遽涔涔断机有训名花帖埋壁无慙见藁砧剪髮为珪供客饌却
蚶令侃职官箴年兄事状夫人志岁月追思泪满襟

李提举【丑父】

荣涂久历似羊肠蓬省归来髮欲黄麟笔正烦朱邸客駟丝还要锦窠郎观鱼濠上归思切吟
雁峯前遗爱长金凤赓酬知乐甚玉楼谁召去何忙

早岁声喧翰墨场晚寻兰芷到湖湘刘郎未得文章力涪老空怀书传香埋壁奈何从石街好
筇滋甚况琴亡山房宿处成终诀怅忆交情四十霜

陈提举【炜】

三为一疏凤鸣阳去国投闲两鬓霜早有重名居豸府晚因同姓误君王恰还使事逢新政已
峻卿班入太常止尼不知何物崇清时竟失鲁灵光

岭海清声玉雪如门庭尤峻是闲居吹嘘昔日班扬赋受用余年老易书亭列百间多筑圃舟
移数里自穿渠春来红紫应岑寂花外无因见小车

别无久近不相忘见面虽疎意味长向摧梁初驰唁疏已埋玉後送铭章我慙临穴诗黄鸟儿
报移阡?白羊絮酒何时浇宿草些成三赋泪沾裳

赵通判

世守祇儒术才优奏最频官终半刺史孝事两家亲长葛碑仍在甘棠爱尚新赵公陂上下遥
想泣遗民【宰惠安筑陂有记】

碎剧更尝久躋攀鬢已皤题輿嗟命嗇制锦得名多铭好传千载梁摧付一窠书丹慙钝笔回
惻甚於苏

山长陈刚父【初为雪川簿入仓总幕】

名在江湖久青袍鬢已霜苔人师凿齿莲幙客君房甫为思芹去还遭撼树伤清朝公道厄埋
骨竟凄凉

又

君本轻场屋何心第太常吟姿如岛瘦直性似萧刚已恨婵娟误争知禪化忙功名虽有命诗在莫俱亡

林宗院母

鹤髮贤哉母冰清又玉温早同夫傖隐晚受子貤恩箕笔营新竊铭文托後村登堂曾及拜吟望暗伤魂

丘进衡内子

鵷?同看去闺营不少须幼痴儿哭母死孝妇从姑牛卧图形好鸾栖镜影孤藁砧铭石语凄寄挽郎歌

梁秘阁

江幙归来喜脱簪当门小筑似山庵名於世见林间一爵以仁尊天下三早失偏慈心已懒晚虽漫仕性难堪非无忧爱闲成僻雷雨曾传旧奏函

白头姓字紫蓬仙三径还公得乐全八九十翁健如虎等闲一蜕妙於蝉何年重见风前树此夜愁看月上弦义合吊庐寒阻我须携斗酒到冈边【三月初八日筑】

当年握手向番湖岁晚交情不暂疎安乐窝中三度宿往来溪上几回书凤游旧客雕零尽龙窟新阡怅望初人物如公应不死有铭有诔果何如【凤游治司堂名】

赵侯母葛氏【莆守】

盛德高年百福全瑶池元是女中仙慈民束吏如侯少为国生材叹母贤彩服俄更衰服去襦歌还与薤歌传民怀召父依依切苦恨夫人不少延

戴主簿【?鑣】

榕楼饮日君豪甚岂料凄凉雪满头横鶚几回宾上国栖鸾一老宾南州拜经传业源流在作赋摩空取次休诗卷旧人无十九箫笳何去暮云愁

有子能贤知孝甚新磨铭石以贫迟为君更作招魂些此士无慙有道碑身老梦思埋玉处客游忆到共灯时家成好入遗文去乞与他年作瑞芝

前往黄檗亮西山

畴昔西山元有亮师今名亮号西山初修白业光时现晚破玄关髮已斑缘熟不妨逢檗住意
阑忽漫杖藜还鴈湖未久跣趺去汝蛻虽高我怆顔

黄倅内子

岸帻生同誉繙经老耐嫠能贤儿似侃爱客母如珪有弟铭崔姊何人传鲍妻霜风吹旆去笳
咽筱塘西

适轩黄革叟

翁昔南游日看君玉雪如晚凭居士几死守乐轩书圣处吟应到原夫技岂疎白头心自适元
不羨高车

二

闽谱虽华远君於派得黄铭宜买石待诗岂入瓢藏忆昔题吟藁伤今赋一章芟畝序葬处遥
想暮笳长

挽潘守

诗书家世事公独妙兵筹异质生三乳时名放一头万山丛里邑五岭水边州谩道登朝去功
多恨未酬

二

广蜀为唇齿双江直下舟人知传干腹公识到源头袖入?前疏筹深岭外忧殷懃参近事字字
比龟猷

三

乡间扶杖久早岁誉兵间谁信白头叟能柔赤脚蛮人言劳不报公有道能闲似是英雄骨埋
名向此山

四

文武忧才尽斯人为底穷威声传境外袖手老闽中来往二三客康宁九十翁及门曾一识铭
笔愧难工

同年赵左藏【时序】

登名三十载岸帻去壶山乍入离珠府不留鸣玉班同升君弱冠久别我衰颜及此吟哀些伤哉数太慳

二

客有南来者云君病本无信然身是梦俄尔我非吾甫脱登山屐犹倾对月壶人生太危脆变幻止斯须

三

畴昔号宗英嶽崎恨莫平晚同蓄用数早负榜中名握手虽疎濶惊心隔死生白头慈母在遥想若为情

挽後村五首

九十非为寿天胡夺此翁两朝名法从一世大宗工集本家家有囊封字字忠老龙虽异宠堪叹梦俄空

二

词源泉万斛笔欲挽天河诗比欧韩密文追汉晋多一生名皎皎四入髮皤皤班不登书殿伤哉可奈何

三

古来皆有死身岂解千年纵使能仙去何如以集传骑鲸乌石外下马钓矶边忍使斯文丧凭谁问老天

四

云鬓登堂老论文四十年忆曾同宿处说到未生前精妙无双手赓酬共几编耽禅生笑我去作海山仙

五

筋力衰难强伤心苦涕零篋多留尺素药仅致空青传後吾何述生前已自铭帷堂才一恸恨莫听讴铃

竹溪鬳斋十一藁续集卷十九

卷二十

钦定四库全书

竹溪鬳斋十一藁续集卷二十

宋 林希逸 撰

祭文

莆守汪宗博【元春】

仆缘乌石得公而友乌石於公知公最久十载睽离于京再见语及乌石必怆顔面每叹平生受恩此老不知何年一哭宿草仆时戏言壶山胜处辍班暫游此为便路我归三年公始再转忽诡民庸果如所愿暨来语余颇觉慰意曰子前言殆几县记我固知公襟谊可敬尤知其贤必有美政一闻下车事事骇俗远近传夸如包孝肃落公之笔若神授手干公以私谁敢启口呼民如儿据案书牋片语可传胜负俱服首营采舟尽却册例厨寒无烟饭喜以麦吏曰神明民曰父母天乎何其遽尔夺去四境哀号曰莆无福香华连连跻堂以哭或尤火攻或叹食少曰我使君何辜而夭凡仕於今无论鬻墨巧则邀名惰则逃责公胡介然皎皎自异岂神亦憎不?奚累千里丧还囊无余孔生者何依死者何送昨公之来过门话旧戒言三酌不许多又今公之归仍道溪曲我持此觴徒酌以哭千载须臾名存身没何嗟乎公惜此人物

梁秘阁【应庚】

君为先辈登名四纪漫焉而仕俄焉而止向也为贫五就宾幕乃心冥鸿挥手荐鹗知己非无两在钩轴拂衣径还甘老驹谷晚遭明时宠以中秘身外虚名君亦何意小圃当门有梅有竹觴咏自娱无所不足九十之年愈老愈健如仙地行举国所羨楚东为僚一见知敬交久而亲屡至三径爱客苛留度度如是书来溪干不知凡几去秋之残忽以病谗亟问亟酬初不伏枕续闻小车亦既出户方喜君安忽得君讣哀哉斯人遽尔仙去君骨非凡必有归处君乎何憾我惜此友寓情一谏寸心何有我虽衰慵义当往哭先驰此卮有泪盈掬

常东轩【挺】

公早以文名晚以节着奏赋如班扬牧民如召杜峩冠则邹陈当制则燕许既受知於两朝犹屹立之一柱何厚积之未施乃见夺之许遽尝观公之平生盖以道而出处莫难於曩岁之涂归莫荣於此时之引去彼璫何人惟宠是怙既斥以凭城之狐重来如出柙之虎岂圣世之清明容此曹之号舞衆方噤而诡随公独奋而力拒虽中札之屡颁抗累奏而不住帝亦何心台已有疏固省闕之暂违实宸旒所简注俄当馈以兴思痛凭几之移御遗之嗣皇擢以政路朝方喜而登贤公亦义而报主天不憖遗此酷何慙思累朝之前修就两地而历数治平有欧天

圣有鲁皆垂誉於初元岂必立於宰府以方之公何愧於古惟贱子之纳交实同游於斋序每握手以相欢至忘形而尔汝温陵之归再见溪干之别三暑余年分守於厄穷一字不到於公所愧公多情逢人寄语墨犹湿於近书事莫惨於远计方得请於帝前忽遗形於江浒嗟何惜於幻尘亦等是於逆旅义当哭临道苦修阻素车之愿以老违卮酒之微以诚寓怅交情之奈何徒陨涕以如雨

莆守监簿陈所翁

千年百年豪杰能几我观所翁则其人矣兴托之胜凌霜喻霞才思之妙舒英吐葩少作流传诵不容口老笔纵横醉不停手名固我予才固我奇即其蕴抱知者伊谁一第中年世路何蹇花底重来缘法何浅生平学问所试几何岂伊才名能尔折磨壶山一麾未至而尼岁晚虽贫吟傲自适去冬遇我紫帽是还仅能两夕笑语溪干祠壁留题醉墨犹湿後约未酬至此何及翁乎已矣已矣翁乎身前百恨可付一吁其迂似夸其简似亢亦以此名亦以此谤仆缘息味一见而亲愈久愈笃岂伊同升中间相望离合屡只每一相逢雀跃拊髀翁今何往再见何时惜此人物云胡不悲太白曼卿不仙则已果如所传翁必不死义当一恸曷日愿谐寓情先此於乎痛哉

後村刘尚书

呜呼先生胡忍遗世梁倾岳摧龙亡虎逝呜呼天其丧斯文乎国不遗一老乎四方之士何所就正乎吾党之友何所问业乎光争日月之文仅止三百卷乎幽泣鬼神之神诗不许足万首乎斗南文星其陨而为石乎壶公玉色其怆如岷峨乎公於先皇受知殊特锡第以宝跗序文以奎画其感恩而从於地下乎嗣圣於公眷亦深厚进班於老龙待公以黄耆不待乞言而弃人间乎西山南塘公知己铁庵驪轩公端友其将往而同游乎骑箕者傅为奎者苏抑公虽去而不死乎仆从公久近四十年书藏几篋诗和几编平生相与似有宿缘论文缕入析理机玄公才之大我时攻坚我学之癖公讥近禅有瑕必摘靡精不研公尝谓我休戚同焉公子吾子如一家然岁在乙丑访公留连登辟支之顶宿寿溪之边同吟即事独妙数聯续闻目眚致药万钱奈何书月至死弗痊迺者问讯於灯夕前小阮惠报知公沉绵走仆数四夙夜县县俄而得讣泪洒如泉义当往哭春犹未暄驰此一酌始为之先二品之贵八袞之延谓公何憾未为知言公来瑞世公去飞仙斯文何抑後学称冤我为此诔悲怀曷宣邦之殄瘁奈何乎天

谒考塘外祖坟

幼来外家及拜王母母怜其孤是爱是拊长既飘零游学天北夫人之丧远望而哭岁在壬辰始谒坟下追惟旧恩有泪如泻後十五年叨此假守爵奠与偕吾母吾舅人世空花翕然聚散回首於今可奈哀叹挈挈壶觞仆仆来止髮已如霜嗣至能几宰木其崇孙曾是荷尚期千载积善之报

谒二舅坟

少也孤苦母舅是怜时来就学诲饬拳拳饶踰叨窃敢昧由缘官游南北岁月易迁不拜堂下
二十六年中慙假守徽福自天儒雅之集团栾母前番易还里偶以病纏舅别吾母实来溪边
自此一间云山连连闻舅之讣寸心欲然吊祭弗及遥望涕涟虽有书疏此情曷宣甥今老矣
有髮如绵持此一酌于舅之阡宿草不哭徒饮泪焉

前高安林县尉

呜呼卿月竟止斯乎一第乃尔不第何如灯窗勤勤蚤岁双字所几成身以慰父母年踰六十
始緑其衣风木之感言之涕洟黄绶而西聊复尔耳三易郡侯非不知己霜台一剡方尔萌芽
春虽有信梅犹未花俄尔书来以归檄告我复其书仆犹未到何恙靡已遽殒其身拖绅鸣玉
世果何人君於交游夙有美誉久窒而通又厄以数士非僭隐孰不求名如斯而已亦曰有成人
世空花短长皆梦底许匆匆则亦可痛總帷一恸宜速而迟亟酌以告云胡不悲

後村墓祭

此山之藏公所自筑有峯其封夹以华屋有桧有松有梅有竹公常自来客亦同宿生而身游
歿而魄复此公所安谁议改卜诸孤能贤不惑流俗吉时良於焉埋玉下马之陵今在城北
来者按图问此宰木惟我於公情同骨肉原头送车义当追逐叨恩误除有旨诏趣小草自惭
行装已束区区数言薄露心曲犹子厚余托为宣读伤哉奈何有泪盈掬公其亮之歆此鱼菽

後坡林吏部祭文

於乎後坡如斯奈何浮荣能几掣电逝波人世匆匆千载一梦虽则云然奈何不痛公於三舍
如狩获麟词华俱妙尤以赋名峥嵘乙科显晦三纪岂不登朝岂无知己既歌于蓼犹咏海沂
後先三入始谓逢时朱邸谈经紫宸对疏胷中光芒於此略吐铨曹既擢帝眷方浓云胡雅志
诡以民庸自谓丞郎法当外补寓书语余欲小结褰朝有公议亦曰予麾虽俞心去犹几公归
朱幡方迎易以丹旄天果如何予夺莫料如玉其德如锦其文胡不持橐胡不演纶世虽多才
公岂易得袞袞羣飞於公何嗇嗇公犹可能不慙遗江干一蛻行路嗟悲矧我於公情同手足
别我入京过我一宿班行三载有鴈必书近墨犹湿幽明顿殊我注南华公所酷喜非苟喜之
忱有悟已经言物化击节不休公今何往为蝶为周我每思公狂欲大叫輶车既还病阻往吊
述情卮酒一字一吁纵令宿草敢废生刍

竹溪鬳斋十一藁续集卷二十

卷二十一

钦定四库全书

竹溪鬳斋十一藁续集卷二十一

宋 林希逸 撰

墓志铭

将仕林君父子墓志铭

三溪之南昔有隐君子庐於古榕之阴曰林氏余识其家四世矣若君之父子余实加敬爱焉君讳鸛翁字朝叔早事乐轩於西轩颇能场屋语年三十杜门如处女动守绳度不苟言笑筑楼於其居面挹西南诸峰梅荔列墙左右余为名曰登明时引接宾友壶觴其间於世泊如也无亲疎远近皆曰德人延师教子尤尽礼课督甚严故诸子皆穎出少孤终鲜母子相守四十五年孝养甚至潘夫人卒岁时悲慕不已咸淳丙寅正月三日以疾终享年五十六补将仕郎曾祖某祖某父某娶张氏男子二俱登仕郎胄其长也浚漕贡进士女一人适俞庆嗣乡贡进士胄字甲父卯角聰敏出羣儿既长恂恂如也於人不妄交从余学易春秋颇有得余筑三文书舍溪干致名师聚学侶胄居其中下笔多奇语同舍推先之将仕病执药餌不顷刻离居丧哀毀骨立卒哭犹往来课艺不辍俄以怯病卒後翁一年丁卯四月也年三十一朋友入哭皆恻余尤痛悼之娶余弟义女一男某方亂戊辰十二月十有四日庚寅与将仕共葬董滌东湾山之原呜呼伤哉先是壬戌余待罪秘书监乞以元士一阶貶秩网山林先生乐轩陈先生既特贈迪功郎仍许以文介文远易名余又疏于朝以二师嗣皆絕旁支无一家乞从诸生金议立後朝家俞之然二师松楸仅存断垣败屋不守归谋诸人无肯即者朝叔慨然曰胄守三文学文介吾宗也愿以在籍田分其半为文介户俾胄承祀焉白之台府诸使义其为皆奋笔褒许於是甲父为文介直下孙而文远亦得嗣君实倡之乡之旧门人喜网山之有传也共植华表於其庐之右扁曰文介坊余方冀其有成以振遗绪而天嗇之乃竟尔呜呼伤哉浚好学性孝友执丧治冢舍尤谨哀其父兄不得年涕泣以铭请余废食擦淚序而铭之铭曰结庐何年松阴翳翳自我识之倏已四世有德必年胡夭而逝哀哀何心铭此翁季矧曰胄乎文介之裔

适轩黄君墓志铭

永阳龙屿黄革叟遯斋纠曹公之次子也讳自信与其兄某同事乐轩陈先生以见趣称早岁有场屋声亦尝走江湖矣交游甚衆诸老颇许之中年喜学诗尽焚他藁筑室以适轩名日夕吟咏其间暇则焚香鼓瑟有萧然自得之趣虽先世簪绂华盛自视漠如也生平守师学鄙夷流俗緇黄占卜之事至死不变潜心经典大抵以诗发之故有适轩吟藁纪行游湘游岳诸集余尝及见其半为之跋矣今存者一千六十八首无非输写已意略不蹈踐古人前死知其期

学力也咸淳己巳三月六日終於寢春秋七十有二其年五月十六日葬芎岵山弟某来乞铭曰君垂歿所嘱也余少因乐轩翁识君父子於溪上纠曹南游初程也于时君兄弟如玉雪人皆以远业期之今止尔伤哉余初记芎岵庵又铭朴斋墓今又铭君俯仰五十年如一瞬息感今怀昔能不慨然遂废一食为之铭君娶陈氏先君卒三十年子一人公裕其世次见朴斋铭兹不重出铭曰

得於师者正得於天者高不耽於进其适者哦不羨何欠不求何遭畸於人者多我以铭之何

梁秘阁墓志铭

咸淳四年十有二月二十有八日秘阁梁公卒年九十一余未能远吊为文驰哭之其孤以书复曰前数载吾父治龕买棺百需具矣且预为遗令曰铭我必竹溪吾兄弟未忍死吾父朝晡守柩哭如生存吾族亲友乃以阴阳说语余谓葬莫难於得日失此春恐其期愈缓非孝也吾兄弟且哀且惧又相与谋曰葬必铭得葬不得铭如不葬死之日何以见吾父期逼奈何余读而悲之不忍辞恨本末未详姑纪其大者梁着姓也其系远世居三山闽县曾大父德昭妣陈氏大父成庆妣王氏父元辅赠承仕郎妣林氏赠孺人公讳应庚字本仁自号止堂生有异质早着文声交游皆前一辈闻人二十四拔解乡漕宝庆丙戌始擢第孺人老矣公既得簿泉之南安易请祠禄以养甫三载孺人卒公哀哭自誓曰母亡矣吾何仕终岁不入京汀守李公华高其行以武平簿辟邑瘴乡盗窟前至者多死公感其知己勉为一出俄摄令四剿强寇一廉如冰霜民德之呼慈父继守右司张公翀以劳绩上得旨循一资与堂除差遣丁酉陞从政五月循文林堂差江西节制司准遣丙申改辟兵钤司峒寇作公宣力多太守胡公泓又以劳绩上得旨与陞擢钤司无岁不荐将以郡剡改奏公辞之甲辰堂差都大司準遣胡适居豸府又荐不报公宦情愈薄矣泉使讷斋程公宪使後村刘公皆授以京削苦辞不受二公列荐于朝又有堂除之命秩将满讷斋辟留陞检校二公召余与蔡久轩俱在番其不可挽者如故癸丑堂差干办江西帅司漕使浩堂翁公以上宾礼之时讷斋入相久轩与政矣方属意料理之公急告老不得已如其请乙卯甫一考就转通直郎赐绯鱼致仕浩堂大书见一二字赠之公归筑圃当门名以三径吏书节斋陈公书其扁乡帅矩山徐公架见一堂圃中余为之记癸亥矩山为大仪以孝廉奏除直秘阁余适待罪西掖制词余所草也朝野荣之丁卯阳岩洪公帅吾闽又以乡诸老状闻更乞褒擢未报而公逝矣公虽五为使客世味泊然殊非所乐岁晚得闲即三径之间为窝曰安乐为亭曰玉堂何似为室曰村田乐往来吟奕客至即饮步履视听如少年人自以为身退而力强造物乘除之赐余居隔一江相去四舍尝三至其庐留必旬日对话超然无一点尘翳然公忠孝人也用世才略甚长忧爱犹至时有所闻稍异必仰天嗟惜不已端平丙申禋夕雷雨一疏几千言皆冰人语癸亥致书庙堂条内外之弊剴切当事情闻者益敬之始知公虽乐於退老而一念之忠不忘也余尝谓仕而去有几有以折腰为屈而去者有挂冠畏祸而去者有坠笏自惫而去者有买山资足而去者公游上幕何屈居明时何畏强於力何惫贫而廉何足由由然而就舒舒然而去爱士者求我我辞焉当国者致我我避焉漫乎仕有元次山之风确乎止有邴曼容之志阳岩之谏有曰早不求举晚为逸民如公高尚世有几人真笃论也余自楚东为僚知其心而爱之闲居相望倡酬之笔还往之书成帙矣去秋闻以蹶伤亟问亟答殊无它苦輿以两竹日涉自如忽以讣传曰俄而逝吁惜哉死生之际亦

异矣今以己巳中春八日甲申葬公龙窟山之冈娶林氏赠孺人先公歿三十有一年合窆焉治命也三子垓国安寅之二孙壮孙定孙女孙七是宜铭铭曰

五墓之游三径之适名齐二疏寿躅九?彼窟谁营崇以数尺彼车何送来者千百老而康强去不寢疾几能如斯允矣见一

陈夫人墓志铭

夫人讳善坚世居福清苏溪湖北计议陈公焕其父也仪真贰车丘公升其夫也莆阳李曹应甲其子也仪真歿李曹方亂夫人守贫课其学壬戌擢兵科夫人喜曰吾无愧吾夫矣尉崇安夫人训尤严每曰重囚之死生羣盜之重轻其狱自尉始是之不审徒廉尔秩满得掾夫人颇以便家喜归至建瓯得疾随愈抵舍如常时无何疾仍作年七十二卒之日咸淳丙寅六月二十有八日也仪真两娶前夫人林氏一女夫人一男二女庶子一女一男应斗治命为其弟并後四壻登仕郎吴之遂武经大夫淮西副总管李应龙顔袭公黄裒一孙真锡仪真与余同里同师又同年进士余尝状其本末矣葬龙山先夫人二十八年卜以九月十七日祔甲也以铭请余曰夫人盛年嫠贫自守有共姜之节焉拊诸息其爱均有程母之慈焉训理曹以学进有翟母之贤焉是可铭也已铭曰

嫠而居成其孤老而殂从其夫驥有驹大其间迟有需荣其墟

潘左藏墓志铭

咸淳五年五月十五日靖州太守左藏开国潘公年八十九卒其孤公助以状来请铭曰此吾兄告院公湜所作也余读之悚然曰公辈行高而得闲久余後进也景定甲子始拜公於里第挹其容听其言知其为钜人长德也而公於湖湘知名许早治兵料敌独有古名将之风赏不偿劳以老自遯世之负公多矣而略无几微见於辞色贤矣哉遂叙次而铭之余虽荒拙忝前史官盍纪其事庶公之尚有传也惟长乐之潘为闽大姓实唐御史中丞季旬之後徙而城居着籍闽邑衣冠之盛自五世祖通奉公常始宣义郎建州教授赠朝议师孔於公为曾王父朝奉郎肇庆府赠太中飞英於公为王父晦翁以种德名其莹者是也朝奉大夫兵部郎中赠银青光禄子韶则公皇考也银青三室前後两朱氏公母周夫人以梦得之生而三乳颇有异质银青酷爱之初补将仕郎银青歿事继母人以伯奇悲之屏而不怨嘉定辛未铨调常德龙阳尉朱夫人歿终丧为黄岩买纳盐场以廉谨得誉丞郴桂东时东南盜作如蟥如蝟江西舒庆二黄十五吾闽晏头陀罗五官郴之高垓衡之妙甫则扶友嵩谢了负包全李纂九皆其最桀黠者也自绍定己丑朝廷调兵遣将忧劳凡数此邑万山之中为湖南江西广东三路门户乃黑风洞罗李二巨贼窟穴也其民暴悍易动小忤意则刀鞘四起台閭以公辟公曰辞难非义也慷慨就职一以赤子待之民安其政俄桂阳寇急权令盛桂以城危告公曰解围不如捣虚自提官军义勇入战洞中簿尉何琛死于阵公之气愈厉相持岩谷数日出奇掩袭高垓贼先奔诸党随溃桂阳围遂解诸公益知其能遂以招抚一委之公曰屈以力易得其心难吾为张纲可也单车造贼地不以兵自随羣獠章章竞出迎拜曰我依非敢弄兵以自速祸常时不堪

侵枉使我至此公生佛也今惟令是从公停马留食与语惻惻然晓譬以逆顺祸福闻者相顾泣下送公还邑巢落几空辞拜之际有出而言者曰我依何以报公苟有驱令愿为朝廷尽死力皆举手加额而去诸峒闻风相继听命公知其可用矣适庠陵守赵公彦覃江西宪魏公大有以?求援公遣七甲义士助之於是舒庆二自陨黄十五乞降台阕皆以义士功居多争上其事得旨因任改官理为须入仍与陞擢差遣公又为之储粟治药刲立义塚使饥者病者死者有资焉然後伤死事之家旌孝妇之节以揉其心新学校之宫还教导之员以回其习于时蛮俗为之一变添差通判潭州朝廷知公得溪洞之心留之於此盖有待也嘉熙丁酉酋为边祸烈史制垣?公以七甲三洞策应公即日就道点集壮勇八百人直抵寿昌突围以进北酋惊顾曰赤脚蛮兵来矣或守月城或战清淮门我军屡捷敌遂退制府上功得旨全军补转三官资赤脚蛮之声遂振於境外当是时公之名於兵间何如也秩满除监左藏东库人谓公乡用矣无何出守浔州衆以为讶而公自视犹若欲然在郡孜孜如理家事以岭民去天远疾痛不得上闻切切然毛缕诊治之损例卷损浮费代其民输夏税一年帅谢公逵状公治行累数百言上之不报继知韶州以父讳辞改梅州未上朝以黄平为虑改知靖州公亦喜於自用初公以浔陞辞援汉唐蒙晋董元二事痛言蜀广可通之路黔郁共下之江时干腹之传未的也先事之见已如蓍龟及抵渠阳访求大理自杞蹊径严如防遏曾未三月以侍御史周坦疏罢公论惜之归食崇道禄寻擢广东参议官时有谏官居寓里者欲请大奚山垦田同僚憚其声势噤齟阁笔公独奋然曰此盗窟也居海中心昔在淳熙为朝廷忧甚久幸而锄薙不许生聚种植其间着在令甲是乌可许其事遂寝闻者赓之公讳周伯字宗之庄重沉默即之粹然无嶭崕异之行与人极和易居官不求赫赫誉而人自称之间关盗贼丛中十一年不徙邑劳绩着甚亦既登朝随以一麾而去其在渠阳甫为边计而又斥之史之当国其失士大抵如此老留瘴岭非其所乐於是慨然归而请老矣至於开庆之元湖广蠡江向公所藉之士赫然有闻临阵争先多为朝廷死节而主其兵者罗詮亦公在邑时荐之帅垣留之飞虎者也缙绅之士以此为誉而公絶口不自言公朝亦无知者此余所以为公恨也优游里社岁晚康宁人以为造物所报门无杂客时与邻曲年德相若者往来乐以忘忧至於没齿人无远近以潘佛称尚德哉若人也积阶朝议大夫闽县开国男食邑三百户娶刘氏继赵氏庸斋忠清公女兄也子三人长公湜故通判抚州次公助漳州推官次公嵩将仕郎女二人杨某赵某其倩也孙男四人成祖将仕郎广祖兴祖彰祖女孙四人其年七月二十有八日葬洪塘山之原铭曰士於今世患不知兵既仁且勇如公几人一纪于郴七甲三洞何以得之惟公所用彼獠所穴白刃如林单车直诣示以赤心人獠以禽我视如子所以其人为公效死援淮之役自将往还敌亦憚之曰赤脚蛮上功虽频赏功何薄曾是登畿亦尔落天南何所一再易麾渠阳甫至又以斥归边犹未宁失此伟士俾之得闲几二十?劳而不报所得者年一身之嗇百世之延伊昔公家名以种德是又种之以铭以勒

刘夫人墓志铭

夫人之子必鳌辱与余子泳游且尝问诗於余余爱之己巳秋居夫人之丧识其事与家世铭状介泳以来且曰吾父没鳌也釋不得铭今吾母弃我不铭不子矣余读而悲之抑自念曰夫人之二祖龙溪东莱实铭之奈何敢虽然不忍辞也夫人生名家自荆溪徙武川旧矣高祖光禄公讳滂太常博士守盱江全家死於难汪公藻合诸贤奏其事高皇帝惻然优赠之汪为志

辞甚哀曾祖梧州刺史讳墉早退有重名吕公祖谦甚高之祖上元令讳续父讳琮母赵氏房公元孙归於赵朱陈之好也夫人讳孟温幼小有见闻言动应准绳在家为贤女既嫁为贤妇既嫠为贤母检法登己丑第初调晋陵尉严陵征官皆以忧不及上再调丹徒簿秩满为毗陵録参改差浙西检法官将就班卒官下生事索如也夫人奉其輶以归为莹为庵事事整集痛其夫之出门折轴也勤苦治生以起家属其子鏊幼章句自授之稍长延师极勤敬既壮纵游四方取友当世豪俊费虽厚不少靳时以闻人相与言归白膝下夫人喜见顔色必勉以母倦初检法该祖泽逊其弟抚州汝之子抚州痛其兄迄以遗泽奏鏊也丙寅铨得【缺】州海门簿夫人每训之曰汝曾王父鼓院王父司理与汝父皆由科目选不应以此自画也海门将问戍夫人以疾卒夫人嫠居二十年治家如烈士教子如严师自饰去其华时祀竭其敬接内外嫻族有恩待宾亲上下有礼戊辰上元中夕俄感疾危甚祷而愈谓鏊曰吾为终计百需已具今虽精强明年今日犹及见否言之不戚若有前知达矣哉生嘉泰四年卒咸淳五年其日正月初六日是岁冬季庚寅合葬于太平乡白峰讲堂山之原男鏊也孙良畛铭曰

嫠之刘唐巨族以节名死光禄世积隆其文郁夫人生陶染熟妇德全慈训笃嫠而居俭以足二十年甘守独一甲子余数六养有期臯不复讲山原为夫卜祔于兹後來福

径山偃溪佛智禅师塔铭

景定四年六月十四日径山佛智禅师广闻示寂遗奏闻皇帝悼惜赐钱助葬塔在大明山下以大明庵御书其扁且给田以食守者呜呼盛矣非师能贤穆陵岂轻畀哉师於余为乡人初得其名於郑丞相所为偃溪序壬戌还朝始见於京疎眉秀目哆口丰颐道貌粹然出语有味益敬之东涧侍郎汤公於师尤稔每相与言其贤方闻其病即以书别余与东涧俱为文以奠之东涧笔甚奇南归五载其徒普晖来溪上乞铭状曰师候官林家子世业儒母陈氏梦僧伽振锡入其室娠而生师貌与像肖人曰僧伽再来也剑负未言见佛即合爪稍长诵书如流年十五父母以夙缘俾从小父智隆於宛陵广孝十八受戒其初谒印铁牛印名具眼深奇之曰法栋也徧参诸老与少室睦无际派追随甚久卒嗣琰浙翁初见於天童针芥虽投自知未隐去再见於双径翁知梅将熟矣迎曰汝来耶一夕坐檐前闻更三转将入云堂曳履而蹶如梦忽醒翼朝造室翁举赵州洗鉢语师将启吻翁挂止之平生疑情篋下冰释机锋自是不可当丛林曰有两浙翁矣绍定戊子四明制阉胡公以小净慈致之郡有贵公谋竊寺後时安晚当国师以诗驰白即行相苦留之事遂止无何移住香山相功德寺也相还里又移城之万寿贵卿名士争先游从晚每至忘归为师作序此时也乙巳雪竈虚榻制阉顔公以师闻如奏勅下此山给勅自师始上又亲洒应梦名山四字以赐戊申移育王辛亥移净慈时教家有挟坐禅宗上帅奏疏百言条析明备上是之诏仍旧时璫焰方炽师以理折闻者敬服甲寅移径山寺更两烬而复始务速成倾漏相仍日费苴补师始至岁仍俭辍衣孟以贍来者厨堂忽败撤而新独雄於一寺其有为之功不苟类此庚申赐号佛智旧庄二所指水为田东饷按籍索租害此寺二纪师为奏免踰年又以和衆病告穆陵雅敬师每请必俞师虽於世泊然而所居利兴弊革不可尽书贤矣哉连住八山几四十年诱纳其徒证悟者衆海东夷相叩读书沓至师之道化远矣病中危坐如常时问疾往来与语不倦将终独以急明己事为门人戒侍僧求偈靡去益请书十六字而化时方炎夏飞霞纷纷非积行所感乎住世七十五年五十八夏其壽若

腊与佛日同金书庵名共一明字闻者异之师襟量素宏与人和易所至缁徒云集敬慕之没齿无疾声遽色遇事虽剧处之如如不逼而成随愿必应他人不可学也或疑主法过慈其弊也弛余曰百丈规则严南阳门户大临济峻峭雪峰粹夷教虽不同其道一也师以身率何弛云余虽交师晚而知师深是宜铭铭曰

振锡何人再来何故梦觉何分归游何处无为有一手呈露全提半提八会言句我翫我珠无汝喜怒汝传汝薪自我来去大明峰前遗蜕所寓枯木衆中法髓谁付金字扁题龙君呵护百世之藏与龙共住

鼓山愚谷佛慧禅师塔铭

愚谷名元智枯禅法子密庵二世孙也枯禅道眼高师初从枯禅於凤山叩请甚勤禅已奇之去而游方谒浙翁琰於双径谒少林崧於北山留掌记有声称少林移径山枯禅嗣席师喜曰青凤山前事未竟今竟矣禅至仍掌记俄而机契万境如如禅移天童甫至而寂师往奠有偈甚悲其词曰拟攀春云作钱楮传徧诸方曰石屏风又题破矣归留南北颇久妙峯石田皆以座元晚之石田病贵璫当至俾师领客璫有数问师与语要而明璫以密闻名彻中禁其人约师一见师力辞之一衆惊服嘉熙己亥出住吴门荐福移翠峰又移毗陵芙蓉道价日隆辞归灵隐宝佑某年泉守以法石致三夏迁西禅寺久废师兴之增筑二庄海田曰福清太宁长乐大泽居六年俄退席踰岁帅阩竹居王公移处则劣甫一夏以病告退老东庵咸淳丙寅正月十七日趺坐书偈而化寿七十一腊五十八塔于鼓山南院师生薛氏世为长溪儒家廉村薛补阙之後年十四治书笔颖出非其所好出家邑之清潭二十受具道貌充然识践兼美淳涵愈富退歛若虚和而有容犯亦不校其所造诣未易涯涘余初得师於冷泉余老溪上师自法石北来一见良喜自此书问不絶师素寡言每见默然以意相怡悦余多方外友师尤质重者也师没三载其门人九峰某谒铭於我语怆然曰吾无以报吾师师不得铭吾弗子也余知师之贤而多某之义遂为铭曰

欬然而虚虽有若无是曰愚淡然而足虽下不辱是曰谷有劣其崇有萃其封我志此翁

前天竺住持同庵法师塔铭

钱塘上天竺诸教寺之冠冕也位置其人亦犹五山之双径焉况是六龙驻蹕大士之奉尤严主席之来必有宸命畴咨声望畀予不轻故先後相承多其宗大尊宿若同庵则其一也师讳允宪越之暨阳刘家子母杨氏梦僧入室而师生以为再来人也少即缁之初游育王有老衲具眼曰子缘在台宗且教以乡往遂从逸堂某於西山又从北峰某於超果精勤十载洞造其微於是学侣奔趋争就炉锤名山虚席迭求致焉自台大龙历秀广福与台白莲遂由鄞之延庆擢主上竺乃探名於大士得之师尝两为座元一衆心服居八载轨行之化私淑门徒有为之功徧新堂宇淳佑一再明禪随祷随应两迁左右街穆陵特旨也初成杰阁以超诸有海赐名宸奎昭回亦惟师是宠丁未季夏朔祝香甫毕就与清衆语违人皆骇之翼朝书偈趺化留龕旬浹危坐如生报年六十九夏五十三葬寺之东其徒以师没二十年塔未有志介古源清

来请余曰佛学莫难於顿悟台宗尤妙於讲明苟获造其玄微岂必离於文字能穷玄辩何钞疏之俱焚既悟此心宁法华之自转即师所学观其终始岂非双修之全功圆位之极致欤遂为铭曰南北互兴空有汨龙胜之传佛陇出二溪而上肃也述玄珠相付同一佛上竺自唐为法窟累朝妙选多人物同庵八年玉柄拂见地光明语剖 往来如蛻没不没书以传之鑱
峯千载宗传指可出来者伊谁覓灵骨

林孺人墓志铭

古囊山之前有处士曰萧宋珍其室孺人林氏玉融镜江人也为处士继室以贤名余尝造其家处士父子皆龐眉皓髮有古君子之风其翁精於内典尝写华严尽其帙余与後村为之跋处士好善如乃翁轻财乐施孺人力助之虽厚费无靳也其平生可称者於公姑尽孝於宾亲尽礼於邻里上下尽情人无亲疎远近皆敬誉之处士以次子留上庠遇禋恩封迪功郎戊辰转承奉郎赐绯鱼袋林氏封孺人年七十五某年某月某日以疾终某年某月某日合葬某山之原子二人长桂芳次桂发为存心长升前庠擢戊辰龙飞第调泉州教官孙四人麒麟福岩桂发未归而承奉没甫归而孺人没痛父母之不及荣养也为承奉求铭於後村乃以此见囑两谒余溪上余悲其志而知其家世之贤亦乐为之书铭曰

承奉之妻广文之母善积于躬福貽尔後谁其铭之竹溪老叟

竹溪麴斋十一藁续集卷二十一

卷二十二

[集部,别集类,南宋建炎至德佑,竹溪鬳斋十一藁续集]

钦定四库全书

竹溪鬳斋十一藁续集卷二十二

宋 林希逸 撰

墓志铭

崇禧陈吏部墓志铭

咸淳二年十二月二十有四日崇禧提举官讲吏部开国陈公梦庚卒前三日犹以手简至溪上索余考工口义曰吾疾少间矣愿见此书幸毋靳余汲汲复命而公之讣闻矣以程度之至才一夕余与公交三十年此帖为絶笔也呜呼哀哉其孤卜次年四月三日毕葬事以国史武谕陈自斋之状来谒铭且曰吾父生平酷嗜书虽病不废卷得考工传良喜扶头繙閱至疾革後已公真生死文字间矣呜呼哀哉公少以文名年二十一拔胄解三十三擢甲科教授潮州秩满堂除广西漕幕人讶其远谓庙堂抑名辈公殊不屑意代还安晚郑公当国矣遂得干办浙西运司兼会子局校艺省闱房中所得多佳士俄以考举如格注庐陵县郑公曰非所以重科目也创员提举会子库比内职以处之郑免相除奏院公以未试邑辞改太社令甫两月台评去以公安晚所敬疑其为党添差通判泉州吏於泉多以珠犀自污公屹立如冰霜大商豪姓敬远之人目为古老通判垂满又以台评去公朝知弹者修同幙之怨甚不直之踰年遂添倅庐陵实文清李丞相当笔庐陵旧有督府卖盐筭钱终岁缗以万计公曰毋貽患他日悉还州家未几漕台积等骤索郡无见储良窘人服公远见董秋闱与诸房以不重誉为约遂洗累试鬻举之疑知和余素病民屏絶符移但委揽家分劝民不见吏卒而办诸司皆高其才檄摄抚州前将交头诸帑多虚数公留其緘钥别为出入两簿自领事日始比去盈缩了然网米敷船岁扰且滞公造巨艘十二先半载出深潭以俟徐以小舟运足之旧以秋期是年四月至总吏以为六十年未有也其长於吏事率类此除检院免得贵州母丧止知惠阳至之日有重囚连逮在狂人二十九前死者不计也公曰韩必和赣客也去管下九年而後韩达诉无尸无证徒据黠卒陈猛一言诘之则曰传闻也见且疑闻而信乎改委贰车审鞫之得其情二十九人皆释前在抚宜黄人有得罪於父而縊死者县囚其父三月公亦一閱而纵之仁而能断闻者以为法便民奏上列二事于朝其一日惠民苦贛商之害名为贩负实则暴客豪夺必空其庐忿激多死於鬪争而诬讼捕系尤扰若如淳熙守臣吴褒之请乞今汀贛二州团保伍与凭由出入稽诸一人有犯同保共坐其二曰博罗石湾介广惠之间海寇以为窟穴出没如鬼虽尝置寨籍缺而力微乞从经司拨水军三十人部以一将兼博罗巡检生劬州给之公为惠政俱可书此於虑民尤远议虽未行识者韪之惠人像公祠於丰湖十贤堂归得汀州除宫教道除太府寺丞就职兼庄文府教授对班首疏言今天下固未乱而乱之形已具国势固未危而危

之证已成内外患交攻公私储俱竭虽未有徐乐瓦解之虑而有贾谊积薪之忧又言盗贼夷狄之祸曰盐禁过密荻浦变生掇盐害滋昭夫啸聚在内则有绿林相挺之虞整居宝峰必谋掩属板筑光化意在图襄城亳邑以窥浮光陷大理以摇广右在外则有日蹙百里之辱皆当时讳闻者言官丁大全甚恶之迁司封即劾去穆陵知其非辜玉音予祠时宝佑五年也大全败前恶者皆召公曰吾倦矣甘老林泉四请祠廩为诗示其子以铜臭不如书香称善人胜官呼为训其始终操趣盖如此公尝自谓吾年七十七为厄岁十二月为厄月果如其言官至中奉大夫闽县开国男食邑三百户所作诗文多不自珍惜仅存者竹溪诗一藁至五藁罗浮倡和小集摹传矣又有笑林若干卷竹溪杂藁五卷藏於家坡诗会笺若干卷刊於惠笑林自志出处也娶刘氏封令人有贤操白头相与如宾先公一年卒葬所公自营今合窆焉子攸承直郎漳州判官孙溶将仕郎孙女三壻曰将仕郎林溶之修职郎新徽州绩溪县尉赵必埴一尚幼公伟人也学问有源委取舍义利明其在桂林两幙皆以征黎受赏经帅憾公护漕盐独遗之有勉其致祷者公曰吾宁失两官祷辱也其在京漕卫公经诺以京剡适有严陵宗姓争嗣者卫决矣公以理争之有疑掇怒者公曰吾宁失一削争职也此其所以自立亦其所以自困使能少贬以徇流俗其达也久矣大资可斋先生实公从祖辞荣高蹈为今丞相所敬屡谋起公而公以知止告可斋曰景长能如是吾家有二隐矣初号竹溪晚以隐名堂盖取诸此余所记是也公姓字居上流嶽崎四十载仅一刺郡两登朝通不及一考人皆以为恨而公春媚玉明由由自适寄所怀於声画视退犹进也是恶可与寡浅者道哉余初识公于京计幙之廨邻余寓屋每夕共坐烛影下评谈古今文字公眼目最高辨难往复时中肯綮必相握手欢笑夫人喜具觞茗隔帘时曰振者铮铮矣去岁秋谒公里第公虽少癯眼光烁烁剧谈纵饮如常时间及京华旧事相顾怆然岂知幽明诀竟以此日余又何忍为斯铭又何忍而辞斯铭也自斋工於文状公本末详而有法余哀思涸姑述其槩云尔因系畴昔所以相与者焉呜呼伤哉铭曰

义江古灵闽之夫子五传至禾义山金紫禾生良臣理曹公祖宗仁太中是为公父母也硕人考谿林氏二李齐名谿之昆弟中外两家有文有道少长熏磨所诣者奥既名於时且翔且止曾中光芒所吐能几藁虽可传事虽可録渊其淳涵见者毫粟岁晚自怡更号一隐我散其樗彼荣者莖是身如云朝闻夕可矧味其腴吟啸至老渺素绶横孤翠笔耸千载不芜一隐之壠

宋知县通直陈公墓志铭

咸淳二年四月乳源陈君之子梦龙以书抵溪上曰吾父尉尤溪丞连江掾英德令乳源东广以架阁檄留乙丑如京钞已上俄得疾致其事进阶通直赐绯鱼命下而卒时十一月二十七日春秋五十有一东轩大仪常公挺为吾父书圹石矣愿有铭仆辞焉九月又书曰吾为吾父卜窆窆初以五月痛其未得铭也改卜中冬丁酉矣吾父生无以骋恐死在湮泯将遗憾九京是吾父有子犹无子也余为之惻然曰君向自连川来掇玉融有贤声其归也余以诗饯之去而为掾为邑皆以廉白名英韶之士至今称之龙也虽不能条其事而余闻之审况寓斋宝章以学问起家仕更麾节而宅不过一区田不盈百亩待制陈公说大书公勤廉俭四字褒之参政徐公荣叟状其出处亦以廉许之建安名前辈也君以父仕守其学终身忍贫以死昔人曰臣父清畏人知臣清畏人不知自以为不及君一廉如冰雪所至歉然未尝以此自多其在吾

邑却例?谢私覲尝敬而誉之君赧然变色曰无是余於是知君家父如威子胜质矣龙也图君之不朽不远数十舍专俾一再至不得铭不葬其志与李方叔同豸犹不以属雪堂仆何取知君世贫无以求於显者怜龙之志遂为铭云君讳焯字仲明寓斋公讳梓朝请大夫直宝章阁江西漕知隆兴府母郑氏赠恭人游氏赠恭人君游出也一子龙也铭曰将相里溪之阳林石坂君之藏再世贤闇而章铭以词传弥芳後之人表洸冈

陈判官墓志铭

君讳介字方叟世为福清人自古龙徙龙津则高王父某也曾王父洪业王父士表父侃皆以积善名其乡君生五岁而孤母氏督教甚至初从学尚右郑公有能赋声郑公世所传八韵活法者名师也长事乐轩于网山之里母氏外家龙江实与网山为邻遂徙而居焉君既有闻於乐轩不以场屋为意年三十不应举人问其故曰吾早孤母子相依为命吾亲老矣何忍一日离膝下终曹夫人之丧已酉始就举庚戌与其子岩石同补上庠两拔解擢开庆己未乙科时鹤相当国仇名士君廷对语切直考官惧而抑之调三衢户曹偶缩戍迟半载始往至即却砂地粳糯例钱秋场受纳每石有买口钱二楮君笑曰口可买心可买乎撝去之後果毅军閤郡诛其渠汹犹未已委君诣营谕之衆欢然曰是不受钱司户吾曹请好米敢不听命台府多委送每以理折之且委曲训谕以还其天间有彼此释然而去或两造俱囂虽负者亦服其议死狱也必为囚者求活死者求冤曰庶几两无憾常邑詹寇成於幕客魁吏君深忧之力言而不听变作登陴守扞君独当所必攻事平辞赏格不独受人益贤之前是谢公奕中祷雨久未应以君纯笃曰为君走灵山随车沾霈郡人曰司户雨也甲子又旱君白郡侯曰旱之虐者天政之虐者人减五邑之赋天必雨王公已欣然弛其半雨立应尝摄邑山时诸乡多盗君谓尉曹曰此饥民耳毋庸激但以祷雨为急既得霖余无闭盗果息邑素煎熬君守之以廉期之以信月解未过以俸代之守曰江山果难乎陈户何优也诸台专吏横旧苦之君摄倅不为屈屡直於使家来者以戢私曰此强项司户也在任三年四易守寛猛虽不同君处其间随事救正无不敬之秩满拟以职幕辟辞不就留八月始得去外移潮州判官宪王公必素昧剡以浙东宪干书币造庐君苦辞以谢杜门课诸孙寄情歌咏於世漠如也忽一日自吟曰了知传菜日仍是破瓜年时咸淳乙丑君年六十六其子以二八疑之惊问曰何为作不祥语君笑不答果以十二月二十三日无疾而逝实立春次日也君盖前知之矣娶郑氏子一人岩石修职郎改差建宁府学教授女一人适登仕郎刘嗣翁男孙二女孙二将以某年某月卜葬云潞山其孤以铭请曰君治命也余虽与君同邑先後出乐轩之门久落江湖而未及识壬戌被命还即舍道行柯山乡落间闻父老诵户曹之贤有曰活菩萨者心甚异之既见则知粹然古君子也尝以其名上於朝越岁南归又一见既而闻君两辞台郡之辟所守甚坚今世之仕争岁月校分毫若不复有明日者而君所守如此又且怡然死生之际非学问之力欤乐轩之门寥落久矣使其年幸而及耄使其学幸而及试岂不为程门尹和靖独殿诸老以寿斯传天不慙遗惜哉若人也君之子既为家传甚备余因取其大者书之铭曰

书而臞道而腴名以文兮双宇誉以政兮三衢却当涂之罗致甘远次以舒徐栖心恬知之养蛻身梦觉之遽夫是之谓乐轩子之徒

张屏山墓志铭

嘉熙庚子秋余以温陵掾入漕闸撒棘有士颀然闯门者视其刺则张君持之也坐而语余曰吾为屏山书室以聚乡俊秀而学焉贫不自给者买濠田一庄以资之今已成愿有记余曰建为往来之冲名於时者日过门何取於仆再三谢不可既而谒其居则山之环者如屏前後左右位置各有思喜而诺之自此相与三十年知君上世家昇州唐曲江司徒之後南徙伊莘遂为建人嘉佑以来擢科第者相踵曾大父穀三舍贡士祖某考某赠迪功母谢氏封孺人开禧禋泽也君字立叔生十四岁而孤与孺人依外氏湘潭令尹居溪滨後移屏山下初从永嘉李公曼卿蔡公幼学授春秋同门生谢公汲古周公端朝皆推先之齐堂倪公领郡亲课学职员君为首选擢以学录极加器重君行醇而学博里人执经席下去而显者甚衆居孺人之丧呕血几毁性远近以孝称庚寅辛卯君损廩质家活千余家人呼为生佛招使抑斋陈公素寡与独约二使者访君於书室欢饮留诗而去君虽笔砚未灵老不释卷晨兴必诵周易终帙持身治家有古君子之风性喜施予建宁县学废堂庑为蔬溪云际寺荒山行苦暴客君一手倡成之邑士行旅至今以为德晚号屏山居士筑精舍於青云峰即梨山也淳佑己酉某月某日留诗一絶无疾而逝享年七十有六有诗两卷名意藁其年十二月五日壬寅葬青云中麓君自营也娶提点陈公局之女男瑜先公十二年卒孙男二人康松年女一人壻莆田叶丞仁甫之子弘祖曾孙男三人女一人状其事者门弟怀安簿黄梦吴咸淳丁卯松年以文学守勅应莆阳赵使君之招道溪上袖以求铭君於是歿十九年矣读其状思其人恍如初见时也为之怆然又喜松年好学工文能绍其业知君之有後铭曰

屏山之下昔君书舍梨山之前今君墓田君穷於世酷爱者山以吟以乐生死其间曼卿芙蓉纯父长白君今何归必如欧石此山长存君则不死何年鹤还问君孙子

林梦隆墓志铭

国清林梦隆字德本惠安丞雷震仲子也早工場屋语长富於学累试不售居裕如年四十辟一室名强斋聚图史其中理家虽甚勤巨细必整比而晨夕讽咏此室以书自味为诗多警语性嗜古宝绘所储集古所録与涵星割云之珍苟有至者以得为喜不计直予之居乡尤乐矜人之急贫而没者櫟之里士程德正老无依谷之家庵死为之窆其能慈且义类此执惠安之丧衰麻不去体前两年尝告余曰吾卜地醴泉西蔡营吾蛭室取香山诗语名之曰海山归处余尝扁矣今年春又以诗请余诗之甫数月其兄忽以书来讣且乞铭又曰吾弟孝於亲友於昆季既歿犹见梦於吾母曰二儿虽稚弟兄在何忧余读之怆然曰强斋其归海山乎因思中庸问答其最後两言穷达死生之事也今君塞於时而不变愬於梦而不戚亦强矣是可铭君生嘉定丙辰终咸淳丁卯某月某日葬以其年十二月某日母余氏娶魏氏先卒十二年已窆今合焉二稚宗直宗海也余尝铭惠安矣家世已具兹不书铭曰

海蒙蒙山小小有人焉强哉矫嗟尔贤嗇尔寿藏於斯利尔後

孙夫人墓志铭

夫人孙氏讳汝静温之平阳仙江人迪功郎叔惠之女保义郎林栋之妻初归时夫家未裕夫人曰姑向老不宜自劳夫力学不宜自汨请以身任之纵其夫远求师养其姑极尽孝去饰甘菲朝晡应酬不少懈苟完矣始辟其居保义亦升右庠人以为贺曰未也夫早成名姑安得寿此吾愿尔俄而姑疾衣不解一年夜半露香自析乞减已筭既居丧泣血不啓齿终其制及保义合选成擢第上三人伤姑不及见语必涕下保义归踰岁即逝夫人叹曰命也奈何嫠孤相守勤苦自力恪意教其子毕婚姻未久而女忽亡悼恨得疾以景定四年六月四日卒享年五十有八初病即曰吾数尽矣三日凝然端坐而瞑但嘱其子以行好事振家声定力如烈丈夫性纯孝慕其亲终身母陈氏年九袞家虽远稍暇必归宁常问时安否不絶屏摄之祀涤视必躬乡邻之急贷予不靳岁侵每平糴以倡一介不苟取尝有输租多数楮去而觉追数里还之又尝遗首饰于庭心知其人不欲言衆索验得实夫人曰非吾所遗者其寛厚类此死之日间里远近哭必哀以咸淳丙寅合葬金舟乡湖原象岭曾祖德运武翼郎祖大经承节郎子一人煜漕贡进士女一人壻方皞如今史蒙之子国史余友也得书为谒铭余又闻煜笔力如乃翁必能大其家惜夫人不少待也铭曰【阙】

永嘉林国辅墓志铭

前之冬浙贡进士林煜以余友方国史蒙之书乞铭其母今又以其父状来亦余友所作也且曰吾父铭吾祖母重趼至闽乞怜於庸斋赵公留数月始得之吾父亡吾尚幼宰木拱矣不铭不予也吾惧焉余怜其志不忍辞按君先世自闽徙温卜居林湾薛习斋已於南仲之志纪之曾大父训大父廷翰父谨皆以积善名于乡君讳栋字国辅一字与守年十二而孤劬书力学志亢其宗甲辰混试补右庠归拜其母恋恋不忍离母趣之君曰欧阳四门虽曰养志儿愿学者陈蕃也未几母以疾终哀毁几灭性朝晡之奠哭三载闻者伤之既葬始入京戊申升舍己酉上舍文声籍籍既擢庚戌第学法必需明禋或曰君为鼎魁不应限此君耻自陈东归甫踰年得奇疾卒淳佑辛亥六月二十有七日也春秋四十二明年从戎殿扈之命下不及拜阶为保义郎君为文简而有法以诸祖多游陈止斋楼攻媿之门议论有源委其从师取友又皆当世名人少时声价与从兄潮阳宰善补仪真教思齐相上下生平一语不轻发自号讷庵而扣阁议时政别忠邪多为同舍先廷策痛言边事甚激切谓兵祸甫息喜功好大前世覆辙也时有主议图边功者君故峻折之末言天理人欲限界定则君子小人限界定君子小人限界定则中国夷狄限界定袞袞数千言识者谓其有龙川气骨无垢学问使君得试掖垣必又有可传者惜哉性喜施轻财救荒调急不少吝某梁某路苟有病于人不待告者筑均水偃复古运河团保伍扞海暴或请於诸使自为之或献以奇策俾行之使君得用於时必以勲劳见惜哉其睦族有恩其交友有义其持身有礼其教子有方国史状已详卒之日无他语但曰死生命也使吾少延得再转以貤吾亲吾愿也已矣奈何歿其身不忘其亲吁贤矣娶孙氏上舍正奏应霖之姊後君十年卒男煜也女嫁方皞如咸淳丙寅十一月己酉与孙夫人合葬湖原象岭君昔自卜也铭曰

声三舍兮文豪上三人兮名高虽横金兮赐袍遽埋璧兮丛蒿志貤亲兮不遂死遗恨兮奈何

秘阁提刑侍讲正言陈公墓志铭

淳佑甲辰大政改纪朝方留意人物公时有声於湖湘矣丙午游克斋独相公以体量江湖盐事稟议尚书省甫至条上三说皆前相施行旧弊也庙堂是之既又述建阃之议曰国初虽收藩镇之权而重边城之寄所以艺祖之世西北帖然今淮西诸城日困於敌谋国不思变通之策如靖康朔四辅建炎置镇抚徒曰昔人剡方镇以为郡县今不可割郡县以启强藩以桓温苏峻疑当世之人而不以羊祜陆逊期文武之士非识时之论也克斋喜书其纸尾曰此论甚伟国有人矣终当用之除公左帑甫陞辖而游去安晚相矣於是迁六部门未几遂除监察御史兼侍讲此丁未七月也初进讲穆陵曰知卿不求人知此朕所亲擢公顿首谢圣意盖欲用公矣第一义及郑签枢又言史宅之之横时史以宇文融故知求媚於时遣使四出名为括田委信王畴为害西瀾公议籍籍谏垣抗疏柱史直前史为掩护犹得外补公乞核其赃重加镌斥朝论壮之在台一年其所弹击皆天下所不与者每奏必行且言大臣不持大体内而筦库小吏外而监司末属骈填光范之门中书案矣人尤以为难言戊申十月除右正言仍兼侍讲公条陈弊事愈力时史已在枢府媒蘖尤甚以言事之臣多侵贵近指公为植党除大理少卿不拜而去此己酉闰二月也明年除江东宪再辞始就职踰年辛亥以部内有簿李某当路倩也夺浮屠田亩数百郡欲媚以畀之公不可移文追索急李毒於朝免宝佑元年十月主管明道宫抗章引年以直秘阁致其事十二月二十一日以疾终年七十一阶朝散郎公讳求鲁字质甫嘉定癸未进士自为小官恪然有守所至得誉且皆有劳效可纪初调临海尉郡罹巨浸弥漫城郭死者相枕藉猾商乘时聚羣不逞详为暴邦人大恐守以属公公不动声色捕三十余人一讯即服闻於朝以弭变於未形宜厚加赏非公意也再调汉阳教官朝论皆言有劳不録何以劝特改承奉郎丞处之丽水伪券之狱诬连大家鞫者欲以尝贿吏实之公曰平民被诬惧祸求脱此亦常情事求其当不可以此为疑请精诘之其人果无罪至今像公祠之知福之闽县郑府家僮逐吏入县廨公执而杖毅斋称其能益以贤公东畎曹帅辟公机幕敬之如宾友继帅意一徐公以公族日蕃郡稍不给议请祠牒以济之公适当笔知宗暴人怙艺妄作素与帅不咸且嫉公守正倡言有所裁抑嗾宗子关公家一空公曰国无纪纲矣拂衣去道富沙铁庵方漕留辟建倅公辞焉会堂中有诵公贤美者时宰曰得非前知宗所恶者乎除通判澧州守杨大异以职事忤孟制改它郡朝旨俾公摄之公尤不屈事有不便於民争不直不已孟反敬惮之堂稟之命虽以此亦不专以此也然公虽以廉介名於时而学问有渊源独歉然自下不少炫其长故知其贤者多而知其学者少盖永嘉诸古事而及之穆陵亦嘉其忠恳而势孤谗胜迄不得少行其言而去惜哉士患无学学成矣患於不得言居可言之地而遇可言之主竟亦止尔惜哉公之季公汲自号玺斋与叶水心钱白石游久公磨礪其间故毫端极细润言论纖悉洞识体要余初交公於朝及公持节来番余备数治事与公相从几一载析理论文句句中肯綮郡刊艾轩先生集初成公得之甫三日俄语余曰艾轩之学异於人矣其於古今书上下数千年事无大小如珠贯而绳引余为之竦然曰吾侪读此书者多矣未有能为此语者况一日而得之益知公之不可及辛亥冬别余江岸时丁为番倅初擢江西分司读山素奇遇之丁亦自许以必见用公私语余曰此轻薄小人他日必自祸但愿朝家毋为所误尔公歿数年而丁败每思公先见之明日先见之明虽老泉辨奸亦不过是公葬所居後山已十三年咸淳戊辰其子为吾郡理曹乃以铭见属余曰我铭也乎哉遂擦涕为之公家本居闽七世祖徙温今为乐清人曾大父师禹大祖说与詹事王梅溪为友号八叟父泳以公贵赠朝奉郎娶魏氏继戴氏皆安人子二人子崇理曹也子嵩今为某官孙一人竺儒自薛常州陈止斋以周官六典参之诸史讲求古今损益异同之故又考本朝文宪相承所以垂世立国者欲正体

统联上下使内朝外廷必别大纲小纪必严与夫取民制兵足国厚下之法随事条理期为长久以今准昔而不为好古之迂本末明究要皆可行公谓礼乐颇得其传每慨前修曾未及试以身为宪谏之臣感人主知遇欲朝廷仿而行之故诸所进言如曰谨微如曰仁必兼知勇如曰务实如曰举要固无非格心之大者至於整齐世故扶补罅敝先後条上十余万言大抵以会计必令为一书内帑必制於冢宰兵民政分则体统失官府情隔则祸患生取士未能复古必回所习以养其心予民未能如古必求所苦而去其害和柔抑也预借欺也又言盐入渐损者衆争利之当严於诸阨楮价愈下者国自轻之母徒以强民人才之乏实原於士习浇民力之困实原於国用窘成周远矣国初非所法乎某病某源某证某药其言皆有关系未尝轻撝浅微通而不拘详而有据凿凿然如谷粟可饱而丝帛可暖也且曰臣非不能抗高论以邀虚名盖救时变通之道毋急於此精粗皆学也陈之奏篇着之讲义又时因进孙其书存於家有杂着奏议讲义故事共若干卷铭曰

公始来闽我未及识人言公贤喻以金石暨游湖湘声俞藉藉既召而来献言千百相曰伟人伟哉此画公留未几晚登宰席每语奇公曰不易得哉豸之除帝所自择时有要人怙眷强愎抗疏力弹并及其客人皆比公凤鸣麟获公虽慈和守义正色或忠或邪靡不别白上知益深付以言责公慨於【阙】如医视疾曰上圣明扶世何策生平讨论得自陈薛出而试敷奏历历匪泛匪迂以今准昔鍼砭其源随证区析约以规绳质之典籍谓此不明无以立国公虽忠勤谗者在侧何憾於公实世之厄我思若人有言有德非以交情为之惻惻皐如之藏苍崖古栢其以斯铭大书深刻

竹溪麴斋十一藁续集卷二十二

卷二十三

钦定四库全书

竹溪鬳斋十一藁续集卷二十三

宋 林希逸 撰

行状

宋龙图阁学士赠银青光禄大夫侍读尚书後村刘公状

曾祖炳赠宣教郎妣郑氏赠孺人游氏恭人祖夙承议郎着作佐郎累赠中奉大夫妣林氏赠令人父弥正朝议大夫吏部侍郎累赠少师妣方氏赠鲁国夫人林氏魏国夫人

咸淳五年正月二十九日龙图阁学士正议大夫莆田县开国伯食邑九百户後村先生刘公卒年八十三前数夕有大星陨公寢室後俄而公逝莆之大夫士皆挥淚以相吊有方斂而往枕尸以哭者有既殓而往拊棺以哭者莫不尽哀又数日则泉南之南闽北之北吊唁往来交驰于道又数月则四方交旧与凡得铭得序得跋得诗之友不远千里而来力不能来亦以书至盖不知其几皆曰斯文无所宗主矣吾侪无所质正矣後进无所定价矣茫茫宇宙人物何限其能擅一世盛名自少至老使言诗者宗焉言文者宗焉言四六者宗焉虽前乎耆老後乎秀杰之士亦莫不退逊而推先卒至见知於人主者古今能几人哉公虽得名得寿得禄而爱公者犹以用公未尽为恨是岂私相好耶吁若公者可谓千载之士矣公讳克庄字潜夫世为莆田人自大着正字峥嵘艾轩之门声振乾淳间已蔚然为文章家矣公生有异质少小日诵万言为文不属藁援笔立就初名灼以声律冠胄子入上庠场屋士至今诵之嘉定己巳郊恩奏补将仕郎更今名初调靖安簿帅曹争檄寘幕下洁斋袁公时以仓兼府尤以文字见知俄丁少师忧终制注福州右理曹改差真州録参菊坡崔公帅维扬因公白事喜曰吾於闽得二士君与子华也鋭欲致公会李公珣建阆金陵辟沿江制司准遣一时幕府诸贤自勉斋黄公而下皆相敬爱及谋进取公有异议主谋者忌之公求南岳庙去荐员及格犹欠一考八桂胡公槻以经司准遣辟公辞地远魏国力勉之八桂佳山水胡与公倡酬几成集岭外帅权重不轻钱客公入京进卷胡公饮别榕台桂人以为前未有也甲申改宣教郎知建阳县新考亭之祠祀朱范刘魏四君子於学庭无留讼邑用有余增余赈粃仓二千斛大书其门曰聊为尔民留饭椀岂无来者续心灯西山真公记之更剡西斋北山陈公篆其扁为之赋于蔦之什西山在朝以公学贯古今文追骚雅荐西山还里公以师事自此学问益新矣言官李知孝梁成大笺公落梅诗与朱三郑五之句激怒当国几得谴安晚郑公时在琐闥力为释辨以免终更彩旗蔽路送者踰数十里比闻公丧犹有重趫来哭者得倅潮阳赵至道犹以嘲咏谤讪弹之毒由梁李也刑寺下所属究实公若不闻邑丞虞德羔素昧以士民公论上府漕使陈公汶社之界以京削主管仙都观俄通判吉州端平改纪安晚当国甲午春有旨都堂审察西山帅闽以机幕辟除将作簿兼帅司参议官公迎魏国之官魏国自哭少师不出户者二纪矣西山知公

吏材高府事一委之平斋洪公迁西掖奏公自代安晚曰中书眼高西山以户书召公援例求退诏以匠簿供职公奉魏公还里踰月独入京九月除宗正簿西山喜曰方是本色公在麟寺南塘为卿游二公间以文字相好欢甚西山梦奠乞假会葬不许乙未六月除枢密院编修官兼权侍右郎官未几郑乔并相公轮对言服天下莫若公今失之私镇天下莫若重今失之轻陛下因私天位遂德柄臣因德柄臣遂失君道非公也因私天位遂疎同气因疎同气遂失家道非公也大臣忧谗畏讥而有狼跋之嗟厌事避权而动鱼羹之兴非轻欵或以匹夫横议而改政或以走卒偶语而易令非轻欵次篇言柄臣坏朝纲开边衅兵骄楮贱贪饕侥幸之俗不可回诸贤起而当之天人未应陛下遂疑君子而思小人曾肇有言上意渐变臣思此语可为寒心愿陛下坚凝初意无使邪说摇正论则天下幸甚贴黄痛言茗川之事出於迫胁向止议其罪不原其情近虽复其爵未雪其冤皆时所难言也公於上前奏读玉音所问随事敷陈或言陛下向待柄臣太重今待大臣太轻或言更化之初奄嬖屏息近因军卒小警此曹颇得进言陛下若听用之天下事去矣或言陛下圣心待济王本不如此只是台谏给舍一等小人遂有後面一段施行当治其罪以涤此谤继絶一事他日国本既定决不容已或言向者权柄下移陛下欲除一吏不可今从官宰相皆自圣擢又言向者近臣惟真德秀魏了翁小臣惟蒋重珍陈埧敢与故相异论今人人得攻大臣议朝此更化美事又言弓旌所招近稍稍引去蒋重珍既去洪咨夔又引疾如此则诸贤渐去别一副当人来矣上曰无人任事公言今日如人久病沉痾已深用君子如服参苓虽无近效犹有生全之理用小人如服乌喙一剂丧生矣殿上下之人皆谓公小官初对音吐琅琅从容如许廊庙器也疏出鹤山魏公果山游公实斋王公南塘平斋时皆在朝击节不已实斋因奏疏有曰兼旬之间嘉谋迭进有益圣学盖为公与杜立斋王臞轩发也狂酋入寇朝议以元枢曾公建督曾辟竹湖李公与公参议不果行丙申左府语泄有锡第表郎之传鹤林舍人疑其遏已遂以吴昌裔疏罢御史舍人弟也主管玉局观寻除漳州毅斋郑公言於朝谓去非其罪丁酉改知袁州有旨趣行公在郡一以崇风化肃纪纲访故家礼名贤为先务因寛得衆郡以最闻殿中蒋御史公同舍郎也因火灾倡邪说为学舍所诋知铁庵方公前在谏垣言济邸事太切天意不怡遂以公与铁庵臞轩同疏皆尝言故王者三公居同里既归相与赋咏无虚日自以同传为荣俄主云台观文清李相当国擢公江西提举改广东提举公不以入岭为难道潮惠谒昌黎祠访坡公旧迹庚子元日始至以婴孺视岭民以冰玉帅寮属岁计羨而商征寛民夷安之八月升漕文清薨史独相经理两淮屯田敷耕牛於广右公以事关边储急为区画既应令而民不知异时表谢有曰每於吏民相告语之间具言朝廷不得已之意指此以讽也识者诵味之留粤两年更摄帅舶俸给例卷皆却不受买田二百亩以贍仕於南而以丧归者南人刻石纪之辛丑令赴行在奏事侍御史金渊谓公以清望自拟寝召命主管崇禧观癸卯元日除侍右郎官又以濮斗南疏罢仍旧崇禧甲辰秋社与范同相除江东提刑一意访求民瘼泽物洗冤劾广信贪守黥南康黠胥皆有奥援者公论称快十一月除将作监未几改直华文阁因任范日忌公托言岁旱民饥艰於择代沮其入也范去游独当国与参与抑斋屡以公荐丙申四月令赴行在奏事时方祷雨公虽治任而拯饥雪枉备极焦劳留至七月乞谒告省亲不许道除太府少卿八月望入修门二十三日面对三劄首言委任之失二其一嵩之以借助灭残今为战以厚币奉俸盍为和以清野蹙国为守土者非长徒尚智术岂堪倚仗若非天去其疾他日必貽朝廷之忧其二曰昔者不择其人而任之太专今也虽择其人而不授以柄但见调护使之勿言宣谕使之奉诏又言谋谟之误二其一曰大臣有翕受之量而无主宰之功同列有不悦之渐而无齟齬之和易一边阉淹久

而後决遣一儒帅迫趣而始行桑维翰一日易十节郭子仪朝闻命夕就道视今何如也其二曰庙谟睽异邪党揶揄殆几反戈以自攻不忧探穴之覆出刘摯主调停而几覆族曾韩争大柄而卒相京追思可畏也陛下虽有退小人之功而虚受思小人之谤臣闻桓温嗤诮王衍诸人自许豪杰而苻坚笑之语及谢安则以为江左伟人秦桧当言诸人但尝啖饭观吾致太平而乌珠将死乃以张浚尚存为忧安之握兵初不如温浚之挟权初不如桧而二国皆慢彼畏此今陛下托国将求如温如桧者乎抑求如安如浚者乎次言善类之合莫盛於本朝言路之通莫盛於本朝祖宗以来甘其苦言养其直气有立行其说者有久而思之者有始忤而终合者有自常调而处以清要者今陛下上法祖宗待羣臣至厚记忆所及收采不遗恐其间尚有迹远而孤位卑而滞者其人昔尚盛年今已暮景愿收之於霜降水涸之余使善类常合言路常通其意盖以言故王者收召未尽也读至迹远位卑处上问为谁公曰从臣如王遂徐清叟方大琮庶僚如汤巾潘枋不幸已歿存者如黄自然王迈自然近已向用余人皆年事已高愿陛下收録之三言江东使事以恤贫民处流民为最急贴黄以亲老求归养玉音曰朕知卿文名有史学即盼锡第之命仍任责修纂公退见果山坐未定宸翰已至刘某文名久着史学尤精可特赐同进士出身除秘书少监令与尤焞同任史事庶累朝钜典早获成书次日兼国史院编修官实录院检讨官又三日御笔兼崇政殿说书公四辞锡第再辞史事晚讲皆不许十月朔转对言今日之深忧莫如国本未建援引甚详且曰臣谓此事在唐宣宗後唐明宗孝宗於禁中也皆择於未入之前定於既入之後异其封爵别其名称自幼至长自侄为子不待建储而人望已有所系矣若朝取一人焉暮取一人焉一出焉一入焉举棋之势未定当璧之冀浸广非所以重宗庙尊本统也于是有自内学退归者故公及之孟昶御笔时暂兼中书舍人同院庸斋赵公时行下三房公以赵已除法从乞以上房易之奏上不许三学友朋喜曰此真舍人也时史相未终丧以草上疏乞挂冠上批服阕除职予祠台谏从藁交章诋之皆不付出十二月初杳御笔嵩之今已从吉守本官职致仕公奏曰嵩之有无父之罪四无君之罪七旧相致仕合有诰词今臣行嵩之之词未知为褒为贬若从其自乞则合用杜衍欧阳修之例何以示天下後世若为贬辞则不下罪名秉笔何所按据此綦密礼所以必请高宗御笔然後草秦桧罢制也上令丞相宣谕可作自陈行词付下御前所録嵩之奏状令体此降制公又奏御笔有守本官职之文未知所守何职本官见封永国公合以本官见封阶官带永国公致仕十四日御笔史嵩之除观文殿大学士致仕公又奏昨日进讲侧聆玉音已降除职指挥臣清旦待班东华门未知所除何职讲退方闻臣窃见高宗朝前左相沈该落大观文致仕孝宗朝左相叶颙以雷变罢不除职只守本官奉祠左相叶衡魏杞去位皆终身资政今嵩之忠孝有亏所除职名乃与元勲重德无异窃闻外廷之论皆咎臣不合奏审公议实可畏也乞详臣元奏寝罢嵩之职名只守永国公致仕容臣行词十六日中使宣谕史嵩之除职致仕卿已遵承又复入奏可依已降批谕行词公又奏词臣命词须合典故嵩之若以阶官永国公致仕则职在掖垣今除大观文则合宣锁降制此乃学士院职事窃见绍兴二十五年秦熺特授少师观文殿大学士嘉国公致仕正与嵩之一同系学士院降麻臣若侵官内制岂不貽笑天下是日王伦复宣谕嵩之除职既系学士院降麻卿可一面书行公奏云连日案牘圣聪未敢重陈容臣於经筵审取圣旨十七日与给事赵无愔舍人赵庸斋同上缴奏十八日上又命谢读山谕旨公遂丐祠不允二十二日御笔嵩之依所乞守金紫光禄大夫永国公致仕除职指挥更不施行游相柬公云诸贤尽力回天圣主舍己从人书之简册有光多矣便可书行命词公为此制有曰我闻在昔求忠臣於孝子之门人谓斯何岂天下有无父之国未上二十四日殿中侍

御史章琰疏罢犹以奏审为罪安晚时在湖滨冒雪祖饯以邹道乡事相勉公在省八十日草七十制学士大夫争相传写以为前无古人丁未二月除直宝文阁知漳州时有仲氏工部之戚公以太夫人年高力辞安晚再相除直龙图阁主明道宫戊申元日除宗正少卿公又苦辞余时备数编修官袖公手书以白五月依旧职知漳州公以戌期远方拜命是月又除秘阁修撰福建提刑欲公便养也公又辞不允九月朔即家建台公方申严使事访疾苦扶善良以哀矜献狱以孤远拔士甫及月丁魏国忧哀慕毁瘠三年如一日庚戌十一月除秘书监公以禪制未终辞辛亥春有旨趣行四月到阙兼太常少卿直学士院对劄二首言端平变局侔於元佑今陛下登庸旧弼垂意至宁而人谓端平之政改矣端平之心亦改矣次言朝廷之士议君上者或以掖庭或以戚畹或以聚斂议大臣者或指除授或指宾客或指子弟道路之传皆曰君相厌之臣以为不然惟圣主可以责善惟贤相可以责备其意甚忠其辞甚婉五义之谏讽居其一不知公者或以为诤贴黄乃以建储为请曰臣於端平乙未以枢掾对尝啓其端丙午孟冬以少蓬对又尝言之越三日孟祀即有贵州刺史之命臣既去国今五六年节旄虽建王爵虽疏名号未正圣意未白愿陛下早图之上皆嘉纳公退见丞相乞召潘凯吴遂二人皆忤相国者大拂相意语诸客曰千辛万苦唤得来又向那边去然公本无心外庭之诤相国之忤皆悞矣五月兼崇政殿说书六月兼史馆同修撰时事多内出公言祖宗盛时内降絶少间有一二有论列者有缴驳者有执奏者海纯仁宁谪而不以濮议为是必大茂良宁去而不与两知阁并立衍宁罢而不肯求容权贵之门今中外除授间有不由大臣启拟者求者予者奉行习以为常但日依应臣窃为陛下君臣惜之又言衍之所以能却内降者当公仅三数月而已盖小臣能以去就为轻虽大事可论大臣能以去就为轻则内降可执横恩可寝其语颇讽当国於是愈落落矣公已决意赋归而上眷甚隆相亦勉谕凡六上祠请再乞挂冠皆不许公亦以礼官逼禋祀未敢数瀆十月除起居舍人闰月兼侍讲公虽迁延数月未能决去而前後进言愈切史宇之除工侍公不草答诏曰宇之一未更事少年使之从上雍非吁俊尊上帝之谊臣前摄词垣未行嵩之之词不乐臣者已横加诬蔑今若秉笔褒宇之之美人谓臣何京尹规谋小利京民苦之公言昔之理财者摧抑富商之盗利权者逐什一养口体者不问也削弱豪家之侵细民者营升斗育妻子者不问也漠算缗钱下逮末作唐为宫市白夺樵夫今何异此时江浙名藩多付戚畹公言择守不过两涂一曰才望二曰资格今穉齿登鹄序弱冠佩虎符昔人以四十专城为荣今不待四十矣凡向者近省均佚名流补外之地今皆以处若人百姓何赖焉山相经营复出事有萌芽公直前奏曰陛下曩语羣臣以为某人决不复用今都人竞传曰落致仕矣建督府矣又曰某人尝以御槩示人矣又曰陛下戒其勿修怨矣臣知陛下万无此事设或有之此误不小向使畴昔在朝终始不废偃月之祸不过及士大夫今以埒国之富震主之威繆为恭顺阴怀怨毒外岂可付以寸铁内岂可假以寸权秦桧再相未尝不牢笼李光胡寅久则当世名臣举族贬窜合门废锢上而至尊亦有靴中匕首之防此陛下商鉴也敌主新亡或传北运以衰荆狃一胜蜀谋再举公言赵范欲图唐邓唐邓不可得而枣阳先失安随郢复均房皆为丘墟赵彥呐欲图秦巩秦巩不可得而剑阬不守五十四州遂成荡覆岂非外重而不能御内虚而无以守臣谓江陵固然後可以援襄樊重庆实然後可以图汉中范与彥呐前事可镜也言虽峻切上独优容察官郑发若不相乐是月十九日疏入公方进讲玉音曰卿与郑发无他否既退疏不下御笔除职予郡道闻安晚薨旅哭甚哀曰吾不忘知己之旧谢吴并相壬子正月除右文殿修撰知建宁府二月兼福建运副郑愤前疏不行再论褫职寝新命六月依旧职提举明道宫公优游里閭作为新居揭宸翰所赐樗庵後村二扁日与

宾客觴咏其间曰吾得此足矣宝佑丙辰矩堂董相欲以冶使处公丁大全沮於上前曰刘某恃才傲物遂有正言邵泽之疏实丁意也仍奉明道祠景定庚申师相魏公还朝公方奏疏引年除起居郎再辞不许九月兼权中书舍人公犹在道十一月朔面对首劄言凶相弄权以富强自诡辅圣君而行霸政为天下宰而设骗局人曰相非相狙也政事堂非政事堂龙断也传者叹其形容之工末言国以危惧存以供乐亡其警告者甚切曰陛下必持胜必虑危已审者毋至量移已斥者毋复亲近大臣必弼违必格非士大夫毋以清谈废务毋以浮文妨要人以为药石之言次言贪吏可惩奚问名胜赃罪狼籍而曰为贤者讳春秋书法八议旧典恐不如是其意有所指也闻者是之读毕以老蒙收召谢玉音曰知卿爱君忧国至老不衰所以欲得相见除擢兵部侍郎兼中书舍人兼直学士院立螭才三日尔十二月兼史馆同修撰初上过东宫见公书肆所传文集喜之未除兵侍前一日中使传宣谕曰卿居闲日久着述必多可録本进呈公辞以容臣繕写俄有旨再索公辞以史事猥冗未及点对越数日以古赋古律诗记叙题跋诗话共二十六卷奏进皆辛亥以後所作也翌日中使以宸翰御制赐公曰卿风姿沉邃天韵崇飮今观所进近作赋典丽而诗清新记腴贍而序简古片言只字据经按史谓非有裨於缉熙顾问可乎先儒有言学富醇儒雅辞华哲匠能非卿不足以语此真儒臣希濶之遇也辛酉正月将降科举诏公以非科第辞同院进藁不称旨命庙堂改属曰非刘某不可三月兼侍讲四月以病辞西掖诏从之俄除兵部侍郎八月再兼中书是岁乞引年者再九月厉文翁除沿江制阍公不待黄至与给事徐公缴奏酉时黄至又奏是夕一更御笔至逼趣书行公又缴奏其言甚苦命遂寝壬戌三月除权工部尚书陞兼侍读李桂除察公力排之桂已入台次日疏出全台待罪朝绅皆谓与艾轩畴昔缴谢某同今上在东宫亦语宫端徐公曰刘中书此举甚高公虽身兼两制词命填委寒暑无间坐至四鼓而一念之忠言无不尽故淫雨有疏大水有疏和采之害有疏拯饥有疏犹有五管见焉其言剴切允当帝心至如大全既死则曰李石责北司有言李训固可罪因何人以进乞斥其内訶奥主者指当时贵璫也涟海归顺边患浸纾公言禁中排当太密湖山丹艧浸盛愿毋忘透渡时江桂二阍密图起废公言史以怯懦邀功李以闭城纵寇罚未当罪其可牵复乎或言簿録奸赃之财圩田御庄之入合以助采本补和采此陆贄散小储成大储捐小宝固大宝之说或言右选勅牒冗滥补授多稽考难战士捐躯得赏而补授帖牒死归他人蠹国无端何以示劝每奏多则万言少亦数千人皆美公之忠纯而服公之整暇八月再乞纳禄御批曰览卿来奏求退甚勇词垣经幄方资文儒输情甚真难夺雅志特除宝章阁学士知建宁权文昌得真学士异恩也御赐玉柄宝箠宸制五言书其上以金纈香茶侑之竹湖以後未有也师相亦赋诗赠行从橐饮别道山堂分赋御制诗韵时人比之二疏公既还里优游觴咏甲子秋以目眚谢事除焕章阁学士守本官致仕其年先帝弃羣臣公哭临哀恻丁卯右目亦苦赤障遗身自乐处之裕如也四年五月今上念先朝遗老御笔刘某谢事先朝年德俱高特除龙图阁学士仍旧致仕人谓嗣圣将起公矣公早受知忠肃贾公辨章尤相亲敬古公碧梧二揆皆公文字友而天不憖遗国嗟殄瘁呜呼惜哉公娶玉融林氏赠淑人宝章国博之女先公卒四十二年子三人强甫朝奉郎三省架阁添差福州通判明甫奉议郎邵武军通判山甫承奉郎监岭口盐仓女一人适正献福公之孙故通直郎惠安知县陈琰孙男八人沂登仕郎涣洙将以京选二泽分奏澈履 锦绚尚幼孙女五人已嫁者承奉郎监岭口盐仓方广翁修职郎浦城主簿方公权余未笄是年十二月十九日诸孤奉公之柩葬城北徐潭之原公负间世之才问学所积源流三世公探索涵泳又深造而自得之无书不读发以诗文持论尚气节下笔关伦教一篇一咏脱藁争传初年即见知於诸老

温陵竹隐传公知晦翁谥议乃公所笔寄声愿纳交趣召道莆造公之庐览公近作曰亹亹逼人屡以疏荐洁斋在豫章得公代郡家贺正表喜曰酷似李云龁勉公加意南塘为西宗得公诸作於北山甚奇之或问北山潜夫诸作如何北山曰不患不好只患忒好公归自桂林迂道见南塘於三山读公南岳藁称赏不已自此遂为文字交水心评公诗曰当是建大将旗鼓者西山知公尤至端平初貽书庙堂曰当今词人惟赵某刘某谓南塘也乙未梦奠于京门人诸贤俱在独以遗表属公果山得公杂咏二百首手之不置曰一章虽十字皆史断也辨章师相尤奇公之文每得公所作必令吏録之自西山诸老既没独岿然为大宗工四方大纪述皆归後村氏铭叙先世勲德以不得公文为耻公尝笑曰吾卖文以资老者也公见地既高而学有定力穷达得丧是非毁誉寄之歌咏一付嬉笑梅花数联以诗得谤也而略不以为悔巴陵一疏以言获譴也而不自以为高前後四立朝共不盈五考非无蚍蜉之撼含沙之射而未尝恨其人既有邱明子夏之疾黑白如故往来交际饮笑自如每曰某亲某友年皆後我木已拱矣老我於今皆剩底岁月自营窳室乃徐先辈故居结庐其间佳客过从时与同宿有以青囊术见者岂无异议但笑以视之非达乎公吏事素长自领邑建阳最声已着为麾为节剖决如神处事件件有方略在番司臬狱案千纸一览尽得其要而行之以恕息庵汤公尝语余甚叹服之安晚亦曰潜夫真材吏为文名所胜故人不尽知之虽中间与晚少忤而追思痛悼时见吟篇暮年状其行事几万余言每语人曰安晚实知我公尝以成集属余序之诸作皆高律诗尤精絶李唐诸子所不及至於骈语虽祖半山曲阜而隐显融化键奥沉表制之外诸启尤妙自成一家他人或相仿倣神气索矣甲子以来又为浑深简到之语尝语余曰吾四六又一变公有前後续新四集已行於世其在新集者半出於目眚之後口诵成篇子侄笔受熔煅诸书字字严密无一篇不可垂训非徒诗也其於当世交游先後辈皆名流杰士姓字班班见集中不可悉数余屡摭於是去公所居差近每一篇成即以见寄时有商榷以余为知言疾革既默诸子问以遗奏属仆如何公瞠目颌之奏上君相嗟惜赠银青光禄大夫与致仕遗表恩泽将谋请谥诸孤俾余状其事欲上之太史碑铭墓表则属之东涧汤公阳岩洪公择斋徐公皆平生密友亦遗命也谨状

竹溪鬳斋十一藁续集卷二十三

卷二十四

钦定四库全书

竹溪鬳斋十一藁续集卷二十四

宋 林希逸 撰

行状

工部侍郎宝章阁待制林公行状

曾祖干不仕祖采赠修职郎父麟赠朝请郎母余氏赠恭人继李氏赠恭人

景定三年正月上以虹节下周尊黄耆汉事三老之诏除公宝章阁待制仍旧祠同命者三人皆耆年不可致特旌异之也公於是时先上章告老矣命未至而公卒闻者皆曰公宾於时十载今政瑟改调四方名胜收拾褒显殆尽典刑遗老虽远不忘使公少留君相之意岂如是而已惜哉公讳彬之字元质姓林氏先世名三山石井国初徙莆自游洋迁郡城左则中兴後也少与王黼轩方铁庵齐名中兴百年言词赋者以莆为首而公尤表表其间端平乙未以词赋第二人擢第时西山真先生典举深用称赏以为得人分教惠阳南方士子翕然宗之再调福建常平干官争盐新议上帅漕数千言慷慨条析痛言其害至有黄巾必扰於山孙恩必扰於海之语闻者凜然议随寝甲辰谒选校文别所除书库官迁武学谕通判福州兼西外丞时安晚郑公当国知公为西山许予甚乡之戊申以国簿召九月为明禋举册官十月除监察御史闽人曰是能与诸司争盐议者必为真御史也上以老成重用公公亦感激知遇不以沽激要虚名誓殚忠爱以报首疏论天命人才民心其言关国大体次言括田之害曰利之一字自古为人主心术之蠹决择不可不明取舍不可不审开阡之利惑孝公而害秦盐铁之利蛊武帝而害汉德宗以裴延龄为度支宪宗以皇甫鏖主财计而害唐此明鉴也今世理财固为急着然兴利於利源既竭之後立法於法意已尽之余非集衆思参公论不可今以一枢臣主之彼生长富贵之家翼以要功黷货私人臣恐利未兴而害滋大时短史之势方张公独不顾上嘉纳之又言皇佑五年仁宗春秋四十四太常博士张述请立皇嗣已有社稷未有所托之言今陛下春秋过於仁宗皇佑时决大议立大本容可缓耶又言弥远用郑损弃关而基蜀汉之祸嵩之招北兵入城而兆樊襄之变以数百年生聚之地沦为鬼魅化为榛莽陛下岂可忘襄蜀沦覆之恨而不加念乎两淮百姓家室流离延息沙洲逃死不暇主兵之臣但曰我步彼骑难与争锋列竈连营畏敌如虎而以闭门自守为上策於是数千里萧条数十城孤立运米江浙以饷粮坐之兵竭财大农以守不耕之野徒曰敌哨虽来空无所得粮尽自去可以苟安岂不中其减水困鱼之计陛下犹徒恃清野而不改图乎人皆以为至论已酉春又言雷雪大作寒如深冬积潦重阴弥月不已此非小变也臣以天意观之必有召怨於民者盖和籴变为敷籴民已不堪而州县有籴发运有籴总所有籴帅有籴分头应办烦扰百出此科抑之召怨一也大农告匮通财无策乃行征之政或随户掇盐或增税取羨有丝粟之利则官攘之有升斗

之贏則官征之此?法之召怨二也近親之田不問權門之田不問乃以民戶世守之業指為官物以耕種不可施之地勒令輸租抑米於茫茫之水指廩於空空之屋議臣曰區畫已定圖籍可成橫奪虛張為欺為暴此括田之召怨三也民怨釋則天意回矣四月朔日食公又言扶陽抑陰三事首日今日未嘗不用君子而君子之勢未固未嘗不去小人而小人之根尚蟠王曾張知白雖在朝而丁謂方圖覆出呂大防范純仁雖共政而揚畏挾詐方深恐妖鬼孽狐乘昏嗥嘯奸謀逆計必累陽明此天之所以示變也其意指山相云庚戌遷左司諫中冬有雷公又言易之洊雷震為長子主器之義象亦曰守宗廟以為祭主乃者一陽方復內卦為震而有雷聲之異天其以此警陛下為國本計乎昔范鎮嘗告仁祖曰陛下許臣三年矣乞行前奏今臣分察之初首陳皇嗣當建聖度如天曲賜容納今且兩年資善雖建益國雖封而錫名之典尚爾悠悠宜臣不能已於言也上曰朕志已定公退而自喜曰宗社之福也竟不以語人辛亥九月將有事明堂時有密荐淳佑權臣者公力以扶道凝定力為請其言曰自景佑慶曆至於至和嘉佑有以朋黨之論撼君子者有以好名之說排正論者女童習書以誣介弼內侍密疏以讒修襄賴仁祖堅定不搖一竦既去遂不復來而文富歐韓始終任遇所以四十余年如一日也元佑之事則有可悔者矣陛下臨御以來寶紹權臣嘗以私意壞吾之紀綱端平更化始從而培植之淳佑柄臣又以私意盜吾之權寵甲辰更化始從而董正之今邪徑欲絕而不能限來者之多戶庭欲峻而不能勝求者之巧某遷某職不曰當遷而疑以媚竈計行某入某闕不曰合入而謂其通神力勝名都藩府如券取價穹官好爵惟意所欲富貴之柄人主所操也而使嗜進亡耻之人可以博取几於倒持矣公道之脉定力不足扶之乃有泯滅彝常慚負戴履之人朶頤羊鼎伺隙以投竊步翳行布置愈密臣恐邪揚之弄奸京桧之貽禍復見於今日讀疏未畢上曰嵩之斷不復用公又退而喜曰宗社之福也定國本扼權奸當時以二事為大樞紐聖意要終不可搖公於此有功多矣壬子除殿中侍御史心思目前擅利病民莫甚於京尹而無敢言者遂以第一義力攻之其言曰今之戶部先朝三司使也陳恕定茶法則以中等為可行不探利以病民也張方平論鹽法則以再?為不可欲弛禁以惠民也今醢醬薪炭斡取不遺田野市朝怨怒日積攘漕司酒課而京畿之漕莫能支斡倖牙契而天下之倖不可為括鹽之法密則處處有場?酤之禁苛則在在有庫甚至旁侵禮部之權下行司農之事禁嚴之地分置私人九重意向內庭動息無不知者長此安窮其言甚切疏入令家人束裝俟命上俾訥齋程公諭公程公辭曰臣嘗與之同台知其必以死諍尹既除紹興都人莫不稱快而疏猶未出公又入奏即以台牒趣之上疑非旧典遂有今後不許用台牒之命預參徐公乃援端平生逐袁韶之例以告上意始解卒行其言乃以余天任攝事公因講次又言天任非才密以裕齋馬公為荐上首肯再三俄而余晦尹京以私意仇諸生激怒右庠之士上下紛紛公率同列以奏曰小司成蔡抗既去諸學官亦求去三學士人又卷堂而去陛下何惜一晦而使紛紜至此如士心何如國體何晦遂罷未几吳子明除大理丞公言子明本一庸人以恩澤補右選既換文資守郡未及考又除朝職班列之臣耻與吟伍上遣中臣宣諭以元奏付還公又言陳舜封以科第進及為大理評事太宗聞其父為伶人以宰相不能澄汰流品改授殿直此陛下家法何愛於子明宣諭至再曰當從卿請勿使趨班俟假及期却令丐外可易元奏以進公曰臣積忱未至無以感動聖心臣之罪也疏如可易是自亏臣職自辱台綱必孤陛下所以用臣之意臣不敢奉詔公既屢忤旨自分必斥十月除工部侍郎公徑出闕上累遣中人諭公公求去益力上又命右司李公諭旨勉留公始就職內引力陳知足知止之請玉音曰從班無人卿未可去同修撰國史實錄兼權侍左侍郎為殿庠詳定官及晦入蜀公又直言宣諭使非其人公

素与时相谢渎山议论不合晦谢所主也至是愈落落矣遂力丐外以集撰知婺州婺人迎境上公径归五上免牒提举太平兴国宫乙卯除知宁国府公又辞左相讷斋以书勉公一出丙辰六月至郡蠲旱租减酒课严府第私酤折强宗干仆事有毫缕便民切切行之以吴衍疏罢领事凡五月不私支一孔一缣邦人服其清俭次年复职予祠今丞相还朝益加器重而公以老无意於世矣郊禋奏补吏以正郎权从必隔郊特与奏行人知传相所以眷公者公谦厚人也平居与人言惟恐毫末伤其意至居言责独有孜孜当世之心在台五年奏疏传落人间不少虽不以直求誉而多言人所难言其详有囿山家集姑摭其关系之大者着之又如迎逢献羡时习方酣公乃以孝宗惩进献邀赏之臣令户部刷上供旧欠独行按劾为奏且曰希进之宠滥及盗臣括利之名累及人主而使四方受横征之害於国何利哉新寺之役衆诤莫回公乃以韩魏公谏大悲殿蔡端明谏开宝?为奏且曰边境多虞国力已困何不留此费积此财以为练兵遣间缮甲治械之用是又因进故事而言者人或未之知也公赋性纯慤事继母李恭人以孝称自少至老日不废书甘於清贫先庐仅数丈晚聚所得禄赐仅葺数椽故居有囿山楼因以自号岁晚食祠廩者三独处萧然不过苍头数辈飧不重味身无鲜衣所趣极枯淡尝曰吾之始生外祖梦有高轩入其门左右呼曰林侍郎吾止矣得闲自喜易箠夷然公与臞轩同生於甲辰以文字相好臞轩之文英囿山之文粹笔力异而臭味同白头如一日臞轩试玉堂而公始第囿山登台省而臞轩没公之没後臞轩十四年实辛酉十二月二十六日享年七十有八积阶朝散大夫赠中大夫其纶言有曰殿作前赋脍炙一时?中弹文芬芳千载持橐方隆於主眷请麾力避於相嗔人曰尽公始终之美此後村刘公所草也娶方氏继叶氏先公卒并赠恭人以景定三年十二月初九日辛酉合窆城西之原子孙若干余因臞轩纳交於公既以乙未同进相与三十年每见握手吐肺肝知公心事为甚悉闻公之逝哭之数日述公言行以传信来者余之愿也辞虽不工字字皆实录後村之密友即许为铭杰也欲藉此以请余固於公有不慙之悲又幸公有不朽之记矣

湖南提举官讲太史礼部李公行状

曾祖德晖从事郎南恩州阳江令祖永年赠承事郎父宗之奉议郎通判邵武军赠中大夫

公讳丑父字良翁先世会稽人唐天宝末与隐君秦系俱避地温陵徙居於莆六世祖思也丞相正献陈公於度支郎建州守事状言之度支讳德昭阳江於度支为弟政和名进士世守诗书至邵武以文名其乡未第时授徒城北执经者岁数百人诸史百家口答疑问人曰伯可书厨也公幼而颖悟读书迎刃解出语辄惊人既授室独寝夜诵达旦母赵令人每劝止之犹篝灯坐帐内学成以文游诸公间後村刘公臞轩王公铁庵方公甚奇其才年四十一始拔乡解明年擢第端平初改纪典举异常时西山真公平斋洪公两实斋蒋公王公实妙一世之选同院皆名人无轻许予西山得公词赋击节称赏参详意一徐公得公第二场喜曰为国得人于时名重一榜铁庵语人曰伯可昔以论名良翁不忝矣调邵武户曹家食五载始至捐俸复廨舍太守嘉其意助成之漕使项公寅孙雅知名檄致幕下公屡辞不许宪康公植仓赵公纶争荐之建守王公实斋座主也俾子弟就师焉项移兼帅与公偕来丁令人忧服除久未谒选後村铁庵皆以书趣之京尹节斋赵公初以筦库辟既见曰是不足为良翁浼改辟节制司准遣安晚郑丞相与语喜甚曰某於莆得潜夫实之德润今又得兄可谓缘熟除刑工架阁庚戌省

试检点官选太学正沂王府教授安晚意乡公为门下诸客所忌公又时以所闻忠告相虽喜而诸客不乐以台疏罢添差干办淮浙发运司分职京口今平章时制两淮以学问深醇文采钜丽荐考举应格改宣教郎添差通判福州公尝摄郡广文士闻其来皆喜綉使康公多以奇书难义诘寮案独公应答如流遂以贰车领学事声誉?然再倅建安摄府事一毫无所私继守庸斋赵公以学问切磋相得欢甚秩满除太学博士归谒诸莖夷犹十阅月割以学官不可久虚趣行丁巳冬抵京迁诸王宫教授先是囿山林公在台丁方营进以公彘同乡同年屡求转嘱公应且憎丁以为憾既当轴已落落不合公以其怪繆百出议论多讥之千峰陈公忤丁去国无敢饯者公独留江浒越宿丁客沈翥诵公私闾?策曰吾当北面公闻而笑曰吾文岂愿此曹称佳丁与翥愈忿俾言者劾去既归曰吾师渊明矣买草堂西隙地即亭山也因以自号景定庚申善类一泰予祠崇禧随以大府丞召道中迁秘书郎校文公闾竣事去国添差淮东制参应李公异待之满岁除着作佐郎景献府教府癸亥春迁着作郎权礼部郎官适大璫董宋臣差讲所承受公与同寮力拒之命遂寝九月以班对公曰吾两登朝皆不及玉阶而去今不尽言是自负也斋戒沐浴草两疏首言苛征戚畹黷货听言四事且曰本末备体统该纲纪张政事举此尧舜禹汤文武植立中国盛际陛下承帝王正统当以中原盛际为法四弊不除将为世运升降之会辞不逼切而关涉大忧虑深知言者是之次言竞侈二习曰游士竞边功借补竞求摄添教正教竞於郡土着游学竞於京天下之官冗矣而吏铨大小使臣诸阉都副钤辖斗量车载皆竞之效也娼优后饰輿阜玉食浆酒藿肉饗夫如董贤之双珠被晶盘里妇有秦虢之贵风俗颓弊浙中为甚过於朱某告先朝时皆侈之积也二习不去长此安穷穆陵嘉纳之甲子春请外提举湖南常平义仓常时户絶之争产多没入公务存继之曰毋使其家有若敖之馁决嫠妇久讼不以势夺条社仓旧规虚额必足桂阳豪民龚某乘敌祸屠王媪家八口冤欣久遏公巡历立决之人以为神明属西全宝庆两守贪虐怙势胁制诸台公谋劾之机泄为所挤乙丑以台疏去公笑指其足曰是间有鬼吾归休矣庙堂怜其非罪畀崇禧祠咸淳丁卯五月某日以疾卒享年七十四积阶至朝散大夫四以进书邸讲转郊恩元士命下不及见矣公温良和易胷次洒然与人无新故一语必用情见者皆曰德人德人少游竹隐傅公之门傅李云龢自出也诗文四六各有法度公颇似之每味南丰诸作曰吾所由入者其文温润含蓄削去穠华其诗清婉而有味俚语极清新所居与後村为隣赓酬无虚日晚岁传藁尤富後村素以文字官期之初擢第意未厌僦一室西湖修宏博之业寒暑不解衣未几曰可以应令矣戊戌中程乔孔山重於取放格不下交游曰良翁不由此科不为两制乎及在东淮後村为词臣奏公自代既归仪曹人曰笔生华矣岂料文章竟不得力遂为刘宾客乎家素清贫虽稍沾禄赐仅仅自给而析其半为义廩与弟侄共之闻者以为难歿之日自处夷然後村往候之举手为别而暝有文若干卷未编次藏于家初娶林氏先公卒三十年赠恭人继室以其娣封恭人先後皆贤善居室公赖以自佚终身守书卷家之有无不问也子二人长济孙登壬戌第迪功郎主六安簿次勤孙迪功郎安丰尉孙一人将以遗泽奏女四人乡贡进士方之巽林公晋何应采太学待省进士吴澧其壻也将以其年十有一月二十五日葬炉峰之阳仙溪东其孤嘱余状其事曰後村翁许为铭矣余於公为同升相与最笃密间留溪上共榻而寝语至窗白及与余迭为表郎颇以自喜余南归公出使书问不少间乙丑余留徐潭公载酒一再又与後村同饯宿古裳三日赋诗饮酒乐甚岂知四十年笔砚之交竟诀於此集呜呼伤哉握笔擦泪未能详公之美姑识其本末云尔

竹溪鬳斋十一藁续集卷二十四

卷二十五

[集部,别集类,南宋建炎至德佑,竹溪鬳斋十一藁续集]

钦定四库全书

竹溪鬳斋十一藁续集卷二十五

宋 林希逸 撰

学记

太玄精语

子云作太玄以拟易昔人以为僭惟韩退之屡称之至我朝康节司马老泉却喜其书康节用其数老泉论其旨司马公为之注独东坡乃谓以艰深之辞文浅近之说此语固佳但子云之辞虽非易比然亦岂易能哉潜虚未必出於温公其辞亦可观视太玄则迥异矣太玄有古意潜虚出似後世文字今取其语之精者表而出之亦略为解释使读者易晓庶有意於古书者不以坡老一言而忽之也

中【準 中孚】阳气潜萌於黄宫信无不在乎中

在历为冬至黄宫土中也信者万物之生意犹今日花信曰春消息也阳复物将生消息皆在地中矣

次二神战於玄其陈阴阳测曰神战於玄善恶并也玄者心也神者心之用也择乎理欲之间而此心未定互有消长犹两阵之交战也

次六月阙其抔不如开明於西测曰月阙有抔贱始退也【贱一作明不如贱字佳】

开明者初三四其明在西方一鉤一弓十五之後其圆渐缺虽其明尚多其势退矣此与其进不与其止之意贱者不与也

次八黄不黄覆秋常测曰黄不黄失中德也

秋气肃杀万物覆败常数之必然也黄中也为德不中则必至覆败犹常岁之秋必肃杀万物也

周【準 复】

次二植中枢周无隅测曰植中枢立督虑也

庄子曰枢得其环中即植中枢也植立也立於中而能运故曰植中枢周环而无方隅言不可定也衣之背缝曰督督中虑思也立中於心故曰立督虑也

礪【準 礪难也屯】

次二黄不纯屈於根测曰黄不纯失中适也

黄中也立中道於此则万善由之而生为中不纯则善根屈絕矣何以适中乎

闲【準屯】

次三关无键舍金管测曰关无键盗入门也

舍注音舍今音释键鎖牡也管所以出入键者也关门而无键虽有鎖管亦开释矣言失防闲之道也

次六闲黄埃席金第测曰闲黄埃以德固也

埃古雉字城也第床箴也闲以金城藉以金箴人之自防如此喻有德以自固也

少【準谦】

次八贫不贫人莫之振测曰贫不贫何足敬也

居贫而不为贫之计是以虚为盈者人谁振贷之喻当谦而不谦者

上九密雨溟沐润於枯瀆三日射谷测曰密雨射谷谦之静也

枯瀆难润但有三日小雨则有射谷之鲋矣言谦久必益也

戾【準 乖戾也睽】

次五东南射兕西北其矢测曰东南射兕不得其首也兕在东南矢射西北事相违戾何由有功

上九仓灵之雌不同宿而离失则岁之功乖测曰仓灵之雌失作败也

仓灵木星也其配为太白金星也金木相配而不可以同二十八宿之度太白在南木星在北名曰牝牡岁则大稔金木合为白衣之会岁大水言事有相戾而吉者离丽也作为也失则为败也

干【準 干进之意升】

次三 键挈挈匪贞测曰 键挈挈干禄回也

鬼谷子有内键飞 篇挈挈急切貌以术干说欲求爵禄非正道也 键用术以 束键固之即纵横之术也 渠掩切回不正也

次七何戟解解邁测曰何戟解解不容道也

何与荷同担荷戈戟而行解解然必与物相遇言相抵触也行道之间必不见容言小人以非道而行多抵触也解解惹绊之意胡买切

次八赤舌烧城吐水于餅测曰赤舌吐水君子以解?也

以赤舌而烧城口中出火也又能吐水於餅变幻之术能为吾崇必有以解之赤舌吐水谗贼之喻柳子厚有此赋

【準 音疎义同进也大也临】

次六独 逝逝利小不利大测曰独 逝逝不可大事也

逝逝犹去去也独进而自行可以小事不可以大事言无助也

次八蚤虱之 厉测曰蚤虱之 不足赖也

疏附之小人如蚤虱然只以自取危厉而已不足赖恃也

美【準 美余也犹璧美以起度之美临】

上九车轴扞其衡相四马就括高人吐血测曰轴扞吐血终不可悔也

扞音月折也括结也车将行而轴与衡俱扞四马又有絜结车上之高入必坠而有伤至於吐血也言非道求赢余反以取祸

童【準蒙】

次七修侏侏比于朱儒测曰侏侏之修无可为也修长也侏侏长大之貌朱儒短小也年长而有童心不足有为也

上九童蒙触犀灰其首测曰童蒙触犀还自累也以小蒙而触犀牛自碎其角不量力也灰蒙碎也

增【準益】

次三木以止渐增测曰木止渐增不可盖也

木虽止而其长有渐谁得而抑遏之盖掩也进学日益之喻也

次五泽庳其容衆润攸同测曰泽庳其容谦虚大也泽在下而诸水自归之谦以得益之喻也

銳【準渐】

初一蟹之郭索後蚘黄泉测曰蟹之郭索心不一也蚘食黄泉而心一蟹多足而躁反不如之荀子劝学篇已有此喻

达【準泰】阳气枝枚条出物莫不达

自枝别者为枚自枚别者为条言阳气既达枝枚条皆生也一树之间枝为大枚为小条又小者言气自下而上大而小也

初一中冥独达迢迢不屈测曰中冥独达内晓无方也迢与洞同中心达而无窒碍也

次四小利小达大迷扁扁不救测曰小达大迷独晓隅方也【扁必沔切】

扁狭也见小而失大不能自救其失也所独者止隅一方所以小也

次八迷目达腹测曰迷目达腹外惑其内也

次二曰迷腹达目言内惑而外察也此曰迷目达腹言内明而外惑也内外俱明则善矣

交【準泰】

初一冥交於神齐不以其贞测曰冥交不贞怀非含慙也

交於神明祭祀也虽斋而其内心不正非事神明之道心既怀非则内慙矣

次五交於鸛猩不获其荣测曰交於鸛猩鸟兽同方也鸛鸛猩猩虽能言非人类也言交於非人只以自辱也

次六大圈閼閼小圈交之我有灵穀与尔穀之测曰大小之交待贤焕光也

圈求晚切豢养之所也以我大养之地而交其小养者即颐卦大烹养贤之意大养犹大畜也以我之灵穀与尔共食之言与贤者共天禄也穀合作肴肴美食也

次七交於鸟鼠贵其资黍测曰交於鸟鼠徒费也所养非类徒费无益也与鸛猩同意

?【準与软同柔弱之义需】

次五黄菌不诞俟于庆云测曰黄菌不诞俟述偶也述一作?古仇字也音?匹耦也黄菌灵芝也芝待庆云而後生需其类也

僖【準需】

次六僖福贞贞测曰僖福贞贞正可服也

次七僖祸介介凶人之邮测曰僖祸介介与祸期也介介邪僻之貌僖福僖祸即积善积恶余殃余庆之意

次四咄其角直其足维以僖谷测曰咄角直足不伎刺也

伎与伎同音至刺郎达切刺狼戾也咄角不触初也直足行以正也以此待禄必可得也穀禄也

次八不祸福僖天活我测曰祸不祸非厥訖也

无取祸之尤而不幸得祸少待其定天必活我訖与尤同即虽在縲紲而非其罪之意

上九僖厖厖天扑之顙测曰僖厖之扑终不可治也厖者病人仰而向天顙额也言恶人为天所弃何所仰望亦徒僖也

从【準随】

初一日幽嫔之月冥随之基测曰日嫔月随臣应基也日於幽隐之时而求其妇月於冥晦之时而随从之言合朔之始也基始也言君臣相得於隐微之中即遇主於巷之意

次四鸣从不臧

鸣从巧言以求合也虽得其从终不善也

次七拂其恶从其淑雄黄食肉

言去恶从善犹药用雄黄可去恶肉而生新肉也拂除也

进【準晋】

初一冥进否作退母测曰冥进否邪作退也

夫道而进其终必否则今日之进所以生异日之退也故曰退母

次七进非其以听咎窒耳测曰进非其以毁滋章也进不以正为世所毁其过咎满耳之听即荣华不满眼殃咎塞两仪之意

释【準散也震】

次五和释之脂四国之夷测曰和释之脂民说无疆也脂泽也以中和而布散其德泽天下自然夷平

次六震於廷丧其和贞测曰震於廷和正俱亡也廷喻内也用威不於外而於内则一家之和正俱失之矣

格【準非大壮】

次五胶漆释弓不射角木离测曰胶漆释信不结也胶漆既开释则角不可用矣何者弓之角与木已离不合矣言人心无所固结岂能用以御难

次六息金消石往小来奕测曰息金消石美日大也息生也金生而石消善长而恶消也所去者小所来者奕奕矣言迁善改过则其德日盛也

夷【準伤也大壮】

次三柔婴儿於号三日不嗷测曰婴儿於号中心和也号胡刀切嗷所嫁切声变也婴儿之啼其气和柔虽三日之久而声不变也此用老子之意言人能和平其心则无所伤也

次四夷其牙或饫之徒测曰夷其牙食不足嘉也饫之徒犹曰饮食之人也贪於食而至夷平

其牙所食虽多亦不足贵言不义而富贵非吾徒也

乐【準 音落豫】

次三不宴不雅 呱哑咋号咷倚户测曰不宴不雅礼乐废也

古吊切哑音厄咋音责?音孤皆不乐之声也雅雅乐也不宴饮不用正乐但 呱哑咋以度日至於死亡而号咷者倚户矣即今者不乐逝者其亡之意

次七人嘻鬼嘻天要之期测曰人嘻鬼嘻称乐毕也嘻叹也小人虐衆以自乐人鬼共嗟怨之得祸必速矣要约也约少其期言不久也

上九极乐之几不移日而悲则哭泣之?资测曰极乐之几信可悔也

乐至於极哀之几也其至不易日矣?资与嗟咨同即乐极则哀来之意

争【準 讼】

初一争不争隐冥测曰争不争道之素也

隐冥无形之中也以不争而善胜默运於无形之中此天道也素即太素也

次二吓河臞测曰吓河之臞何可 也

吓呼驾切 与怙同以口拒人曰吓诗云伊予来吓人不量力如何方溃而以口吓之徒自臞瘠何可恃也

次八狼盈口矢在其後测曰狼盈口不顾害也

天文弧矢星在狼星後狼之噬物方盈其口而人在後射之即螳螂捕蝉黄雀在後之意言不知後祸也

上九两虎相牙知掣者全测曰两虎相牙知所制也相牙相噬也掣尺制切即卞庄子刺虎之说两虎相鬪既弊则人皆取之矣掣即制之意

务【準 事也蛊】

次五蜘蛛之务不如蚕之綸测曰蜘蛛之务无益人也綸音须衫帛也或作榆音遥榆翟之服也言蜘蛛虽巧不如蚕可以为衣为服也

上九务成自败雨成自坠测曰务成自败非厥命也事功既成不能自守必至於败如云既成雨则自然坠落也此非天命自取之也

事【準蛊】

次二事在枢不咨不 丧其哲符测曰不咨不 其知亡也

与谏同枢事之始也图事之始不谋於人自夺其鉴也哲符此心至灵至明之喻也

次四男女事不代之字测曰男女事非厥务也

以男子而为女子之事女之字育亦可代乎言人各有职业非所事而事皆失常也

次七丈人扶孤竖子提壶测曰丈人扶孤小子知方也丈人老者也老者扶其孤而小子为之提壶尊卑之分宜然也

更【準变也革】

次二时七时九轸转其道测曰时七时九不失当也七阳盛九阳极极则必衰宜知通变如轮轸之转则得其道矣即通变无弊法之意

次三化白於泥淄测曰化白於泥变不明也

淄黑也黑泥可以化白乎言不知变而变则失其道矣

次五童牛角马不今不古测曰童牛角马变天常也牛有角而童之马无角而欲角之此古今所无之事逆天理而求异非所当变而变也

断【準夬】

初一断心灭斧冥其?矩测曰断心灭斧内自治也断决於心而不见其用断之迹曰灭斧冥者隐而不可见也?矩法则也法度在心不见於外也

次六决不决尔仇不阔乃後有钺测曰决不决辜及身也

仇敌在近初不濶远当断不断必有斧钺之事在後來也

次七庚断甲我心孔硕乃心有铎测曰庚断甲义断仁也

庚义也甲仁也以义断恩也硕大也我心所见者大其後乃有铄美也

上九斧刃蛾蛾利匠人之贞测曰蛾蛾之斧利征乱也蛾蛾衆多之貌匠人用此以制木此用兵制敌之喻也

毅【準夬】

上九豨毅其牙发以张弧测曰豨毅其牙人所猎也【人一作吏非】

毅其牙者勇用其牙欲以噬人人必张弧矢以取之发起也小人用势正以起兵而自祸也

装【準旅】阳气虽大用事微陰据下装而欲去

立夏气应阳虽大用事而一陰已生据於在下阳则束装将去矣

次二 鵲慘於冰翼彼南风内怀其乘测曰 鵲之慘怀忧无决也

音哥又音加鴈也慘冰怕寒也翼飞也向南而飞去寒就温鴈所宜也今怀爱其乘匹而未决去喻人之当退而不退也乘时证切

次五鸿装於溜饮食颐颐测曰鸿装於溜大将得志也溜水名也鴈自北来宿於水滨得其所也颐颐自得之貌

衆【準师】

次七旌旗絰罗干戈蛾蛾师孕唁之哭且?测曰旌旗絰罗大恨民也

絰户挂切唁音咳?莫佳切絰罗惹绊也蛾蛾衆多散乱之貌师败孕妇相吊唁也?窃视之貌言百姓皆恨其上也

亲【準比】

次三螟蛉不属蜾蠃取之不迺悔测曰螟蛉不属失其体也

不属无类也不迺悔不御侮也言亲非其亲缓急不相为也迺侮犹迎敌也

次六厚厚君子秉斗测曰厚厚君子得人无疆也厚厚亲其所亲也斗居中央而中星环之君子得衆之喻也

歛【準小畜】

次二墨歛載載寢我匪貞測曰墨歛載載非其以先也墨貪也載載取之盡錙銖也匪貞不正也言取民載悉則我之政道寢失矣

次六閔而綿而作大元而小人不戒測曰閔綿之戒不識微也

閔忧也綿微也元首也其忧虽小忧之大者自此而始言當慮微也

睪【準乾】

初一睪於內清无穉

言初心之純也无穉不杂也

次二冥駁冒睪 於中測曰冥駁冒睪中自?也冥冥昧之中駁杂以萌則其粹美皆冒沒矣与惡同漸也?於計切隱昧也

次五睪於幽黃元貞无方測曰睪於幽黃正地則也幽冥也黃中也其睪在心也元貞大正也无方不可定名也即是黃裳元吉之义

次七睪辰愆君子補愆測曰睪辰愆善補過也

辰時也人誰無過當過之時能以睪易愆則善矣

盛【準大有】

初一盛不墨失冥德測曰盛不墨中不自克也

時雖盛而不以法則自守則失中心之德墨法也冥心也

次五何福滿肩提禍禪禪測曰何福提禍小人之道也何与荷同禪音纏又音丹衆多之意滿肩言不自勝也提取也言小人受福不能自勝必自取禍

次七乘火寒泉至測曰乘火泉至禍不遠也

火方炎而水忽至必能滅之盛極必衰之喻也乘盛也

次八挹於滿莢几後之頃測曰挹於滿几危也

挹损也熒炎也既盈滿之時宜自挹损而反以炎炽自矜乃後日傾危之地也几兆也測曰几危者謂此乃傾危之几也

居【準家人】

次二家无壺婦承之姑或洗之塗測曰家无壺无以相承也

洗蘇典切壺尊酒器也婦之事姑无盛酒之器乃行酒於地上非礼也洗猶書曰洗腆致用酒也塗泥塗也即在地之意

次四见豕在堂狗系之迹測曰见豕在堂其体不庆也迹音剛兽迹也堂尊处也既有豕在則狗亦相繼而至也系迹猶接迹也此自辱以招辱之喻

次八反其几双其杔其家不旨測曰反几双杔家用不臧也

几以家食今反之七只用一今二之其家必不美矣言所用失道也杔与枇同旨美也此立家不用礼法之喻

上九株在蘖其种不絕測曰株在蘖其类乃长也木斩而复生曰蘖枯株再生蘖則其种不絕矣書曰若颠木之有由蘖是也此既废而复兴絕而复续之喻

法【準井】

初一造法不法測曰造法不法不足用也

造作也作法而不應法何可用也

次五繻陆陆餅寘腹井潢洋终不得食測曰餅寘腹非学方也

繻音橘汲索也陆陆索下之貌寘音田餅腹先填满也潢音黄潢洋犹汪洋也索虽下井水虽多餅既满何以得水非虚心以求益也

次六於纪於纲示以贞光測曰於纪於纲大统用也纲纪既定而示以正大光明之道則治统得矣竹溪鬳斋十一藁续集卷二十五

卷二十六

钦定四库全书

竹溪鬳斋十一藁续集卷二十六

宋 林希逸 撰

学记

太玄精语

应【準离】

初一六干罗如五枝离如测曰六干罗如附离君也干木也六干而只五枝不能辅其本矣罗列也离踈也此君不得臣之喻

次二上历施之下律和之非则否测曰上施下和匪其真也

历施於上以观星辰之行律和於下以求地气之应律历必更相治也非则否者违此则不可用也匪其真也言不得正法也只曰上施下和不曰非则否省文也

次三一从一横天网??测曰一从一横经纬陈也?音郎又郎宕切广大貌网有经纬而後成故曰一从一横此法令全备而濶疎之喻天网犹天则也自然之法也

次六炽承於天冰萌於地测曰承天萌地阳始退也阳长之极上至於天而陰已萌於地下矣言阳进极而陰生也炽阳也承接也

迎【準咸】

次二蛟潜於渊陵卵化之人或陰言百姓和之测曰蛟潜之化中精诚也

蛟潜於水产卵在陵下复於渊以气感之自然剖化此言发於隐而虽遂必应之喻陰隐也言以诚感人也

次六玄黄相迎其意感感测曰玄黄相迎以类应也玄黄天地也天上地下而时乎相迎以意自相感也与咸卦同

竈【準鼎】陰虽沃而洒之阳犹热而觶之

陰陽俱盛此洒而彼和猶相息也

次五鼎大可觴不齋不庄測曰鼎大可觴飧無意也觴當作 音商大亨以養聖賢亦必以禮行之今鼎雖大可以觴食而不以齋庄臨之則士不歸之矣飧無意者言其無心於飧禮也

次六五味醯調如美如大人之飧測曰味醯之飧宰輔事也

五味既和而調之又美宜大人亨之言大臣能和其職則天子亦樂之也

次七脂牛正肪不濯釜而烹則欧 之疾至測曰脂牛欧 不潔志也

脂牛肥牛也肪亦脂也正肪者割之正也烹之之釜苟不精潔則人將吐之矣言養士必以禮也欧鳥后切 哀都切欧 吐逆之聲也

大【準丰】陰虛其內陽蓬其外物與盤盖

蓬蓬然盛也盤結也陰在內陽在外而盤結覆盖之言外盛而內虛也

次六大失小多失少測曰大失小禍由微也

凡事之大皆因小而失之凡物之多皆因少而失之此由微至著之意也

次七大奢迂自削以觚或益之餽

奢侈也迂遠也方大而侈遠之法能以法自律則其所養愈厚矣觚法也削自損約也餽食也

次八丰牆峭址三歲不筑崩測曰丰牆之峭崩不迟也牆雖丰大而削去其址三歲之久不能更筑則崩壞矣言自削其根本也

廓【準大也丰】

次二金干玉楨廓於城測曰金干玉楨蕃輔正也版筑之旁曰干其題曰楨題額也筑城之具其堅固如金玉則其城可以高大矣此人君得輔佐之喻

次三廓无子室石妇測曰廓无子焉得後生也

石妇无所产也其家虽大而无继承之子以其室人乃石妇也此辅佐不择人而無益於國之喻

文【準渙】

初一袷 何縵玉贞测曰袷 何縵文在内也

袷乞洽切 与绘同音会何与荷同縵莫旦切袷衿也以 为衿而乃被荷无文之縵自晦之意也衣锦尚絺是也縵无文曰縵

次七雉之不禄而鸡荇谷测曰雉之不禄难幽养也荇进也雉不得谷而以谷养鸡言失所养也

礼【準履】

次四孔鴈之仪利用登於阶测曰孔鴈之仪可法则也孔孔雀也其羽毛有文鴈飞有行列喻人之有仪也登阶可进而仕也即鸿渐於陆其羽可用为仪之意

次六鱼鳞差之乃秩施之帝用登於天测曰鱼鳞差之贵贱位也

差次也鱼鳞有次序制礼制法秩然有次而施之於国可以格天矣故曰帝用登於天

逃【準遯】

次六多田不萎费我腓功测曰多田不萎费力亡功也萎音楼腓户佳反田虽多而不楼理之徒费腓食之功也熟食曰腓

唐【準遯】

次三唐素不贞亡彼珑玲测曰亡彼珑玲非尔所也珑玲玉也荒唐朴素而不守以正自丧其德以玉比德故曰珑玲

次五奔鹿怀麋得不訾测曰奔鹿怀麋奚足功也鹿失不顾而以麋鼠为怀所得者不足以为訾矣訾与资同言弃大而见小也

次八唐收禄社鬼辍哭或得其沐测曰唐收禄复亡也唐遯之後而能收其禄谓废而复兴也社稷有主则其鬼不哭矣沐泽也言得其福也

次七弋彼三飞明明於征终日不归

一弋岂能中三飞鸟平明而去至暮不归无所得也此求不以道之喻

常【準恒】陰以知臣陽以知辟君臣之道萬世不易

陰陽君臣之道也

初一戴神墨履靈式以一耦萬終不稷測曰戴神墨體一形也

神墨妙法也靈式善法也以一耦萬執一而萬事畢也稷曰下稷也稷與昃同終不稷者言用不窮也

次七得七而九懦撓其剛不克常測曰得七而九棄盛乘衰也

七陽之盛九陽極而衰也以柔亂而自撓其剛則不能守其常矣言處盛不自強則必衰也

次八常疾不疾咎成不詰測曰常疾不自能治也常疾而不以為疾言病而不治也詰問也有病而不治其禍既成何所歸咎此安其危利其菑之意

度【準節】陰氣日躁陽氣日舍躁躁舍舍各得其度

舍音舍躁動也舍止也陰氣動而陽氣止各得其所也

次三小度差差大賴之階測曰小度之差大度傾也賴音賴毀裂也差失也小法差失乃大法毀裂之階也此不謹小而失大之喻

次五干不干賴於營測曰干不干不能有寧也

干本也所本非本則其經營者皆毀裂之矣賴毀裂也

次六大度檢檢於天示象垂其范測曰大度檢檢垂象貞也

檢檢猶整整也范法也天垂象而聖人法之其為大法整整然可以垂後此云漢猶天子法度之意

次七不度規之鬼即訾之測曰不度規之明察笑也規圍也訾笑也所為不以法度則鬼笑之矣訾音子

次八石赤不奪節士之必測曰石赤不奪可與有要也石赤丹砂也丹砂之色不可變移猶人之守節而可必信也有要有約也有節之人必不負所約也

永【準同人】

次四子序不序先宾永失主测曰子序不序非永方也为子而不得子之道言不知小大之序则宾主先後之义皆失之矣此非可久之道也

昆【準 音混同人】

次二白墨菲菲三禽一角同尾测曰三禽一角无害心也

白墨菲菲羣而不乱也譬如三禽以一为之首而余皆尾之尾随其後也故曰一角同尾言人之羣聚必有所长则不乱故其心无得而相害也

次三昆於白失不黑无际一尾三角测曰昆白不黑不相亲也

昆同也白不同黑而自为分别无交际之道羣聚而无为之首此一民二君之意角者衆而尾者少宜其不相亲也

次五谷不谷失疏数衆厘毀玉测曰谷失疏数奚足旬也

谷与穀同为车穀而失疏数之度不足为衆幅之所容言为主不得其道也衆厘毀玉犹积羽沉舟也立心不均则毀言日至贤者无所容矣旬均也厘毛也

次六昆於市井文车同轨测曰昆於市井同一伦也井市人所居也昆而同之则天下皆同文同轨矣一伦者一其伦类也

减【準损】

次六幽阐积不减不施石测曰幽阐不施泽不平也幽微也阐大也无大无小皆自积聚而不能减损以施人其顽如石不知称物平施之道也

噤【準 音钦又否 音琴】

次五不中不督腐蠹之嗇测曰不中不督其噤非也督衣缝之中也不中不督言不知中道也积而不能散虽腐蠹之物亦吝嗇之此噤闭之道也

守【準否】

次六车案轲圭璧尘测曰车案轲不接隣也

轲碍车轮之木也案止也车为轲所止圭与璧皆积於尘埃之中此闭吝而不与人交际者之喻

次八曰无杵其碓举天陰不已白日毀暑测曰曰无杵其守贫也

有曰而无杵不舂米也其碓举而不下无所碓也天陰不雨泽不下流也白日宜热而陰晦之故曰毀此贫不得时者之喻

翕【準巽】

次三食翕嘍嘍测曰食翕嘍嘍利如舞也

嘍楚快切翕食贪食也嘍嘍贪食之貌也小人多贪见利如舞无所不至矣

次六黄心鸿翼翕於天测曰黄心鸿翼利得辅也黄心得中也鸿翼大翼也翕於天者合於天也得大中之道而合於天贤者之喻也

次七翕繳惻惻测曰翕繳惻惻被离害也

繳音灼以繳取鸟人见之惻惻然而见利者不顾他日必自离害也

次八?其罍絕其罍殆测曰?罍絕罍危得遂也?与挥同罍古县反罍覆车也罍网也小人以罍罍害物一旦挥絕而去之则虽危而可以自免矣此为恶而知悔者之喻遂安也

聚【準萃】

初一鬼神以无灵测曰鬼神无灵形不见也

鬼神之灵以不可见也

次三宗其高年羣鬼之門测曰宗其高年鬼待敬也宗尊也高年之人能尊敬之则其心可以事鬼神矣

次五鼎血之 九宗之好乃後有孚测曰鼎血之 信王命也

与爇同鼎欲荐血而薪爇之熟之也既祀而享其九宗以诚意相好乃有後也以王命而从事者其心亦如此诚信可也

积【準大畜】

次七魁而顔而玉帛班而决欲收寇测曰魁而顔而盜之招也

魁大也顏露也班布也自夸大自炫露而玉帛班布而示之人斷可以致寇也收者致之意

飾【準賁】陰白陽黑分行其職出入有飾

白黑相錯所以為文飾也分行其職各致其用也即剛來文柔柔來文剛之意

初一言不言不以言測曰言不言默而信也

次五下言如水實以天牡測曰下言之水能自沖也天牡海也从諫如流如水下而歸海也實者盛之意也沖謙也

次八蜺?喁喁血出其口測曰蜺?喁喁口自傷也蜺與蝟同喁喁鳴聲不已也血出其口自傷也多言不誠無以取信徒自苦耳

上九白舌于于屈于根

白舌者徒費舌而言之也于于屈貌根舌根也言不思信不如屈其舌根而勿言

疑【準賁】

次五 黃疑金中測曰 黃疑中邪奪正也

音雄雄黃石也以其色而疑為金在其中紫亂朱之意也

次七鬼魂疑貞厲嚶鳴弋木之鳥射穴之狐反目耳厲測曰鬼魂之疑誠不可信也

以鬼魂自疑惑乃有嚶鳴之嘆既以為鳥而弋之又以為狐而射之鳥黑狐赤至易見也而亦不能別之反其目而以耳為信危矣哉

視【準觀】陰成魄陽成妣物之形貌咸可視

陰如月既蝕成魄而陽為妃偶言秋分陰陽均平也

次七視其瑕無穉測曰視其瑕能自矯也

視其瑕知其過也人能知過則行無疵矣穉疵也飾矯也

沈【準下視觀也】

次三沈於美失贞矢测曰沈於美作聋盲也

贞矢正直之道也为纷华之美所沈迷则失其道矣

次五雕鹰高翔沈其腹好 恶粥测曰雕鹰高翔在腐粮也

雕鹰鸷鸟也沈其腹飞虽高志在实腹而已自好生孕而乃恶他物之生育言其喜杀也 古孕字粥与育同沈实也

次七离如萎如赤肉?梟厉测曰离萎赤肉食不臧也以离萎之明而食如?梟但食生肉危道也赤肉生肉也此贪不择禄者之喻

内【準归妹】

初一谨於嚶?初贞後宁测曰谨於嚶?治女贞也嚶古妃字?古?字匹偶也娶必择贤初得其正则家终安也

去【準无妄】

去彼枯园舍下灵渊

枯园自高之喻灵渊善渊也自处之卑也此好谦自下之喻枯园燥地也

次四去於子父去於臣主测曰去於子父非所望也父尊子卑主尊臣卑今子居父上臣过於主皆逆也去之则顺矣去逆从顺以其逆道非所欲也望欲之之意

次五撻其衣之庭有麋测曰撻衣有麋亦可惧也撻音愆牵也庭有荆棘牵衣而行则麋鹿生之矣言有国有家不自修饬则必至荒乱也

次七去其德贞三死不令测曰去其德贞终死丑也失其正德者必死於不善非令终也三死犹离骚言九死也即多多之意

次八月高弦火几县不可以动动有愆测曰月弦火县恐见咎也

月至高弦则蚀将尽矣大火几於流则暑将往而寒生矣皆时之喻下弦则一鉤之明在魄之上故曰高几近也近於县则将西入也时去则不可有为也

晦【準明夷】

次三陰行阳从利作不凶测曰陰行阳从事大外也陰先阳後於理为逆然世间亦有小者卑者先之而大者尊者应之之时既相从顺亦可有为不至於凶也大者不在内而反外言异常也

次四晦其类失金匱测曰晦其类法度废也

金匱良法也君子小人之类不明则国之良法必废矣

次七?提明或遵之行测曰?提明德将遵行也?古霄字世方昏暗我揭明德以示之人必有从我者凡人夜中提灯照路则行人必有遵之者矣

瞢【準明夷】陰征南阳征北物失明贞莫不瞢瞢

瞢古梦字又莫登反陰往南而阳往北失其位矣非相见於离之日矣小人用事则世皆失其明正之道矣物人物也

次二明腹睽天覩其根测曰明腹睽天中独烂也睽失冉切视也以腹中之明而能窥见天理则可以穷究根抵矣烂明也

穷【準困】陰气塞宇阳亡其所万物穷遽

塞宇满天内也遽窘也穷窘无所归向也

次五?无羴其腹坎坎不失其范测曰?无羴犹不失也

坎坎空虚也贫而不失其法犹曰不改其度也范法也

上九破壁毁圭旧竈生鼃天祸以他测曰破壁毁圭逢不幸也

破壁毁圭失其所宝也旧竈生鼃贫之食也祸以他非自取也此贤者不逢时之喻

割【準剥】

次七紫蜺齋云朋围日其疾可割测曰紫蜺齋云不知刊也

紫蜺妖气也齋云日旁刺日之气也齋余律切朋聚而围日此太阳之病也可以割而去之谗邪障蔽可以扫去也刊削也可去而不去是不知刊也

次八割其蠹得我心疾测曰割其蠹国所便也

蠹国之人我心所疾恶割而去之则得我心矣便利也去此人为国之利也

止【準艮】

次七车累其 马改其蹄止贞测曰车累马改行可輒也

音雉又音驰轮也改良涉切有所经也累有所系也车累马改不可行之时宜止则止也輒敝也考工记不輒於凿亦作輒宜止而行则敝也輒作邻改或作猎皆误也

坚【準艮】

次三坚不凌或泄其中测曰坚不凌不能待齐也凌水也当水坚之时而不成凌者其中陰为阳所泄也齐中也外能坚守而中不自持此色厉而内荏者之喻

次四小蠡营营蟠其翊翊不介以坚蝶测曰小蠡营营固其居也

与蜂同蟠与蒂同蜂房之蒂也翊青许又音弋蜂房也蜂营营而为房必坚其蒂不坚则房坠矣蒂只在坚而不在大故曰不介以坚介大也

次五翊大蟠小虚测曰翊大蟠小国虚空也

翊蜂房也蟠房之蒂也房大而蒂小不足以系之则蜂必散乱而蜂窠虚矣为国而不知其本必失其民以此喻之

次六戴蟠纱纱县於九州测曰戴蟠之县民以康也纱纱微小貌音幽九州之民各戴其君心有所系如蜂房之蒂小而甚坚则可以康安矣戴与纆同县系也

成【準既济】

次二成微改改未成而殆测曰成微改改不能自遂也为善方成而心已改改不待成而知其危矣

次三成跃以缩成飞不遂测曰成跃以缩成德壮也事之既成可以跃进又缩之可以飞上而不飞随之言能谨畏退托以守其成则德愈壮也遂随也

?【準?与窒同噬嗑闭门也】

上九陰阳启 其变赤白测曰陰阳启 极则反也启青启 古化字启 开通讹化也陰变而赤阳变而白极则反也

失【準大过】

次七疾则药巫则酌测曰疾药巫酌祸可转也

酌祭以酒也此言灾咎可禳也为改过之喻

次八雌鸣於辰牝角鱼木测曰雌鸣於辰厥正反也雌鸣辰旦反常也牝而求角缘木而求鱼皆反正之喻

剧【準大过】陰穷大泣於阳无介□离之剧

□与俦同介助也陰既穷大而阳自啼泣为无助也阳陰之离至此剧甚矣介□即无介助党类也

次五出野见虚有虎牧猪撻袴与襦测曰出野见虚无所措足也

野外荒虚虎牧其猪出而遇此不过撻裳而走撻与牵同襦短衣也牧逐也

上九海水羣飞弊於天杭

杭即航也海水羣飞狼方勇也弊坏也天杭即大舟也

驯【準坤】

次四狗其劳不如五之豪测曰狗其劳伐善也

五中也苟伐其功劳则不如五之得中为过人也豪过人者也

次五灵囊大包其德珍黄测曰灵囊大包不敢自盛也灵善也囊有涵蓄也大包可以包容而大受也此为珍美黄中之德以其不自大也

次六囊失括泄珍器测曰囊失括臣口溢也

有囊而不括则其珍美之器皆泄露矣此伐善矜能者之喻

竹溪虜斋十一藁续集卷二十六

卷二十七

[集部,别集类,南宋建炎至德佑,竹溪鬳斋十一藁续集]

钦定四库全书

竹溪鬳斋十一藁续集卷二十七

宋 林希逸 撰

学记

太玄精语

将【準未济】

次二将无疵元睟测曰将无疵易为後也

元善也睟美也将求无过则其德必善美矣谨之於初则後易为矣

次三鑪钩否利用止测曰鑪钩否化内伤也

冶人为鑪陶人为钩鑪钩既不可用则宜止矣强以化物徒自伤损也化犹考工记饬化八材之化也即工欲善事必利其器之意

次四将飞得羽以登於天测曰将飞得羽其辅强也欲飞得羽言有助也

次七蹠船跋车其害不遐测曰蹠船跋车不远害也蹠古穴切跋蒲拨切蹠踏跌之也跋难行貌车船所以行济也今自弃之害必至矣此不求助者之喻跋韵书不由蹠隧而行曰跋

上九红蚕缘於枯桑其茧不黄测曰缘於枯桑蚕功贬也

蚕之初生有毛既老故曰红枯桑无所食也不黄不中用也此不能自养者之喻红者以老无毛而但红也

难【準乃旦切蹇】

次四卵破石?测曰卵破之?小人难也

徒玩切以卵破石则其坏不生也必矣卵不孚曰杨子曰雌之不才其卵矣

次七拔石力没以引测曰拔石乘时也之人切难致之意石虽难拔我能没尽其力以引致之亦可拔也此勉力济难者之喻

上九角豸终以直其有施测曰角豸终以直之也豸本作𧈧 豸之直始终如一则可以有施矣戒中变也

勤【準蹇】

次三羈角之吾其泣呱呱未得繻扶测曰羈角之吾不得命也

男角女羈孩子之饰吾者吾吾然无归也繻抱扶持也不得命者不得活也此孤弱而无归者之喻

次七劳牵不其鼻於尾弊测曰劳牵之弊其道逆也牵牛徒劳不以鼻而以尾自弊也此操持失理者之喻

养【準颐】

初一藏心於渊美厥灵根测曰藏心於渊神不外也渊深静也藏心於深静以自养其性则美矣灵根性也

次二墨养邪元函匪贞测曰墨养邪中心败也

墨与默同元始也函心中含养之地也隐默之中养其邪思则用心之始已匪正矣

次四燕食扁扁其志利用征贾测曰燕食扁扁志在赖也

扁扁即翩翩也音篇求利貌赖利也小人求利如燕之飞欲但攫食而已此贾者之事

次六次次一日三飢只牛之兆肥不利测曰次次之飢肥无身也

次与赵同音咨不安之貌只神只也祭祀之牛卜既得兆一日而三饲之肥则烹矣此以利自祸者之喻

踦赞一

冻登赤天晏入玄泉测曰冻登赤天陰作首也

晏至热也阳气深入而陰得时此小人道长之喻

羸赞二

一虚一羸蹇蹇所生测曰虚羸蹇蹇禅无已也

蹇奇数也数之有盈有虚皆自奇而生所以相禅代而无穷也夫惟不齐乃能生变化也

玄冲 【冲序也準易序卦】

闲孤而竈隣

差过也而常谷 【谷善也差过也人能知过则常归於善矣】

僖也出翁也序

格好也是而疑恶也非 【格去羣陰则所好者是也疑而未定则所恶或非也】 玄错
【错杂也準易杂卦】

进欲迂止欲鹜

从也牵守也固

玄攤 【○音离张也攤莹捩图準系辞】

故玄聘取天下之合而连之者也 【○陰阳善恶是非类皆合也】 夫玄晦其位而冥其畛深
其阜而眇其根

阜高也根深也言玄之理隐奥也

人之所好而不足者善也人之所丑而有余者恶也○ 【此二句有味谁不知好善而得善常
少谁不知恶丑而有之者常多】

夫天宙然示人神矣夫地佗然示人明矣天地奠位神明通气有一有二有三位各殊辈回行
九区终始运属上下无隅

殊辈异类也回行运行也佗负荷也汤何切

信道致拙拙道致信

存存而亡亡微微而章章始始而终终

玄莹【○明彻也】

天地开辟宇宙拓坦【开拓坦夷】天元咫尺【有躔度也】日月纪数【纪数有历纪数度也】周运历统羣伦品庶或合或离或羸或踦故曰假哉天地?函启化罔?於玄终始幽明表赞神灵大阳乘陰万物该兼周流九虚而祸福经罗【经罗随所遭也】?徒濫切?函即含容之意

鑽精倚神箝知休咎

鑽求也求其精倚其神言蓍龟也箝知推索而知之也

一一所以摹始而测也三三所以尽终而极崇也二二所以参事而要中也

自一始一曰一自一为二而二之曰二二自二而三至於九曰三三

陰阳所以抽噉也从横所以莹理也明晦所以昭事也噉情也抽理也莹事也昭君子之道也

噉与齧同抽深也

夫福乐终而祸忧始天地所贵曰福鬼神所佑曰福人道所喜曰福其所贱恶皆曰眚故恶福甚者其眚亢昼人之祸少夜人之祸多昼夜散者其祸福杂

昼明者也夜昧者也

玄数

昆仑天地而产蓍参珍【参考也珍贵也】睟精以?数【?音索义同】散幽於王重而立家旁拟两仪则覩事逢遭并合【音格】繁其名而极命焉精则经疑之事其质乎令曰假大玄假大玄孚贞爰质所疑於神於灵休则逢阳星时数辞从咎则逢陰星时数辞達凡筮有道不精不筮不疑不筮不轨不筮不以其占若不筮神灵之曜曾越卓

不以诚占与不筮同神灵虽明曜曾是不诚而可以见越卓乎越卓高远也

玄掬【妍启切】

秉圭戴璧胪凑羣辟

秉圭戴璧有爵者所执也胪传而辐凑以奉其君羣辟者天子诸侯皆有臣也

喷以牙者童其角?以翼者两其足无角无翼材以道德掎拟之九日平分

有牙可喷则其角童有翼可挥则其足二无角无翼则有性

天地作函日月固明五行该丑五岳宗山四渎长川五经括矩作函上下相函也固明永久之明也该丑该徧其丑类也宗山为山之宗也长川为川之长也五常之理括尽其矩法也

玄图

日月畛营陰阳沈交四时潜处五行伏行

畛营所居之躔度也沈伏也交相代也潜处密运也伏行有迟留伏逆也

七宿軫转【軫转轮转也】驯幽历微六甲内驯九九实有律吕孔幽历数匿纪图象玄形赞载成功

七宿四方各七宿也軫运也二十八宿运转於上循历幽微之间六十甲子寓焉九九之数有焉九九者黄钟而下有此数也九九则为律吕六甲为历数孔幽者甚妙也匿隐也历纪隐然在中也玄形浑仪也赞载称述也

始哉中𡗗从百□权輿乃讯感天【讯与迅同速也】雷推□【雷声也推出也□字书无疑作□徒感切】輿【合作与】物旁震【音震珍响】寅赞柔微拔根於元东动青龙光离於渊【东阳生离渊出也】摧吐万物【摧古催通上合作吐】天地輿新【輿合作与】

中哉更睟廓象天重明霏风炫焕【浑明也】与物时行陰酋西北【酋就也】阳尚东南内虽有应外觝【触也】亢贞龙干於天长类无疆南征不利遇崩光【丧明也】

终哉减沈成天根还向【陰阳之本元气也】成气收精閱入庶物【物皆閱见而入歛】咸首𪔐鸣【气感之初物皆不鸣

咸感首初也𪔐古艰字】深合黄纯地【地道】广含羣生泰柄【斗也】云行时监地营

随时监视随方营度斗运有时有方也斗斜指而可论四时斗高运而可吞四方

衰谟高吸乃驯神灵【循天之神道也】旁该终【该徧曰时也】天地人功咸酋贞【就正也】

玄攤莹掎图告皆拟易系辞也始中终九卦於玄图言之拟易系履谦井等九卦也始哉中𡗗

从一首生九首中至 九首美至溪九首从至事九首以历言之则自冬至至谷雨是其时也中哉更睟廓亦一首生九首更至疆九首睟至大九首廓至昆九首以历言之则是清明至立秋是其时也终哉减沈成亦一首生九首减至视九首沈至坚九首成至养九首以历言之则是处暑至大雪是其时也以二十四气分而三以八十一首亦分而三子始哉二十七首中哉二十七首终哉二十七首以其时参其词则始之拔根於元东动青龙中之陰酋西北阳尚东南终之天根还向成气收精其义易通矣辞虽奥澁得其义则迎刃可解坡仙所谓浅近者是也

天甸其道【甸治也井甸之意有伦序也】地柅其绪【柅音侈有条理也】陰阳杂厕有男有女天道成规地道成矩【天圆地方】生阳莫如子生陰莫如午西北则子美尽矣东南则午美极矣子阳也午陰也西北乾十月也阳方尽而後生东南巽四月陰方尽而後生

五以下作息【生也】五以上作消数多者见贵而实索数少者见贱而实饶息与消乱贵与贱交

此论九赞之中五以下四三二一也五以上六七八九也

昼夜相丞【丞与承同】夫妇系也终始相生父子继也日月合离君臣义也【月助日也以比君臣也合离行度也】孟季有序长幼际也两间相闔朋友会也一昼一夜然後作一日一陰一阳然後生万物昼数多夜数少象月而闔日溢君行光而臣行灭君子道全小人道缺

月有小闔也与亏同日有余溢也灭暗也君阳臣陰也

玄有一规一矩一?一準以从横天地之道驯陰阳之数

玄告【準说卦】

天穹隆而周乎下地旁薄而向乎上人茝茝【音泯】而处乎中天浑而?故其运不已【?与挥同】地隤而静故其生不迟人驯乎天地故其施行不穷天地相对日月相别【别居御切伤也日月相食也】山川相流轻重相浮【浮过也】陰阳相续尊卑不相黜是故地坎【陷也】而天严【穹尊也】月遯而日湛【沉迟也】五行迭王四时不俱壮【有时衰也】日以昱乎昼月以昱乎夜【昱由鞠切日明也】昴则登於冬【日短星?】火则登於夏南北定位东西通气万物错杂【兩也】乎其中玄一德而作五生一刑而作五尅【生者为德尅者为刑即五行也】五生不相殄五尅不相逆【以尅为用】不相殄乃能相继也不相逆乃能相治相继则父子之道也相治则君臣之宝也

玄日斗书而月不书常满以御虚也【日满月虚即日可知月也】岁寧悉【多也】而年病【减也】十九年七閏天之偿也【建欠敝也】阳动叱陰静翕【吐出也翕入也】阳道常饶【多也】陰道常乏【少也】陰阳之道也天强健而侨矜【高之貌侨渠消切又与矫通

躒音据】一昼一夜自复而有余圣人察乎朏朧侧匿之变

晦见於西谓之朏朔见於东谓之朧侧匿失正行也四者皆日月之变

而律乎日月雌雄之序【干为雄支为雌】经之於无已也故玄鸿纶天元屡而拊之於将来者乎【屡发明不一也拊巨淹切拊摘而发明之】故玄之辞也沉以穷乎下浮以际乎上曲而端【正当也】散而聚美也不尽於味【其味之美无尽也】大也不尽其彙【其类之大亦无穷也】

自玄冲而下以其文奇摘而録之造语用字可以为法潜虚方之大有迳庭矣

潜虚

太元起九数潜虚起五数自是天地间不可泯者先师尝云易则正穴此支龙也辞之有古今又不可不精别之潜虚非无佳语但只是後世文字太元则犹有古意况潜虚设谕大抵皆前人书文中已有者张炳文以为果温公所作此亦不必深辨只以文论不必问何人前後本有缺有全续添者为伪文公言之尽矣初本已有肤浅无深味者况续增者乎今以其语之工者与退之所谓正而未至者摘而録之未知世之具眼者以为何如也

元

元始也夜半日之始也朔月之始也冬至岁之始也好学智之始也

此数语佳

慎於举趾差则千里机正其矢

谨矢意也荀子尚书已有此意

裒

裒聚也气聚而物宗族聚而家圣贤聚而国

此数语比象其词甚佳

三百毒之聚胜者为主惟物之蛊

胜者毒之甚者也衆毒之中必推其甚者以为主喻小人之党其主者必桀黠其为世害必矣蛊败也

五兔丝之焚附草絕根

焚多也附之草岂能生喻所附匪人必不久也

六人倮而繁兽猛而殫

倮无爪牙也兽虽猛而必尽人有道则愈蕃

柔

四蜚石之落抗之以幕

强弩不穿鲁縞即是此意喻柔可制刚也

六蒲梁柳穀倾橈脱辐

梁败则橈倾穀败则辐脱以弱力胜重任无不败者

刚

三目瞋耳塞拔木触石一跌而踣蝼蚁之食

言恃力者必败下八字胜上八字太露太刚则折即此意

雍【○和也】

六盐梅不适羹弃不食

相与以和则事可济调羹而咸酸不适人谁食之

昧

昧晦也日之晦昼夜以成月之晦弦望以生君子之晦与时偕行

此三句比象也颇有昧

初取足於已不知外美

被褐怀玉即是此意其词虽佳以比易爻则露

四冥行失足或导之烛

暗弱之人能得所辅则可自安

五无相之瞽闾户而处

不明而无助能退而自守则可免祸

上偶人守金衆益攸侵

愚暗而处高位必为人所夺也

昭【○明也】

三察穷秋毫物骇而逃

太察无徒即是此意其不古者皆此类

立循墙不蹶秉烛而跌

知畏者可自保恃明者必罹害

容【○貌也】

上樛木之垂甘匏之累

用樛木诗意其浅露者类此

言

二人不我知馈金而疑

此乃未信而谏人必见疑之意

虑【○思也】

三澄原正本执天之键

下一句佳然执神之机乃韩语也澄原正本四字弱甚

五万虑之神出天入尘

模仿子云玄中之语不谓之蹈袭不可

聆【○间】

二苦言刺耳惟身之利

言苦口者利於行亦前人语

覲【○见也】

初粉泽之晖覆弃埋机昧者不知明者识微

晖华也外虽粉泽中藏机弃明者则知之发得太露不似爻辞

憊【○怒也】

初匪怒之道必理之求拔刃难收

道劲也言怒之来必以理察既发则不可悔矣下四字佳

二自怒自解人之不畏

八字尤弱意亦浅露

三快心一朝忘其宗祧失不可招鰥之浮乌鸢之求招悔也一朝之忿忘其身即此意下八字设喻却佳

六忍之少时福祿无期

触来勿与竞事过心清凉即此意也语亦太露

四豨腹鬻鬻为人益膏

小人贪得终不自亨此八字甚佳

湛【○乐也】

三醉饱之惜歌舞之纷突火将焚盗倚其门

以贵为乐不能为曲突徙薪之虑祸将至矣

四酒食衎衎威仪反反?墨不远

用抑诗意下四字却佳

六家有韶濩外忘其慕

金朱乐也外顔氏乐也内即此意也

【○进也】

四兔跳而局鸟蜚而伏弧张肘缩

兔先局而後跳鸟先伏而後飞欲张弧者必缩其肘能退而能进也三句俱佳

六弩马之疲 马之追轂羽强蜚坠於藩篱

不量力以求进必至自敝下八字差弱

上日没而征力惫而登遇淖逢兵

不知时而贪进必遇祸也淖用左传晋事

却【○退也】

初一叶於蜚木陰未稀我心伤悲

一片花飞减却春即此意也

一纳履而顾心留迹去

纳履将行也顾者欲留也伪为退而心实恋恋此二句佳

三唾面不辱叱嗟不缩或挤诸谷

忍辱无耻不知自退受祸必矣

四云蜚於江舟藏於浦雷出於山车税於宇

见云藏舟闻雷止车知几知退也

六膳珍不御致鼎而去勿须其饫

饫饱也致食而去不求自饱此不恋荣华自知早退者之喻

上龙登於云垂尾之卷下人式瞻

龙在云中而卷其尾相去也则人望而羡之人能知退则世皆贵之矣

庸【○常也】

六井污而久虫羃其口

井久不洁则飞虫覆其上如羃然也

蠢【○动也】

五凿冻树稷劳而无得

冻地岂宜种徒劳动而无功即耕石田之意

六树谷於雨拔草於暑

言及时也此八字佳然亦易得

訢【○仁也】

二养虺纵蝗匪仁之方

蝗虺当去而养之纵之不知仁者也

忱【○信也】

四父子乖离吐心而疑祸不在羣

父子至亲才有离间虽吐心亦疑之况他人乎上八字佳下四字可去

六小信之必大谊之失君子不由

信不近义非信也尾生之信则失谊矣

憂【○礼也】

四掣牛之狂服亩遵塲

牛虽狂苟能掣之可使服田此以礼制心之喻

六斐如煌如纪如纲如四海王如

下五如字模仿易之突如其来也然亦不甚佳

昵【○亲也】

三竹枯不拔虺死不蹶

百足之虫死而不僵曹子建已用之言人必亲亲也

四曰条亡栢存或斧之根

诗云枝叶未有害本实先拔此云条已亡其栢仅存又斧其根意却稍异然亦蹈袭为之

六割臂断足易之金玉其肌不属

此为弃亲即他人之喻庄子隋珠弹雀臂重於天下亦此意

续【○子也】

三蚕子满腹不如螺贏之不育

有子不才不如无也

考【○父也】

五囊金篋玉不畀之烛盗守其屋

徒遗以富贵而不教之他人有覬觎之意矣

徒【○衆也】

初出门择术跬步之失之晋而粤

千里失於跬步即是此意有衆而不能用必失之矣

丑【○友也】

四总角繆綢胶而漆投半涂分?注矢操矛

为交不终耳余是也

上一首三尾先完後毀惟初之罪

始交而终睽择之不早也此三句佳

隶【○臣也】

地不天不能以生月不日不能以光臣不君不能以君此比彖辞言人必有所主也

三一身三首蜂蚁所丑

忠臣不事二主刘牢之犯此戒矣八字极工

四登丘而俛置剝而远百禄简简

登丘而俛居高能自卑也置剝而远虽相亲而不?以合也

六顔戴其劳口扬其高挟恩以骄或傳之刀

顔戴其劳有矜色也口扬其高自夸功也或傳之刀必见杀也挟恩以骄四字太露可省而不省

林【○君也】

三人无主不能共处

盗贼之人亦必有为首者此八字甚佳

禋【○祀也】

五莖栗之角瓦登匏爵上帝是亨

礼虽薄能尽其忱帝亦歆之

準【○法也】

初董荼之萌雉则不荣燎火荧荧沃不尽瓶

恶之初生除之必早能薙能沃则恶草必去燎火必灭矣此小惩大戒之意不尽瓶者不用多也

二瞽夫执銚兰艾同剗上罔下毕兽骇而突

不善用法则善恶无别矣上罔下毕法太密也此四句佳

声【○名也】

三蔽叶之蜩其鸣晓晓蜚鸟之招

虚名自矜必自祸也三句佳

兴【○起也】

三澣垢缝裂搯欹补缺

此兴滞补弊之意二句佳然亦易得

五荧出於灰可以焚莱

小能致大不可忽也

六困 而憩望远而唏【 倦也音剧唏讶几切】

力小任重欲罢不能嗟何及矣

泯【○灭也】

初蜩鸣於林?衣絮衾

大寒索裘与此异矣

隆【○盛也】

五暑至陰生寒极阳萌君子畏盈小人怙成

此四句俱露弱亦甚矣

六盛不忘衰安不忘危一日万几

此三句尤弱且皆前书语子云不尔也诸变如此者颇多可以类推

余【○终也】

余终也天过其度日之余也朔不满气月之余也日不复次岁之余也功德垂後圣贤之余也故天地无余则不能变化矣圣贤无余则光泽不远矣

此数句有味

斋【○中也】

衆星拱极万矢凑的必不可易

上八字佳下四字弱元余斋无变只有此数语

六十四卦或因象而名或因义而名六爻六位各有意义故千变万化而不穷太玄九赞与方州部家初无干涉其间犹有因历而以时言者潜虚体性本於立行之生成每行七变初上者始终也於占不用二三四五六则以生剋王相别之然每行之名不过一字以一字取义故其意浅而易穷其辞又多窃取前人譬喻之语有工有拙非惟不及易亦不及太玄矣然五自是一数亦有可观後今世而有子云别为之辞使稍有古意庶几可行於时亦不待借温公之名以求信於人也

五五行除元余齐无变之外五十二行每行七变共三百六十四变有七变皆有词者有七变皆无辞者有一行一变者二变者三四变者总而计之共一百七十六今所摘録者六十七而已

竹溪齋十一藁续集卷二十七

卷二十八

钦定四库全书

竹溪鬳斋十一藁续集卷二十八

宋 林希逸 撰

学记

江淮河济此六书所谓谐声造字者也广雅曰江贡也春秋说题辞曰河之为言荷也淮者均其势也济齐也齐渡也如此分说意义岂非自为胶扰乎且水之名多矣如泾渭伊洛其类非一若欲字字求义谓之不牵强吾不信也

汉地理志东莱有地名曰计斤师古曰即左传所谓介根也语音有轻重故成二名设非地名或者欲为训诂则从其轻者乎从其重者乎地名既随声轻重而字亦异同其他名字安知不随声而有异同者注解欲强通之可乎

韩文公张中丞传後序末後述张司业之言结以三字曰张籍云此用礼记老聃云之法然前既有张籍曰三字而此又曰张籍云不知者必以为衍语知此则所谓古文须省字者决不然矣

溪西先生曰?书有四叠华书无四叠今鹿字部中有若 者有若麤者三鹿而一土非四叠乎溪西字学最精恨不得抠衣而请之姑记此以俟精学者

韩文顔子不贰过论曰故惟圣人无过故所谓过者故顔子之过此类也三故字中间一故字势不顺必误也瓜华之祭前人多用之佛塔庙僧家不知所本乃以瓜字为误曰合作瓜谓以瓜画某物而为供此缪说也瓜即今之瓜华果蓏也即是蔬祭尔二字出於郊特牲乃蜡祭所用之物

太史公伯夷传者尾转换笔力最高文字最妙自夫学者载籍而下且辨许由之事及卞随务光而曰孔子序列吴太伯伯夷又引夫子伯夷叔齐之言而後及作传之意既传其始末及其所作之歌乃曰然邪非邪此应前面怨是用希之语也或曰天道无亲发论而起又以顔子盗跖并言之至天道是耶非耶乃结天道无亲之语也道不同不相为谋至其重若彼其轻若此哉则是断世情之轻重以足前论又引疾没世而名不称一句盖言身前得丧为轻身後毁誉为重也再举贾生之言正在烈士殉名一句贪夫等语牵联而及亦以见世俗好恶轻重不同如此此下同明同类从龙从虎圣人万物五句又是援古书之言谓惟贤则知贤有孔子则知夷齐顔子亦得孔子而後有後世之名此又并结前段顔子之语也岩穴而下方是叹惜今世无人虽有贤者谁能知之其伤已之意则默寓其间矣间巷立名必附青云之士言今人欲立

名於後非得高世者记之不可此则子长自谓着书立言可以传後恐世无夫子未必能传也索隱於圣人作万物觀处即以为自言着书之意则文脉扞格失其本旨亦无以见其笔势之妙文字最要看转换处此篇自夫学者至其传曰上一转也至然耶非耶一转也自或曰至天道是耶非耶一转也自子曰道不同至其轻若此哉一转也此数行分别重轻正是归结在名上却未及名字却举君子疾没世而名不称又贾子烈士殉名之语足之而彼重此轻之意则隱然在贪夫夸者等语之内此一转也欲言名字之传须有知我者却举相照相求以下数句而後指夷齐顏子得夫子之实此一转也其曰岩穴无附而名不闻闾巷必有附而显此只正反两语却如此曲折言之最是天道是非而下三四转皆藏鋒不露顯此为子长絕高处欧阳公喜读此传其亦有取於此耶

韩退之祖席诗二首送王津自虢州司马徙袁州刺史也诗後有手札语云两诗好处好就中何处佳何处恶不知此手札问之谁也

韩诗多作生语硬韵岂当时之士既以应科选烂熟软靡千人一律故特为此以别之乎

有人欲和靖为伊川作行状和靖曰自不须得又欲为伊川请謚和靖亦曰不必如此又有曰伊川文集讲解近皆刊行亦可喜和靖曰正不要得如此和靖此见极高岂亦预忧庆元道学伪学之所由起乎

和靖曰事当为者岂可不为废事便是废人道乃引庄子匿而不可不为者事也和靖之语自正庄子意又别杨子安学禪问伊川易从何处起伊川以扇柄画地一下曰从这里起子安无语後来语和靖曰悔当时不问此画从甚处起和靖以告伊川伊川曰待他问时与个默然此伊川就子安禪学而戲之也杨公如此伎俩如何伊川面前出手得和靖却看未破

王恽期字子真不见富韩而公丐茶炷香以待伊川且曰正叔欲来信息甚大嵩山董五经亦谓伊川曰先生欲来信息甚大祁寬以为至诚前知和靖但守伊川之语曰静则自明又举伊川之语曰释氏庵内坐见庵外事亦是此类此语当矣但伊川见董五经则以为隱者王恽期学仙至洛居於刘壽臣家园亭中未尝来谒伊川伊川何为先往见之伊川岂轻下人者惜当时祁居之不以此质之和靖也【尹语錄】

和靖语錄所载伊川远行尝憩古寺闻鼠啮於佛腹中起而视之於佛腹窍中得文字一小卷取而读之乃丹方也过目悉了其意遂錄本却以元纸纳窍中後因郊居如其法锻之本法火养四十九日乃成锻近三十日遇夜四远皆以遗火为问云如见火发如此数四恐惊衆遂取出试以粟粒许置银盂中凡丹到处皆成黄金崇寧间此盂尚在其金如线圜转数匝皆丹着处也和靖尝以问伊川伊川曰此外丹也若人内丹成服之可长年点化五金不足道也和靖曰何不服伊川曰这般肚皮里便着得此物晚年许传一道士而伊川卒又曰伊川尝云此丹可夺五百年造化以其近怪不以告人然则伊川之所以不服者亦以无内丹而不可服也然刘向得之淮南枕中而炼不成伊川一炼即成乃以点化五金为余事岂其所得之方有至与未至欤抑此法只许自炼而不许言之於人也惜和靖当时不问至此和靖曰介甫未尝废春

秋废春秋以为断烂朝报皆後來无忌憚者托介甫之言也和靖又谓韩玉汝之子宗文字求仁尝上王介甫书请六经之旨介甫皆荅之独於春秋曰此经比它经尤难盖三传皆不足信也故有介甫大段识好恶之语且曰介甫亦有易解其辞甚简疑处即缺文後來有印行者名曰易传非介甫之书和靖去介甫未远其言如此甚公今人皆以断烂朝报之语为荆公之罪亦冤甚矣然亦荆公有以招之所以君子恶居下流孟子之论桀与和靖之论荆公正同此意和靖尝以易传之序体用一源显微无间为太泄露天机请问於伊川伊川曰如此分明说破人犹不解愚因此语深知和靖质实之意使和靖而在今日见字义语录编类诸书又不知如何其叹息也虽然天机正亦何曾漏泄得

东臯冯圣先尝学於伊川其子名忠恕尝问於和靖曰其父晚年不信陰阳拘忌之说更不择日亦无避忌恐是伊川家风和靖曰不须立异人之所畏不得不畏从俗何害看此等语便见和靖质实不自异处【语錄上卷】和靖曰欧公文章一时宗师只为不见道故有憾於晁文元又曰作小词语不择为人所慕赋题通变使民不倦为人所讥此皆程门之论又曰伊川不言人短每见人论前辈则曰汝辈且取他长处此语甚有益於後学亦有论伊川於吕荣阳者吕曰何不谈他好处意与此同

和靖曰孟子论仲子曰以其小者信其大者奚可哉此极本之言若以其小者信其大者只是啓诈伪之端和靖此语极有关系今人正有此弊【语类下卷】

和靖每早晨拜经书二拜曰道之所在也今庸愚人见释氏书则知敬儒者却以枕或置之坐侧或袒跣以读皆不知畏此即侮圣人之言者也此语极佳

邹阳下狱以书免江文通亦然寇荣延熹之书其情尤可怜其辞亦甚工竟以此不得免岂非遇不遇乎况荣为寇恂曾孙亦在八议之科桓帝独不动念何耶荣贵盛於人少与兄子又尚公主始又为帝亲户门太盛为人所忌害之者非一荣死而寇氏遂衰非邹江寒士之此其所以死者或在此耶然此以天理论桓帝之不明亦可叹也已

蛊卦正义释注令治後來诛曰诛者谓兼通责让之罪非专为诛杀也诛亦训求如左传诛屨於寺人费是也此则为责义

说苑庄辛谓襄成君曰昔越人之歌曰山有木兮木有枝心悦君兮君不知与杨子春木之苞礼记狸首之斑然皆兴诗也【说苑见魏文帝善哉行注】

车在鱼韵又在麻韵增韵云韦昭曰古无居音自汉以来始有居音然何彼穠矣以华韵车为協韵又曰华古读为敷正与居为韵後皆仿此则是古有居音而韦昭之说乃尔何耶况睽卦先张之弧後说之弧见豕负涂载鬼一车此非居韵乎

艾轩道桐庐有诗示成季云此是滩头处士家我从何日离天涯木绵高长云成絮瞿麦平铺雪作花其曰此者言我自广东被召而来今忽到桐庐矣木绵则离广时所见瞿麦则今所见

也盖有感叹行李跋涉之意初与处士无预其曰处士家但谓桐庐县也

丁卯正月一日始郊诏书头联曰虞典之类于帝率惟正月上日之初周郊之单厥心只若昊天成命之始或疑有帝字又有天字余因拟曰易言履位上天下泽以定民书美重华正月上日而肆类庶见天地俱全又稍浑成

茶山有新如月出初三夜清似茶烹第一泉之句实本於山谷清於夷则初秋律美似芙蓉八月花茶山语又好此山谷谢张仲谋示新诗篇在编年集第四卷柳河东之言有害於理者吏商一则尤甚也董子曰正其义不谋其利明其道不计其功若以利心而为廉岂有识者所为哉况诚明明诚之论尤为失当利进而害退又曰明而诚者乎末言孟子缓而孔子急果何所据云尔学术不正莫甚於斯是岂可以为训

范文公祭尹师鲁文云为学之初时文方丽子师何人独有古意衆莫子知子特弗移是非乃定英俊乃随圣朝之文与唐等夷繫子之功多士所推而欧公师鲁却不及此意何也

尚书尧典正义曰释训云鬼之为言归也乡饮酒义云春之为言蠢也然则释训之例有以声相近而求其义者厘治工官皆以声近为训他皆仿此类例也

大岁三百六十六日小岁三百五十五日则一岁所余无十日此尧典正义之文大岁小岁字前人未有用者诗家用字汉拔用赤帟荆公作汉旗红伯成子高押作伯成高本集七言廿一卷

三代忠质文之说刘公是以为不然本杂集着中三代同道论此说甚正此论有三第二论同此意杂着中说多偏文字亦有佳处

天官笱人朝事之笱𩺰鮓注云𩺰者牒生鱼为𩺰也鮓者於?室中糗乾之出於江淮鮓者析乾之出於东海正义曰经文鮓𩺰二者鱼在於中明二物皆鱼与云土梦玄纁缟文同史记天官书曰论其书传故其占验凌杂米盐正义曰米盐细碎也此必古来有此语非以米盐比细碎也虽然小雅曰王事靡盬郑笺云盬固也靡盬不坚固也愚意恐不然米靡声同假借而用如事之为土也菊之为言鞠也盬与盐字相近非盐讹为盬则盬讹为盐大抵皆言细碎也诗曰王事靡盬仄声字若作盐则不可读以此求之史记盐字必误

欧公作谢希深铭其末有曰昔太史公世称其文善以多为少今予不能此语可为作铭者之法但以多为少固难以少为多尤难退之铭子厚士穷乃见节义一段与欧公薛真孺不孝有三无後为大之说此非二公笔力不可能也

陈止斋铭中有曰薛寺正见公於仙岩问其所安止斋曰毋不敬薛曰比参倚如何公始释然归心薛氏故其祭寺正之文曰我昔自喜壁立倚天见兄海潭忽若坠渊海潭即仙岩也以此观二公之学有可想见者今人师友无此问亦无此荅矣

欧公为黄梦升铭举其祭乃兄子庠之词曰子之文章电激雷震忽止闐然灭没此与次云先生所谓吾文如雨有则流溢四壑无时一点也无一等才力也

唐人失鹤诗曰西风吹失九皋禽一片闲云万里心此两句甚佳碧落有情应怅望青天无路可追寻青天碧落如何分别愚意以为若作日远对天高则当日远者言彼乍去犹未觉日稍久後当亦不忘我也初来白雪翎犹短欲去丹砂顶渐深长有不尽之意华表柱头留语後更无消息到如今华表一句却大有病若以为前日在此留语乎则与出处意不合不然则是既失之後曾来一番又去乎题中又无此意愚谓改作解作令威归语否方可言其他日更无归来否今去许时未有消息也如此语稍圆留以俟精於诗者商之

阜陵翔选德殿洪野处作记而陈止斋又有代周益公作一篇岂益公所进不用久而再命洪耶洪记中亦云不命诸贤而以命臣或是如此野处所作得内中文字体止斋一篇首尾皆要着题故先一行便云不增苑囿中间又以诗书所说射文发明欲见选德本意然阜陵既明言不专习射见羣臣閱奏看经史皆在此则引用射事似太局矣只是书生认题日常法兼末後云以尧舜授受而可以为汤武岂不曰阜陵受高庙之禅今欲习武而事为汤武之事亦是就上干归题意愚亦疑其太謏謏但就此一句评量则是尧舜不能为汤武之事汤武又优於尧舜乎已自碍理况欲体贴为工则愈差矣野处只是宏博体制却觉稍大体但中间抑唐太宗而独称宣宗武宗此又大窒碍宣宗武宗犹胜於太宗乎纵当时面对之间阜陵或有此语亦当委曲敷奏以为未当况笔入记中乎偶寻二作与儿辈言之因记於此未知作者以为如何虽前辈尊老之作不当轻议然论文要到尽处不容不如此商确退之曰古书虽正而未至者犹欲别白之况文乎

鹤山赠奕碁罗五星诗云少年不识碁但见剥剥啄啄更相围有人指授予冲关夺角劫复持少年不识星但见膈膈膊膊还如碁亦有告予者缩羸伏见元有期七年五谿读书暇时把二事相悦怡久之割然悟是间有数人不知三百六十一碁子此是乾策藏其奇万有一千五百二十星若以三十六乘之乘之既尽除坤策恰与碁数无参差此理极精密归後不复思罗生挟二长过我泸之湄恍如着我五谿上欲与之语无间时此须静观乃有得而我家住西山西生揣我何时归按此诗所引者易也乾策二百一十有六坤策百四十有四合乾坤之策为三百六十也微星之数万有一千五百二十此於张衡灵宪见之乃易所谓当万物之数者也即万有一千五百二十之数以三十六除之则为三十六者三百二十鹤山先以碁数三百六十一去其一谓之藏其奇则三百六十而已又以微星之数乘以三十六则除去一万六百为三百个六十六矣其余七百二十又以乾策二百一十六除之又以坤策百四十四除之则所存者三百六十故谓恰与碁数无参差以愚见观之不过三百六十而已谓之合当期之日亦可也既以为极精密又以为割然悟不知先生何以叹其神妙如此漫记於此更俟学於鹤山者问之

老泉上欧阳书如曰退养其心幸其道之将成可以复见於当世贤人君子又曰斯人之去而道虽成不复足以为荣又曰姑养其心使其道大有成而待之何伤又曰道既以粗成而果将有以发之也愚尝反覆诵此数语恐只须换道字作学字未知世之学者有与余同此疑否以

为己为人之训参之谓之学已不可况道乎范甯注谷梁有周书曰大荒有禱无祀杨士勋疏曰周书者先儒以为仲尼删尚书之余今据其书与尚书不类未知是与非也在襄公二十年论大侵之礼今世未见所谓周书者然则前世之书於今不及见者多矣孟子曰父子不责善所以有父不教子之说然今人看此语更须究竟到尽处方可父非其人固不足问若父有可学之善必其子知学而有请则可以告之若其识性未明未可语此而强以责之则父为失矣

歆向不同自来以其学问言之向不取左氏而歆力主之此事固然但向之用心於宗国如许而歆末年失节如此则其禀赋本自不同岂特学问之殊哉虽然学问之殊亦其禀赋之不同者为之也

庄子大宗师所言狝韦氏得之以挈天地至传说得之以相武丁十三个得字余於本章已解之矣然细思庄子之意中间言日月斗末後言西王母彭祖与传说其垂示万世更须具大眼目方看得破不特鼓舞而已若於此看得破则大藏教可束高阁矣戊辰十月十二日偶记於此

天末海门横北固烟中沙岸似西兴此荆公和平甫金山诗上句指其地下句言其似固为甚佳但李雁湖以寺影中流见钟声两岸闻为不及此联则似未然据此十字犹胜於天多剩得月地少不生尘落星寺亦在水中虽亦可用然论诗却不如此此十字实中有虚虚中有实正诗笔妙处且如湘潭云尽暮山出巴蜀雪消春水来池阳南康纵有高处可用正亦何嫌

久埋瘴雾看犹湿一取春波洗更鲜此荆公谢丁元珍送绿石砚诗久霾厚地金声尽才着新泉翠色深赵紫芝古鼎诗句絶相类岂紫芝读公诗熟不觉似之耶抑偶合也【荆诗三十五卷绿石玉当新样】

柳子厚监察使四门助教诸使兼中丞馆驿使进奏院皆就题目援古证今此世间文字常法也可谓典实体飧军堂新食堂兴州江运则就题目指实其事发明亦是正当法度独武功丞一首自邦畿甸服叙起至引用丞字如左右中丞之类则近俗而无味谓之典实则不可今之为文不得法者大率有此病末後使令丞与抗礼在当时极为切当此两行却极佳但以韩文蓝田之作观之则子厚输筹多矣由前典实诸篇则飧军堂模写燕飧之时自幢牙茸纛而下至礼成乐遍以上宛然与西都西京赋中间相似精采华艳又如馆驿前面铺叙其驿若干则有西汉西南夷传首气象此皆可以为法至其游山水诸篇则无逊於蓝田矣而又有胜焉然作文亦看题目游山水题目佳易得好若蓝田丞本无可说被退之如此簸弄真不可及却又当如此看方得若洪野处郎官题名则全依傲退之寄人篱下山谷所谓文章切忌随人後正此戒也

子厚?家洲戴氏东池一卷皆为伟笔若全义北门非特意浅其辞亦未为精美

径山无準云圆悟大慧普说示衆甚好然他人犹可得而学至如德山临济则皆学不得他是自胷中流出此语极是无準时在径山今槧山住持允善亲闻之柳子厚南岳弥陀碑般舟第

二碑两人也韩注不考以弥陀为日悟以承远为未详故弥陀一篇首末不可读不思般舟道场之名代宗所赐也名山置大德肃宗朝事也般舟台者其徒自号也般舟承远卒於贞元十八年般舟日悟卒於贞元二十年法昭因梦而见承远求於衡山肖所梦乃从而学所以曰师南岳大长老有异德传教天下法照为国师也由公之训者公即承远也国师必禅宗日悟乃律教事之不同如此注误甚矣幼曰弘愿惟孝恭者承远之门人最小者名曰弘愿能为其师乞文立石是能尽孝恭者也【承远碑铭乃吕温作英华有之韩氏何未之见】

柳集南睢阳碑犹用唐初四六体末一联云洛阳城下思乡之梦恍来麒麟阁中即图之词可继如此等语汪龙溪李云龕更有可称者不可不知也

公羊解郑伯克段於鄢曰母欲立之已杀之如勿与而已矣注曰如即不如齐人语也诗曰有周不显即显也以如为不如不显为显皆古方言如此

论古文者以省字省句为高若过秦论所谓有席卷天下包举宇内囊括四海之意并吞八荒之心其间十六字只是一意盖不如此不足以甚孝公之用意也若以并吞为心是有甚其用心犹在四海之表也今观始皇既并六国有天下遂筑长城限匈奴南取百粤非并吞八荒之心乎

乡邦俗语即方言也今人简帖或用之试取朱文公所用者録之诚斋东坡以下诸公并记於此

索性 颞颥 儻侗 糊涂

劳攘【吕子约四十八】持掇【陈同父三十六卷】麻嗒 斗海

无转智 捻合【蔡李通合】骨董【江德功书】厮炒【杨子直】厮崖【廖子晦】
四?【黄商伯书】下梢头【潘叔昌】活络【黄仁卿书】杜撰扛夯【吕子约】漩渦【
吕子约末】打并【吕子约四十八】翻腾【上】

折洗【上】排靛【上】搏量【吕子约】催儻【王子合未残上晋】郎当【黄仁卿二十九】揣模【张钦夫二十卷】钝滞【程正思五十】焦躁【黄子耕五十一】柄【万正淳五十一】捞摸【万正淳】苗脉【吴伯丰五十二】次第节拍【姜叔?】遏?【汪长孺五十二】撻掇【刘季章五十三】倒东来西【孙季和田五】白撰【项平父五十四】刮剔【上】点掇【吴宜之五十四】记当【徐居厚五十六】意寄【方宾王五十六】擎夯作弄【方宾王】腔窠【方宾王五十六】?得课程【郑子上五六】丑差【徐子融五十六】湊泊【辅汉卿五十九】千生万变【杜叔高】略绰【潘子善】
衬帖【张元德六十一】历落【张元德六一说得历落】相属【季通八五】
锥剗【刘韬仲续集第四上】间界学问【陈同父二八】卒乍白发【陈丞相二十五】盘剥【运米王漕二十六】各别【陈帅画一二十六】私瞽【庚子封事】

顏情【戊申封事】 打并【打并人闻名利心诚斋退休集】?鬻【坡诗注二十四】拉搭
【坡诗注上海市诗】惺惚【放翁诗第一卷】蓝鑱【眼藏保宁百八】懵懂【上妙喜拈
语】拉扱 懣?麤慥【大慧真赞】劈脊娄【上声大慧真赞】藟苴【大慧真赞】
搯【劈腮一搯大慧真赞押客窄字】拍盲【韵大慧真】邹搜歛【赞廉上
音大慧真】聒噪【赞】壁角落头【上】压?【上压捺朝头敌子胥白诗二十】淡泞【
二和顺之琴者白诗五十】嶢崎【二格言十六说孟】坯朴【子格言十六说王】蒿恼【
通邵康节诗五言他人蒿恼】

竹溪鬳斋十一藁续集卷二十八

卷二十九

[集部,别集类,南宋建炎至德佑,竹溪鬳斋十一藁续集]

钦定四库全书

竹溪鬳斋十一藁续集卷二十九

宋 林希逸 撰

学记

周礼六官缺其一河间献王以考工记足之考工之文自与五官不同余尝以此为造物之巧毕竟五官文字俱同一律考工之文又奇足以此书似造物有意也或者又曰轮人舆人弓人庐人匠人车人梓人此攻木之工七也筑氏冶氏鳧氏?氏段氏桃氏此攻金之工六也函人鲍人鞞人韦氏裘氏此攻皮之工五也画人绩人钟氏筐人?氏此设色之工五也玉人栲人雕人矢人磬氏此刮摩之工五也陶人旆人此搏埴之工二也以上共三十一人又五官之中天官则有掌皮司裘地官则有鼓人?人掌节卣人角人羽人掌 草春官则有典瑞典同磬师钟师鐸师巾车车仆司常夏官则有射人司甲司兵司戈盾司弓矢繕人藁人服不氏射鸟氏秋官则有职金柞氏庭氏以上共三十人则是冬官之属六十未尝亡也此说亦佳但以文论则考工自是考工周礼自是周礼

淮南原道训云道横四维而含陰阳绂宇宙而章三光山以之高渊以之深兽以之走鸟以之飞日月以之明星历以之行麟以之游凤以之翔与退之送文畅序所谓日月星辰之所以行天地之所以着鬼神之所以幽人物之所以蕃江河之所以流同意岂退之本於此乎抑退之自有所见乎先师乐轩尝於此序云恐退之只是说得亦未必尽知之也

诗有六义後世不传者兴也然太白王建独漉歌王建李益促促词促促曲韩退之水中蒲首句皆为兴体何论者前此未及之李益云促促何促促黄河九回曲嫁与棹船郎空牀将影宿不道君心不如石那教妾貌长如玉王建云促促复刺刺水中无鱼山无石少年虽嫁不将归白头犹着父母衣韩退之云青青水中蒲下有一双鱼君今上陇去我在与谁居寄语浮萍草相随我不如青青水中蒲叶短不出水妇人不下堂行子在万里李太白云独漉水中泥水浊不见月不见月尚可水深行人没越鸟从南来胡鷹亦北度我欲弯弓向天射惜其中道失归路王建云独漉漉鼠食猫肉鸟日中鹤露宿黄河水直人心曲又据史记田敬仲传云松耶柏耶信建共者客耶盖其国人以齐王建信客之言致为秦所灭而迁建於共地松耶柏耶以韵起语兴也朱文公记外祖祝公遗事中问有曰伯舅莘娶张氏其先以治狱有陰功王宣徽拱辰所传张佛子者也佛子二字入之文中今人必以为近於异端文公此言是或一例也

放翁曰俗人为俗诗佛出救不得此语最佳但何以为不俗何以为俗此须分别得子细方可

下笔今未论他人子美送王判官扶持还黔中诗云青青竹笋迎船出白白江鱼入馔来两句下得极佳但不过是用王祥姜诗妇两事若无此句法兼非船归亦未免近俗也至如珍重六州防御使起居八座太夫人气象体面则如何又如我已无家寻弟妹君今何处访庭闱此语虽似无奇特却有情味视彼用事而句不工者则大迳庭矣诗有直述句有得意句须分别得定方可七月三日苦炎蒸对食暂食还不能已愁夜中自足蝎况乃秋後转多蝇此直述句也似於质朴束带发狂欲大叫簿书何急来相仍此是杰句南望青松架远壑安得赤脚踏层冰此兴句也後四句如此则前四句但见豪壮矣文无害汉语也史记减宣传以佐史无害给事河东大将军青使买马河东见宣无害言上徵为大廐丞杜周事张汤汤数言其无害如此则无害二字乃当时解事者之称

宣为左内史其治米盐事大小皆关其手此言烦碎事也若以米盐为细则不当又言大小矣米盐事已辨在前卷

晋傅图澄传闻铃声曰洛度尝与後村读此後村曰二字何义也余曰犹今人言落泊尔後村以未有前训为疑及观蜀杨仪语费祎曰丞相亡歿际吾若举军以就魏氏宁当落度如此耶见仪本传又水心为莫子纯母虞夫人墓铭乃有叹其迟暮落度之语余始以自信铜历者隔也隔与历音可以借用犹土之为事史记优孟传

滑稽必方言也否则古语也索隐之注曰滑乱也稽同也以便捷之人言非若是乱异同也崔浩因扬雄酒箴有鸱夷滑稽之语乃曰滑音骨稽流酒器也言出口而不已犹注之吐酒也姚察又曰滑稽四字稽音计也以言谐语滑利其智计此三说皆恐未然今人言滑落若欲解说亦可分析为训其实不然大抵非方言则古意也

司马子长作东方朔滑稽传所载事迹甚略比之汉史十失其九使东方只如子长所传则何以得名於百世若此哉岂刘向扬雄之论子长时皆未及见班固则有所依据矣

世说下卷任诞类中以左传哀公虞殡周勃吹箫乐丧证挽歌不始於田横其说是也

朱易言象於颐虎曰虞仲翔以坤艮为虎马融以兑为虎郭璞以兑艮为虎三者异位而同象坤为虎坤交乾也艮为虎寅位也天文尾为虎艮也兑为虎参伐之次也龙德所冲为虎亦兑也易之取象果如是乎独乐轩以理言象八卦之外不喜穿凿曰乾为马坤为牛而曰牝马地类此象解坤繇辞也论易象者当以天子为法荆公字说人皆以为穿凿溪西曰王氏不足为穿凿许慎说文识字而求义太多是可谓之穿凿半山未能分别文字何穿凿为某何以免此病某有三语尝书诸绅曰无义之理理之真有理之理理之失多义之理理之妄此见高矣哉东方朔传曰时方外事胡越内兴制度国家多事自公孙弘以下至司马迁皆奉使方外或为郡国守相至公卿而朔尝至大中大夫後常为郎与枚皋郭舍人俱在左右诙谐而已然司马子长未闻有出使方外及为守相之事不知何所据而云也

文选七发七啓七命曹子建张景阳末段归结只谀其时枚乘欲以至言妙道为断此见高於

张曹惜其所谓资略者见焉而未莹语焉而莫详悉未免识者所哂孔老贤观孟子筹之万不失一此等句谓之乱道亦可周益公青城奏劄云【臣】适蒙宣谕天道甚佳因奏自来赦文例是前期具草无由槩见感格今欲於其中增入四句具述晴霁庶几四方万里咸知陛下至诚动天之意恭奉圣训令添入谨録进呈如得允当乞令本院一面咨报中书门下省施行所有宣读致本即更不须改易伏乞睿照十一月十一日奉御宝批依据此则殿廷宣读本与播告四方本不同非阜陵圣明学士院亦不敢如此具奏今时则讥议随至矣

洪文安小隐集第四卷载辛次膺辞免新除御史中丞荅诏不允末云今後除常朝便殿引对外应行事陪位立班从驾及非泛朝谒等并许请假从驾预许请假前未有例此则孝宗优待之也

韩王信叛汉之後其子颇当归朝得封弓高侯而二孙韩嫣韩说皆入佞幸传比之邓通嫣又为太后所怒赐死岂其祖不忠之罪越四世而犹得此报乎

溪西先生郑渔仲千载豪杰之士也其文超絶自为调度有同叔友兄见宇文枢密二书其一曰厚生天地间藜藿二十有八年矣樵生二十有四年矣为儿时楚楚便有脱落流俗志闻君子长者风即规纓矩履不避风雨一求见马首而还视间阎轻薄子可蹴蹶数千百辈若躡秋毫好读古人书而性真率不求一二记忆惮作时下文章喜盘诘聱牙风雅古澹易春秋邃迈欲效之未能也家贫无文籍闻人家有书直造其门求读不问其容否读已则还去住曾不外情寒月一窗残灯一席诵读达旦而喉舌不疲劳才不读便觉舌本乾强或掩卷帷灯就席杜目而坐耳不属口不谓而心不适人或呼之再三莫觉春风二三月时兄弟二人手揭饭囊酒瓮贸贸深山中遇奇泉怪石茂林修竹凡可以可人意向者即释然坐卧一觴一咏累月忘归山林翳荟禽鸟不知人来争食挥之不退牧子樵夫抖擞相逢呼之不就坐即疑为神仙鬼物不敢问姓名睨睨而去或采杞拾橡浇花种药随鱼狎猎优游山谷间自得名教中乐地故夏不葛亦凉冬不裘亦温肠不饭亦饱头非累月不栉面目衣裘垢膩相重不洗而真粹之地油然礼义足兄弟亲戚乡党僚友谓为痴为愚为妄不相辈行也而土木形质又好冲介自守不广交游以求闻达用是见斥於世弥旷宇宙若无所容焉一见阁下便开怀许可推阶前盈尺之地与之扬眉吐气激昂青云且熟视详听了无难色承颜接辞稠欸移时布衣受知於此极矣傥犬马之骨不坠於地当効首领以报故不敢不尽其所能亦不敢不尽道其所不能也厚也樵也 崎历落可笑人也春言文赋体物浏亮笼天地於形内挫万物於笔端春云秋月无下手处疑不若屈宋贾马凭陵造化櫜括风云所得皆惊迈絶去翰墨蹊径语出山间笔归图障田夫女子讽道不容口疑不若鲍谢李杜回既倒之狂澜支已颓之岱岳澄世所不能澄裁世所不能裁千条析理一绪连天扞壁周孔俾申韩杨墨佛老重足而立疑不若孟荀杨韩天才英俊豪拔不羣朝野挹其风流人伦推其表烛落笔作文章言语妙天下干将镞难与争锋如日出水溶焜耀人耳目若不敢正视者疑不若王杨卢骆或掉三寸舌拚捋王公或清持高论收降物议如扣钟如悬河如玉屑如琴瑟听之纒纒令人忘勸疑不若苏张裴乐练达宏博攬摭古今出入羲黄驱驰绵邈如经笥如肉谱如五总龟如人物志如入宗庙中观礼乐器疑不若迂固歆向经纶韬略 峯理窟画地布棋岌不可犯如入武库中但见五兵纵横疑不若孙吴英卫乃若义分明於霜信行直於弦平生之言握手入地仅不舐毫髮厚也樵也?牧荀

息其人也利不可回威不可刳义存友道视死如归瑟然英魄与秋霜争严厚也樵也程婴杵臼其人也仗节奉辞有死无贰直挫虓虎而夺之气其英姿奋激动人毛髮厚也樵也毛遂藺相如其人也岩岩清峙壁立万仞精神动天威毅贯日义气凛凛迫人若有寒色厚也樵也荆轲聂政其人也孤城围急飞鸟不敢度独能身质鉄钺拯危亡於菹醢中壮图谅节颓嵩华不吾压使英荡之命不委於草莽厚也樵也解扬其人也铁肠石心铭忠勒孝身全君父含笑就刑生为万夫雄死为壮士规厚也樵也纪信其人也抱松筠之节岁寒不凋堂堂直道讐豺狼若象齿若犀角嶷然有不可夺气厚也樵也苏武其人也瞻干应辨隐有城府拳歔侯之旗斩郅支之首悬旌万里扬威昆西何其壮哉厚也樵也陈汤其人也生不封侯死不庙食非丈夫也勃勃雄飞气吞逆敌期以马革裹尸而後已厚也樵也马援其人也标格辽亮洒出物表台阁生风奸雄斂手砥 名节慨然有澄清天下志厚也樵也陈书其人也蹇裳赴义擲足轻生虽白刃礚胷而锋钜不顿呕肝?血呼号欲絶天地闻之无置顔处厚也樵也向雄其人也主忧臣辱主辱臣死笃存亡之义虽崎岖晋阳而端冕繾綣臣节愈恭义血点点馍糊御服诚疾风中劲草也厚也樵也嵇绍其人也张胆厉声羯酋褫色临刀锯鼎镬而顔色益壮吐志饮坟含糊不絶在今与古尽千一焉厚也樵也顔杲卿其人也一握义气剖奸剔邪而其?万丈使蜂毒狼威絶然疑沮而不得逞真可畏人也厚也樵也何蕃其人也拥疲卒婴孤墉抗方张不测之虏梗其喉牙掣其首尾生虽不能报君死当为鬼以疔贼眦裂血面叠尸遍地古之烈夫也厚也樵也张巡许远其人也此志不展则栖迟林野长啸泉石负耒而锄破北陇春烟扣角而歌残南山夜月一邱一壑一山一云便作了一生事下视势利而胷怀洒洒然者厚也樵也向子平寔孝威其人也然则厚也樵也何也沉寂人也仁勇人也古所谓能死义之士也谓人生天地间一死耳得功而死死无悔得名而死死无悔得义而死死无悔得知已而死死无悔死固非难恨未得死所耳今天子蒙尘苍生鼎沸典午兴亡卜在深源一人厚樵兄弟用提一死以售功售名售义售知己故比见阁下以求其所也王彦章曰人死留名豹死留皮史臣谓其於忠义盖天性也厚樵自卜其云为虽决絶中庸?墨非常人行检奈天性有不可矫激云其不知者谓为狂生其知者谓为义士知与不知等不知耳盖其醞藉在我舒卷惟时生平用心有独到处不敢於阁下讳也拥幼君临大节义形於色隐然社稷之臣霍光金日磾其师也兼资文武出入将相勲烈盖世为中兴功臣表寇恂邓禹其师也枕戈待旦志梟强敌飞英腾茂竞着鞭於中原刘琨祖逖其师也戮力奸回再造王室名垂竹帛功勒鼎彝郭子仪李光弼其师也其如毛穎未脱阮途尚穷使霜松雪桧杞质楠姿摧颓林薄泣露悲风蝼螳窘溜荆苇杂陰几殆於薪茺苏?者数矣傥一得题品於大匠手虽礪砢多节目施之大厦保有栋梁之用惟阁下亮之惟阁下矜之宇文名粹中复书有云二公之文上则驰骋前世根本仁义下则邃晓民情旁达吏治知彼知己料敌人之情伪则又若躬践敌庭之议殆所谓千万人之中无一者也所恨某罪戾放逐无能为二公轻重愿以自爱一言以谢来意夫士言信计行未有不由於知己者连城之璞三献而不售明月之珠一顾而按剑岂非轻以示人之所致哉愿二公三思愚言毋忽盖有勉其自韬晦之意又一书云厚樵生长山野幼不学犁鋤慨然有读书志胷中便以古人自期每於史册见一传而高风凛凛者必读之再三通即掩卷长思跻仰其为人拚搏气槩以从之游若骤若驰及之而後已故厚性清达而规模宏远慕王导之为人樵性豁荡而慷慨有节尚慕祖逖之为人今沧海横流处不安故终夜振衣达旦不寐跋涉山川蒙犯风雨仗天下安危大计以求见一时通人为人望所归而论之与其饥饿蓬蒿中老死而比屋不闻曷若推心授首於忠义之域俾天地日月所共知者阁下一时通人用不用为朝廷重轻实人

望所归也厚兄弟不自疑愚且贱?所着文凡三进阁下之门每进而貌愈怡言愈温情愈密进席促膝移晷而初情不吝且谓厚樵议论文章皆可人用经纶韬略缓急足倚正当求之古人近世未见其比者无何钩翰左授辞旨稠委间以自爱一言为诲虽父兄提耳谆谆其抚怜固不过是迺若器其朽陋而纳之前修轨躅则品题过情若怀千钧之璧弗克负荷者昔人有言曰人固不易知知人亦未易王济王湛同居三十年不啻若秦越人相视则知人岂其易哉阁下列筦枢庭为天子大臣厚樵风尘布衣不在天地一螻蛄数当代文伯阁下实司之厚樵未许藉衙官列阁下出入三朝为时元老厚樵黄髯经生耳且闽蜀相距仅弥万里远近之相悬贤不肖之相悬先进後学之相悬其间可置数百驿举烽燧传呼不相及者何以三见间而分不间毫髮盖磁石取铁以气相合固不期然而然者今既蝇吞蠡测不逃裁鉴当展尽底里以俟采芣厚逸迈而痴樵幽邃而愚厚痴絕樵愚絕厚於风格有领袖於人物有林藪厚见理如破竹迎刃而解初无留手樵见理如攻坚木终自劈析稍迟耳厚於文如狂澜怒涛袞袞不絕樵於文如悬崖絕壑向之瑟然寒人毛骨厚仰慕韩愈如不及樵下视李白犹常人厚下笔如迅马历陇坂终日驰骋而足不顿且无蹶失樵下笔如大匠抡材肚中暗有?墨每作文文成自不晓其义必求厚为之解说然後胷中了然者厚常曰我弟文章合有神物不然何得乃尔厚失之易得樵而後峻樵失之纷得厚而後理厚得樵而城壁固樵得厚而朱紫分厚真粹之地可容千百輩而峰岨孤峭樵自出厚之右厚应辨多方略樵迟钝有隐思厚临仓卒若素成綽有余晷樵临仓卒若暴疾沉昏徐而图之了无一尘相累使厚司台谏则世无豺虎迹使樵直史苑则地下无冤人智解交锋气挫虓虎使於四方不辱君命则厚优於樵正固干事不避暮夜能辛苦其身为纪纲先樵亦优於厚当官正色不畏强御则厚优於樵小心事君縉縉朝夕樵亦优於厚至当庙堂拥幼临大节而不可夺厚能之樵亦能之斟酌治体如扁鹊治疾尽见五脏揲中短长不出此尔推短论长於阁下有望焉古者将门必有将相门必有相故萧何之於韩信羊祜之於杜预王导之於纪瞻李绩之於戴胄皆相首尾以成功名厚樵生平用心於古人阁下亦以古人许可幸而犬马之齿未及桑榆正当戮力周旋阁下着一鞭於中原使白骨寒灰复然若反掌尔惟阁下置胷臆而终始之公妙年笔端如此宜宇文之所敬也然集本少传莆人犹有不及见者録此二篇与溪干诸同舍共之

中兴以来诗之大家数惟放翁为最集中篇篇俱好其间约对诸史诸书搜索殆尽後村已尝言之余尝於其七言律诗中得其警联有天矫不穷之妙者摘録而咏之虽後村亦有品题未尽今録於此自咏云钟鼎山林俱不遂声名官职两无多简章德茂云造物无情吾輩老古人不死是心传即事云醉来身外穷通小老去人间毁誉轻感秋云万事从初聊复尔百年强半欲何之得京书云百年未必如炊久万事真须作梦看萧山云功名姑付未来劫诗酒何孤见在身感秋云世味扫除和蜡尽生涯零落并锥空幽居云衰极睡魔殊有力愁多酒圣欲无功病起云志士凄凉闲处老名花零落雨中看早春池上云一官空作读书崇五斗不供沽酒资述怀云大鹏境界?尘里旷劫年光掣电中乞祠久未报云得闲要及身安日到死应无睡足时及感愤云出处有心终有愧圣贤无命亦无成蜗庐云为生草草僧行脚到处悠悠客泛槎自笑云老气醉中犹跌宕闲身梦里亦消摇幽居三首云流年不贷人皆老造物无私我自穷又云交朋散落欢娱少忧患侵袭志气衰览镜云三万里天供醉眼二千年事入愁歌寓叹云幻世界中均起灭太虚空里孰冤亲闭户云安乐本因无事得功名常忌有心求沽壑西酒小酌云从旷劫来俱有死出青天外始无愁醉後庄门望西南诸山云百年只是梦长短一醉且随

家有无早秋云谋身自拙穷无鬼闭户长闲睡有魔秋思云未死皆为闲日月无求尽有醉工夫老学庵云名誉不如心自肯文辞终与道相妨夜坐云风宁可系功名误日不能黏岁月迁作梦云骠骑向来求作佛淮南末路望登僊世间妄想何穷尽输与山翁一醉眠读书云饱识二三千岁事已为七十四年人朝饥示子聿云外物不移方是学俗人犹爱未为诗示友云尚嘲孟顗迟成佛那计辛毗不作公昨非云老狐五百生前错孤鹤三千岁後归读史云功名多向穷中立祸患常从巧处生枕上云月色横分窻一半秋声正在树中间明日复理梦中意作云客从谢事归时散诗到无人爱处工寓叹云潜消暗换人谁在小醉闲眠我自奇初夏闲居云功名会上元须福生死津头正要顽对酒云荣枯一枕春来梦聚散千山雨後云溪上看云舒卷了穷达见月亏盈知死生山房云身游与世相忘地诗到令人不爱时闲中偶咏云不识狐书那是博尚分鹤料敢言高初夏杂兴云百年等是一枯塚四海应无两放翁对酒作云饮酒豪如卷白波遣愁难似塞黄河多闻只解为身累後死空令见事多酒後快意步至湖塘云古人亦自逢时少吾辈何疑忤俗多书叹云穷居自是长年术魔境常为定力资新堤行饭云诗酒消磨无事日功名分付未来身悲秋云四海一身常落魄十年万事苦差池舟中戲书云英雄到底是痴絶富贵但能妨醉眠夏日云三千界内人人错七十年来念念非村居云造物与闲仍与健乡人知老不知年家风云四海交情残梦里一生心事断编中

溪西笔力甚高其作夹漈听泉记曰去溪西遗民夹漈草堂之枕六七步许有前日不闻夜闻深夜犹闻夜之闻也作不闻静闻静之闻也有适莫不闻无适莫闻故觉莫不闻而梦或闻觉与之情其声之形梦与之然其声之天此数语可谓奇絶又言觉与之情其声之形则曰经於怪石之嶮阻龟者盂者齿者咽者室者堵者级者箔者复於老树根之为龙为蛇为人为禽为蓄为指为股为矛为?为飞翔跣足之势者故能去而复来下而复上没於此而出於彼盘而吸晕而洒明珠靡靡玉柱珊珊千态万状无所不有其或滞於轻沙落叶乍停乍决或冒於红蓼芳荇一俯一仰虽长松萧骚风雨啾嘈落叶析戍空谷噫鸣莫得而浑互也亦极其模写之妙可与子厚游山水记并观

竹溪鬳斋十一藁续集卷二十九

卷三十

钦定四库全书

竹溪鬳斋十一藁续集卷三十

宋 林希逸 撰

学记

陆象山为王荆公祠堂记意以孔孟而下斯道之微陵夷数千载公能卓然有见於斯义而前修讥议之者皆未公也其首日裕陵初得公问唐太宗何如主公对曰陛下每事当以尧舜为法太宗所知不远所为未尽合法度裕陵曰卿可为责难於君然朕自视欲然恐无以副此意卿宜悉意辅朕庶同济此道自是君臣议论未尝不以尧舜相期及委之以政则曰有以助朕勿惜尽言又曰须督责朕使大有为又曰天生峻明之才可以覆庇生民义当与之戮力若虚损岁月是自弃也秦汉以下南面之君亦尝有知斯义者乎後之好议论者之闻斯言也亦尝隐之於心以揆斯志乎曾鲁公曰圣知如此安石杀身以报亦其宜也公曰君臣相与各欲致其义耳为君则自欲尽君道为臣则自欲尽臣道非相为赐也秦汉而下当涂之士亦尝有知义者矣後之好议论者之闻斯言也亦尝隐之於心以揆斯志乎惜哉公之学不足以遂斯志而卒以负斯志不足以究斯义而卒以蔽斯义也昭陵之日使还献书指陈时事剖析弊端枝叶扶疎往往切当然核其纲领则曰当今之法度不合乎先王之法度公之不能究斯义而卒以自蔽者固见於此矣其告裕陵盖无异旨勉其君以法尧舜是也而谓每事当以为法此岂足以法尧舜者乎谓太宗不足法可也而谓其所为未尽合法度此岂足以度越太宗者乎又曰典礼爵刑莫非天理洪范九畴帝实锡之古所谓宪章法度典则者皆此理也公之所谓法度者岂其然乎献纳未几裕陵出谏慌疎与公评之至简易之说曰今未可为简易修立法度乃所以为简易也熙宁之政病於是矣释此弗论尚何以费辞於其建置之末哉又曰大学不传古道榛塞其来已久随世而就功名者渊源又类出於老氏世之君子天常之厚师尊裁籍以辅其质者行於天下随其分量有所补益然而不究其义不能大有所为其於当世之弊有不能正则依违其间稍加润饰以幸无祸公方耻斯世不为唐虞其肯安於是乎蔽於其末而不究其义世之君子未尝不与公同而犯害则异者彼依违其间而公取必焉故也熙寧排公者大抵极诋訾之言而不折之以至理平者未一二而激者居八九上不足以取信於裕陵下不足以解公之蔽反以固其意成其事新法之罪诸君子固分之矣此本朝一大公案也象山之言有關於学问未知晦翁东莱曾见此记否其文甚富摘其大旨如此留俟来者商确之

正字方先生讳翥字次云老艾之友也真千载豪杰之士其诗雄放如太白法度如子美向有集本今其家微甚此本不存莆人无有记其一联者独後村时相与讽咏之今取古律絕句録而传之庶使同志友朋知有前辈风度

羽仪洁白如自修风雨晦冥那失晓沙头鸥鸟不驯熟雪里鹭丝太孤皎山寒夜半落叶深闭

门垂黄耒重衾闻鸡而起竟何事我老看书不入心久无鬪志形如木世上痴儿能舍肉白鸡之肉不可食无劳断尾亦为福山僧穷独老无妻想见爱养如婴儿得地羽毛愈应好天年全得山中老【家有白鸡蓄之三年矣驯熟可爱谦之读书山中一日相过偶道庵僧所阙遂送谦之以遗之】

吟诗夜半霜月白胡床梦作乘槎客醉中入月捉玉兔手撼桂枝鸣策策风吹天河银浪高月边星宿相周遭五色机头索云锦天孙一笑颜如桃天河下接武陵溪重覓仙源路却迷五更波上回烟棹半空飞雨落凄凄羽衣稚子双瞳方伴我清江老严光落日还收钓筒去芦风起处暮天长【次韵时瑞见寄】

云昏雨暗黄芦渚沙碛风高人断渡一叶扁舟忽下来落日还收钓筒去收尽沙头白鸟飞芜葭暮雪满蓑衣千门万户拥被卧独钓寒波人未归【跋渔村晚景潇湘夜雨图】去年雪暗江南路日暮踟蹰无宿处今年坐见故园春梅花已过桃花新东臯薄田才数亩依方旋造逖巡酒嗣宗痛饮是吾师万事否臧勿挂口循环三百真超忽谁向空蒙问巢窟愚痴聪慧一冥冥不如且进杯中物【除夜寄谦之】

生犀百万环帐立漏声未残楚声急拔山男子心转柔夜倚芙蓉秋露泣帐中别酒苦如荼不是婵娟害霸图鄴人愤死愁云气吕氏田头见老夫汉宫三万六千日得意蛾眉亦陈迹至今一曲唱虞姬恨草摇摇向春碧【虞美人】

策筇山下路未省尽幽寻回首见桑柘始知墟落深【与郑国叔司法山行】

暗雨落漫漫山中五月寒大江浑不觉溪壑有惊湍【无题】树连平野濶深夜易高风星月迷蒙外乾坤鼓荡中山窗寒未白宿炭晓能红抱被论诗句长长与子同【再过几先侄斋中】

又见增年齿谋身事事非时难逢岁飮日暖换春衣新莽奸犹在怀王殡未归中原久离絶感节泪频挥【元日】山寒一杯酒岁晚两穷人【和郑处易溪边赠别】

可惜听泉夜还当残月时【游石泉】

昼出阳关已断肠那堪真别更凄凉痴人刻水方求剑一息舟行过夜郎【读易】

荡荡春风野老家欲寻踪迹隔烟霞洞中携出小桃核种作碧云千树花【乾】

雨过前村湖水平鱼头戢戢逐波生隣家篮里收鸡子昨夜分明报五更【元】

洛邑舟中万里均舟车白浪与红尘微掀衣角凉生面不是清风动白苹【亨】

江上柴门照夕阳牧童蓑笠下牛羊明朝依旧山前路溪北溪南花草香【利】

牛背稳如千斛舟斜烟细雨任遨游春风草绿江南岸祇见轻寒不见牛【贞】

邓侯牵挽政难留六十年来亦倦游至竟眼高无俗韵不因人唤始回头【次韵郑汉仲讲书】

茅檐寂寞住人稀落日逢迎宿酒旗梦觉五更山月上溪边人语钓船移【宿钓溪】

老僧方丈倚云岩窘束公私百不堪虽有此泉无此耳留君旬日驻征骖【过华严谒陈季若同年】

星光如月映长空惊起愁眠夜向中残暑不妨欺枕簟隔窗鸣叶是西风【立秋】

无端正踏江南路暮雪萧骚满客衣

隔屋青灯一点明卧听檐雨落三更无因作得还乡梦门外儿童爆竹声【癸酉冬赴部除夜宿信州客舍】

来时雪片杨花落今见杨花作雪飞独立暮江心似醉羡他一叶钓船归【临安江上】

大江东接海漫漫海气江风吹雨寒才出国门三十里便成回首望长安【离武林】

且柅流沙青犊车葱葱佳气满城闾白头不解家人语狂学司空城旦书【读老子】

儿女欢喜罗酒浆夜深笑语火炉傍如何去岁听风雪身在江南梦故乡【甲戌除夕】

淡荡光风寻户牖迷蒙宿雾净园林春深燕子来无数雨後桃花落不禁【病起】

宿命须同一洞天相逢孰处故依然不知堕落青衫底何日尘泥是了缘【送虞仲房监仓归临安】

上书北阙妨何事笑杀孤寒孟浩然【同前】

天寒古寺往来希门掩柴炉昼共围细雨无声潜自落开帘时复见霏霏

阵阵山风遶雨来夜深飘损满庭梅未应一等成摇落知有人家花未开【宿尊胜庵二首呈谦之】

断崖日夕自撞春未近先看气象雄万壑不停雷隐隐一川长觉雨蒙蒙【百丈漈】

学得天文夜睡迟云笼月照恨星稀而今病眼都无力犹向檐边认紫微【紫微】

远山马首尚相随近岸迎人势却回鸛鹄食残松子落虹霓饮过水声来【再至北乡干归路中作】

鸡犬还家自识村重营生理长儿孙时平战地逢华屋岁久他乡是故园别後尘埃如我老归来耆旧几人存鴈行畴昔从游者莫话凋零恐断魂【谓柔立兄】

出户春光刮眼明远云迟日庆初晴偶来傍树寻梅子时听新蝉叶底声【出户】

江山入眼昔无殊只有人事堪嗟歔权门杂沓行苞苴屠儿贩客纡青朱梵仪膜拜参浮屠痴儿娇子不识书淫坊博塞为欢娱金章下堂揖老胥老胥分庭抗士儒身裹道衣臂佛珠岁时入谒何易于羊肩斗酒清而腴酬酢偃蹇以字呼官家赤子元何辜一毫枉直凭青蚨十八年前此事无作诗一笑君应呼【此诗无题末段数语如此必当时有所愤激而作今世亦然】

文字以浑正为本如范文正严子陵祠堂记濂溪爱莲说伊川易传叙李泰伯袁州州学记此固不可揜者穆伯长尹师鲁以古文为倡在欧曾苏王之先严洁雅正而後人不甚传诵者岂非精神风采有未备乎二公专慕韩柳终未及之

荀子富国篇云墨子之言昭昭然为天下忧不足夫不足非天下之公患也特墨子之私忧过计也今是土之生五谷也人善治之则亩数盆一岁而再获【获读获】之然後爪桃枣李一本数以盆鼓【量也记曰献米者操量鼓】然後葷菜百蔬以泽量然後六畜禽兽一切而剗车鼃鼃鱼鳖鰭鱸以时别一而成羣然後飞鸟鳬鴈若烟海然後昆虫万物生间【生其间也】可以相食养者不可胜数也夫天地之生万物也固有余足以食人矣麻葛茧丝鸟兽之羽毛也固有余足以衣人矣夫有余不足非天下之患也特墨子之私忧过计也此段之文可谓奇絕

溪西上皇帝书曰臣本山林之人入山之初结茆之日其心苦矣其志远矣欲读古今之书欲通百家之学欲讨六艺之文而为羽翼如此一生则无遗恨忽忽三十年不与人问流通事所以古今之书稍经耳目百家之学粗识门庭惟着述之功百不偿一不图晚景获见太平虽松筠之节不改岁寒而葵藿之心难忘日下共惟皇帝陛下诚格上下孝通神明以天纵之圣以日新之德君臣道合一言而致中兴自书契以来未之闻也臣窃见兵火之余文物无几陛下留心圣学笃意斯文擢用儒臣典司东观臣伏覩秘书省岁岁求书之勤臣虽在草莱亦欲及兹时効尺寸顾臣究心於此殆有年矣今天下图书若有若无在朝在野臣虽不一一见之而皆知其名数所在独恨无力抄致姑能纪记之耳谨搜尽东南之遗书古今之图谱以及上代之鼎彝与四海之铭碣遗编缺简各有彝伦天篆梵书亦为厘正於是提四百卷自作之书徒步二千里来趋阙下欲以?尘而裨嵩华欲以涓流而益沧海者也念臣穷困之极而寸陰未尝

虚度风晨雪夜执笔不休厨无烟火而诵声不絕积日积月一簣不亏十年为经旨之学以其所得者作书考作书辨讹作诗传作诗辨妄作春秋考作诸经序作刊繆正俗跋三年为礼乐之学以其所得者作谥法作运祀议作乡饮礼作乡饮驳议作系声乐府三年为文字之学以其所得者作象类书作字始连环作续汗简作石鼓文作梵书论作分音之韵五六年为天文地理之学为鱼虫草木之学为方书之学以天文地理之所得者作春秋地名作百川源委图作春秋列国图作分野纪作大象畧以虫鱼草木之所得者作尔雅志作诗名物志作本草成书作本草外类以方书之所得者作鹤顶方作食监作采治録作畏恶録八九年为讨论之学为图谱之学为亡书之学以讨论之所得者作羣书会纪作校讎备论作目书正讹以图谱之所得者作图书志作图谱有无记作氏族源以亡书之所得者作求书阙记作求书外记作集古系时録作集古系地録此皆已成之书也其未成之书在礼乐则有器服图在文字则有字书有音读之书在天文则有天文志在地理则有郡县迁革志在鱼虫草木则有动植志在图谱则有氏族志在亡书则有亡书备载三二年间可以就绪如词章之文论说之集虽多不得而与焉奈秋先蒲柳景逼桑榆兄弟沦亡子姓亦殇惟余老身形影相吊若一旦倏先朝露则此书与此身并填沟壑不惟有负於平生亦有负於圣时谨缮写十八部百四十卷恭诣检院投进其余卷帙稍多恐劳圣览万一臣之书有可采望赐睿旨许臣料理余书续当上进微臣遭遇文明之世宁无奋发之情使臣得展尽底蘊然後鹤归蕙帐狐止首丘庶几履陛下之地食陛下之粟不辜陛下之一民也公之诸书今散失已尽余仅得十一二种观此可以见其所着书是亦天地间一奇事也溪西云重莫重於二典舜典至姚兴时始出凡江左诸儒不得覩其书焉古莫古於三坟五典八索九邱三坟至近代始出於民间凡往代诸儒并不得覩其文焉如我之怀矣自貽伊阻今诗雄雉之言也而晋时为逸诗戒之用休董之用威俾勿坏今书大禹谟之言也而晋时为逸书似此类极多应知古书前代不得而有反出於後世甚多以晋志较汉志凡汉以前之书汉志不得而有反出於隋志者多矣以国家崇文总目史馆书目较之民间之藏凡奇图异书民间所有而国家所无者亦多民间如吴氏西斋书目【一卷唐人吴竞家藏】新集书目【一卷唐人蒋或家藏已上二目并见崇文总目第二十二卷】荆州田家书目【六卷兴化方郎中陈运使家有之】古今书目【四十卷】沈氏墨野堂书目【二卷】祁氏藏书目【二卷】梁山书堂目錄【四卷已上兴化方家有之】沈谏议书目【三卷】李正议书目【三卷】羣金堂书目【三卷已上漳浦吴家有之】六一居士目錄【福州余氏有之】万卷楼书目【三卷】望壶书目【三卷已上兴化二方家藏】此皆官所无民间所有也

溪西有诗云昨夜西风到汉军塞鸿不敢传殷懃几山衰草连天见何处悲笳异地闻犬马有心虽许国草茅无路可酬君微臣一缕申胥泪不落秦庭落暮云其题曰建炎初秋不得北狩消息作公时为士人而忠愤如此後来虞丞相以此诗荐公遂召对

溪西曰字有大小只有二体故许慎之书凡万字无一有三从者如森字淼字似有三从然森乃从木从林淼乃从水从淼如此二字既不得为三从则他可知矣王氏未能如此所以可笑如同字从 【莫保切】从口王氏则曰从 从二从口衆字从目从𠂔王氏则曰从目从三人甚者如冬字从𠂔从、【音冰】王氏则曰从八从勺从重入以冰为重入尚可论字乎

溪西曰说字要如画卦爻为三阳为乾三陰为坤以坤承乾为否以乾承坤为泰以乾坤相错为未济以坤乾相错为既济由是转错相承则六十四卦可成矣若陰阳各一爻不能生息安得成三爻而为乾坤若皆着在一处不能转动则安能变移而成六十四卦某之说字亦如此使字不丽乎纸而能使之横斜曲折反转走动如陰阳家拨沙经然今以一之文论之

起於一从一为丨【音袞】而委蛇为人【音猷】斜一为丿【房必切】反丿为ㄣ【音拂】曲一为乚【音罕】反乚为𠃊【音及】转𠃊为乚【音隐】反乚为乚【音厥】侈为𠃊【音乙】曲乙两端为冂【音冪】转冂为凵【口犯切】侧凵为匚【音方】反匚为凵【音播】陪冂为几【音凡】引一而勾之为𠃊【音私】转𠃊为𠃊【音了】引一而绕合之正圆为○【音星】微方为?【音围】○○以反转无异势自一至圆起机之义备矣丨【音社】与一并生一变至围九十八文又合二体而变之叠为二并为𠃊【音浚】互为义【音五】串为十向为八合为入之类积而起之生生成文至於无穷丨与一并生而丨独孤者盖卜不可引不可屈曲故孤溪西之意以文自一起凡十八变成十八文亦犹易之十有八变也

刘向作列女传其言某人作诗者十与序同者二载驰许穆夫人也渭阳秦康公也其小异者二行露无指名而有申女许嫁於酆迎不以礼之说汝坟但言行役而有周南大夫受命平水土之说此犹可也乃若大乖异者则有六焉柏舟仁人不遇也而向以为卫宣夫人所作芣苢妇人乐有子也而向以为宋女之夫有恶疾誓不改志而其母作之燕燕送归妾也而向以为慈姑之定姜送其亡子之妇硕人美庄姜也而向以为庄姜有冶容淫心傅姆作此以防未然式微则曰傅姆与夫人更相问答大车则曰息国夫人有生离地上岂若死并地下之言此其说与序犹冰炭黑白也至於二子乘舟虽以为汲壽而又不言作诗之由然则三百篇之诗虽火於秦出於汉而诸儒传之其说各有互异使小序果出於子夏自孔门而下果有之则向在卫宏之前号为博极羣书不应未之见而又为异论也况卫宏之学出於毛公毛公在西都已为河间献王博士其诗必有传者何为向亦见之由此而言则此序非惟不出於子夏亦未必出於毛公今人但知有卫宏之序不复考之诸书故信之而不疑非溪西艾轩二先生未有具此眼者也

行露之诗列女传以为申女许嫁於酆酆人迎之不以礼誓不肯行故作此据向此言召南有申国又有酆国一国之外其为国必多以申酆之见於所传而推其所不及传者则知二南之诗诸国之诗也皆以为为文王而作可乎

赵次公注杜诗用工极深其自序云余喜本朝孙觉莘老之说谓杜子美诗无两字无来处又王直方立之之说谓不行一万里不读万卷书不可看老杜诗因留功十年注此诗稍尽其诗乃知非特两字如此耳往往一字紧切必有来处皆从万卷中来至其思致之妙体格之多非唯一时人所不能及而古人亦有未到焉者若论其所谓来处则句中有字有语有势有事凡四种两字而下为三字而上为语拟似依倚为势事则或专用或借用或直用或翻用或用其意不在字语中於专用之外又有展用有倒用有抽摘参合而用则李善所谓文虽出彼而意殊不以文害也又至用方言之稳熟用当日之事实者又有用事之祖有用事之孙何谓祖其

始出者是也何谓孙虽事有祖出而後人有先拈用或用之别有所主而变化不同即为孙矣杜公诗句皆有焉世之注解者谬引旁似遗落佳处固多矣至於只见後人重用重说处而不知本始是谓无祖其所经後人先捻用并已变化而但引祖出是谓不知未舍祖而取孙又至於字语明熟混成如自己出则杜公所谓水中着盐不饮不知者盖言非读书之多不能知觉尤世之注解者弗悟也次公所注杜公诗误者正之遗者补之且原其弟因明其旨趣与夫表出其新意未见则阙之以俟博闻疑则论而弗泥以俟明识其间所言来处有四种与夫专用借用直用翻用或用其意而不在字语专用之外又有展用倒用拈摘参合而用凡八个用字观此知公之用心苦矣惜此板在蜀兵火之後今亡矣予尝及见於杜丞相子大理正家京中书肆已无有前两行有男虎録者是

西轩陈先生已有诸赋见有前集今又得其赞铭数首如六牛铭其一纯白曰天命之谓性率性之谓道无惻隐之心非人也无羞恶之心非人也故曰人无有不善水无有不下其二半黑前着草数丛曰赤子之心其发未远据操舍而言则得失岂但相半其三纯黑一童子向後牵之曰牛山之木斧斤濯濯人见其濯濯也以为未尝有材此岂山之性也哉其四回头前半白曰富岁子弟多赖凶岁子弟多暴子弟未变於初耳是以圣人善其改过其五露地纯白曰白雪之白白玉亦尔惟人与牛稟受则异其六纯白水边啮草田间有获者有收遗秉者曰天位乎上地位乎下由尽己之性至於尽人尽物之性则能参天地之化又有王审权昆斋铭曰白白黑黑人弗汝亲以黑为白不可语人孰知其白而守其黑鸟巢於丛人寄於公有友有朋有兵有戎市井同文安危同仁三禽一角是谓玄德学古斋曰於何疑於稽古於何畔道於征利於何相畏於朋友竹庵赞曰不汲富贵似介不矜才知似怠不畏强御似骄不容俗子似隘谷堂赞曰谷堂峩峩丛林望之如备头陲至若惊世鼓索琵琶夫子能之而能不为者邪调度皆不凡爱翫不可夫惜其集不传遂録於此前六半记向在番阳得之一友以为监簿郑谷叔所作误也

洪野处作夷坚壬志序记王质景文之作曰志怪之书甚夥至鄱阳夷坚之志出则尽超之矣予平生所嗜畧类洪公始读左传史记汉书稍得其记事之法而无所施因志怪发之又曰世以徐铉好志怪而今存者多其客蒯生欺之岂可以蒯生尽待天下之士盖有之矣亦在夫决择之者审也传闻云者置之而余所自遇者小孤梦神君瞿唐峡梦公孙子阳云安梦张益德甚白寤寐云者亦置之而余所亲覩者王渊亭见龙彭泽舟中见蛤蜊菩萨像永兴道中见道人嚼草成蜡甚着则致诸人者胡可以弗信也景文之书谓之夷坚别志笔力如此信不减洪公宜乎公得之而喜也洪公记此时景文已没臭味之相契亦如欧公之得廖生矣

春秋用周正始於左氏先师乐轩尝云古人作长历自晋以来推算閏余皆与诸历合不知何处过了此两月止斋又有夏时冠周月之说尤为鶻突不知周以建子为正即周礼所谓正岁也十有一月初未尝改即尚书太甲元祀十有二月之文可证正月始和则建寅月也正岁者以十一月为岁首也商亦然汉初仍秦以十月为岁首此尤明白先师三传正已言之特人未见尔东坡诗有甚奇者如无锡道中水车翻翻联联衔尾鸦莘莘确确蛻骨蛇分畦翠浪走云阵刺水緑鍼抽稻牙洞庭五月欲飞砍翬鸣窟中如打衙天公不见老翁泣唤取阿香推雷车此篇笔法岂可及而前此未有人拈出者

东坡之文人皆知敬之而公之诗犹有妙处尤长於叙事即其文法也且如黄鹤楼诗叙其旧闻曰黄鹤楼前月满川抱关老卒饥不眠夜闻三人笑语言羽衣着屐响空山非鬼非人意其仙石扉三扣声清圆洞中铿鉦落门关缥缈入石如飞烟鸡鸣月落风驭还迎拜稽首愿执鞭汝非其人骨腥膻黄金乞得重莫肩持归包裹弊席氍夜穿茆屋光射天里间来观已变迁似石非石鉦非鉦或取而有衆忿喧讼归有司今年无功暴得喜欲颠神人戲汝真可怜愿君为考然不然此语可信冯公传此事见於章炳文搜神秘览终篇叙述无一长语况李公择以此楼求诗公不咏楼独以冯京当世所传者作一篇如此其调度自是英杰岂他人所及哉东坡书焦山论长老壁云法师住焦山而实未尝住我来辄问师法师了无语法师非无语不知所荅故君看头与足本是安冠屨譬如长鬣人不以长为苦一旦或人问每睡安所措归来被上下一夜着无处展转遂达晨意欲尽镊去此言虽鄙浅故自有深趣持此问法师法师一笑许此说人皆知之等闲拈出作此偈语多少奇特此是坡仙游戲三昧试为拈出

竹溪鬳斋十一藁续集卷三十